

KAGIGE  
DEBWEWINAN,

KAGINIG GE-TAKWENDANG

KATOLIK ENAMIAD.



CINCINNATI, 1855.

---

Joseph A. Hemann o gi-masinakisan mandan  
masinaigan.





FREDERIC BARAGA,

Kitchi-mekatewikwanaie.



*Ninidjaniss waiabandaman ow masinai-gan.*

*Kitchi batainowag jaigwa anishinabeg nessitawinangig masinaigan, kitchi pangwagadon dash masinaiganan ge-wabandamouad; mi dash ow bejig masinaigan minawa ga-ondzi-ojitoiān. Weweni, ninidjaniss, wabandan. Kitchi onijishin kakina iw gagikwewin ge-wubandaman mandan masinaiganing. Kego dash iw ijiwebisiken, tchi wabandaman eta, tchi agindaman; bekish sa dodan eji-gagikimi-goian oma. Kawin dash awiia o da-gash-kitossin gego tchi mino dodang, win igo*

*ejiwebisid; mi dash enamiad mojag ge-on-dji-pago-sse-nimad Kije-Maniton tchi wi-dokagod, tchi minigod sa mino inenda-mowin, mino ijiwebisiwin gaie. Mi dash iw, ninidjaniss, ga-on-dji-ijitchigeiān, anamiewin aiapi gi-atoiān oma masinaig-aning. Weweni dash ikiton iniw anamiewinan; kego kidoning eta, kideing sa gaie ikiton. Mashkawendan tchi mino inabadjitoian kakina gagikwewin, minik ge-wabandaman mandan masinaiganing.*

## *1. Wegonen wendji-aiaian aking?*

SASAGWANA gagwedjindison, nini-  
djaniiss : "Wegonen wendji-aiaiàn oma  
aking"? Ow dash inendan : Kawin nind  
ondji-aiassi aking, tchi kitchitwawisiìàn,  
tchi mino aiaiàn, tchi kitchi-daniiàn gaie.  
Kitchitwawisiwin, mino aiawin, kitchi-daniiwin,  
anotch gaie minawanigosiwin kawin  
apitendagwassinton tchi missawendamàn ;  
kawin geget nin da-ondji-jawendagosissi,  
missawa kitchitwawisiìàn, kitchi-daniiàn  
gaie. Bakan gego nin gi-ondji-pagidinig  
oma aking Debeniminang Kije-Manito. Mi  
sa ga-ondji-mijid bimadisiwin Debendjiged,  
tchi kitchitwawenimag, tchi sagiag, tchi  
anokitawag gaie oma aking wenibik, wedi  
dash gjigong tchi wabamag, tchi widabimag  
gaie kagigekamig ; mi iw eta ga-ondji-pa-  
gidinid aking. Mi dash iw ge-dodamamban  
megwa bimadisiìàn ; kishpin bakan ijibisiìàn,  
kawin nin de-apitendagosissi tchi  
bimadisiìàn.

Kishpin Kije-Maniton ondji-bimadisissig anishinabe aking , awashime da-onijishin tchi aiassig, gonima gaie tchi apitchi ishkwa-aiad, tibishko ga-ijiwebisid bwa anishinabewid.

Kakina minik endagog aking, mi wendji-aiamagak, anishinabe tchi inabadjitol ; win ondji aihamagad kakina gego. Win dash anishinabe Kije-Maniton ondji aia, kawin bakan gego ondji aiassi aking. Geget Debenniminang Kije-Manito o kitchi sagian, o kitchitwaweniman gaie anishinaben. Jawendagos anishinabe weweni nissitotang wendji-aiad aking, weweni gaie inabadjitol eji-jawenimigod Kije-Maniton. Kitchi kitimagendagosi dash , kishpin bakan gego oma aking endagog awashime apitendang, iw dash tchi anokitowad Kije-Maniton Debendjigenidjin. Gi-ikito sa Jesus : Kishpin maniwid mitig, gonima mishiminatig, kawin migiwessig mishiminan, ta-kishkigawa, ishkoteng dash ta-apagina, kawin sa ningot inabadisissi, anisha patakiso akikang. Mi tibishko gaie anishinabe bemadisid aking, kishpin sagiassig, anokitawassig gaie Kije-Maniton, geget anisha aia aking, ta-danakiso dash kagige ishkoteng gi-ishkwa-aiad egidakamig.

Mi dash iw ge-dodaman, ninidjaniss. Weweni kitchitwewenim Kije-Manito Debeniminang, weweni anokitaw, enigokode-eian gaie sagi oma aking wenibik, kagige-kamig dash wedi gijigong ki ga-kitchitwa-wenima, ki ga-sagia gaie, kagine minawani-gosiwining.

Oma aking endagog kego osam misswendangen, kego gaie osam sagitoken. Kishpin gego pagossenimad Kije-Manito, mojag inendan tchi mino inabadjitoian; kishpin dash gego minigoian, geget mino inabadjiton, ejii-minwendang Debendjiged. Memindage dash pagossenim mojag tchi minik o jawendjigewin, gawaiako-bimadisi-win, mino ijiwebisiwin gaie, weweni tchi gashkitoian tchi kitchitwawenimad ged-akobimadisiian. Bekish gaie wikwatchiton tchi gashkiad awiia, gaie win Kije-Maniton tchi sagiad, tchi anokitawad gaie. Kishpin onidjanissiian, weweni kikinoamaw kinidjanissag tchi sagiawad Kije-Maniton. Ki da-kitchi-mino-dodam gaie tchi ganonad awiia tchi gagansomad gaie, Kije-Maniton tchi anokitawad gaie win, tchi kitchiwawenimad gaie. Debeniminang Kije-Manito eta apitendagosi tchi apitchi sagiind, tchi apitchi kitchitwawinind, apine gaie tchi

anokitawind. Jawendagosi geget enokitawad Kije-Maniton. Missawa pang<sup>i</sup> gego eta dodang Kije-Maniton ondji, awashime jawendagosi, awashime gaie nibiwa o gashkiton, aw dash geshkiad nibiwa joniian, geshkitod gaie anotch gego aking endagog. Kawin geget oma aking pabige o wabandansin eji-jawendagosid, aw enokitawad Kije-Maniton, ningoting dash kakina mija-sha o ga-wabandan; o ga-kikendan dash gaie iwapi eji kitchi kitimagisid saiagiassig Kije-Maniton, anokitawassig gaie.

**GIJENDAMOWINAN.**

1. Kije-Manito nin gi-minig bimadisiwin oma aking, tchi kitchitwawenimag, tchi sagiag, weweni gaie tchi anokitawag; mi dash iw wendji-gijendamān, mojag tchi ijiwebisiiān eji-nandawenimid Kije-Manito, weweni gaie mojag tchi anokitawag.

2. Nin gjijendam gaie apine tchi takwenimag Kije-Manito; kawin wika nin wi-wanenimassi. Anokiiān; kema gaie bisan aiaiān, nin wi-mikwenima; namadabiiān, kema gaie bimosseiān, nin wi-mikwenima; beka nanagatawendamān, kema gaie gigitoiān, mojag nin wi-mikwenima; kotagito-

iān, kema gaie mino aiaiān, apine nin wi-mikwenima, kawin wika nin wi-wanenimassi. Kakina dash minik ged-ijitchigeiān, weweni nia wi-ijitchige, tchi kitchitwawinind Debeniminang Kije-Manito, weweni gaie tchi anokitawind.

3. Apitchi dash nin gjendam, wika tchi matchi dodansiwān ; apegish Kije-Manito mashkawendamiid. Kishpin dash sesika gego matchi ikitoiān, matchi dodamān gaie, pabige nin wi-anwenindis enigokodeeiān, nin wi-pagossenima gaie Debeniminang tchi jawenimid tchi webinamawid nin batadowin, mi dash tchi mijid songendamowin, apine weweni tchi anokitawag ged-ako-bimadisiān.

#### ANAMIEWIN.

Debendjigeian ! kawin weweni ki gi-anokitossinon binish nongom. Bonigide-tawishin, nosse, bonigidetawishin ; bekish dash mijishin ki jawendjigewin, tchi gashkitoiān weweni tchi anokitonan, kin apitchi nigan tchi apiteniminan, awashime gaie tchi sagiinan eji-sagiidisoīān.



2. *Kagige jawendagosiwini wikkwachitoda.*

W<sup>W</sup> INIK ga-dodang Kije-Manito , gi-  
Mojitod gijig aki gaie, gi-bi-ininajawad  
gaie Ogwissan oma aking , kakina gi-ijitchi-  
ge tchi ondji kitchitwawendaming od ijini-  
kasowin, anishinabeg dash tchi ondji jawen-  
dagosiwad. Kishpin anishinabe bemadisid  
aking babamitawad Kije-Maniton, o ga-  
minigon kagige bimadisiwin gijigong ; kish-  
pin dash agonwetawad. kawin o ga-waban-  
dansin kagige minawanigosiwini, meshkwat  
dash ta-kitimagisi, ta-kitchi-kitimagisi, ka-  
gigekamig gaie ta-kitchi-kitimagisi.

Mi dash iw ge-dodaman, ninidjaniss , mo-  
jag weweni babamitaw Debeniminang Kije-  
Manito ; dodan eji-gagikimigoian ; mi ima  
ge - ondji - kitchitwawendaman Kije-Manito  
od ijinikasowin, ki tchitchag dash ki ga-ja-  
wendagosia. Jesus gi-ikito : “*Bejigwan iw  
aiapitchi - kitchi - abadjitong.*” Wegonen  
dash iw ? Mi sa tchi sagiang, tchi anokita-  
wang gaie weweni Kije-Manito, mi dash  
tchi jawendagosiangwa ki tchitchagonanig.  
Kakina anokiwin minik endagog aking ka-  
win apitendagwassinnon epitendagwak iw  
tchi anokitawang Kije-Manito , mi dash  
gijigong kaginig tchi wabamang , kagige-

kamig tchi jawendagosiiang. Mi sa iw gwaiak wendji-aiaiang aking.

Mikwendar, ninidjaniss, ga-dodang Kije-Manito, tchi minik kagige jawendagosiwini gijigong. Nakawe sa aking tchi bimadisian, kid inenimig ; ki minig nibwakawin, inendamowin gaie ; ki minig anamiewin, kitchi Jawendagosiwinan, o jawendjigewin gaie ; tibinawe Ogwissan saiagiadjin o gi-migiweenan tchi nibonid tchibaiatigong, mi sa tchi jawendagosiian, gijigong kaginig tchi mino aiaian gi-ishkwa-kitimagisian aking. — Geget Kije-Manito kitchi inendam tchi jawendagosian, ninidjaniss, kagigekamig gijigong; o kitchi apitendar ki jawendagosiwini; Ogwissan o pagidinan tchi jawendagosiad ki tchitchagwan ! — Apegish, ninidjaniss, weweni nissitotaman, tibishko dash gaike kin tchi apitendaman kagige jawendagosiwini gijigong, Kije-Manito epitendang.

Ow dash gaie mikwendar. Kishpin gashkitamasoian kagige jawendagosiwini gijigong, kin ki ga-jawendagos, kin ki gad-aiyan ge-gashkitamasoian. Kawin Kije-Manito nawatch ta-ondji-jawendagosissi, kishpin kin gijigong aiaian ; kawin gaie win awashime pangti ta-ondji-jawendagosissi, kish-

pin kin anamakamig danakisoian. Kin eta ki gad-aian minik geshkitamasoian.

Apegish gaie ow nissitotaman. Kishpin gashkitoian kagige jawendagosiwin gjigong, kakina gego jewendagwak ki gi-gashkiton, ki kitchi jawendagos. Kishpin dash gwaiak ijiwebisissiwan, gashkitossiwan kagige jawendagosiwin gjigong, kakina gego ki gi-waniton, kakina ki gi-banadjiton, kawin bakan gego ki gad-ondji-jawendagosissi, ki ga-kitchi-kitimagis kagigekamig. — Kawin oma aking gwaiak jawendagosiwin ningotehi dagossinon, gjigong eta dagomagad ; kishpin dash iw gashkitamasossiwan, mi dash kaginig tchi animisiiian.

Geget kashkendagwad ! Anawi o kikendan enamiad, wenibik eta tchi aiad oma aking ; o kikendan gaie dagossinog aking gwaiak jawendagosiwin, gjigong eta dagomagad ; gwaiak o kikendan kakina iw, kawin dash o babamendansin ; mi dash iji bimadisid tibishko enendagosid, oma eta aking tchi bimadisid, tchi apitchi ishkwa aiad dash api nebed aking.

Kego kin iw ijiwebisiken, ninidjaniss. Nissitotan ejiwebak ; nissitotan wendji-aiaian ogidakamig. Mi eta wendji-aiaian tchi gashkitamasoian kagige jawendagosiwin gjij-

gong. Kishpin geget gashkitoian iw, ki gad-apitchi-jawendagos, missawa kitimagisiian aking. Kishpin dash iw gashkitosiwan, ki ga-kitchi-kitimagis kagigekamig, missawa kitchitwawisiian ogidakamig, kitchi-daniian, kitchi mino aiaian gaie. Kishpin mino aiaian aking, babamendansiwan dash kagige jawendagosiwin gjigong, wikwatchitamasossiwan gaie, awashime wedi ki gad-ondji-kashkendam. Ki gad-inendam sa wedi : Geget nin gi-gagibadis megwa gibimadisiàn aking ; mi eta aking endagog nin gi-sagiton, nin gi-babamendan ; nongom dash nin gi-waniton iw, meshkwat dash kagige kotagitowin nin gi-wikwatchitamason. — Apegish, ninidjaniss, weweni nissitotaman, babamendaman gaie.

#### GIJENDAMOWINAN.

1. Apitchi enigokodeeiàn ow nin gijendam : Nin wi-gashkitamason kagige jawendagosiwin gjigong ; minik eji-gashkitoian nin wi-wikwatchiton.

2. Endasso-kigijeb api gweshkosiiàn, ow nin wi-inendam : Minawa nin minig Kije-Manito bejig gjigad ge-mino-inabadjitoian tchi mino anokitawag. Geget dash kab-

gijig nin wi-anokitawa, kawin nin wi-bata  
ijiwebisissi.

**ANAMIEWIN.**

Kije-Manito Debenimiian, kikinoamawishin epitendagwak kagige jawendagosiwini gijigong; kikinoamawishin tchi nissitotamàn ejii-jawendagosid aw geshkitod iw jawendagosiwini, ejii-kitimagisid dash aw benadjitod. Mijishin ki jawendjigewin, tchi missawendamàn kagige bimadisiwin gijigong, tchi songendamàn tchi gashkitorian, mi dash endasso-gijigak tchi anokian tchi minigoian ningoting.



3. *Apitchi kitchi apitendagwad kagine jawendagosiwin gjigong; apitchi dash anokida tchi minigoiang; apitchi weweni ganawenimada ki tchitchagonanig.*

**W**IBIWA bemadisidjig aking kawin nin-got inanokissiwag ge-ondji-minindwa ningoting kagine jawendagosiwin gjigong. Anind dash pepangi, naningotinong gaie eta anokiwig iw ondji, tchi jawendagosi-wad gjigong. Geget gagibadisiwag. Apitchi mino dodaso awiia wikwatchitod kagine jawendagosiwin gjigong; apitchi dash kitimagiidiso kishpin wikwatchitossig; anish meshkwat sa ta-danakiso kagine ishkoteng anamakamig, kishpin gashkitossig kagine minawanigosiwin gjigong.

Geget gagibadisiwag bemadisidjig aking! Anotch gego o wikwatchitonawa; gonima masinaiganan tchi kikendamowad, gonima gaie nibiwa jonian tchigashkiawad, anotch gaie bakan gego tchi gashkitowad, gonima gaie tchi minawanigosiwad mojag; anotch sa go gego o wikwatchitonawa. Iw dash eta kagine jawendagosiwin gjigong kawin ganage o babamendansinawa. Kakina gego o babamendanawa oma aking, tibinawē

dash o tchitchagowan kawin o babamen-imassiwawan; mi dash kitimagiawad o tchitchagowan kagigekamig. Missawa anotch gego oma aking endagod gashkitod awiia, o tchitchagwan dash banadjiad, geget kitimagisi, kaginig gaie ta-kitchi-kitimagsi anamakamig.

Kego, ninidjaniss, inendangen tchi gashkitoian ningoting tchi pindigeian gjigong, bwa apitchi wikwatchitossiwan. Kawin awiia anisha ta-pindiganassi kagige minawanigosiwining, mi eta aw weweni ge-wikwatchitod. Mi wendji-ikitod Jesus: “*Wikwatchitog tchi pindigeieg ima egassadeag ishkwandeming. Mangadea ishkwandem, mangademo gaie mikana anamukamig enamog, kagige ishkoteng; batainowag dash ima pandigedjig. Agassadea dash ishkandem, agassademo gaie mikana gjigong enamog, kagige minawanigosiwing; pangiwagisiwag dash mekangig.*” Mi gaikitod Jesus Debeniminang. Wikwatchiton dash kin, ninidjaniss, tchi pindigeian kagige jawendagosiwining. Kego matchi ijiwebisiken, babamendan anamie-gagikwewin, babamitaw Mekatewikwanaie gegikwed, mi dash tchi jawendagosian.

Apitchi dash apitendagwad iw kagige

jawendagosiwin gjigong. Apegish weweni nissitotaman, mojitoian gaie kideing. Mikwendan ga-iji-kotagitod Jesus, tchi minik kagine jawendagosiwin gjigong, mikwendan iw, nanagatawenda gaie, mi dash tchi nissitotaman epitendagwak. Mikwendan gaie ga-iji-kotagitowad ketchitwawendagosidjig nongom gjigong ebidjig, anamiewin ga-ondji-nanindjig, ga-iji-kotagitowad tchi gashkitamasowad kagine jawendagosiwin gjigong. Weweni sa o gi-nissitotanawa epitendagwadinig kagine jawendagosiwin gjigong, mi dash ga-ondji-minwendamowad, anotch tchi animisiwad aking, tchi gashkitowad dash kagine jawendagosiwin gjigong, mi dash ga-ondji-minwendamowad, anotch tchi animisiwad aking, tchi gashkitowad dash kagine jawendagosiwin gjigong. Mikwenim gaie kakina ketchitwawendagosidjig gjigong ebidjig ga-iji-kotagiidisowad ondjita, tchi wanitossigwa iw jawendagosiwin.

Geget apitchi kitchi apitendagwad kagine jawendagosiwin gjigong. Mino ganawenindison dash, ninidjaniss, tchi wanitossowan, tchi banadjiasiowad ki tchitchag baiejigod. Bejigo eta geget ki tchitchag; kishpin banadjiad, mi kakina gi-banadjitoian. We-

weni nanagatawendañ iw, ninidjaniss ; kishpin dash odissikagoian matchi inendamowin, gego wi-matchi-dodaman, pabige mikwendan iw, bejigod eta ki tchitchag, ikiton dash ga-ikitod bejig inini ga-songanamiad, gigagansomind tchi matchi dodang ; ow sa gi-ikito : “*Kishpin nijicad nin tchitchag-wag, gonima nin da-dodam iw ; nin kiken-dan dash bejigod nin tchitchag, kawin dash nin wi-banadjassi.*”

Bejig nibwakawinini dash ow gi-ikito : “Geget nin kashkendam naiagatawendañ nin eji-gagibadisiang bemadisiang aking. Kawin sa weweni ki wikkwatchitossimin tchi mino ganawenimangwa ki tchitchagonanig, kawin sa weweni kid apitenimassawananig, awashime win matchi manito od apiteniman ; apitchi sa win anoki tchi gashkiad ki tchitchagonanin, tchi dibenimad kaginig anamakamig ; kinawind dash kitchi pangí kid anokimin tchi ganawenimangwa, kagige minawanigosiwining gjigong tchi pindiganangwa.” — Geget gawaiak gi-ikito aw nibwakawinini. Nanagatawendañ iw, ninidjaniss.

**GIJENDAMOWINAN.**

**1.** Nin kikenindis eji-matchi-ijiwebisiiān, nin gjendam dash apitchi weweni, kaginig tchi migadamān nin matchi ijiwebisiwin, nin matchi inendamowin, nin matchi gigitowin, nin maminadisiwin, nin gagibadisiwin, kakina gaie nin matchi dodamowinan, tchi banadjiassiwag nin tchitchag baiejigod.

**2.** Nin gjendam gaie tchi babamendansi-wān aking endagog, matchi minawanigosiwin, kitchitwawisiwin, daniwin.

**3.** Nin gjendam gaie, kaginig tchi miganag matchi manito. Mojag sa matchi aiaawish nin wi-minig matchi inendamowin, tchi matchi ijiwebisiiān, mi dash tchi banadjiag nin tchitchag. Kawin dash nin wi-odapinamawassi, pabige nin wi-mikwenima Kije-Manito, nin wi-pagossenima gaie tchi mijid mashkawendamowin, weweni tchi miganag matchi aiaawish.

**ANAMIEWIN.**

Mashkawendamiishin, Debenimiian, mojag tchi dodamān ga-iji-gijendamān nongom. Kawin nin tibinawe nin da-gashkitossin

gego tchi mino dodamān, mi wendji-pagos-seniminan tchi mashkawendamiiian, tchi mino anokitonan ged-ako-bimadisiiān aking, mi dash gjigong kaginig tchi wabaminan.



*4. Apine anokida tchi gashkitamasoiang  
kagige jawendagosiwin gjigong, segisida  
tchi wanitoiang.*

GEGET kawin kinawind tibinawe ki Qda-gashkitossimin tchi mino dodamang, kagige jawendagosiwin gaie tchi gashkitamasoiang. Win geget Kije-Manito ki minigonan mino inendamowin, ki widokagonan tchi madjitaiang tchi anokitawang, ki jawenimigonan gaie apine tchi anokitawang. Kawin dash kakina win eta wi-ijitchigessi; kid ineniminigonan tchi anokiiang gaie kina-wind, ge-ondji-gashkitamasoiang kagige jawendagosiwin gjigong. Kishpin enamiad ow inendang: Anisha nin ga-jawenimig Kije-Manito aaamiaiān, gjigong nin gad-

odapinig, missawa anotch ijiwebisiiān; kishpin iw inendang enamiad, kitchi waiejindiso. Kawin awiia gjigong ta-ijassi wikwatchitossig tchi mino ijiwebisid minik ej - gashkitod.

Apine gaie enamiad ta-wikwatchito tchi mino ijiwebisid, kawin wenibik eta, kawin gaie aiapi eta; apine sa go o gadanokitawan Kije - Maniton. — Kaginig mino ganawenindisog, kid igonan Jesus, kego nebangin ijiwebisikegon. Kishpin enamiad nebangin ijiwebisid ej - anamiad, kawin ta - jawendagosissi gi - ishkwa - bimadisid aking. Ikito sa Jesus: “*Megwa nibawad kitigewininiwag, gi-bi-ija jangendjiged, matchi mashkossiwan dash o gi-kitigadanana kitiganing, mi dash kakin-a gi-banadjitod*”. Mi go gaie ketimishkid enamiad, nebangin ejiwebisid, o gabanadjian o tchitchagwan, kawin kagine jawendagosiwin gjigong o ga-wabandansin.

Apine dash mino ganawenindisoda, tchi wanitossiwang kagine jawendagosiwin. “*Kishpin awiia nibawid, (mi sa, gwaiak ijiwebisid,) weweni ta-ganawenindiso tchi pangishinsig*”, ikito kitchitwa Paul. Kishpin enamiad mino ganawenindisossig, pagibe ta-pagishin batadowining. Potch kit-

chitwa Pierre gi-pangishin gi-mino-ganawe.  
nindisossig.

Nanagatawendañ kakina iw, ninidjaniss,  
apine dash mino ganawenindison tchi pangishinsiwan batadowining. Kawin ki dagashkitossin osam tchi ganawenindisoian, kishpin nanagatawendaman ge-wanitoian ganawenindisossiwan. *Kagige minawani-gosiwin su gjigong endagog ki ga-waniton, meshkwat dash kagige animisiwin anamakamig ki ga-wikwatchitamason.*

Segisida gaie tehi wanitossiwang kagige jawendagosiwin, mi dash awashime ge-ondji-wikwatchitoiang tchi gashkitoiang. Nijwaiagad iw ge-ondji-segisiiang:

1. Sanagad tchi gashkitong, kawin awiia anisha ta-minassi.

2. Kitchi nibiwa enamiadjig kawin o gashkitossinawa; kagige ishkoteng apaginawag gi-ishkwa-bimadisiwad aking.—Nanagatawendañ iw, ninidjaniss.

1. Sanagad tchi gashkitong kagige jawendagosiwin gjigong, kitchi waiba gaie awiia o waniton: waiba sa awiia batadowining pangishin, kishpin dash kitchi batadowining pangishing, mi gi-wanited kagige jawendagosiwin; kishpin dash kitchi batadowining dapined, kawin wika gjigong

ta-ijassi. Anwenindisad eta, tchi gassiamawind, mi tchi gashkitod tchi ijad. Gagibadisi enamiad segendansig, gotansig batadowin. Kishpin segendansig, waiba tapangishin batadowining; potch Anjeniwag gi-pangishinog; ketchi-nibwakadjig ininiwag gi-pangishinog, David, Salomon, kitchitwa Pierre. Mi ge-ondji-segendamang; sana-gad sa gijigong tchi ijang. Mi ga-ondji-ikitod hitchitwa Job: "Nin segendam ejiewebisiian". Kitchitwa Paul gaie mojagi-kotagiidiso gi-segendang Kije-Maniton tchi webinigod. Kitchitwa Jerome gaie mojagi-mawi gi-kotagiidiso gaie, gi-gotang dibakonidiwin, gi-segendang gijigong tchi ijassig.

2. Kitchi nibiwa enamiadjig kawin ijassi-wag gijigong, kagine jawendagosiwining, gi-ishkwa-bimadisiwad aking; kagine ishkoteng anamakamig apaginawag; mi ge-ondjisegisiiang. Debeniminang Jesus ow ikito: "Agassadea ishkwandem, agassademo gaie mikana gijigong enamog, kagine minawanigosiwining; *pangiwagisiwag* dash me-kangig". Ikito dash gaie: "Batainowagnandomindjig, *pangiwagisiwag* dash wenabamindjig". Mi sa wa-ikitod: Nibiwa anamiaiwag, nandomawag tchi pindigewad

gijigong; kawin dash nibiwa pindigessiwag, osam matchi ijiwebisiwag, osam matchi dodamog iko. Mi dash geget ejiwebak. Nibiwa anamiawag misiwe aking, weweni gaie mojag gagikimawag gwaiak tchi ijiwebisiwad, tchi migadamowad matchi inendamowin, tchi sagiawad widj' anishinabewan eji - sagiidisowad, jangenimigowadjin gaie tchi sagiawad ; tchi tabassenindisowad : tchi odapinansigwa matchi minawanigosiwin ; tchi kotagiidisowad; tchi kikinowabamawad Jesusan, tchi ijiwebisiwad ga-ijiwebisid aking ; weweni tchi odapinamowad kota gitowin, animisiwin gaie ; tchi babamen- dansigwa oma aking endagog ; kakina gaie gego wenijishing mojag gagikimawag ; kawin dash dodansiwag eji-gagikimindwa. Anawi nibiwa enamiadjig gwaiak ijiwebisiwag eji - nondamowad gagikwewin ; awashime dash batainowag bebamendansigog anamie-gagikwewin, gwaiak ejiwebisissigog.

Kishpin dash nawatch batainowad igiw anamakamig ged-apaginadjig, igiw dash gjigong ged-odapinindjig, wegonen wendjisegisisiwan, ninidjaniss ? — Gonima dash kid ikit : Anawi sa nin segis. — Anish, ki mino dodam sa, ninidjaniss, segisiian. Kish-

pin dash geget segisiian, anamakamig kagine ishkoteng tchi apaginigoian gaie kin, giishkwa-bimadisiian aking, kishpin iw geget gotaman, kego anotch matchi ijiwebisiken. Matchi ijiwebisiwin eta ki gad-ondji-apaginigo anamakamig. Kishpin dash gwaiak ijiwebisiian, mojag migadaman matchi ijiwebisiwin, mi gwaiak gjigong ged-odapiningoian.

**GIJENDAMOWINAN.**

1. Sasagwana nin wi-nanagatawendaow: Kishpin gashkitamasoiān kagine jawendagosiwin gjigong, kakina gego nin gi-gashkiton, kaginekamig nin ga-kitchi-jawendagos. Kishpin dash gashkitamasossiwān kagine jawendagosiwin gjigong, kakina gego nin gi-waniton, kaginiq dash nin ga-kitchi-kitimagis, nin ga-kitichi-animis anamakamig. Nin gjendam dash kakina tchi ojindamān, kakina tchi webinamān, ge-ondji-wanitoiān kagine jawendagosiwin gjigong endagog.

2. Kishpin dash ningoting pangishinān, eji-naninamisiiān, pabige nin wi-pasigwi, nawatch dash weweni nin wi-bimosse Kije-Manito o mikanang; nin wi-anwenindis

enigokodeeiān, nin wi-webinige, mi dash awashime tchi song-anokitawag Kije-Manito.

**ANAMIEWIN.**

Debenimiian Kije-Manito, ki pagossenimin enigokodeeiān tchi mijiian mashkawendamowin, wika tchi wanendansiwān ga<sup>z</sup> iji-gijendaīmān nongom, kaginig dash gaie tchi gotamān iw gijigad api ge-dibakoniian. Kid iji pagossenimin dash gaie tchi wido-kawiian, kaginig gwaiak tehi ijiwebisiiān, wika ondjita tchi matchi dod-nsiwān, tchi wanitossiwān kagige bimadisiwin gijigong, gē-wi-mijiian, kishpin gwaiak ijiwebisiiān, ki jawendjigewining dash dapineiān.



5. *Geget gagibadisi enamiad wikwatchitossig tchi gashkitod kagige jawendagosiwini gijigong endagog.*

KISHPIN nanagatawendumang ga-iji-kotagitod Jesus, tchi nodjimoad ki tchitchagonanin, gijigong tchi assinang; kishpin gaie mikwendamang ga-iji-kotagi-towad ketchitwawendagosidjig tchi mino ganawenimawad o tchitchagowan, tchi ijawad gijigong; kishpin iw nanagatawendumang, mi ima ge-ondji-nissitotamang epitendagwak kagige jawendagosiwini; awashime geget apitendagwad kakina dash aking endagog, awashime dash gaie enamiad da-anoki tchi gashkitod iw, kakina dash bakan gego.

Kitchi nibiwa dash enamiadjig kawin ganage pangí o wikwatchitossinawa kagige jawendagosiwini tchi gashkitowad. — Neb-wakad enamiad ow inendam: Missawa kakina gego aking endagog gashkitoian, kawin nin wi-ondji-dodansin gego ge-ondji-banadjiag nin tchitchag, ge-ondji-wani-toian kagige jawendogosiwini gijigong endagog. Mi enendang, mi ejivebisid neb-wakad enamiad Gegibadisid dash, pangí

gego od ḡondji banadjian o tchitchagwan; awashime sa minwendam oma aking wenibik tchi minawanigosid, iw dash kaginig gjigong tchi mino aiad enassaminid Kije-Maniton.

Ninidjaniss, apegish nissitotaman ejigagibadisid aw awashime epitendang matchi minawanigosiwin aking, iw dash kagige minawanigosiwin gjigong; awashime gaie anoki tchi mino aiad aking, iw dash tchi jawendagosiad o tchitchagwan. — Apegish enamiad ganage tibishko apitenimad o tchitchagwan, epitendang gego oma aking endagog Kawin dash; awashime od apitandan, awashime gaie o sagiton anotch gego aking endagog, ejii-sagiad dash, epitenimad gaie tibinawe o tchitchagwan. Geget gagibadisi. Ningoting o ga-kikendan ejii-gagibadisid; api sa ge-nibod, mi api ge-kikendang.

Ningoting bejig kitchi ojibiigewinini jaigwa wa-nibod ow gi-ikito, bekish gimawid: Geget nin gi-gagibadis. Kitchi weweni nin gi-anokitawa mojag nind ogimam, tchi kitchitwawisiiān, tchi daniiān gaie aking; Kije-Manito dash Debenimid kawin nin gi-anokitawassi. — Mi dash gaiji-matchi-nibod.

Kishpin awiia wiiawing akosid, kitchi kashkendam, kitchi segendam gaie. Pabige o nandoman nebwakanidjin mashkikiwiniwan, weweni gaie od odapinan mashkiki, missawa wissagipogwadinig. Kishpin dash otchitchagwan akosiwan gi-bata-ijiwebisid, kawin kashkendansi, kawin gaie segisissi. Kitchi ginwenj kawin o babamemimassin o tchitchagwan aiakosinidjin, kawin ket-chitwawendagwadinig mashkiki od aiossin, mi sa anwenindisowin, webinigewin gaie. Kawin sa o tchitchagwan kagigekamig gebimadisinidjin iw minik od apitenimassin, epitendang wiiaw waiba ge-pigishkana-dinig.

Apitchi weweni awiia o babamandan mino aiawin aking, tchi mino wissinid, tchi onijishininig egwidjin, tchi minawanigosid, tchi akosissig wika. Kakina iw weweni o babamandan. O tchitchagwan dash kawin o babamenimassin, o bakadean, awakaning od apiteniman, wegotogwenishing o dodawan. Awashime o pijikiman, o bebejigo-gajiman gaie o mino ganaweniman, eji-ganawenimad dash o tchitchagwan; awashime gaie iniw awessiian o jaweniman o bamian gaie akosinid, eji-bamiad eji-jawenimad gaie tibinawe o tchitchagwan aiako-

sinidjin. — Geget mamakadendagwad, be-kish kaškendagwad, eji - gagibadisiwad kitchi nibiwa bemadisidjig aking!

**GIJENDAMOWINAN.**

1. Enigokodeeiān nin gjendam weweni tchi bamiag nin tchitchag, weweni tchi ganawenimag. Kawin gego aking endagog nin wi-iji-babamendansin ged-iji-babamenimag nin tchitchag. Nind apitchi gjendam weweni mojag tchi anokitawag Kije-Manito, tchi kitchitwawenimag, tchi babamitawag gaie, mi dash gjigong kaginig tchi wabamag gi-ishkwa-kitimagisiiān aking.

2. Kitchitwa Paul ga-ikitod nin wi-odapinan, tibishko gaie nin nin wi-inendam; gi-ikito sa: “*Ajishking nind apitendan kakina gego aking endagog, tchi gashkiag dash Jesus Christ.*”

**ANAMIEWIN.**

Debenimiiān Kije-Manito, jawenimishin widokawishin, weweni tchi nissitotamān epitendag̃osid nin tchitchag wika ge-nibosig, epitendagwak gaie kid ogimawiwin

gijigong, endaji-wabamigoian, endaji-sa-gügoian gaie kagigekamig. Jawenimi-shin tchi apitchi niganendamàn iw jawendagosiwin gjigong endagog, enigokode-eià̄n gaie mojag tchi wikwatchitoià̄n. Nissitotamoishin epitendagwak, mi dash tchi songendamàn: Apegish gaie nin iji jawendagosiià̄n, tchi odapinigoià̄n kagine minawanigosiwining gjigong endagog. Widokawishin, Kije-Manito nosse, weweni mojag tchi anokitonan, mi dash kaginig gjigong tchi wabaminan.



6. *Wenibik eta ki gad-aiamin aking, kakina gaie aking endagog waiba ko ishkwa-aiamugad.*

MEGET wenibik eta gego aiamagad *Gaking*, waiba ko ishkwa-aiamagad. Ningotwak dasso bibon, gonima gaie midasswak dasso bibon *kitchi wenibik* apitendagwad, kishpin nanagatawending *kagige* bimadisiwin. Kagige bimadisiwin eta kitchi apitendagwad; kakina dash iw wenibik eta ged-aiamagak kawin ningot apitendagwassinton.

Mikwendan ketchi-sanagak gego, gonima kitchi kitimagiwin, animisiwin, kitchi kotagitowin, kitchi akosiwin; kakina iw ningoting ta-ishkwa-ijiwebad, tibishko gego ga-aiassinog wika; minwendainowin dash ishkossemagad, minwendam sa enamiad odeing gi-ishkwa-kotagitod, kishpin weweni gi-odapinang kotagitowin. — Mikwendan dash gaie kitchi-daniwin, kitchi minawanigosiwin, kitchitwawisiwin, anotch gaie gego ketchi-minwendagwak. Gaie iw kakina ningoting ta-ishkwa-aiamagad, tibishko gego wika ga-aiassinog aking; kashkendamowin dash ishkossema-

gad, kashkendam sa bemadisid, segisi gaie, kakina tchi nagadang aking, mi dash tchi nasikawad ge-dibakonigodjin.

Anindi aiawad nongom anind ga-kitchit-wawendagosidjig ininiwag ga-kitchi-mino-aiadjig aking, bekish dash gi-matchi-ijiwe-bisiwag, kawin Kije-Maniton o gi-anokita-wassiwawan. Anindi aiawad? Anamakan-mig kagige ishkoteng danakisowag. Keiabi masinaiganing ojibiigadeniwan od ijinikasowiniwan; keiabi kitchitwawinawag, keiabi mamakadenimawag ga-iji-kitchitwawi-siwan aking; wedi dash kagige animisiwing aiawag anamakan-mig. Mi dash kit-chitwa Augustin wendji-ikitod: “*Kitchit-wawinawag endaji-aiassigwa, kotagiawag endaji-aiawad*”.

Bejig kitchi ogima jaigwa wa-nibod ow gi-ikito gi-kitchi-kashkendang: “Mi jaigwa ishkwa-bimadisiian, kakina nin naganigon nin kitchitwawisiwin ga-sagitoian. Awashime nongom nin da-minwendam tchi gitimagisiian aking, mi dash weweni Kije-Manito tchi gi-anokitawag”. — Nanagata-wendan iw, ninidjaniss. Kego dash ningot inendangen kishpin kitimagisiian, tabashish gaie aiaian oma aking. Awashime geget ki jawendagos kitimagisiian, weweni gaie

tabassenindisoian ; ki ga-kitchi-jawendagos gi-ishkwa-bimadisiian aking, ki ga-kitchi-apitendagos gijigong. Kakina kitchitwawiwin , matchi minawanigosiwin gaie kitchi waiba ishkwa-aiamagad ; batadowin dash kid aian kishpin nandawendaman, sagitoian gaie. Kitimagisiwin dash gaie win waiba ta-ishkwa-aiamagad, kawin sa **ginwenj** bimadisissim iko aking ; kitchi jawendagosiwin dash ki gad-aian kishpin weweni odapinaman minik manigoian ktagitowin.

Kego wika, ninidjaniss, missawendangen kitchitwawiwin, minawanigosiwin, kitchi-daniwin aking; awashime missawendan, apitchi gaie nandawendan gwaiako-bimadisiwin, mino ijivebisiwin ; ki ga-minig dash Kije-Manito kagige kitchitwawiwin, kagige minawanigo.iwin, kagige daniwin wedi gijigong.

Kego gaie missawendangen bimadisiwin, **ginwenj** tchi bimadisiian aking ; missawendan dash, apitchi gaie nandawendan tchi **mino** bimadisiian. Awashime jawendagos i weshkinigid nibod, kishpin gwaiak gi-bimadisid, aw dash kitchi anishinabe anotch ejivebisid. Kawin gaie kashkendagwas-sinon abinodji nibod. Kitchi jawendagos

**aw eshkwa-bimadisid tchi bwa kikendang  
matchi ijiwebisiwin.**

Kishpin enamiad weweni nanagatawendaŋ *kagige bimadisiwin* gjigong endagog, kawin keiabi o missawendansin mandan *ketimagak bimadisiwin* aking; mino bimadisiwin gaie o kitchi wikwatchiton, tchi wanitossig ketchitwawendagwak bimadisiwin gjigong. Api ge-ishkwa-bimadisiian aking, ninidjaniss, mi dash tchi nasikawad ge-dibakonik, kawin ki ga-gagwedjimigossi, *minik ga-iji-bimadisiian* aking, gonima ginwenj, gonima dash wenibik; kawin iw ki gagagwedjimigossi, ki ga-gagwedjimig eta *ga-iji-bimadisiian*, gonima weweni tchi gi-bimadisiian, gonima dash tchi gi-matchi-bimadisiian aking. — Nanagatawendan iw, ninidjaniss; apitchi dash mashkawendan tchi mino bimadisiian. Kego dash babamen-dangen ginwenj tchi bimadisiian, anotch gaie minawanigosiwining tchi daji-bimadisiian aking.

**GIJENDAMOWINAN.**

1. Enigokodeeiān nin gjendam tchi babamen-dansiwan, tchi webinamān gaie kakina matchi minawanigosiwini, tchi babamen-

dansiwàn gaie oma aking endagog dani-win, kitchitwawisiwin gaie, tchi missawendansiwàn gaie bimadisiwin aking.

2. Nin gjendam gaie, sasagwana tchi nanagatawendamàn gjigong endagog bimadisiwin, kagine bimadisiwin ketchitwawendagwak ; mi dash iw eta ge-missawendamàn.

**ANAMIEWIN.**

Debenimiian Kije-Manito, jawenimishin mijishin mino inendamowin, tchi jingendamàn kakina maianadak ; kakina gego tchi jingendamàn minik kin jangendaman ; tchi missawendamàn dash gawaiako-bimadisiwin oma aking, kagine bimadisiwin dash wedi gjigong. Kikinoamawishin, Debenimiian, weweni nindeing tchi nissitotamàn epitendagwâk kagine bimadisiwin gjigong, endaji-wabamigoian, endaji-sagiegoian gaie kaginig ; kawin dash meshkwat wika kid agonwetagossi wedi, kid apitchi mino anokitago, kid apitchi babamitago. Apegish gaie nin jawenimiiàn, Kije-Manito nosse, tchi mijiian kagine bimadisiwin gjigong endagog.



7. *Awashime batadowin manadad, kakina dash bakan maianadak aking endagog.*

W enendang, endodang gaie ejि-мини-  
wendansig Kije-Manito, mi aw baiata-  
ijiwebisid ; gonima endodansig ge-dodan-  
giban tchi minwenimad Kije-Maniton, mi  
gaie win baiata-ijiwebisid. Enamiad baiata-  
ijiwebisid od agonwetawan Kije-Maniton,  
kawin o babamitawassin, kawin gaie o sa-  
giassin. Gi-ikito dash Debeniminang : Aw  
aiagonwetawid kawin nind ogimawiwining  
gijigong ta-pindigessi. — Mi dash ima  
wendji-kikendamang, mi eta batadowin ge-  
ondji-ijassig awiia gijigong ; mi dash iw  
wendji-ikitong : Kawin gego maianadak  
aking iji manadassinon, batadowin ejи-ma-  
nadak. Kishpin awiia kitimagisid, kotagi-  
tod, animisid aking, *wenibik* eta kotagito ;  
kishpin dash awiia bata-ijiwebisid, batado-  
wining gaie dapined, *kagine* kotagitowin,  
animisiwin, wissagendumowin gaie ana-  
makamig o gad-aian. Geget batadowin  
awashime matchi ijiwebad, kakina dash ba-  
kan gego aking endagog ; mi dash iw  
awashime ge-ondji-gotamang batadowin,  
kakina dash bakan gego senagak, gonima  
ketimagak.

Baiata-ijiwebisid od agonwetawan Kije-Maniton. Debeniminang Kije-Manito od ineniman bemadisinidjin aking, gwaiak tchi ijiwebisinid, mi wendji-assad aking, mi wendji-minad anamiewin, Jawendagosiwinan, o jawendjigewin gaie. Win dash baiata-ijiwebisid bakan inendam, bakan gaie ijitchige ; gwaiak Kije-Maniton od agonwetawan.

Kije-Manito o gi-ininajawan Ogwissan aking tchi kikinoamonang tchi ojindamang batadowinan ; baiata - ijiwebisid dash ondjita o nasikan ge-ondji-bata-ijiwebisid.

Kije-Manito Debeniminang ki minigonan od ikitowin ketchitwawendagwadinig, ge-ondji-mino-ijiwebisiiang ; baiata-ijiwebisid dash kawin o babamendansin Kije-Manito od ikitowin, kawin o pisindansin, od agonwetan dash gaie.

Kije-Manito ki minigonan Kitchi Jawendagosiwinan, ge-ondji-binitoiang kideinanin, tchi bata-ijiwebisissiwang, tchi gigishkansiwang batadowinan ; baiata-ijiwebisid dash kawin o babamendansinan Kitchi Jawendagosiwinan, kawin o nasikansinan, o baptongan gaie.

Kije-Manito ki jawenimigonan ki minigonan nibwakawininiwan kekendaminidjin

gwaiako-bimadisiwin, gwaiak gagikwewin gaie, mi sa mekatewikwanaien ; baiata-ijiwebisid dash kawin o pisindawassin mekatewikwanaien, kawin o nasikawasssin, o matchi dajiman gaie ko , o bapinodawan g aie.

Geget win baiata-ijiwebisid kakina o banadjiton Debeniminang od inakonigewin, minik ej-i-gashkitod ; ga-iji-jaweniminang gaie Jesus gi-siginang kakina o miskwim tchibaiatigong tchi wi-nodjimoad ki tchit-tchagonanin, kakina iw o banadjiton baiata-ijiwebisid, minik ej-i-gashkitod. — Geget apitchi kitchi manedad batadowin !

Kishpin bata-ijiwebisiiian, ninidjaniss, geget ki kitchi kitimagis ! Kije-Manito inendam tchi atessininig batadowin ningotchi aking ; minik gaie enakoniged mi wendji-inakoniged tchi angotod batadowin misiwe. Kin dash kideing ki pindigadon batadowin, ki moshkinadon gonima batadowin kide ; bekanisid gaie ki bata-dodamoa matchi kikinoamawad. — Ninidjaniss, nanagatawenden iw ! Kishpin nita-bata-ijiwebisiiian, ki gad-animis dibakonige-gijigak, kagigekamig gaie anamakamig ki gad-animis

Tchi bata-ijiwebisissiwan dash, mikwen-

dan eji - matchi - dodawad Kije - Maniton baiata - ijiwebisid.

1. Kawin Kije - Maniton o babamitawassin, kawin o babamenimasssin.

2. O matchi dodawan, o matchi inan gaie enassaminid, kawin o gossassin.

3. Kawin o migwetchiwenimasssin, ano mino dodagod mojag.

4. O bapinodawan, kawin ningot od apitenimasssin, awashime anotch gego aking endagog od apitandan.

5. O kashkendamian gaie.

6. Jesusan neiab o sassagakwawan tchibaiatigong.

Nongom dash nanagatawendan kakina iw.

1. Baiata - ijiwebisid kawin Kije - Maniton o babamitawassin ; kawin sa dodansi enenimigod Kije - Maniton ; enendang sa dodam. Kakina gego oma aking gaie wedi gjigong ijiwebad enendang Kije - Manito. Win enendang mi ejii - gjigak, gonima mino gjigad, gonima gaie niskedad ; gonima anwatin, gonima gaie kitchi nodin ; enendang sa Debendjiged, mi ejiwebadinig. Kakina gaie awessiiag aking ijiwebisiwag enenimigowad Debendjigenidjin ; anishinaben gaie o babamitawawan awessiiag ; win sa Kije-

Manito iw inendam. — Wedi gaie gjigong ketchitwawendagosidjig, Anjeniwag gaie, od apitchi babamitawawan Kije-Maniton. Win eta baiata-ijiwebisid anishinabe kawin o babamitawassin, kawin ganage o baba-menimasson. — Geget apitchi kitchi matchi ijiwebad batadowin !

2. Baiata-ijiwebisid o matchi dodawan, o matchi inan gaie Kije-Maniton enassaminid, kawin o gossassin. Geget gagibadisi enämiad baiata-ijiwebisid. Anawi o kikeniman Kije-Maniton ejiwebisinid. Misi sa aia Debeniminang, kaginig ki wabamigonan, ki nondagonan gaie. Kishpin awiia gego matchi ikitod, matchi dodang gaie, *enassaminid Kije-Maniton* matchi ijiwebisi. Kakina gego gaie o gashkiton Kije-Manito tchi dodang ; o da-gashkiton pabige ima tchi banadjiad, anamakamig tchi apaginad baiata-ijiwebisinidjin. Kawin dash aw baiata-ijiwebisid o gossassin , minotch matchi dodam ano wabamigod. — Kishpin wi-matchi-ikitoian , wi-matchi-dodaman gaie, ningotchi ijan endaji-aiassig Kije-Manito. Kishpin iw mikaman , mi ge-daji-matchi-dodaman. — Anindi dash iw ?

3. Baiata-ijiwebisid kawin bapish o mi-gwetchiwenimasson Kije-Maniton, ano mino

dodagod mojag. — Nanagatawenda iw. ninidjaniss. Kakina gego Kije-Manito ki minig ; kiiaw, ki tchitchagwan, kid inendamowin ; kakina gaie gego aking endagog, anishinaben o gi-ondji-aton aking. Tibinawe gaie Ogwissan o gi-bi-ininajawan aking ; win dash Kije-Manito Ogwissan o gi-kitchi-jaweniman anishinaben, bimadisiwin o gi-pagidinan, kagine bimadisiwin gijigong tchi mininang. Kakina sa go gego Kije-Manito ki minigonan, win o migiwe-win kakina gego. Kishpin dash awiia bata-ijiwebisid, Kije-Manito o migiwe-win od aion tchi ondji-matchi-dodawad Kije-Maniton. Geget kawin migwetch od inenimassin ; potch o migiwe-win od aionan tchi ondji-nishkiad. — Mi gaie ima ge-ondjinissitotaman ejimanadak batadowin.

4. Baiata-ijiwebisid o bapinodawan Kije-Maniton, kawin gaie od apitenimassin epitendang gego oma aking endagog. — O kikendan anawi enamiad ow : Kishpin bata-ijiwebisiiàn, nin gawania Kije-Manito. — Minotch dash matchi dodam, mi dash waniad Kije-Maniton ; tanassag o webinan. Pangi gego od ondjiwebinan ; matchi minawanigosiwini, gagibadisiwin, nishkadisiwin, minikwewin,

pangi jonian, anotch sa go gego ondji-webinad Kije - Maniton. Judas nissimidaña dasswabik o gi-atawenan Jesusan. Aw dash baiata-ijiwebisid kawin ganage iw minik od apitenimassín Kije-Maniton ; pangí gego sa go od ondji-webinan. — Geget apitchi kitchi matchi ijiwebad batadowin.

5. Baiata-ijiwebisid o kashkendamian Kije-Maniton. Mi ejibiigadeg Kije-Manito o masinaiganing : Enigokodeed gi-kashkendam Debendjiged gi-wabamad metchi-ijiwebisinidjin, mi dash kakina nibikang gi-dapinead. — Kawin geget Kije-Manito iji kashkendansi, anishinabe aking eji-kashkendang. — Mi wa-ikitomagak iw : Kishpin Kije-Manito Debeniminang iji gashkitod tchi kashkendang, batadowin da-on-dji-kashkendam enigokodeed. — Mi gaie ima ge-ondji-nissitotaman eji-kitchi-mandak batadowin.

6. Baiata-ijiwebisid Jesusan neiab o sas-sagakwawan tchibaiatigong. Mi sa ekitod kitchitwa Paul. Kishpin nanagatawendumang Jesus o kotagitowin, kawin nin minwendansimin ga-iji-matchi-ijiwebisiwad Judawiniwiwag gi-sassagakwawawad Jesusan tchibaiatigong. Geget gi-matchi-

dodamog ; awashime dash matchi dodam baiata-ijiwebisid. Winawa Judawininiwag kawin weweni o gi-kikenimassiwawan Jesusan Kije-Manitowinid. Win dash baiata-ijiwebisid enamiad o kikeniman ; anishinabewi Jesus, bekish gaie Kije-Manitowi, minin Kije-Manitom ; od ineniman Jesusan enamiad. Minotch dash o kitchi matchi dodawan, tanassag nassab o sassagakawan tchibaiatigong dassing baiata-ijiwebisidjin. — Geget apitchi kitchi manadad batadowin ! Kawin gego aking endagog iji manadassinon, batadowin eji-manadak.

**GIJENDAMOWINAN.**

**1.** Nin kikendan, nin nissitotan gaie, kawin gego geget iji manadassinon, batadowin eji-manadak ; mi dash iw wendjigijendamān enigokodeeiān, weweni mojag tchi ojindamān kakina batadowinan. Kawin nin wi-bata-ijiwebisissi, osam manadad batadowin.

**2.** Ow gaie nin gjendam nongom : Kawin nin wi-wissokawassi baiata-ijiwebisid, metchi-gijwed ; metchi-dodang gaie ; kawin gaie nin wi-nasikansin maianadak ;

kawin nin wi-ijassi endaji-nimiwad, endaji-minikwewad, endaji-atadiwad.

3. Nin gjendam gaie apine tchi takwenimagine Kije-Manito misiwe eiad, kakina waiabandang, nin wi-anwenindis gaie ninding endasso-gijigak minik ga-iji-bata-ijiwebisiian, nin wi-mashkawendam gaie minawa tchi matchi ijiwebisisiwa, Kije-Manito gaie mojag nin wi-pagossenima tchi mijid mashkawendamowin.

**ANAMIEWIN.**

Kije-Manito Debenimiian, ki pagossenimin, Jesus od ijinikasowining kid ondji-pagossenimin, tchi bonigidetawiiian minik ga-iji-bata-ijiwebisiian binish nongom, tchi gassiamawiiian kakina; tchi mijiian dash mashkawendamowin, tchi apitchi bonitoian matchi ijiwebisiwin, meshkwat dash gwaiako-bimadisiwin tchi odapinamàn, gwaiak tchi iji bimadisiian oma aking, ejinandawenimiian tchi ijiwebisiian, mi dash wedi gijigong kaginig tchi wabaminan.



8. *Kije-Manito o kitchi jingendan batadownin, od apitchi kotagian gaie baiata-ijiwebisinidjin.*

KIJE-MANITO Debeniminang kawin abakan gego o jingendansin, mi eta batadowin. Kakina sa go gego win o gi-gijiton, kawin dash gego o jingendansin minik ga-ojitetod; batadowin win eta od apitchi jingendan; kawin sa batadowin win o gi-ojitetossin. Apitchi Kije-Manito kitchitwawendagos, apitchi gaie gwaiak ijiwebisi, kawin ganage panggido gego o da-gashkitossin tchi-matchi inendang, tchi matchi dodang gego; kakina mino ijiwebisiwin od apitchi aian. Od apitchi sagiton dash gaie kakina mino-ijiwebisiwin; epitch dash sagitod, mi epitch jingendang matchi ijiwebisiwin, batadowin; apine gaie kaginig o jingendan, kagigekamig gaie o gad-apitchi-jingendan kakina batadowin. Mi dash iweg - ondji - jingendamang gaie kinawind, awashime kakina gego. Kishpin dash awilia inendang, gonima gaie ikitod: Nin sagia Kije-Manito, nindeing nin gigish-kawa; kawin debwessi, kishpin bekish batadowin sagitod; kawin sa Kije-Manito

o da-gashkitossin tchi abitang odeimang endaji-aiamagak batadowiu, osam o kitchi jingendan, o jingeniman gaie baiata-ijiwebisnidjin, kishpin anwenindisossinig. — Nanagatawenda iw, ninidjaniss, nissiton tan gaie. Kishpin gigishkansiwan batadowin, ki kitchi jawendagos, ki sagiig sa Kije-Manito; kishpin dash batadowining daji-bimadisiian, ki jiungenimig Kije-Manito, geget dash ki kitimagis.

Eji-kitchi-jingendang dash Kije-Manito batadowin, mi eji-kitchi-kotagiad baiata-ijiwebisnidjin.

1. Oma aking o kotagian.
2. Awashime dash o kotagian gi-i-hkwabimadisinid aking.

3. Kawin gaie awiia awashime o babamenimassin, kakina baiata-ijiwebisnidjin o kotagian kishpin anwenindisossinig.

1. Kije-Manito oma aking anotch o kotagian baiata-ijiwebisnidjin; kawin dash naningotinong pabige, kawin gaie mojag; naningotinong dash pabige oma aking o kotagian eji-matchi-ijiwebisnid. Nitam inini Adam gi-kitchi-matchi-dodam kitchi kitiganing; pabige dash gi-kitchi-animisi, gi-sagidjinajawa kitchi kitiganing, anotch dash gi-kotagito; kakina gaie onidjanissan,

ojisheian gaie kakina gi-animisiwan; keiabi dash kąkina kid animisimin iw batadowin ondji. Ojibiigade gaie Kije-Manito o masinaiganing ga-iji-kotagiindwā ga-bata-ijiwebisidjig gaiat. — Kain pabige ga-matehi-dodang gi-nissad oshimeian, Kije-Maniton o gi-webinigon; mojag dash noping gi-baba-danisi, awessiing gi-iji-bimadisi, kaginig gi-kitchi-gotadjid. — Ningoting gaie Kije-Manito kakina baiata-ijiwebisinidjin aking nibikang o gi-dapinean; nishwasswi eta anishinaben meno-ijiwebisinidjin o gi-bimadjian. Minawa dash ningoting anind odenawan o gi-banadjian, ishkote sa osawi-makate gaie o gi-pangisisiton odenang, mi dash ishkoteng gi-dapi-nead kakina iniw ga-bishigwadj-ijiwebisinidjin. — Ningoting gaie Judawiniwig o gi-matchi-inawan Kije-Maniton gi-bata-gijwewad; pabige dash Kije-Manito ishkote-ginebigon o gi-ininajawan tchi tak-wamawad iniw metchi-gijwenidjin. Keiabi dash winawa Judawiniwig matchi dodawawag, jingendagosiwag gaie misiwe aking, gi-matchi-dodawawad Jesusan. Kitchi nibiwa gaie bakan ga-matchi-ijiwebisidjig gi-kitehi-kotagiawag. „Anotch ta-bashanjewa baiata-ijiwebisid”, ikito

Kije-Manito. — Kishpin dash wabanda-mang ej-i-kitimagak anotch gego aking, naningotinong kawin nitawigissinon kitiganan, kitimagisiwag, bakadewag bema-disidjig aking, kitchi akosiwag, kitchi nibowag gaie naningotinong, kitchi migadi-wag gaie, anotch sa go gego senagak aking aiamagad; kishpin iw wabandamang mikwendanda, mi wendji-kitimagak aking matchi ijiwebisiwad bemadisidjig, o kota-giigowan dash Kije-Maniton. — Kishpin iw nanagatawendaman, ninidjaniss, ki ga-kikendan wendjibamagak kakina gego senagak aking ; batadowining sa ondjabamagad. Ki ga-kikendan dash gaie gedodaman tchi jawendagosiiian ; ki da-an-wenindis sa. — Apitchi kitchi kijewadisi Kije-Manito! Kishpin bashanjewad baiata-ijiwebisinidjin, mi wendji-bashanjewad tchi anwenindisonid ; kishpin dash gwaiak ej-jiwebisinidjin bashanjewad, mi wendjidodawad, nawatch tchi mino ijiwebisinid. Jawendago si enamiad nessitotang iw.

2. Naningotinong Kije-Manito oma aking o kotagian baiata-ijiwebisinidjin, naningotinong dash kawin ; gwaiak dash wedi o ga-kotagian gi-ishkwa-kitimagisi-nid aking. Epitch jingendang Kije-Ma-

nito batadowin, mi epitch kutagiad wedi baiata-ijiwebisinidjin ga-anwenindisossinig. — Ninidjaniss, gwaiak tchi nissitotaman eji-jingendang Debendjiged kakina batadowinan, mikwendan eji-kötagitowad ga-ki-tchi - bata - ijiwebisidjig wedi anamakamig. Kitchi ishkoteng sa danakisowag, kaginekamig gaie ta-danakisowag, ka wika, *kawin sa wika*, ta-ishkwa-animisisiwig. Potch winawa batadowinensing ga-dapinedjig, kitchi animisiwig gassiakisowining, epitch Kije-Manito jingendang *kakina* batadowinan.

3. Kawin gaie awashime awiia o baba-menimassin, kakina baiata-ijiwebisinidjin o kotagian kishpin anwenindisossinig. Kawin kinawind bemadisiiang aking ki dagashkitóssimin weweni tchi nissitotamang eji-manadak batadowin, win eta Kije-Manito o kikendan iw; mi dash ow eta gedinendamang : Geget apitchi kitchi manadak batadowin. Anawi kitchi kijewadisi Kije-Manito, o kitchi sagian bemadisinidjin aking; minotch dash kakina baiata-ijiwebisinidjin o kitchi kotagian, kishpin anwenindisossinig. Potch anjeniwan ga-apitchi-sagiadjin anamakamig kagine ishkoteng o gr-ápaginan, gi-bata-ijiwebisiwad. Epitch

sa manadak batadowin, mi sa Debendjiged wendji-ijitchiged. — Geget nin segis, iw nanagatawendamàn! — Wegonen bata-iji-webisiìàn, mi dash batadowining dapineiàñ, mi go gaie nin kitchi ishkoteng tchi dana-kisoïàñ anamakamig kagigekamig. — Geget gagibadisi, apitchi gaie gagibingwe aw gwtansig batadowin.

GIJENDAMOWINAN.

1. Nin kitchi gjendam tchi apitchi jingendamàn kakina batadowinan. Kawin gego oma aking nin wi-iji-jingendansin, batadowin ge-wi-iji-jingendamàn; kawin gaie gego iji manadassinon, batadowin ejimanadak.

2. Kawin dash eta iw tchi jingendamàn batadowin, nin *wi-ojindan* gaie apitchi. Pabige nin wi-webinan matchi inendamowin, nin wi-mikwenima Kije-Manito misi gego kekendang; pabige gaie nin wi-jingendan matchi gjewin ge-nondamàn, kawin nin wi-pisindansin, kawin nin wi-babamendansin; kawin gaie wika ondjita nin wi-ijassi ge-daji-bata-ijiwebisiìàn.

3. Nin gjendam gaie, enigokodeeiàñ mojag tchi anwenindisoïàñ minik ga-iji-

bata-diïän binish nongom; ketagüdisowining gaie nin wi-odapinan kakina gego senagak ge-mijid Kije-Manito binish tchi ishkwa-bimadisiiän.

**ANAMIEWIN.**

Kid iji pagosseñimin, Debenimiian, tchi jawenimiian tchi mijian mashkawendamowin, gwaiak tchi jingendamàn tchi ojindamàn gaie kaginig kakina batadowinan. Ganawenimishin, Kije-Manito nosse; kego ijijiishiken gagwedibeningewining; kishpin dash anawi gagwedibenimigoiän, songendamiishin weweni tchi migadamàn maianadak, mi dash kaginig gwaiak tchi anokitonan.



9. *Apitchi inigaidiso baiata-ijiwebisid.*

XISHPIN awiia kitchi bata-dodang, geget kawin gwaik o kikendansin endodang, kawin gaie o nissitotansin ej-i-nigaidisod, minik ej-i-wanitod.

1. Kije-Manito o jawendjigewin o waniton.

2. O tchitchagwan o wanian.

3. Kije-Maniton gaie o wanian. — Ape-gish weweni nissitotaman, ninidjaniss, tchi jingendaman batadowin, tchi gotaman, tchi ojindaman gaie.

1. Kije-Manito o jawendjigewin od apitchi waniton awiia ketchi - bata - ijiwebisidjin. Apitchi kitchi apitendagwad Kije-Manito o jawendjigewin. Kakina joniia, osawa-joniia gaie, kakina gaie gego aking endagog kawin apitendagwassinton, Kije-Manito o jawendjigewin epitendagwak. Jawendagosi enamiad gegishkang odeing Kije-Manito o jawendjigewin. Missawa apitchi kitimagisid aking, gigishkang dash Kije-Manito o jawendjigewin, geget kitchi jawendagosi. Kishpin dash awiia gigishkansig iw jawendjigewin, apitchi geget kitimagisi, missawa kitchi-danid, missawa

megwaii minawanigosiwining mojag dajibimadisid aking. Geget kitchi apitendagwad Kije-Manito o jawendjigewin. Kishpin gigishkaman iw jawendjigewin, ki kitchi sagiig Debeniminang, wenidjanissingin geget ki sagiig, kid inenimig gaie tchi pindigeian gijigong gi-ishkwa-bimadisiian aking. Kishpin dash wanitoian, kawin keiabi ki sagiigossi Debendjiged, kid apitchi jingenimig, kid inenimig gaie anamakamig kagige ishkoteng tchi apaginigoian. — Geget kid inigaidis wanitoian Kije-Manito o jawendjigewin. — Ow dash gaie nanagatawendan. Kishpin kitchi batadowining pangishinan, pabige kakina gego ki banadjiton ga-gashkitoiamban megwa gwaiak ijiwebisiian, gonima ginwenj. Api dash iw wanitoian, awashime nibiwa ki waniton kin, aw dash wenitod kitchi-daniwin aking endagog. — Wika dash awiia o nissitotan iw. Kishpin awiia nibiwa joniiian waniad, gonima gaie kitchi-daniwin wanitod, geget kitchi kashkendam, kitchi mawi gaie ; kishpin dash Kije-Manito o jawendjigewin wanitod gi-bata-ijiwebisid, kawin mawissi, kawin o babamendansin. — Kawin sa o nissitotansin. — Apegish nissitotaman kin ! — Ow dash gaie mikwendan. Kawin iw eta

kid ondji kitimagiidisossi api ketchi-bata-  
ijiwebisiian, wanitoian kakina ga-anō-gash-  
kitoian megwa gi-mino-ijiwebisiian, kawin  
iw eta, mi go gaie iw wendji- kitimagiidi-  
soian gashkitossiwan gego tchi mino dodam-  
an tchi odapinang Kije-Manito. Kawin  
sa win kid odapinamagossi gego ano mino  
dodaman, epitch gigishkaman kitchi batad-  
owin. Missawa anamiaian, missawa gaie  
jajawendjigeian, kawin Kije-Manito od  
odapinansin iw, kishpin bekish kitchi batad-  
owing daji-bimadisiian. Kishpin eta an-  
wenindisioian, webinaman gaie iw kitchi  
batadowin, minawa dash neiab gashkitoian  
Kije-Manito o jawendjigewin, mi pitchinag  
minawa tchi sagiik Debeniminang, mi dash  
pitchinag minawa tchi odapiñang ki mino  
dodamowinan. Megwa dash gigishkaman  
kitchi batadowin, ki jingenimig, kawin dash  
gego kid odapinamagossi; kishpin dash ni-  
boian megwa gigishkaman kitchi batado-  
win, megwa jingenimik Kije-Manito, gwaiak  
anamakamig kagige ishkoteng ki gad-apagi-  
nigo. — Nissitotan, ninidjaniss, ejī-mana-  
dak batadowin; nissitotan ejī-kitimagiidi-  
soiñ kishpin kitchi batadowining pangishi-  
nan. — Kego dash ow inendangen: Kish-  
pin ningoting kitchi batadowining pangishi-

nàn, mi na tchi apitchi bonitoiān anamie-win, jajawendjigewin, giigwishimowin, anotch gaie mino dodamowinan? — Kawin iw. Anamian sa mojag, mino dodan gaie minik ej-i-gashkitoian, tchi jawenimik Kije-Manito tchi minik *anwenindisowin*, gawaiak tchi anwenindisoian, tchi bonitoian bata-ijiwebisiwin, mi dash minawa Kije-Manito o jawendjigewin tchi minigoian; kakina dash iw ga-wanitoian gi-kitchi-bata-diian, neiab ki ga-minig Kije-Manito.

2. O tchitchagwan gaie o kitchi inigaan, o wanian gaie baiata-ijiwebisid. Kishpin awiia bata-ijiwebisid, geget o kitchi ini-gaan o tchitchagwan, awakaning, awessi-ing od apiteniman. Anjeniwag gjigong gi-bata-ijiwebisiwag, anamakamig dash gi-apaginawag, mi dash wedi matchi-mani-towiad. Kishpin dash anishinabe kitchi bata-ijiwebisid, matchi awessiing od ijina-gosian o tchitchagwan. — Ninidjaniss, kishpin gigishkaman ki tchitchagong kitchi batadowin, apitchi jingendagosi ki tchit-chag, gagwanissagakamig ejinagosid. Kishpin dash ishkwa-bimadisiian megwa iw ijinagosid ki tchitchag, apitchi ta-jingendagosi kagigekamig, win gaie ti-binawe ta-jingenindiso. — O nissan gaie

o tchitchagwan awiia ketchi-bata-ijiwebisidjin. Anawi ki tchitchagonanig kawin wika ta-nibossiwag, kaginig ta-bimadisiwag. Kishpin dash.iw ikitong : O nissan o tchitchagwan ketchi-bata-ijiwebisid, mi wa-ikitong : Gwaiak bimadisiwin wedi gjigong kawin o gad-aiansin, kagige nibowining, mi sa kagige animisiwining anamakamig ta-aia. Kishpin kitchi batadowining daji-bimadisiian, anawi bemadisingin kid ijinagos, geget dash nebongan kid apitendagos enassamid Kije-Manito. Mi wendji-inad Debendjiged baiata-ijiwebisinidjin : “*Bimadisi, kid igo, ki gi-nib dash.*” Ki kitchi kitimagis dash, ninidjaniss, kishpin iw nissitotansiwan, kishpin gaie kashkendansiwan gi-bata-ijiwebisiian. Kitchitwa Jerome ow o gi-ojibiamawan bejig ininiwan ga-kitchi-bata-ijiwebisinidjin : “Kawin ki mawissi gi-kitchi-matchi-dodaman. Nin kitchi maw dash nin ; mawissiwan, mi wendji-mawiiān.”

3. Kije-Maniton gaie o wanian ketchi-bata - ijiwebisid. Kishpin Kije-Manito o jawendjigewin gigishkaman, bimadisi ki tchitchag, Debenimik gaie ki Kije-Manitom kid aiawa ki tchitchagong ; kishpin dash kitchi bata-ijiwebisiian, o naganan

Kije-Manito ki tchitchagwan, mi dash nibonid. — Ki tchitchag ondji-bimadisimagad kiiaw; kishpin ki tchitchag nagadang kiiaw, mi dash iwapi kiiaw nibomagak. Mi tibishko gaie Kije-Maniton ondji-bimadisi ki tchitchag; kishpin dash Kije-Manito naganad ki tchitchagwan, mi api nebod ki tehitchag. Geget dash ki kitchi kitimagis kishpin naganik Kije-Manito, kishpin sa waniad. — Apegish weweni nissitotaman wa-ikitomagak iw : Nin gi-wania Kije-Manito! — Kishpin kakina gego aking endagog wanitoian, Kije-Manito dash gigishkawad kideing, kawin gego ki gi-wanitossin, ki kitchi jawendagos. Kishpin dash kakina gego aking endagog gashkitamasoian, Kije-Manito dash waniad, kakina gego ki gi-waniton, kid apitchi kitchi kitimagis. — Mi sa ketchitwawendagosidjig gjigong ebidjig wendji-kitchi-jawendagosiwad, mojag wabamawad Kije-Maniton, enassaminid gaie mojag aiawag. Winawa dash anamakamig ebidjig mi wendji-kitchi-animisiwad, gi-waniawad Kije-Maniton, kawin gaie wiwa o ga-wabamassiawan. — Kishpin waniad Kije-Manito, geget ki kitchi kitimagis. Awashime dash kid apitchi kitchi kitimagis kishpin *babamendansiwan* iw gi-

waniad. — “Anish win! ikito kitchitwa Augustin, ki kitchi mawima aw ga-nibod, ga-waniad (ga-pagidinad) o tchitchagwan; ka-win dash ki mawimassi ki tchitchag ga-waniad Kije-Maniton.” — Bejig gaie ketchinibwakad inini, mi sa kitchitwa Thomas Aquinas, ow gi-ikito : “Kawin nin nissitotansin ejи-gashkitod tchi bimadisid, bisan tchi nibad, tchi minwendang gaie aw ga-waniad Kije-Maniton.” — Geget gagibadisi bemadisid aking! Kishpin pangи gego wanitod, pabige kitchi kashkendam, mawi gaie ko; kishpin dash Kije-Maniton waniad metchi-dodangin, kawin o babamen-dansin, bapi, baba-minawanigosi. — Nnidjaniss, kego kin iw ijiwebisiken. Kishpin kitimagisiian, kitchi batadowining gi-pangishinan, enigokodeeian kashkendam, pabige mikwendan ga-iji-kitchi-kitimagiad ki tchitchag, mikwendan gi-waniad Kije-Manito ! Apitchi dash inendan: Apegish minawa mikawag Debenimid nin Kije-Manitom ! — Ki ga-mikawa dash, minawa kideing ki gad-aiawa, kishpin enigokodeeian anwenindisoian, weweni gaie webinigeian, apitchi gaie mino ganawenindisoian, wika minawa tchi bata-ijiwebisissiwan.

**GIJENDAMOWINAN.**

1. Nin gjendam, sasagwana tchi naganatawendamàn eji - manadak batadowin, memindage kitchi batadowin; eji-kitimagii-disoià̄n gaie dassing baiata-ijiwebisiià̄nin.

2. Nin gjendam tchi apitchi mino gana-wenindisoià̄n, gego tchi matchi dodansiwà̄n, wika tchi waniassiwag Debenimid nin Kije-Manitom; mojag gaie anwenindisowing tchi daji-bimadisiià̄n.

3. Nin gjendam gaie, wika tchi ijassiwà̄n endaji - bata - ijiwebisiwad, wika gaie tchi wissokawassiwag metchi - gjuwed , gonima metchi-dodang, gaie nin tibishko tchi ijiwebisissiwà̄n.

**ANAMIEWIN.**

Kije-Manito nosse kejewadisiiian, kawin ganage pangi gego nin da-gashkitossin tchi mino dodamàn widokawissiwan. Kid iji pagossenimin dash tchi widokawiian, gwaia-kwendamowin tchi mijiian, tchi apitchi jingendamàn kakina batadowinan, kin dash meshkwat tchi apitchi sagiinàn, weweni mojag tchi anokitonàn mino ijiwebisiwining, binish tchi wabaminan kid ogimawiwining.



10. *Gotanda ki matchi ijiwebisiwininan gegishkamang ; batadowinensan gaie.*

AKINA bemadisidjig aking od aianawa matchi ijiwebisiwin, anind nawatch nibiwa, anind nawatch pang. Kawin gaie bejig matchi ijiwebisiwin kakina od aiansinawa, bebakan sa od aianawa. Anind memindage wi - bishigwatch - ijiwebisiwag , anind wi-sasagisiwag, anind wi-dajingewag mojag, minawa anind mojag wi-nishkadisiwag, anind dash wi-minikwewag. Bebakan sa bemadisidjig o mojitonawa odeiwang matchi ijiwebisiwin. Kawin iw batadowan-sinon gigishkamowad anotch matchi ijiwebisiwin ; mi sa kakina ejiewebisiiang , mi ejiewebak anishinabewiwin, kawin awiia od ishkwa -gigishkansin matchi ijiwebisiwin. Winawa eta nitam anishinabeg bwa mashi matchi dodamowad kitchi kitiganing, kawin iwapi o gi-aiansinawa matchi ijiwebisiwin. Api dash baiata-ijiwebisiwad, mi iwapi gi-gashkitamasowad matchi ijiwebisiwin , kakina dash nongom kid aiamin. Kishpin dash awiia pabige webinang matchi inendamowin wi-matchi-dodang, kawin ta-bata-ijiwebisissi ; kishpin dash min-

wendang matchi inendamowin, ondjita dash matchi dodang, mi geget batadowining pangishing. Kishpin awiia wi-bishigwatch-ijiwebisid, nond dash jingendang iw, webinang gaie, kawin ta-bishigwatch-ijiwebisissi.

Nibiwa enamiadjig kawin kikenindisosiwag ejiwebisiwad, kawin gaie o wikwatchitossinawa iw tchi kikenindisowad; kawin dash o migadansinawa iw matchi ijiwebisiwin gegishkamowad, mi dash nanningim bata-ijiwebisiwad. — Jawendagos enamiad weweni kekenindisod, weweni gaie mojag migadang o matchi ijiwebisiwin; kawin gwetch wika ta-bata-dissi. Kishpin awiia wi-kikenindisossig ejiwebisid, geget nibiwa ta-matchi-dodam, kawin dash ganabatch weweni ta-anwenindisossi enigokodeed. Anawi ta-ikito: Nind anwenindis gi-bata-ijiwebisiiàn; gonima dash waiejindiso, gonima ondji kashkendam eta bata-ijiwebadinig iw endodang, kawin dash wendji-kashkendansi gi-dodang. Apeghish matchi ijiwebassinog iw endodamàn, inendam eta. — Kishpin awiia wikwatchitossig tchi kikenindisod, geget sanagisi, kawin gaie o debwetansin gagikwewin, misawa anwenimind. Anisha ki da-waban-

daa gego awiia pessangwabid, kawin sa o wi-wabandansin. Anisha gaie ki da-minaa mashkiki awiia ekitod: Kawin nind akosissi. Mi tibishko gaie awiia wa-kikenidisossig ejivebisid, anisha ki da-gagikima, kawin o debwetansin gagikwewin, kawin gaie o wi-odapinansin. — Geget jawendagosи enamiad gwaiak kekenindisod ejimatchi-ijiwebisid, kishpin bekish weweni anwenindisod, mashkawendang gaie tchi migadang mojag o matchi ijiwebisiwin, wika ondjita tchi matchi dodansig.

Bejigwan iw ge-gotaman oma aking, ninidjaniss, mi sa batadowin, kakina gego maianadak. Jawendagosи enamiad gwtang batadowin! Kishpin awiia weweni gotang batadowin, kawin bakan gego o gotansin; bisan bimadisi, gwaiak ijiwebisi oma aking megwa bimadisid. Geget jawendagosи!— Apegish nissitoman weweni, tchi apitchi gotaman, apine tchi jingendaman batadowin. Kawin dash kitchi batadowin eta ki da-jingendansin, ki da-gotansin; kakina gaie *batadowinensan* ki da-jingendanan. Batadowinens kawin geget iji manadassinon, kitchi batadowin ejimanadak; anawi dash matchi ijiwebad gaie win batadowinens. Weweni tchi nissitota-

man epitch manadak batadowinens, ow ki da-nanagatawenda:

1. Enamiad batadowinensing pengishing o nishkian Kije-Maniton, o matchi dodawan; kawin apitchi geget, eniwek dash. Batadowinens gaie win gi-ondji-kashkendam Jesus, gi-ondji-mawi, gi-ondji-kotagendam gaie. Mi dash iw ge-ondji-jingendaman gaie kakina batadowinensan. Kishpin awiia sagiad bemadisindjin aking, kawin o matchi dodawassin, kawin gego dodansi ge-ondji-kashkendamiad saiagadjin. Awashime dash enamiad o da-sagian Kije-Maniton, kakina dash aking bemadisindjin; mi dash iw ge-ondji-ojindang, minik eji-gashkitod, kakina gego ge-ondji-kashkendamiad Debenimigodjin saiagadjin. Kishpin kinawind aking bemadisiiang tibishko iji mino ijiwebisiiang, ketchitwendagosidjig gijigong ebidjig eji-mino-ijiwebisiwad, awashime weweni ki da-nisitotamin, eji-manadak gaie win batadowinens. Geget winawa kitchi minwenda-mog gashkitossigwa ganage batadowinensing tchi pangishinowad, apitchi gaie gwaiak o kikendanawa wika tchi pangishinsigwa. Eji-kikendamowad epitch manadadinig gaie win batadowinens, awa-

shime da-minwendamog, kakina kotagito-win tchi odapinamowad, iw dash batadowinensing tchi pangishinowad.

Nawatch dash weweni tchi nissitotaman ejii-manadak gaie win batadowinens, ejii-jingendang gaie Debeniminang kakina batadowinensan, mikwendan ga-iji-dodawad Kije-Manito anind ga-bata-ijiwebisinidjin. Anawi kawin apitchi gi-bata-dissiwag, kid inendamin; apitchi dash Kije-Manito o gi-dodawan. Lot wiwan anisha gi-abanabewan gi-sakidenig odena Sodome, mi dash ga-iji-nibod ima, gi-jiwitaganowi sa. — Moise gaie, ga-kitchi-anokitawad mojag Kije-Maniton, ningoting panggi gi-matchi-inendam, kawin pabige Debendjigenidjin o gi-apenimossinan, mi dash ow ga-igod : “Gi-matchi-inendaman, kawin ki gad-oditansin wenijishing aki Canaan, wassa eta ki gad-onsabandan, mi dash tchi niboian.” — David gaie, ga-kitchi-sagiad mojag Kije-Maniton, ningoting panggi gi-maminaden-dam odeing, mi dash ga-ondji-anokid tchi agindjigasonid kakina od anishinabeman; pabige dash Debendjiged kitchi akosiwin o gi-minan iniw anishinaben, mi dash kitchi nibiwa gi-nibowad. — Aw dash Osa panggi o gi-tanginan iw Gaiat-ijitwawinini-

makak ga-kitchitwawendagwadinig, mi dash sesika ga-ondji-nibod ima. — Anind gaie kwiwisensag, nimidana ashi nij, o gi-bapiawan ketchitwawendagosinidjin ininiwan Elisean ; pabige dash Debeniminang o gi-ininajawan nij makwan, mi dash igiw nij makwag ga-iji-nissawad kakina iniw abinodjiian. — Kishpin Kije-Manito Debeniminang iji kitchi bashanjewad batadowinensing pengishininidjin, mi ima ge-ondji-nissitatamang eji-jingendang gaie batadowinensan, kawin eta kitchi batadowinan.

Minawa dash awashime ki ga-nissitotan iw, ninidjaniss, kishpin nanagatawendaman *gassiiakisowin*. Winawa gassiiakisowining ebidjig apitchi kitchi kotagitowag. Kawin gego kotagitowin aking endagog iji sanga-gassinon, eji-sanagak kotagitowin gassiiakisowiniag endagog. Mi dash wedi ebidjig wendji-kotagitowad batadowinensig gidapinewad, kawin kitchi batadowining ; kishpin sa awiia kitchi batadowining dapi ned, anamakamig kagine ishkoteng ija, kawin gassiiakisowining. Mi ima ge-ondji-nissitataman apitchi, eji-manadak gaie batadowinens. Mi dash ge-ondji-wikwatchitoian weweni tchi ojindaman kakina batadowinensan, minik eji-gashkitoian.

2. Minawa dash ow nanagatawenda.  
Geget batadowinens kawin kid ondji wanitossin kakina Kije-Manito o jawendjigewin,  
*pangi* dash anawi ki waniton. Kawin iw minik ki sagiigossi Kije-Manito, gaiat gaji-sagiik bwa pangishinan batadowinen-sing.— Kawin geget batadowinens ki gadondji-ijassi anamakamig ; kishpin dash babamendansiwan batadowinensan, waiba kitchi batadowining ki ga - daji - bimadis, mi dash anamakamig tchi ijaian, kishpin kitchi batadowining dapineian. — Kishpin batadowinensing pangishinan, kawin geget pabige nibossi ki tchitchag, akosi dash ; eshkam dash akosi, kishpin ondjita batadowinen-sing daji - bimadisiian , babamendansiwan dash.

Weweni nanagatawenda kakina iw, ki ga-gotan dash batadowinens, ki ga-jirgen-dan, weweni ki gad-ojindan. Missawa dash apitchi wikwatchitoian tchi ojindaman kakina batadowinensan, minotch naningotinong ki ga-pangishin. Mi ejiwebisiiang kakina. Potch winawa ketchitwawenda-gosidjig nongom gjigong ebidjig, megwa gi-aiawad aking, naningotinong gi-pangi-shinog batadowinen-sing. Win eta kitchitwa Marie, Kije - Manito ogin, win eta kawin

wika ganage pangī gi-bata-dissi. Ondjita sa Kije - Maniton o gi-ganawenimigon gi-wawenabamigod tchi nigiad Jesusan. Kakina dash bemadisidjig aking, missawa apitchi mino ijiwebisiwad naningotinong pangī kawin gwaiāk ijiwebisissiwag.

Kego dash, ninidjaniss, ningot inendangen, kego gaie anijitangen mino ijiwebisiwin; mojag apitchi wikkwatchiton tchi mino ijiwebisiiān, kego ganage bejig batadowinens sagitoken; kego wika *ondjita* matchi dodangen gego, kawin ganage pangī gego; pabige dash anwenindison kishpin gego pitchi-dodaman, pagossemim gaie Kije-Manito, mojag tchi ganawenimik, tibishko wenidjanissid inini eji-ganawenimad onidjanissan bimossenid.

#### GIJENDAMOWINAN.

1. Nin gjendam mojag tchi wikkwatchitoiān weweni tchi kikendamān nin matchi ijiwebisiwin, tchi gashkitoiān dash tchi migadamān, mi dash eshkam nāwatch tchi mino ijiwebisiiān. Kishpin kikenindisossiwān, kawin nin da-gashkitossin tchi nanai-toiān nind ijiwebisiwin; nin wi-wikkwatchiton dash weweni tchi kikenindisoiān.

2. Nin gjendam weweni tchi odapinamàn gagikindiwin, anwenindiwin gaie; migwetch nin gad-inenima ged-anwenimid; nin wi-pagossenima gaie awiia tchi anwenimid, kishpin wabandang gego nin matchi ijiwebisiwin.

3. Apitchi weweni nin gjendam tchi gotamàn gaie win batadowinens, tchi ojindamàn gaie win. Kawin wika *ondjita* nin wi-bata-ijiwebisissi ganage pangí.

**ANAMIEWIN.**

Debenimiian Kije-Manito, kikendamoishin nin matchi ijiwebisiwin; jawenimishin eshkam tchi jingendamàn kakina maianadak, weweni gaie kaginig tchi ojindamàn kakina gego wendji-bata-ijiwebisiiàn. Jawenimishin, nosse, nibwakaishin, tchi nissitotamàn ejì-manadak gaie win batadowinens; mi dash gaie win tchi ojindamàn minik ejì-gashkitoiàñ.



11. *Kego enamiad ta-inendansi: Panima nagatch nin gad-anwenindis.*

ITCHI waiejindiso enamiad enendang:  
Panima nagatch nin gad-anwenindis.  
Mano nakawe nin ga-minawanigos, mano  
enendamàn nin gad-ijiwebis, panima dash  
ningoting nin gad-anwenindis, gwaiak dash  
nin gad-ijiwebis. — Geget kitchi waiejindiso,  
kitchi matchi dodaso gaie enamiad,  
kishpin iw inendang. — Weweni tchi nissi-  
totaman iw, ninidjaniss, ow nanagatawen-  
dan:

1. Kawin awiia o kikendansin, keiabi  
ginwenj tchi bimadisid aking, kawin ga-  
nage bejig dibaigans nigan awiia o kiken-  
dansin tchi nibossig. Kitchi sasagwana iw  
ijiwebad, sesika awiia nibod. Kawin ga-  
nage pangì nigan o kikendansin tchi nibod,  
mi go apitchi sesika ishkwa bimadisid.  
Kishpin dash iwapi gigishkang kitchi batad-  
owin, mi apine anamakamig kagige ishk-  
oteng apaginind. Kishpin dash gaie kin,  
ninidjaniss, nongom gigishkaman kitchi  
batadowin, ki kitchi kitimagis, kid apitchi  
nanisanis. Wegonen sesika niboian! Anindi  
ged-ijaian? — Na? Ki gagwedjimin, anindi

ged-ijaian? — — Kid apitchi kikendan na dash, sesika tchi nibossiwan? Kawin awiia iw o kikendansin. Kishpin enamiad nib-wakad da-inendam: Gonima nind inendagos gaie nin, sesika tchi niboian, gonima gaie waiba. — Mi gaie kin mojag ged-inendaman. Kego dash iw ijivebisiken tchi *inendaman* eta, *dodan* gaie eji-gagikimigoian. Anwenindison enigokodeeian, webinan iw batadowin gegishkaman, gawaiak dash dodan eji-gagikimik mekatewikwanaie naiasikawad. — Ninidjaniss, kawin na nawatch da-onijishinsinon, oma aking pangtchi kotagiidisoian, pangtchi gaie tchi mindjiminidisoian, iw dash kagigekamig ana-anamakamig tchi danakisoian kagine ishkoteng! — Nongom keiabi ki gashkiton tchi anwenindisoian, tchi webinaman ki kitchi batadowin gegishkaman, mi dash tchi apitchi gassiamagoian. Kishpin dash babamendansiwan, gonima kitchi waiba kawin ki ga-gashkitossin gego tchi webinaman, jaigwa ki ga-nibaw enassamid Kije-Manito, tchi dibakonigoian; mi dash tchi animisiian apine go anamakamig. — Geget ki kitchi gagibadis, ki kitchi gagibingwe gaie, kishpin *ondjita* kitchi batadowining *daji-bimadisiian*!

2. Ow dash gaie nanagatawandan. Kije-Manito o masinaiganing ow ojibiigade : “Wewib anwenindison ; kitchi sesika Kije-Manito ki ga-pakiteog tchi bwa inendaman, epitch nishkiad.” Kin kid ig Debendjiged iw ; kishpin dash babamenimas-siwap, nawatch ki nishkia. Kawin anisha Kije-Manito ikitossi gego. Geget ki ga-pakiteog tchi niboian, kishpin keiabi nish-kiad. Sesika gaie ki ga-pakiteog. — Ki gotan na sesika-nibowin? — Ki gotan sa ; apitchi sa gotamigwendagwad. Kishpin dash gotaman, enigokodeeian anwenindison nongom igo ; webinan dash, boniton gaie iw wendji-gotaman sesika-nibowin.

Geget gagibadisi enamiad enendang : Panima nagatch nin gad-anwenindis. Memindage dash gagibadisi ow enendang : Mano nin ga-minawanigos epitch mino aiaiàn ; panima dash akosiiàn nin gad-anwenindis. Geget sa gagibadendam enamiad iw enendang. Kawin sa awiia o kikendansin, nakawe tchi akosid tchi bwa nibod ; gonima sesika ta-nibo. — Kishpin dash geget nakawe akosid tchi bwa nibod, kawin iwapi pitchinag o ga-gashkitossin weweni tchi anwenindisod api ketchi-akosid. Ki kikendan sa, ninidjaniss, ejii-kiti-

magisid aiakosid. Kawin ganage o gashkitossin, weweni tchi nanagatawenindisod, weweni gaie tchi gigitod; kawin gaie gego o babamendansin, nebangin ima jingishin nibaganing. Mi na dash iwapi weweni tchi anwenindisod? — Bejig ga-mino-ijiwebisid inini sesika gi-kitchi-akosi, mi dash mekatewikwanaien gi-bi-wabamigod, ow dash o gi-igon: Ninidjaniss, anwenindison enigokodeeian, ojitan weweni, kawin ki ga-bimadisissi. — Aw dash aiakosid ow o gi-inan mekatewikwanaien: Kawin nongom nin gashkitossin tchi nanagatawennindisoian, osam ninamad nind inendamowin. Nin kitchi minwendam, kija gi-ojitaian; kawin nongom nin da-gashkitossin tchi ojitaian tchi mino niboian. — Geget gi-nibwaka aw inini, kija gi-ojitat gi-anwenindisod, gi-webinang, gi-bonitod kakina maiandak; mi dash weweni ginibod. Mi iw ge-nanagatawendaman, ninidjaniss, nassab gaie kin tchi dodaman.

Kishpin awiia nibod bwa sagiad Kije-Maniton, sagitod dash gego maianadak, kawin win gijigong ta-ijassi. Kid inendam na dash tchi gashkitoian tchi sagiad Kije-Manito sesika api aiakosiiian, kishpin wikwatchitossiwan tchi sagiad megwa mino

aiaian? Kid inendam na gaie tchi gashkitoian pabige tchi webinaman tchi jingen-daman gaie maianadak, api ged-akosian, kishpin anwenindisossiwan, wikwatchitos-siwan gaie tchi jingendaman batadowinan, tchi bwa akosian? Weweni eta nanagata-wendang awiia, weweni gaie gjijdang, mi gashkitod tchi andjitod od inendamowin, ode gaie. Ki ga-gashkiton na dash we-weni tchi nanagatawendaman, kishpin kitchi akosian? Sanagad iw weweni tchi nibong; kawin pabige awiia o gashkitossin iw. Ginwenj eta wikwatchitod awiia, ginwenj gaie ojitat megwa mino aiad, mi aw ge-mino-nibod. Kishpin dash awiia iwapi pitchinag madjitar, api enendagosid tchi ishkwater, kawin weweni ijitchigessi.

Kishpin awiia ginwenj batadowining daji-bimadisid, kawin weweni ta-anwenindisossi api jaigwa wa-nibod. Kije-Manito eta, win kakina gego geshkitod, o da-gash-kiton tchi minad ketchi-akosinidjin gwaiak anwenindisowin; kawin dash ganabatch o ga-minassin, kishpin ondjita iwapi pitchinag wi-anwenindisonid. — Nanagatawenda iw, ninidjaniss. Kishpin ginwenj batadowining daji-bimadisiian, eshkam ki nishkia Debeniminang; kishpin dash mojag nish-

kiad, kid inendam na tchi minik gwaiak anwenindisowin, api jaigwa wa-niboian, tchi minik gaie kagige minawanigosiwın gjigong? Kawin ganabatch; osam gin-wenj mojag ki gi-nishkia. Kawin iwapi ki ga-gashkitossin weweni tchi anwenindisoian, gwaiak gaie tchi gassiamagoian. Nawatch da-onijishin, megwa mino aiaian tchi anwenindisoian, tchi adjitoian kid ijiwebisiwin, mi dash gwaiak tchi gassiamagoian ki batadowinan. Geget dash ki ga-jawendagos api ged-ishkwa-bimadisiian aking; kaginig sa gjigong ki ga-jawendagos.

Missawa gaie awiia anwenindisod api jaigwa wa-ishkwa-bimadisid, iwapi pitchinag anwenindisod, kawin weweni anwenindisossi. (Wika ganabatch awiia iwapi weweni ta-anwenindiso.) Mi sa iwapi wendji-anwenindisod segisid. O gotan nibo-win, o gotan gaie Kije-Manito o dibakoni-gewin, mi wendji-anwenindisod inwasod; kawin dash ganabatch odeing kashkendansi gi-nishkiad Kije-Maniton. Kishpin gaie iwapi pitchinag webinang matchi ijiwebisiwin, kawin geget win o nagadansin matchi ijiwebisiwin, kawin; matchi ijiwebisiwin sa o naganigon. Kishpin sa awiia

api jaigwa gega wa-ishkwa-bimadisid, pitchinag wi-nagadang giwashkwebiwin, bishigwadisiwin, gimodiwin, matchi minawanigosiw; geget kawin win o naga-dansin iw maianadak, iw sa maianadak o naganigon.

Geget sanagad weweni tchi anwenindisong api jaigwa wa-ishkwa-bimadising. Osam iwapi kotagendam aiakosid, migoshkadendam gaie; kawin o gashkitossin we-weni tchi nanagatawendang. — Kishpin awiia ningotchi wa-ijadjin, ow da-ikitod : Kawin nongom uin wi-bosissi, megwa an-wating, gonima minwanimak ; panima kitchi niskadak, kitchi gotamigwak gaie, nin ga-bos ; kawin na da-kitchi-gagibadisissi? Awashime dash kin, ninidjaniss, ki gagibadis, kishpin anwenindisossiwan megwa bisan bimadisiian, mino aiaian gaie. Nongom weweni ki da-gashkiton tchi nanagatawennindisoian, enigokodeeian tchi anwenindisoian, gwaiak tchi adjitoian ki bimadisiwin, mi dash weweni tchi ijiwebisiian. Kishpin dash bitoian kitchi akosiwin, iwapi dash pitchinag wi-anwenindisoian, kawin ki ga-gashkitossin.

Mano dash, ninidjaniss, apitchi mashkawendan, wewib nongom tchi adjitoian ki

bimadisiwin, tchi bonitoian maianadak, wika minawa ondjita tchi matchi ijiwebisissiwan. Ow sa nagatawendañ. Kishpin kitchi batadowin gigiskaman, geget ki kitchi kitimagis; wegonen sesika niboian! Nongom Kije-Manito ki wi-minig o jawendjigewin, ki wi-widokag gaie tchi gashkitoian weweni tchi adjitoian kid ijiwebiswin. Kishpin nongom babamendansiwan iw Kije-Manito o jawendjigewin, odapinamawassiwad gaie, gonima nagatch kawin ki ga-minigossi. — Minawa dash ow naga-gatawendañ. Kishpin ikitoian: Beka, beka; nagatch nin ga-nagadan nin matchi ijiwebisiwin, nagatch nin gad-anwenindis; ki kitchi matchi ikit, ki matchi ijitchige gaie; kawin ki tchitchag iw minik kid apitenimassi epitendaman kiiaw. Kishpin sa kijaodisoian, kawin kid ikitossi; Beka, beka; panima nagatch, wabang, gonima awasswabang, nin gad-agobis, wenijishing mashkiki nin wi-aton, kawin nongom; kawin iw kid ikitossi; pabige ki jawenindis, wenijishing mashkiki kid aton, weweni kid agobis, waiba tchi gigeian, tchi nodjimoian. Kishpin dash ki tchitchag kijawad, (mi sa kitchi batadowining pangishinan,) kawin ki jawenimassi, kawin waiba ki wi-nodji-

moassi ; panima, panima, kid inendam. — Geget ki gagibadis kishpin awashime kiiaw apitendaman, ki tchitchag epitenimad.

Anawi sa dash kid ikit : Kawin kitchi batadowining nin wi-dapinessi. Kid inendam sa anawi tchi bonitoian ki bata-ijiwebisiwin. Wegonen dash *nongom* wendji-bonitossiwan megwa keiabi bimadisiian? Kid inendam na awashime weweni tchi gashkitoian tchi bonitoian panima nagatch? Awashime na nagatch Kije-Manito ki ga-jawenimig mojag nishkiad? Awashime na ta-wenipanad tchi bonitoian matchi ijiwebisiwin, kishpin ginwenj batadowining daji-bimadisiiau? Awashime na nagatch tamino-inagode kide, kishpin ginwenj agon-wetawad Kije - Manito? — Kawin, nindjaniss, eshkam ta-sanagad.

Minawa dash ōw nanagatawendan. Kije-Manito Debeniminang kakina gego o kikendan, kakina gego kija inakonige. O kikendan win api ge-niboian, kawin kin ki kikendansin ; kija dash gi-inakonige iw minik ge-wi-jawenimik bata-ijiwebisiian; kishpin dash awashime matchi dodaman, kawin keiabi ki ga-jawenimigossi. Win eta o kikendan iw, kawin kin. Gonima waiba ki ga-moshkinadon iw dibaigan, mi

sa ki batadowini-dibaigan ; gonima keiabi *bejig* kitchi batadowin, mi tchi moshkineg ki dibaigan ; kawin dash keiabi Kije-Manito ki ga-jawenimigossi, ki gad-apitchi-webinig ; mi dash batadowining tchi dapi-neian, kagigekamig dash anamakamig ki ga-danakis. Mi ganabatch ged-ijiwebak, kishpin ondjita keiabi batadowining wi-daji-bimadisiian, panima nin gad-anwenindis, mojag inendaman.

Kitchi nibiwa danakisowag kagige ishkoteng, nawatch-ganabatch ga-mino-ijiwebisidjig, kin nongom ejiwebisiian ; kawin iw minik kitchi batadowinan o gi-aiansinawan, kin eji-aiaian jaigwa ; gi-dapinewag dash kitchi batadowining, mi dash wedi danakisowad kagige ishkoteng. Ki kikendan na dash kin tchi dapinessiwan kitchi batadowining, kishpin ginwenj jaigwa kitchi batadowining daji-bimadisiian ? Mikwendan dassing ga-iji-wikwatchitamasoian anamakunig tchi apaginigoian. Dassing sa kitchi batadowining pangishinan, ki wikwatchitamas tchi apaginigoian ima kagige ishkoteng ! Kishpin dash nongom, megwa wabandaman mandan masinaigan, kitchi batadowining daji-bimadisiian, kishpin se-sika niboian, anindi bakan ged-ijaian ? Mi

go wedi kagige ishkoteng ! — Ninidjaniss,  
ninidjaniss, jawenindison, kitimagenindis-  
son ! —

Kishpin gegibingwed inini bimossed mikanang, mi dash megwekana dagomagak kitchi wanikan, gwaiak ima wanikaning ta-pangishin kishpin ani-bimossed. Mi go gaie kin, baiata-ijiwebisiian, gegibingwenging kid ani-bimosse batadowini-mikanang, mi dash gwaiak kitchi wanikaning endagomagak kagige ishkote, kid ani-bimosse. Missawa gaie eshkam na-watch kitchi bata-ijiwebisisiwan, kitchi batadowin dash apine gigishkaman, mi ima batadowini-mikanang bimosseian, megwekana dash dagomagad iw wanikan gwetamigwendagwak; mi dash ima ganabatch waiba ge-pangishinan.

Minawa dash kid inin: Ninidjaniss, jawenindison! — Kego waiejindisoken. Nin ga-biig Kije-Manito; kego inendangen. Ginwenj jaigwa ki biig, kid ano nandomig, eji-kijewadisid; kid agonwetawa dash, eji-matchi-ijiwebisiian. Minotch dash keiabi kid ikit: Nin ga-biig. Anawi geget kitchi kijewadisi Kije-Manito Debenimina-nang. Kishpin apitchi kijewadisissig, ka-win kin ganabatch keiabi ogidakamig ki

da-babamossessi, jaigwa anamakamig ki da-danakis gaie kin. Geget kijewadisi ; be-kish dash o kitchi jingendan batadowin ; kagige ishkoteng dash od apaginan baiata-ijiwebisinidjin, kishpin naianj anwenindisossinig. Kishpin gaie biad baiata-ijiwebisinidjin tchi anwenindisonid, kawin od inassin minik ge-wi-biad. Gi-ikito potch : “*Mojag akawabamig Debendjiged ; tadagwishin sa api enendansiweg.*” Mi dash, ninidjaniss, minawa ininān : Jawenindison, jawenindison ! Kishpin kikenindisoian, kitchi batadowining daji-bimadisiian, wewib anwenindison, weweni webinigen, apitchi dash mashkawendan, gwaiak tchi ijiwebsiian, enigokodeeian gaie tchi sagiad Debeniminang Kije-Manito.

#### GIJENDAMOWINAN.

1. Gwaiak nongom nin gjendam tchi andjitoiān nin bimadisiwin, kawin panima nagatch, *nongom igo*.
2. Nin gjendam, wika tchi inendansi-wān : Panima akosiiān, jaigwa wi-ishkwabimadisiān, nin gad-anwenindis. Kitchi nibiwa anamakamig danakisowag kagige ishkoteng, ga-inendangig iw megwa gi-

bimadisiwad aking. Kawin nin wedi nin wi-ijassi.

3. Nin gjendam gaie, sasagwana tchi webinigeià̄n, weweni gaie tchi wi-babamitawag mekatewikwan aie. Api ge-gagikimid, ow nin gad-inendam: Kije-Manito nongom nin gaganonig, kawin nin wi-agonwetawassi. Mi mojag ged - inendamàn dassing ge-nondamàn anamie-gagikwewin, dassing gaie ge-webinigeià̄n.

#### ANAMIEWIN.

Kije-Manito kejewadisiian, kid iji pagosenimin tchi widokawiian, gwaiak tchi dodamàn ga-iji-gijendamàn nongom. Nind agatch, mojag agonwetonan. Weweni nongom ki wi-babamiton, jawenimishin. Kawin keiabi nin wi-inendansi, nakawe tchi nishkiinan, tchi matchi dodonan, panima dash nagatch tchi mino anokitonan; pabige nongom ki wi-anokiton weweni, binish dash tchi ishkwa-bimadisiià̄n ki wi-anokiton, ki wi-sagiin gaie enigokodeeià̄n, epitch kitchi kijewadisiian. Widokawishin, Kije-Manito nosse, apine tchi mino ijiwebisià̄n, kin ejì-minwendamàn, mi dash kaginig gjigong tchi wishdanakiminan.

12. *Jesus gi-kotagitod ki batadowinininanin ondji, mi ge-ondji-kikendamang ej-i-manadak batadowin.*

I kikendan, ninidjaniss, ga-iji-kotagitod Jesus, gi-bi-ijad oma aking, gi-bi-nodjimoad ki tchitchagonanin. Ki batadowinininan sa gi-ondji-kotagito. Kawin win gi-matchi-dodansi, tchi gi-ondji-kotagitod dash, kawin ; kinawind sa ki gi-matchi-dodamin ; gi-gashkitossiwang dash tchi webinamang, win o gi-odapinaninan ki batadowinininan tchi gassiamagoiang ; mi dash iw ga-ondji-kotagitod, mi eta ki batadowinininan gi-ondji-kotagitod.

Anawi jaigwa nibiwa debwewini-ikitowinan ki gi-wabandanan mandan masinaganing binish nongom, ge-ondji-kikendaman ej-i-manadak batadowin. Awashime dash, ninidjaniss, ki ga - nissitotan ej-i-manadak, kishpin nanagatawendaman, nongom ge-windamonan oma.

Jesus sa o kotagitowin weweni mikwendan, weweni gaie nanagatawendan, mi dash tchi nissitotaman epitch manadak batadowin. Apitchi sa Jesus gi-kitchi-kotagendum o tchitchagong, gaie dash wiiawing. Ka-

win kinawind ganage ki da-gashkitossimin weweni tchi nissitotamang ga-iji-kotagitod. Minik dash eji-gashkitoiang nanagatawendanda.

1. Jesus gi-kitchi-kashkendam minik gabimadisid aking. Gi-bi-ija sa oma aking tchi gassiamonang kakina ki batadowininanin, mi dash ga-ondji-odapinang kakina; win dash o gi-aianan, win o gi-gigishkanan kakina ki batadowininanin; mi dash ga-ondji-kitchi-kashkendang. Geget gi-kitchi-kotagendam.

2. Gi-kitchi-wissagendam gaie o tchitchagong Jesus, gi-kikendang kija ged-iji-webisiwad baiata-didjig. Kawin sa o wi-inabadjitossinawa iw kotagitowin ga-odapinang Jesus kinawind ondji, tchi mininanng kagige bimadisiwin gjigong. Gi-kitchi-wissagendam dash o tchitchagong, gi-wabandang iw kija; gi-kitchi-mawi, gi-kitchi-animendam, miskwi dash gi-abweso ga-apitch-wissagendang.

3. Gi-kitchi-segendam gaie Jesus odeing gi-wabandang kakina ki batadowininanin ga-odapinang; mi dash gi-mikwendang Kije-Manito o nishkadisiwin, eji-jingendang gaie Kije-Manito batadowinan, eji-kitchidodawad gaie baiata-ijiwebisinidjin. Ka-

win eta api wa-ishkwa-bimadisid Jesus gi-kotagendansi, mojag sa minik ga-bimadisid aking gi-kotagendam, gi-segendar gaie odeing, ki batadowininanin ondji.

4. Gi-kitchi-agatendam gaie Jesus ki matchi ijiwebisiwininanin ondji ga-odapinang. O gi-kitchi-agatchitawan Ossan Kije-Maniton. Apitchi sa Jesus o kiken dan eji-jingendang Kije-Manito kakina batadowinan; kakina dash o gi-aianan gi-odapinang ki batadowininanin; mi ga-ondji-agatchitawad Ossan. Win gaie gi-agatchitadiso eji-Kije-Manitowid, gi-gigish kang kakina ki matchi ijiwebisiwininanin. Gi-kitchi-agatendam gaie gi-matchi-inind, gi-matchi-dodawind gaie. Mojag sa gi-matchi-ina, gemodishkidjin, apitchi metchi-ijiwebisidjin gi-dodawa, win ga-apitchi-mino-ijiwebisid!

Kishpin kakina iw nanagatawendamang, mi pangtchi nissitotamang ga-iji-kotagendang Jesus o tchitchagong, ki batadowininanin ondji; mi eta iniw ondji! Mi dashima ge-ondji-kikendamang eji-manadak batadowin, eji-jingendagwak gaie. Kawin ki gashkitossimin weweni tchi nissitotamang ga-iji-kotagitod Jesus minik ga-bimadisid aking. Kishpin apitchi weweni nis-

sitotamang iw, awashime ki da-kikendamin eji-manadak bata-ijiwebisiwin.

Minawa dash, ninidjaniss, nanagatawenden dan ga-jji-kotagitod Jesus wiiawing. Kawin ki da-gashkitossimin weweni tchi nisstotamang Jesus o kotagitowin, minik gaiji-kotagitod gaie wiiawing. Awashime win gi-kotagito, kakina dash oma aking gwetagitodjig mamawi. Minik ga-bimadisid aking gi-kotagito gi-kitchi-kitimagisid. Api dash jaigwa odjitchissenig iw tchi ishkwa-aiad aking, gi-apitchi-kitchi-matchidodawa, ishkwatch dash tchibaiatigong gi-sassagakwawa, mi dash gi-agodjing ima binish gi-nibod. Kakina dash iw, ki batadowninanin gi-ondji-kotagito; kawin win wiwa ganage panggi gi-matchi-dodansi.

Ow dash nongom mikwendan : Kije-Manito kossinan gjigong ebid o kitchi sagian Ogwissan Jesusan ; o pagidinan dash tchi apitchi kotagitonid. — Geget kitchi mamakadendagwad ! — O kikendan sa, kawin bakan gego da-ondji-gassiigadesson batadowin, mi eta kotagitod, nibod gaie Kije-Manito Ogwissan, mi eta ge-ondji-gassiigadeg. Missawa gaie kakina anishinabeg aking bemadisidjig kotagitowad, nibowad gaie, kawin da-ondji-gas-

siigadessinon batadowin, mi eta Kije-Manito kotagitol, nibod gaie, mi pitchinag gassiigade. — Ah! wegonen iw batadowin! — Kawin wika awiia o ga-de-nissitansin eji-kitchi-manadak batadowin, eji-kitchi-jingendang Kije-Manito kakina batadowinan.

Weweni, ninidjaniss, kakina iw nanganawandan, gotan dash batadowin. Kije-Manito tibinawe Ogwissan saiagiadjin o gi-apitchi-kotagian, batadowin gi-ondjikotagiad; anin dash kin ge-dodok ningoting, kishpin ondjtā batadowining dajilimadisiian, kishpin gaie batadowining dapineian? — Apitchi gotan, apitchi jingendan, apitchi ojindan kakina batadowinan.

Nawatch dash weweni tchi ojindaman kakina batadowinau, ow inendan: Jesus nin wi-ondji-ojindan kakina maianadak. Apitchi Jesus kijewadisi, nin kitchi mino dodag; kawin minawa nin wi-nishkiassi, enigokodeeiān nin wi-sagia. Ka wika nin wi-wanendansin ga-iji-kitchi-kotagitol, nin ondji, tchi mijid kagige bimadisiwin gjigong. Enigokodeeiān migwetch nind inenima. Potch oma aking bemadisid gego minō dodawid, migwetch nind inenima.

Apitchi dash win Jesus nin gi-mino-dodag, anamakamig kagine ishkoteng nin gi-agwashimig, gijigong dash kagine minawanigosiwining nin wi-odapinig; geget apitchi nin mino dodag; mi ge-ondji-ojindamān kakina batadowinan, tchi mamoiawagenimag mojag, enigokodeeiān tchi sagiag.

Ow gaie mojag mikwendan: Nin nandawenimig Jesus tchi sagiag; mi ge-ondjisagiag enigokodeeiān. Kije - Manito o masinaiganing ow ojibiiгадe: “Ningwiss, mijishin kide.” Jesus nind ig iw mojag. Geget dash nin wi-mina kakina ninde. Gaie win Jesus kakina ode nin minig, nin kitchi sagiig, kakina o miskwim o gi-siginan, o bimadisiwin gaie o gi-pagidinan, tchi mijid kagine jawendagosiwin gijigong. Mi sa ge-ondji-jingendamān, mi ge-ondji-ojindamān weweni kakina batadowinan, epitch sagiag Jesus. — Mi mojag ged-inendaman, ninidjaniss; ki ga-kitchi-jawendagos dash; ki ga-sagia Jesus, gaie dash win Jesus ki ga-sagiig.

#### GIJENDAMOWINAN.

1. Apitchi nongom nin gijendam, wika tchi wanendansiwan ga-iji-kotagitod Jesus

ki batadowininanin ondji, mi dash tchi apitchi jingendamàn batadowinan.

2. Nin gjendam gaie tchi apitchi sagiag Jesus , mojag migwetch tchi inenimag. Win nitam nin gi-sagiig , nin-gi-apitchi-mino-dodag , mi ge-ondji-sagiag , kawin nin wi-matchi-dodawassi , kawin batadowining nin wi-bimadisissi. Kawin Jesus nin da-sagiassi , kawin gaie win nin da-sagiigosi , kishpin batadowining daji-bimadisiiàn.

**ANAMIEWIN.**

Debenimiian Jesus , ga-sassagakwaogonian tchibaiatigong , nin ondji , enigokode-eiàn ki pagossenimin tchi mijiian gawaiak anwenindisowin , enigokodeeiàn tchi anwenindisoiàn minik ga - matchi - dodonan binish nongom ; mashkawendamiishin gaie , weweni tchi odapinamàn kakina gego senagak ge-mijian , kotagiidisowining sa tchi odapinamàn , mi dash tchi gassiamawiian nin batadowinan , tchi mijiian gaie ki jawendjigewin , wika minawa batadowining tchi daji-bimadisissiwàn .



13. *Kego babamenimassidanig bemadisi-djig ekitowad.*

ITCHI nibiwā anotch ejī-matchi-ijiwebisidjig enamiadjig anawi kashkendamog ejīwebisiwad, kawin dash o bonitossinawan o match ijiwebisiwiniwan; osam sa o gossawan bemadisinidjin, ningot tchi ikitonid. — Mi ow enendang baiata-ijiwebisid: Kishpin andjitoiān nin bimadisiwin, bakan dash tchi ijiwebisiiān, wegonen gedikitowad nidjikiweiag? Nin ga-bapiigog. — Kishpin keiabi wissokawassiwad aw, wegonen ged-ikitod? Gaie dash anishinabeg oma anotch nin gad-igog. — Kishpin ojindamān iw wakaigan, wika minawa pindigessiwān, wegonen ged-ikitowad bemadisidjig? Geget nin ga-bapiigog. — Kishpin gaie ijiwebisissiwān, kakina weshkinigidjig gaie nidjikiweiag ejīwekisiwad, wegonen ged-ikitowad? Anotch nin ga-matchi-igog, gonima gaie ningot nin ga-dodagog.

Mi enendang, mi ekitod gaie anotch ejīwebisid enamiad gegibadisid. Geget gagibadisi win iw ekitod. Awashime o gossan bemadisinidjin aking, Kije-Maniton dash Debendjigenidjin; kawin dash enamian-

gin jjiwebisissi. Nissitotan iw, ninidjaniss. Gwaiak enamiad *o ga-gossan* Kije-Maniton, bekish dash gaie *o ga-sagian*. Win dash mojag ow ekitod : “Wegonen gedikitowad bemadisidjig”? kawin Kije-Maniton gwaiak o gossassin, kawin gaie weweni o sagiassassin. Kishpin gwaiak Kije-Maniton gossad, awashime o da-gossan, kakina dash bemadisinidjin aking. Pabige da-inendam : Kishpin andjitoiān nin bimadisiwin, bonitoiān gaie matchi jjiwebisiwin, geget nin ga-bapiigog anind bemadisidjig gegibadisidjig, anotch nin gad-igog. Mi go eta iw. Kishpin dash bonitossiwān nongom nin bata-ijiwebisiwin, gonima nin gadapine kitchi batadowining, win dash Debenimid Kije-Manito nin ga-dibakonig, mi dash apine anamakamig tchi animisiān. Mi sa enendang gwaiak enamiad gwessad Kije-Maniton. Kawin dash ondjiita batadowining ta-bimadisissi, osam o gossan Debendjigenidjin.— Kishpin gaie weweni sagiad ossan gjigong ebinidjin, awashime o sagian kakina dash bemadisinidjin aking. Enigokodeed dash inendam : Awashime nin minwendam tchi ijiwebisiān, Kije-Manito ejī-minwendang, iw dash tchi dodamān ejī-minwendamowad bemadisidjig aking ge-

gibadisidjig. Mi enendang gwaiak enamiad, bekish dash kitchi songendam, pabige tchi webinang kakina maianadak, enigokodeed dash tchi odapinang kakina gego wenijishing. Mi sa ejiwebisid gwaiak enamiad ; *o gossan* Kije-Maniton, bekish gaie *o sagian*. Awashime dash *o gossan*, awashime gaie *o sagian*, kakina dash bemadisi-nidjin aking.

Kishpin dash iw ijirwebisid, kawin *o bamenimasssin* widj' anishinaben ekitonid. Ow sa inendam : Mano ta-ikitowag minik ge-wi-ikitowad ; mano anotch nin gad-igog, mano nin ga-jingenimigog, mano gaie nin ga-dodagog minik ge-wi-dodawiwad. Kishpin eta Kije-Manito noss gjigong ebid sagiid, kishpin eta win minwendang endodamān, mi tchi apitchi minwendamān, mi tchi minawanigwendamān nindeing ; megwaii gaie matchi dajindiwining, wegwaii gaie kotagitowining nin ga-kitchi-minwendam nindeing. Mi enendang swangana-miad. Mi dash gaie kin, ninidjaniss, mojag ged-inendaman, ki ga-kitchi-jawendagos dash. Kego dash babamenimaken, kego gossaken kidj' anishinabeg aking, gego wi-mino-dodaman. Kije-Manito eta goshi, enigokodeeian gaie sagi.

Minawa dash ow mindjimendan. Kishpin gego nandawenimigoian tchi dodaman, tchi ijitchigeian, dodan kishpin onijishing; missawa sanagak, dodan, tchi mino doda-wad kidj' anishinabe, tchi minwendamiad gaie. Kishpin dash manadak iw nenda-wenimigoian, kego dodangen; mikwenim Kije-Manito, pabige dash inendan: Nin wabamig Kije-Manito, kawin nin wi-dodansin; missawa gaie ningot igoiān, gonima gaie gego dodagoiān, kawin nin wi-matchi-dodansi. Naningotinong enamiad tchibaiatigogijigadinig ningotchi pindige endawad bakan ejitwadjig, ashama dash wiiass, pabige dash od odapinan, o midjin gaie; anawi dash o kikendan matchi dodang, inendam dash: Kishpin midjissiwān, kawin ta-minwendansiwag. Kawin dash inendansi: Kishpin dash midjiiān, nin ga-matchi-dodam, kawin dash Kije-Manito ta-minwendansi; kawin iw inendansi. Awashime sa o gossan, awashime gaie o mandjian widj'anishinaben, Kije-Maniton dash. — Gonima gaie ningotchi pindige endaji-minikwewad ishkotewabo; minaa dash gaie win. Anawi kawin minwendansi tchi minikwed, o kikendan sa eji-jingendang Kije-Manito matchi minikwewin, minotch dash

od odapinan minikwed; inendam sa: Kishpin minikwessiwàn, kawin ta-minwendansiwag nidj' anishinabeg. Kawin dash inendansi : Kishpin dash minikweiàn, win Debenimid Kije-Manito kawin ta-minwendansi; kawin iw o babamendansin. Geget awashime o manadjian, awashime gaie o gossan bemadisinidjin aking, Kije-Maniton dash. Kishpin iw ijiwebisid, kitchi nibiwa matchi dodam; ta-kitchi-agatchi dash, ta-kitchi-animisi gaie dibakonige-gijigadinig ; gi-ikito sa Jesus: "Kishpin awiia awashime babamenimad, awashime gaie gossad, manadjiad gaie widj' anishinaben, ejima-nadjiad Kije-Maniton, kawin apitendagosissi enamiad tchi inind," — Kitchi segen-dagwad iw ikitowin! Kishpin awiia apitendagosissig enamiad tchi inind, ka wika o ga-wabandansin kagige jawendagosiwang gjigong; kid-anamiewininan sa eta, mi ge-ondji-gashkitioang gjigong tchi ijaiang.

Enamiad bebamendang iw ged-ikitowad anishinabeg, geget kitchi gagibadisi. — Tchi babamendansiwan dash, ninidjaniss, ow nanagatawenda:

1. Mano ta-ikitowag anishinabeg minik ge-wi-ikitowad, kawin dash bakan gego o gashkitossinawa, mi eta dananagidonowad.

Kawin nawatch nind ondji kitimagisissi, kawin gaie nawatch nind ondji-danissi, anotch igoiān ; kawin nawatch nin matchiaissi, kawin gaie nawatch nin mino aiassi, anisha dajimigoiān. Mano ta-ikitowag minik ge-wi-ikitowad. Mi ged-inendaman ; kego dash babamendangen anotch danaganidonowin. Kije-Manito ki wabamig, win kid apitchi kikenimig ejiwebisiian ; mi dash ow ged-inendaman mojag : Apegish gwaiak ijiwebisiān enassamid Kije-Manito ; kawin dash anotch ekitodjig nin wi - babamenimassig.

2. Kawin awiia bemadisid aking o dagashkitossin tchi apitchi ojindang iw anotch dajindiwin ; missawa apitchi mino ijiwebisid, potch naningotinong ta-dajima. Mi go gaie win Jesus, ga-apitchi-mino-ijiwebisid , sasagwana gi-matchi-dajima. Kid inendam na dash kin wika tchi dajimigosawan ? Kego iw inendangen, inendan dash tchi babamendansiwan dajindiwin, ti'bishko Jesus ga-iji-babamendansig. Pabige gaie mikwenim Jesus , kishpin anisha dajimigoian ; tibishko dash win ga - iji - bekadisid gi-matchi-dajimind, mi go gaie kin ged-iji-bekadisiian.

3. Kawin o kikendansinawa ekitowad igiw anotch ekitodjig. Gwaiak ejiewebisiniidjin naningotinong anotch gego od inawan, gegibadisnidjin dash o minwenimawan. Pabige gaie o dibakonawan widj'anishinabewan, tchi bwa apitchi kikenimawad, geget dash anisha od inawan anotch maianadak. Win eta Kije-Manito kakina gego o kikendan, win eta gwaiak ta-dibakonige.

Kishpin kakina iw nanagatawendaman, kawin keiabi ki ga-babamenimassig anotch ekitodjig, kawin gaie ki ga-kashkendansin, kishpin ningot igoian. Ow dash eta apitchi mashkawendant : Apegish gwaiak ijiewebisiian enassamid Kije-Manito, apegish win mojag minwendang ejiewebisiian. Winawa dash nidj' anishinabeg, mano tamwendamog, mano gaie kawin ta-minwendansiwag, ejiewebisiian. Apegish Kije-Manito minwenimid, apegish win sagiid ; mano dash bemadisidjig nin ga-jingenimigog. — Mi mojag ged-inendaman, ninidjaniss ; ki ga-kitchi-jawendagos dash.

**GIJENDAMOWINAN.**

1. Nin kitchi gjendam, weweni mojag tchi anokitawag Kije-Manito; kawin dash nidj' anishinabeg nin wi-babamenimassig ged-ikitowad. Kishpin iji gashkitoiān awiia gego tchi mino dodawag, nin wi-dodawa eji-minwendang Kije-Manito ; kawin dash wiwa nin wi - babamitawassi awiia nenda-wenimid tchi dodamān gego eji - minwendansig Kije-Manito. Awashime win Debeniminang nin wi-gossa, awashime gaie nin wi-sagia, kakina dash bemadisidjig aking.

2. Nin gjendam, kishpin gego matchi dodamān, mi dash iw wendji-dajimigoiān, kawin nin wi-nishkadisissi, nin wi-tabasse-nindis, nin wi - anwenindis gaie enigoko-deeiān, apitchi dash nin wi-songendam, wiwa minawa tchi dodansiwān. Kishpin dash anisha matchi dajimigoiān , nin wi-mikwenima Jesus, anisha ga - iji - dajimind mojag ; beka dash nin wi-odapinan iw da-jindiwin ; kawin gaie nin wi-jingenimassī aw metchi-dajimind.

**ANAMIEWIN.**

Debenimijan Kije-Manito, jawenimishin mijishin mino inendamowin, kin eta tchi apitchi sagiinàn, weweni gaie tchi gossinàn, tchi babamendansiwàn dash nidj' anishinabeg o dananagidonowiniwa. Songendamiihin tchi mino ganawenindisoian mojag, weweni gaie tchi anokitonan binish tchi ishkwa-bimadisiian.



#### 14. *Weweni odapinanda kotagisowin.*

WIN enamiad o da-gashkitossin weweni tchi anokitawad Kije-Maniton, tchi gashkitamasod gaie kagine jawendagosiwin gjigong, kishpin weweni odapinansig kotagitowin, minik manigod Kije-Maniton.

1. Kishpin inendaman weweni tchi anokitawad Kije-Manito, songandan, mojag tchi ijiwebisiian ej-minwendang Debeniminaang. Kishpin dash weweni odapinansiwan kotagitowin, kawin ki songendansi tchi ijiwebisiian enendang Kije-Manito. Anisha dash kid ina anamiaian: “Enendaman apegish ijiwebak, tibishko gjigong mi go gaie aking.” Inendam sa win tchi kotagitoiang oma aking, ej-matchi-ijiwebisiang. Ki batadowininanin sa kid qndji kotagitomin aking. Win sa Debiniminang kid inenimigonan tchi kotagitoiang, win ki ininigonan kotagitowin. Kishpin dash awiia gwaiak wi-anokitowad Kije-Maniton, weweni o gad-odapinan kakina kotagitowin. Jesus ow gi-ikito: “Kishpin awiia wi-nopinajid, (mi sa wi-anamiad,) o gad-odapinan o tchibaiatigoman endasso-gijigadinig, (mi sa kotagitowin o gad-odapinan,)

mi dash tchi nopolajid. Kawin enamian-gin inenimassi awiia enassaminid Kije-Maniton, kishpin kotagutowin weweni wi-odapinansig. Swanganamiad gwaiak eno-kitawad Kije-Maniton, mi aw weweni wedapinang kakina kotagutowin minik manigod Kije-Maniton.

Anind enamiadjig nenibiwa anamiawag, minwendamog wi-anamiawad, wi-odapi-namowad gaie sasagwana Kitchitwa Eu-karistiwin, enogokodeewad gaie o ganowan Kije-Maniton anamiawad; kawin dash senagadinig gego weweni od odapi-nansinawa; kawin minwendansiwag, pa-bige nishkadisiwag; abiding matchi gano-nindwa, gonima gaie pang matchi doda-windwa, mi jaigwa nishkadisiwad. Megwa minwendamowad, mino aiawad bisan, gego kotagitossigwa, o mino anokitawawan Kije-Maniton; kishpin dash pang minindwa kotagutowin, mi pabige nishkadisiwad, kawin minwendansiwag, nishkadendamog, matchi ikitowag gaie, matchi dodamog gaie ko. Kawin sa iw o mikweendan-inawa, mojag tibishko tchi anokitawawad Kije-Maniton, kishpin minigod minawanigosiw, gonima gaie kotagutowin minigod. Potch awashime weweni o da-anokitawan enamiad, kishpin

minigod kotagutowin; ikito sa kitchitwa Paul: "Kije-Manito o bashanjewan saagiadjin, o pakitewan onidjanissan." Geget wenidjanissingin ki sagiig Kije - Manito, kishpin minik kotagutowin; ki bashanjeog sa pang oma aking bata-ijiwebisian, kagigekamig dash gijigong tchi jawendago-sian. Kishpin dash baiata-ijiwebisid oma aking kotagitossig, gonima gaie weweni odapinansig ketagutowin manigod Kije-Maniton, gonima win batdowining tadapine, mi dash kaginig anamakamig tchi kotagitol. — Ojibiigade ga - dodang ningoting kitchitwa Ambroise. Gi-danisi sa ningotchi wakaiganing. Aw dash inini debendang wakaigan gi - matchi - ijiwebisi, kawin dash wika kotagutowin o gi-aiansin. Mi dash kitchitwa Ambroise ga-ondji-ikitod: "Kawin Kije-Manito wenidjanissingin o sagiassassin iniw ininiwan, kawin sa wika o bashanjewassin. Nin segendam; ningot ta-ijiwebad; nin wi-sagaam oma." Mi dash ga-iji-nagadang iw wakaigan. Gasagaang dash k. Ambroise, mi waiba gi-gawisseg iw wakaigan; batadowining dash gi-dapine aw inini ga - dibendang wakai-gan. — Ninidjaniss, ged-apitch-minigoian kotagutowin, kego segisiken; ki sagiig

Kije-Manito, ki bashanjeog, wenidjanissingen ki dodag. Weweni dash odapinan iw kotagitowin, migwetch inenim; eshkam dash ki ga-sagiig. Kishpin dash matchi ijiwebisiian, gego dash kotagitowin aiansiwan, mi iwapi ge-segisiian, mi dash enigokodeeian tchi anwenindisoiyan.

Anawi kakina bemadisidjig aking od aianawa kotagitowin, anind nawatch nibiwa, anind nawatch pang; meno-ijiwebisidjig od aianawa, metchi-ijiwebisidjig gaie. Kije-Manito Debeniminang mojag ki mino inenimigonan kishpin mininang kotagitowin, mi sa tchi mino inabadjitoiang. Kawin dash kakina enamiadjig tibishko od odapinansinawa, kawin tibishko od inabadjitosinawa. Kishpin metchi-ijiwebisid minind kołagitolin, mi wendji-minind tchi anwenindisod, mi dash gwaiak tchi ijiwebisid. Kawin dash weweni od odapinansin, nishkadisi, matchi ikito, matchi dodam; eshkam dash nawatch nibiwa od aianan batadowinan. — Kishpin dash meno-ijiwebisid minind kotagitowin, mi wendji-minind tchi anwenindisod gaie win, kotagiidisowing tchi odapinang kotagitowin, eshkam tchi mino ijiwebisid, eshkam tchi sagiad Kije-Maniton. Weweni dash od odapinan,

migwetch od inan Kije-Maniton manigod kotagitolin, weweni od inabadjiton, kota-giidisowining od odapinan; geget dash awashime weweni od anokitawan Kije-Maniton, ga-iji-anokitawad dash megwa gi-minawanigosid. — Bebakan sa geget enamiadjig od odapinanawa kotagitolin. Mojag dash kin, ninidjaniss, weweni odapinan anotch gego senagak ge-minigoian, akosiwin, kitimagisiwin, kitchi anokiwin, matchi dajindiwin, kashkendamowin; kakina gego weweni odapinan, bekadisin ga-iji-bekadisid Jesus gi-kotagitod, gi-matchidodawind Pabige ow inendan: Nongom wenidjanissingin nin dodag noss gjigong ebid. Nin mamoiawama geget ej-sagiid. Mano win enendang ta-ijiwebad.

2. Kitchi inabadad geget kotagitolin, kishpin enamiad weweni odapinang, mi sa iw mikana gjigong enamog, kotagitolin. Gaie win Debeniminang Jesus, megwa gi-bimadisid aking, mojag kotagitolini-mikanaang gi-bimosse, binish kitchi kotagitolining gi-dapined tchibaiatigong, mi dash gjigong gi-ijad. Mi dash iw wendji-oji-biigadeg Kije - Manito o masinaiganing : “Gi-kotagitod Jesus Krist, mi ga-ondji-pindiged o kitchitwawisiwining gjigong.”

Gaie dash win enamiad, mi go gaie win kotagitowini-mikanang tchi bimossed aking, gwaiak dash gjigong ta-dagwishin. — Kego dash, ninidjaniss, ningot inendangen, kishpin minigoian kotagitowin. Pabige mikwendan epitendagwak kotagitowin enassamid Kije-Manito, kishpin weweni odapinamang. Papige dash gaie inendan: Migwetch nind inenima Kije-Manito mijid kotagitowin; nind inenimig sa weweni tchi odapinamawag, mi dash kotagitowini — mikanang gjigong inakakeia tchi ani-bimosseiān, Jesus ga-iji-bimossed gaie win. — Kishpin iw mindjimendaman, nanagatwendaman gaie, kawin ki ga-nishkaden-dansi minigoian kotagitowin, weweni ki gad-odapinan, gwaiak ki gad-inabadjiton. Aw kwetagitossig wika, da-segisi; da-inendam sa: Kawin oma aking ningot nin kotagitossi, ano matchi ijiwebisiiān, gonima dash wedi kaginig nin ga-kotagito. Mi get ged-inendang aw wika kwetagitossig. Aw dash kwetagitod da-inendam. Nin kikendan nongom inenimid Kije-Manito gjigong tchi ijaiān; kotagitowin sa nin minig, mi dash inenimid, kotagitowini-mikanang tchi bimosseiān, gjigong dash tchi dagwishinān. — Nawatch onijishin, oma

aking awiia wenibik tchi kotagitod, mi dash wedi gijigong kaginig tchi mino aiad, iw dash tchi winawanigosid megwa aking bimadisid wenibik, wedi dash kagigekamig tchi animisid. Gwaiak enamiad, aiapitchi-sagiad Kije-Maniton, geget o gotan minawanigosiwin aking, awashime dash kotagitowin o minwendan; kishpin gaie ginwenj kotagitossig, o nandotamawan Kije-Maniton kotagitowin, mi sa, kotagiidisowining tchi odapinang, mi dash wedi kagige bimadisiwining tchi kotagitossig. Winawa ketchitwawendagosidjig nongom gijigong ebidjig o gi-minwendanawa kotagitowin, sasagwana gaie o gi-nandotamawan Kije-Maniton tchi kotagiigowad. Mi dash gaie kitchitwa Augustin ga-iji-nandotamawad gi-anamiad : “*Debenimiian, mano tchagiswishin, mano kishkijwishin oma aking, wedi dash kakige bimadisiwining ja-wenimishin.*”

Memindage dash bejig kotagitowin weweni mojad odapinan, minwendan kishpin minigoian; mi sa *akosiwin*. Nijwaiagad iw ge-ondji-minwendaman.

1. Kishpin akosiian, memindage dash kishpin nita-akosiian, pabige inendan: Kije-Manito kakina gego o dibendan, nin bima-

disiwin gaie win o dibandan ; enendang dash nin minig, gonima mino bimadisiwin, gonima dash akosiwin. Apitchi gwaiak ijiwebad minik Kije-Manito enendang, minik gaie endodang. Kawin Kije-Manito o da-gashkitossin ganage pangtchi matchi inendang, tchi matchi ijitchiged gaie ; kakina gego apitchi mino dodam. Mijid iw akosiwin kitchi mino dodam. Kawin anawi nin kikendansin wendji-dodang Kije-Manito endodang, apitchi dash gwaiak nin kikendan mino dodang ; mino dodam gaie mijid iw akosiwin. Mi sa ged-inendaman. Kishpin dash weweni nanagatawendaman, mojag gaie mindjimendaman, kawin ki ganishkadendansi akosian ; migwetch potch ki gad-inenima Debeniminang ; ki ga-minwendam tchi ijiwebak win enendang ; endasso-gijigak sa kid ina anamiaian : “Enendaman apegish ijiwebak, tibishko gjigong mi go gaie aking ;” mano dash geget taijiwebad win enendang. Anawi o da-gashkiton Kije-Manito, pabige tchi minik mino bimadisiwin, tchi ishkwa-akosian dash ; kawin dash inendansi, inendam sa tchi akosian ; mano dash minwendan tchi ijiwebak, Kije-Manito enendang.

Gonima dash kid inendam : Osam nin

kitchi kotagito aking. — Anish geget ki kotagito, kego dash wika inendangen, *osam nibiwa* kotagitowin tchi minigoian. Kawin, *osam pangī* ki minigo; awashime jaigwa ki gi-wikwatchitamas tchi kotagitoian gi-bata-ijiwebisiian. Mikwendañ ejiwebak kitchi batadowin. Kishpin abiding eta kitchi batadowining gi-pangishinan, minik bema-disiian aking, ki gi-wikwatchitamas iwapi, anamakamig kagige ishkoteng tchi apaginigoian; ki gi-jawenimig dash Kije-Manito, kawin anamakamig kagige ishkoteng ki gi-apaginigossi, iw dash kotagitowin, kid akosiwin, ki minig meshkwat. Geget ki kitchi jawenimig. Kishpin iw weweni nissitaman, weweni gaie nanagatawendaman, kawin wika ki gad-inendansi : Osam nibiwa kotagitowin nin minig Kije-Manito. Kawin, osam pangī nin minig, ki gad-inendam. Mi dash tchi mamoiawamad Debeniminang; kagige kotagitowin ki gi-wikwatchitamas, pangī dash kotagitowin, kid akosiwin, ki minig. Kishpin dash weweni odapinaman, kawin wedi ki ga-kotagitossi. Geget migwetch ki gad-inenima, kishpin iw nanagatawendaman. Agepish weweni nissitaman, apitchi gaie debwetaman ki-deing.

Kego gaie, ninidjaniss, ow inendangen: Nawatch da - onijishin tchi akosissiwàn. Kishpin mino aiaiān nin da-anoki; nongom dash kawin ningot nind inabadisissi. Kego sa go iw inendangen. Kishpin sa weweni odapinaman kid akosiwin; Kije-Manito nind inenimig tchi jingishinàn oma, inendaman; mi apitchi mino dodaman, ki dodam sa iw enendang Kije-Manito; awashime dash iw kitchi mino dodamowin, kakina dash anokiwin endagog aking.

2. Minawa dash ow nanagatawendañ, tchi minwendaman kishpin minigoian akosiwin. Kitchi nibiwa wenijishing ondji-bamagad akosiwining, kishpin enamiad weweni odapinang. Kishpin sa enamiad akosid, weweni dash minwendang, o mino kikinoamawan ima eianidjin widj' anishinaben. Gaie dash winawa ima eiadjig kejewadisidjig, meno-anokidawadjig aiakosinidjin, geget kitchi mino dodamog; kitchi minwendam Kije-Manito, o minwendan sa Debeniminang kijewadisiwin. Memindage dash aiakosid jawenimind, mi kitchi mino dodamowin, apitchi o minwendan Jesus iw. Mi ga-ondji-ikitod kitchitwa François gi-akosid, mi dash gi-nanagatawenimad ima eianidjin kejewadisinidjin,

weweni enokitagodjin: "Geget nin kitchi minwendam nindeing, gi-ikito, eji-mino-dodawiwad ogow; kitchi mino dodamog; kagine minawanigosiwini gijigong o gagashkitonawa." — Mi sa geget ejiwebak; kishpin awiia akosid, nibiwa enamiadjig mino dodamog ganawenimawad, weweni gaie jawenimawad aiakosinidjin. Kitchi mino dodamog dash igiw; gi-ikito sa Jesus: "Nin igo nin mino dodag aw menododawad aiakosinidjin."

Minawa dash ow nanagatawendar. Geget onijishin akosiwin tchi ondji gassiamagoian ki batadowinan. Kishpin kotagiidisowining odapinaman kidakosiwin, weweni gaie bekish anwenindisoian kideing, ki gagassiamag Kije-Manito ki batadowinan; oma aking kotagitowin ki gad-aian, kagine kotagitowin dash kawin ki gad-aiansin. Kawin dash eta iw kagine kotagitowin anamakamig segendagwassinton, gaie iw kotagitowin gassiakisowining endagog kitchi sanagad; awashime sa iw sanagad, kakina dash kotagitowin aking. Kishpin kitchi batadowin aiansiwan, batadowinen-sing dash daji-bimadisiian, kawin geget anamakamig ki da-ijassi niboian, gassiakisowining dash ki da-kotagito ginwenj.

Kishpin dash kid akosiwin weweni odapinaman, enigokodeeian gaie anwenindisoian, ki ga-gassiamag Kije-Manito kakina ki batadowinan ; kishpin dash niboian, kawin gassiiakisowining ginwenj ki ga-kotagittossi. Ki nissitotan dash ima eji-onijishing kotagitowin, memindage akosiwin, kishpin weweni odapinaming. Awashime sa wenipanad ki nibaganing wenibik tchi kotagitoian, ima dash ishkoteng gassiiakisowining ginwenj tchi animisiiian.

Kishpin weweni odapinaman kotagitowin minik manigoian, kin igo ki jawenindis. Kid inenimig Debendjiged tchi kotagitoian ; missawa gaie minwendansiwan, potch ki gad-aian kotagitowin minik enendang Debendjiged. Kishpin nishkademan, minwendansiwan gaie, awashime ki ga-mojiton iw kotagitowin ; kishpin dash beka odapinaman, minwendaman gaie, mamoiawendaman gaie kideing, kawin gwetch ki ga-mojitossin kotagitowin, ki ga-widokag sa Kije-Manito, kawin dash geget gwetch ki ga-kikendansin kotagitoian. — Geget onijishin bekadisiwin ; tibishko Jesus ga-iji-bekadisid, mi tchi iji bekadisid gaie enamiad, minik eji-gashkitod, beka tchi

odapinang kotagutowin minik manigod Kije-Maniton.

Mi gaie anotch kotagutowin wendji-onijishing, tchi ondji-kikenindisoiang ejivebisiiang enassamid Kije-Manito. Onijishin iw weweni tchi kikenindisoiang, tchi waiejindisossiwang ; mi dash kotagutowining awashime weweni kikenindisoiang. Kishpin awiia mojag mino aiad, kawin sanagassini tchi minwendang, tchi nishkadendsig gaie ; kishpin dash kitimagisiwin, kota-gitowin gaie minind, mi go minwendansig ; mi ima kikenindisod ejivebisid.

Kishpin gaie awiia mino dodawind mojag, matchi dajimassiwind, kawin ta - nishkадиси, kawin gaie ta - matchi - ikitossi ; kishpin dash jaigwa matchi dodawind, matchi dajimind gaie, mi nishkадиси, matchi ikito dash gaie, gonima gaie o matchi dodawan ga - matchi - dodagodjin ; mi dash kikenindisod ej - matchi - ijiwebisid odeing.

Kawin iw sanagassinnon, awiia tchi mino ijiwebisid, tchi bekadisid gaie, kishpin nингот dodawassiwind, gego gaie kotagitossig. Kishpin dash awiia matchi dodawind, matchi dajimind, anotch kotagiind ; kawin dash win nishkадиси, kawin meshkwat matchi ikitossi, kawin gaie ajita matchi dodansi ;

mi aw geget gwaiak ijivebisid. Mi dash wendji-ikitong : Kotagitowining ki ga-ki-kenindis ejivebisiiān.

**GIJENDAMOWINAN.**

1. Nin gjijendam, mojag weweni tchi odapinamān kakina kotagitowin ge-minigoiān. Kawin anisha gego ijivebassino oma aking ; Kije-Manito kakina gego o dibendan ; win dash enendang mi eji - mininang. Mi dash iw ge-wi-mikwendamān, weweni tchi odapinamān minik ge-mijid Debendjiged kotagitowin.

2. Nin gjijendam dash gaie, akosiwin memindage weweni tchi odapinamān, migwetch tchi inendamān kishpin minigoiān : kitchi nibiwa sa wenijishing ondjabamagad akosiwining, kishpin weweni odapinaming.

3. Nin gjijendam gaie, tchi wikwatchittoiān weweni tchi kikenindisoiañ. Kotagitowining dash ejivebisiiān, mi ge-ondji-kikenindisoiañ.

**ANAMIEWIN.**

Kije-Manito Debenimiiān, aiapitchi-kijewadisiān, misi gego debendaman, enigo-

kodeeiān ki mamoiaawamin minik jewenimiiān. Kakina gego wenijishing ki mij ; kishpin gaie kotagitowin , kitimagisiwin, akosiwin, kashkendamowin gaie mijian, mi go gaie iw onijishing, kishpin weweni odapinamān. Kid iji pagosse nimin dash tchi jawenimiān tchi widokawiān, mojag tchi gashkitoiān tchi minwendamān kotagitowin, tchi nishkadendansiwān, tchi mino inabadjitoiān gaie minik manigoiān senagak, tchi gassiamawiān nin batadowinan , mi dash ningoting kid ogimawiwing gijigong tchi odapiniān.



15. *Nawatch onijishin kitimagisiwin,  
kitchi-daniwin dash.*

ITIMAGISIWAG anishinabeg, kawin kitchi-danissiwag. Kego dash, ninidjaniss, kashkendangen kitimagisiian. Awashime onijishin kitimagisiwin, iw dash kitchi-daniwin, awashime Jesus o minwendan. Anawi oma aking naningotinong onijishin kitchi-daniwin, minwendagwad gaie; minwendamog ketchi-danidjig, o sagitonawa o kitchi-daniwinwa, segendamog tchi wanitowad. Geget oma aking minwendagwad kitchi-daniwin. Mikwenda dash, ninidjaniss, wenibik eta awiia bimadisid aking; gi-ishkwa-bimadisid dash ogidakamig, kagige bimadisiwining ta-pindige wedi Nijwaiagad dash iw kagige bimadisiwin; kagige jawendagoswiin sa gijigong, kagige animisiwin gaie enamakamig. Mi dash iw kagige jawendagoswiin gijigong endagog tchi gashkitod enamiad, nawatch onijishinini tchi kitimagisid aking.

Potch oma aking kawin gwetch jawendagosissiwag, kawin minwendansiwig, ketchi-danidjig Wika awiia ketchi-danid jawendagosi, wika awiia debenimo, min-

wendam gaie. Mojag nawatch nibiwa o missawendant ketchi-danid, mojag gaie ko-tagendam nawatch nibiwa tchi gashkitod ; kawin sa minwendansi, kawin geget jawendagosissi. — Geget gaie winawa ketimagisidjig kawin mojag jawendagosissiwag, kawin minwendansiwig ; awashime dash batainowag ketimagisidjig jewendagosidjig, igiw dash ketchi-danidjig jewendagosidjig. Kishpin ketimagisid enamiad panginanagatawendum, debwetang gaie Kije-Manito od ikitowin, pabige minwendam, geget dash jawendagos.

Ketchi-danid mojag segisi tchi wanitod o kitchi-daniwin, tchi gimodimind, tchi makamind, gonima gaie bakan tchi ondji wanitod. — Kejimagisid dash kawin segissi tchi wanitassod ; kawin sa gwetch gego od aiansin ge-wanitod.

Ketchi-danid o sagiton o kitchi-daniwin, eshkam dash nibiwa o missawendant, wikkwatchito gaie eshkam tchi gashkitod; anotch dash naningotinong matchi dodam, gimodi, waiejinge, sasagisi, kawiu jajawendigessi. — Geget manedad kitchi-daniwin; potch oma aking kawin gwetch jawendagosissiwag ketchi-danidjig; wika ganabatch awiia jawendagos.

Kawin dash eta aking bimadisissim; bejig bimadisiwin wedi dagomagad, mi sa kagine bimadisiwin. Kishpin dash iw nanagatawendamang, awashime ki ga-nissitotamin eji-sanagak kitchi-daniwin, eji-manadak gaie, mojag gega. Tchi nissitotaman dash iw weweni, ninidjaniss, tchi debwetaman gaie, ow nanagatawendan. Jesus gi-ikito: "Kitchi sanagad iw tchi pindiged gijigong aw saiagiad joniiian. Nawaitch wenipanad, kitchi awessi tchi jabolled jaboniganing, aw dash ketchi-danid gijigong tchi pindiged." — Wegenen dash iw wendji-sanagak? Anish, sanagad sa iw tchi kitchi-danid awiia, tchi sagitossig dash kitchi-daniwin. O sagiton sa ketchi-danid o kitchi-daniwin, o kitchi sagiton, apitchi o ganawendant. Kishpin dash apitchi sagitod, meshkwat kawin Kije-Maniton o sagiassassin, kawin gaie widj' anishinaben gwetch o jawenimassassin, potch win igo tibinawe kawin jawenindisossi. Nanagatawendan dash iw tchi nissitotaman.

Kawin Kije-Maniton o sagiassassin, kawin gaie gwaiak o manadjassassin; matchi-mani-toke sa aw saiagiad joniiian; mi ejibiigadeg Kije-Manito o masinaiganing; *matchi manitokewin* mi edaming sasagisiwin. Mi

dash geget ejiwebak. Aw enamiassig menitoked o manitokenan masininin, joniia-masininin, osawa-joniia-masininin gaie; aw dash sesagisid od apitchi sagian joniian, geget o manitokenan joniian, osawa-joniian gaie; awashime od apiteniman, epitenimad Kije-Maniton; awashime gaie segisi tchi waniad o joniiaman, iw dash Kije-Maniton tchi waniad. Geget tanassag manitokewin sasagisiwin. — Naningoting gaie od apitchi waniton od anamiewin sesagisid. Mi wendji-ikitod kitchitwa Paul: "Anind sesagisidjig o gi-wanitonawa od anamiewiniwa." Mi geget; kishpin awiia osam sagiad joniian, kawin gwetch o babamendansin anamiewin, gaie anamie-gagikwewin; gegapi kakina o boniton od anamiewin. Mi sa gaie Phariseiag gaondji-jingenimawad Jesusan, gaie anamiewin o gi-jingendanawa; osam sa gi-sasagiswag. Aw gaie Juda, mi ga-ondji-atawed Jesusan, osam gi-sasagisid. Geget manitokewin sasagisiwin; mi dash ketchi-danidjig ejiwebisiwad iko. Mi dash Debeniminaang Jesus wendji-ikitod: "Kitchi sanagad iw, gijigong tchi pindiged ketchi-danid."

Kishpin awiia sagitod kitchi-daniwin, kawin gwetch widj' anishinaben o sagias-

sin, kawin gaie o jawenimassín, pepangi ganabatch naningotinong o jaweniman. Apitchi dash Kije-Manito kijewadisi, o minwendan gaie kijewadisiwin, o jingen-dan dash sasagisiwin. Kawin ta-jawendagosissi wedi ketchi-danid, kishpin iw ijiwebisid, sasagisid. Mi ga-ondji-ikitod Jesus: “Gi-nibo aw ga-kitchi-danid inini, anamakamig dash kagige ishkoteng gi-pagidenima; ga-kitimagisid dash gaie win gi-nibo, Anjeniwan dash gijigong o gimatjinigon.”

Kawin aw ketchi-danid sesagisid o jawenimassín ketimagisinidjin; potch win igo tibinawe kawin jawendisossi. Mi geget ijiwebisid sesagisid; kawin ganage win jawenindisossi, kawin gaie tibinawe onidjan-nisan o jawenimassín, kawin gwaiak o sagiassín, mi eta joníian aiapitchi-sagiad.— Geget kitchi matchi ijiwebad sasagisiwin wendjibamagak ima kitchi-daniwining.

Anind dash ketchi-danidjig kawin anawi od apitchi ganawenimassiwawan kakina o joniiamiwan, anawi dash ketimagisinidjin kawin o jawenimassiwawan, anotch dash gego wenijishininig o gishpinadonawa; geget o matchi aionawa o kitchi-daniwiniwa, o nishiwanadjitonawa gaie; kawin dash

Kije-Manito iji minwendansi, kishpin awiia nishiwanadjitod gego. Kid inenimigonan sa Debeniminang, kakina gego oma aking tchi mino inabadjitoang, tchi mino dodamang. Kishpin dash awiia mino dodansig, nishiwanadjitod dash anisha od inodewisiwin, o kitchi agonwetawan Kije-Maniton. Mi ga-ijiwebisid aw inini ga-kitchi-danid, eji-dibadujmod Jesus; anamakamig dash kagige ishkoteng gi-apagina ga-ishkwa-mino-aiad oma aking.

Kishpin kakina iw nanagatawendaman, ninidjaniss, ki ga-nissitotan wa-ikitomagak iw: Sanagad kitchi-daniwin; kawin gwetch awiia ketchi-danid gjigong ta-ijassi. — Gjigong tchi ijang nawatch onijishin kitimagisiwin; nawatch gaie Jesus o gi-minwendan kitimagisiwin, o gi-kitchi-apitendan gaie. Mikwendan ga-ikitod Jesus: Jawendagosiwag ketimagisidjig, kishpin sa minwendamowad.

Ki kitimagis ganabatch gaie kin, ninidjaniss, waiabandaman ow masinaigan. Mano dash, ninidjaniss, minwendan kitimagisiian, kego missawendangen kitchi-daniwin, nawatch onijishin kitimagisiwin. Kawin sa oma aking eta ki bimadisissi wenibik, kagigekamig sa wedi gjigong tchi

bimadisian, kid inenimig Kije-Manito; mi dash tchi ijaian, nawatch onijishin tchi kitimagisian aking, iw dash tchi kitchidaniian. Mano dash minwendan enenimigoian. Kid inenimig sa Debeniminang tchi kitimagisian, win ki minig kitimagiswin; mano dash weweni odapinan, Kije-Manito onindjing odapinan iw manigoian; o kikendan Kije-Manito endodang, wendjidodang gaie; apitchi sa mino dodam minik endodang; weweni minwendan endodagoian.

Mikwenim gaie Jesus ga-iji-aiad aking. Anawi kakina gego win o dibendan, Kije-Manitowid; o da-gi-gashkiton tchi kitchitwawisid, tchi kitchi-danid gaie, megwa gi-bimadisiid aking. Kitchi-daniwining na dash gi-bimadisi? Kawin; apitchi sa gi-kitimagisi. Kawin kin, ninidjaniss, missawa kitimagisian, kid iji kitimagisissi, Jesus ga-iji-kitmagisid aking. Kitchi kitimagisiwining gi-ondadisi pijikiwigamigong, mojag gaie kitchi kitimagisiwining gi-bimadisi, gi-kitchi-anoki mojag binish gi-ininiwid, (binish gi-nissimidana-dasso-bibonagisid.) Api dash ga-ininiwid, kawin gaie iwapi kitchi-daniwin o gi-nandawendansin; kawin kitchitwawisiwin, minawa kitimagi-

siwin o gi-sagiton, mojag dash kitchi kitimagisiwining gi-aia. Geget gi-kitchi-kitimagisi gi-baba-gagikwed; kawin endad o gi-aiansin, agwatching wadjiwing sasa-gwana gi-niba; anisha gaie gi-ashama, ke-jewadisinidjin o gi-ashamigon; kawin sa gego tibinawe o gi-aiansin. Mojag dash kitchi kitimagisiwining gi-bimadisi, binish kitchi kitimagisiwining gi-dapined tchibaatigong. — Mi sa Debeniminang ki Kije-Manitominan ga-iji-kitimagisid megwa oma gi-bimadisid aking. Wegonen dash kina-wind ge-ondji-minwendansiwang, kishpin inenimigoiang kitimagisiwing tchi bimadisiang ? — Weweni, ninidjaniss, odapinan kitimagisiwin, mamoiawamenim Jesus. Ow sa inendan : Geget nin sagiig, nin jawenimig Jesus. Win igo ga-iji-sagitod aking, nin minig, kitimagisiwin ; nind inenimig tchi aiaiān aking, win ga-iji-aiad. Mig-wetch endodawid Jesus. Mi ged-inendaman, ki ga-jawendagos dash kaginig.

**GIJENDAMOWINAN.**

1. Nin gjendam, wika tchi missawen-dansiwan kitchi-daniwin, kawin sa geget

jawendagosissiwag ketchi-danidjig, kawin ganage oma aking gwaiak jawendagosissiwag; osam gaie sanagad iw, gijigong tchi ijad ketchi-danid, gi-ishkwa-mino-aiad aking. Awashime kitimagisiwin onijishin.

2. Mi dash iw wendji - gijendamàn nin-deing, tchi minwendamàn kishpin kitimagisiàn; kawin nin wi-nishkadendansi, nin wi-minwendam enenimigoiàn tchi kitimagisiàn aking. Apegish dash gijigong mino aiaiàn kaginig; mi ged-inendamàn.

3. Nin gijendam dash gaie, kishpin gego aiaiàn, nin wi-mino-inabadjiton, nin wi-jajawenimag gaie ketimagisidjig minik ejigashkitoiàn.

#### ANAMIEWIN.

Jesus Debenimiian, ga-kikinoamawiiian tchi missawendansiwan kitchi - daniwin aking, enigokodeeiàn ki pagossenimin, mashkawendamiishin, tchi wika missawendansiwan; tchi nanagataweniminàn gaie mojag, ga-iji-kitimagisian aking, mi dash gi-kikinoamawiiian tchi minwendamàn ki-

timagisiwin. Songendamiiishin tchi mino odapinamàn ge-wi-mijiian, migwetch gaie tchi ineniminàn, kishpin mijiian kitimagi-siwin oma aking; meshkwat dash wedi mij kagige jawendagosiwin, kaginig wedi tchi wabaminàn kid ogimawiwing.



16. *Osam kitchi kitimagisiwin kawin onijishinsinon.*

NAWI kitimagisiwin onijishin. Awashime sa wenipanad iw, ikito Jesus, ketimagisid gijigong tchi ijad, aw dash ketchidanid. Osam dash kitchi kitimagisiwin kawin onijishinsinon. Mi dash iw wendji-ikitod nebwakad inini: Debenimiian Kije-Manito, ego mijishiken kitchi-daniwin, kego gaie kitchi kitimagisiwin. — Kishpin awiia osam kitimagisid, anotch matchi inendam, matchi ikito, matchi dodam gaie. Geget matchi inendam ; epitch sa kotagendang kitchi kitimagisid, mojag missawendjige, o missawendamawan gego nawatch meno-aianidjin ; matchi inendamowin dash iw missawendamowin. Matchi ikito gaie ; epitch sa missawendamawad gego meno-aianidjin, anotch o matchi inan. Kije-Maniton gaie o matchi inan anisha ; kawin nin minigossi gego, od inan. Geget kitchi matchi ikito. Matchi dodam gaie anotch ; o waiejiman sa widj' anishinaben eji-gashkitodjin, o gimodiman gaie, sasagwana sa gimodi ketchi-kitimagisid. Mi sa wendji-ikitong iw : Anawi onijishin kitimagisiwin,

osam dash kitchi kitimagisiwin kawin onijishinsinon.

Kishpin dash gaie kin, ninidjaniss, apitchi kitimagisiian, nanagatawenindison wendji-ijiwebisiian. Gonima kin kid indowin iw ejि-kitimagisiian. Gonima kawin weweni kid anokissi; naningotinong eta ganabatch kid anoki, kawin dash bejigwanong ; kawin dash ki de-gashkitamasossi ge-ondji-bimadisiian weweni, mi dash apitchi wendji-kitimagisiian. — Gonima dash anisha ki nishiwanadjiton iko minik geshkitamasoian; anotch gego ganabatch ki gishpinadon ge-gishpinadossiwan kitimagisiian ; gonima gaie ki minikweshk, kid atageshk gaie, mi dash iw wendji-kitchikitimagisiian. — Gonima gaie kawin weweni nigan ki nanagatawendansin ged-ijiwebak ; kishpin gego gashkitamasoian, pabige kakina ki tchaginan, waiba dash minawa ki manesin ge-midjiian, ged-agwiian gaie. — Gonima gaie osam ki migiweshk ; bekanisidjig ki minag, tibinawe dash kini-djanissag ki kitimagiag. — Anotch sa go gego awiia wendji - kitimagiidiso, apitchi dash kitchi kitimagisiwining bimadisi, mi dash anotch gego matchi ijitchiged.

Nanagatawenindison, ninidjaniss. Kish-

pin iw ijiwebisiiān, kin igo ki minidis kitchi kitimagisiwin. Kawin Kije - Manito kid inenimigossi tchi ijiwebisiiān ejiwebisiiān, wendji - kitimagisiian dash apitchi. Debeniminang Kije-Manito kid inenimig, weweni tchi anokiiān, tchi gashkitamasoian ge - ondji - mino - aiaian. Kitchi onijishin anokiwin, kitimiwin dash kitchi batadowin, Kid inenimigonan Debeniminang, mojag weweni tchi anokiiāng. Gaie win Kije-Manito mojag gi-anoki, megwa anishinabeng gi-bimadisid aking. Kishpin enamiad weweni anokissig, od agonwetawan Kije-Maniton ; kawin dash ganage apitendasissi tchi bimadisid aking. “*Kishpin awiia wi-anokissig, kawin gaie da-wissi-nissi*,” ikito kitchitwa Paul.

Kishpin dash anokiiān, gego dash gashkitamasoian, weweni ganawendañ iw, kego anisha banadjitoken ; ki ga-dibakonig sa ningoting Kije-Manito, ki ga-gagwedjimig dash ga - iji - inabadjitoian minik ga - gashkitamasoian gi - anokiiān ; kishpin dash matchi aioian, ki gad-animis dibakonige - gjigak. Kego wika inendangen : Nin nin dibendañ minik geshkitamasoiān anokiiān ; kego iw inendangen. Kije-Manito kakina gego o dibendañ ; kid awiigo-

nan dash anotch gego megwa bimadisiang aking, tchi aioiang, tchi mino inabadji-toiang, ge-ondji-minwendang Kije-Manito, ge-ondji-jawendagosiiang dash kinawind wedi kagige bimadisiwining. Mikwenda*n*w dibakonidi*n*win, mojag dash weweni inabadjiton minik geshkitoian anokiian. — Memindage dash ojindan matchi minikwe-win; apitchi sa enamiad matchi dodam minikwed ishkotewabo, banadjitod od aii-man, mi dash kitimagiidisod, onidjanissan gaie o kitimagian. — Gaie *n*w matchi atadi*n*win apitchi ojindan; apitchi manadad gaie *n*w; mi ima gaie awiia kitimagiidisod, kitimagiad gaie onidjanissan. — Nibwakan gaie ej*i*-bimadisiian aking, enamiad enendagosid tchi nibwakad. Nigan nanagata-wenda*n* ged-ijiwebak, kego nongom ej*i*-gijigak eta babamendangen, nigan nanagata-wenda*n*. Missawa nongom gijigak nibiwa aiaian ge-midjiian, kego ondjita osam nibiwa tchaginangen; manadandan ki midjim, manadjiton gaie kakina gego; gonima nagatch nin ga-manesin, inendan.

Mi sa, ninidjaniss, ged-ijiwebisiian; bekish gaie apenimon Kije-Manito, pagosse-nim gaie tchi minik, minik menessiian megwa bimadisiian aking; ki ga-minig dash

minik enendang. Minwendam sa Debenimang tchi nandotamawang gaie kakina gego menesiiang oma aking. Jesus ki kikinoamagonan, endasso-gijigak tchi nandotamawang kossinan gijigong ebid, minik menesiiang; mi wendji-ikitoiang anamiaiang: "Mijishinam nongom gijigak nin pakwejiganiminan, minik eioiāng endasso-gijigak." Mi sa wa-ikitoiang: Nossinan, jawenimishinam, kitimagenimishinam, kakina dash minik menesiiāng bimadisiang aking, kakina mijishinam eji-minwendaman; tibishko wenidjanissid inini eji-jawenimad onidjanissan bekadenidjin, ashamed weweni, mi iji jawenimishinam, enendaman. — Mi sa eji-kikinoamonang Jesus tchi anamiaiang endasso-gijigak; mi sa gaie kin eji-nandotamawad kossinan gijigong ebid. Bekish dash gaie weweni anokin, gwaiak gaie nibwakan; kawin dash kitchi kitimagisiwining ki ga-bimadisisi; kawin iw onijishinsinon.

Kishpin awiia osam kitimagisid, anotch matchi dodam, nin gi-ikit; waiejinge, gi-modi gaie. Nongom dash ow kid inin: Ninidjaniss, kishpin kikenindisoian gitachi-dodaman, gi-waiejimad awiia, gi-gimodimad gaie, apitchi enigokodeeian an-

wenindison, weweni webinigen, gaie dash neiab mij aw ga-waiejimad, ga-gimodimad gaie ; minik ga-mamawad, neiab mij kakina. Kishpin gego ishkonoman, ki kikenimig Kije-Manito ; kawin dash ki ga-gassiamagossi ki batadowin, binish tchi minad neiab kakina ga-gimodimad. Mindjimendan iw, babamendan gaie ; kitchi segendagwad iw. — Kishpin dash nongom gashkitossowan kakina neiab tchi minad aw ga-gimodimad, nawatch enigok anokin, waiba tchi gashkitoian neiab tchi minad. Awashime onijishin tchi kotagitoian oma aking, tchi kitimagisiian gaie, iw dash kitchi batadowining, mi sa gimodiwinning, tchi dapineian, mi dash kagigekamig anamakamig tchi animisiian.

**GIJENDAMOWINAN.**

1. Nin gjendam, weweni tchi anokiiān eji-minwendang Kije - Manito Debeniminnang. Win kid inenimigonan tchi anokiāng, mi ge-ondji-minwendamān gaie nin tchi anokiān ; gaie dash tchi gashkitamasoiān ge-ondji-bimadiān aking, osam tchi kitimagissiwān, mi gaie ge-ondji-anokiān.

2. Nin gjendam gaie, weweni mojag tchi inabadjitoià̄n ge-gashkitamasoià̄n; nin wabamig Debendjiged, nin kikenimig endòdamàn, nin ga-dibakonig dash ningoting, mi ge-ondji-mino-inabadjitoià̄n minik geshkitamasoiià̄n.

**ANAMIEWIN.**

Kije-Manito Debenimiian, enigokodeeià̄n kid iji pagossenimin, kego wika mijishiken kitchi-daniwin, osam sanagad iw, gjigong tchi ijad ketchi-danid; kego gaie, nosse, mijishiken osam kitchi kitimagisiwin, nibiwa sa ima ondjibamagad maianadak. Mijishin sa, Debenimiian, minik enendaman, minik sa kekendaman tchi mino inabadjitoià̄n, tchi wanitossiwà̄n kagige jawenda-gosiwin gjigong.



17. *Enamiad ta-nita-jawendjige, ta kijewadisi gaie.*

AKINA gega bemadisidjig aking awashime minwendamog tchi *minindua* geego, iw dash tchi *migiwewad*. Kawin dash enamiad iw da-ijiwebisisi ; gi-ikito sa Jesus: “Nawatch jawendagos i aw magiwed, aw dash manind.” — Mindjimedan iw, ninidjaniss ; kishpin dash inendaman tchi jawendagos ian gaie kin, nita-jawendjigen, kijewadisin gaie; minik ejii-gashkitoian jawenim ketimagisid. Anawi ganabatch ki kitimagis gaie kin ; awashime dash awiia kitimagisi, kin ejii-kitimagisi ian ; minik dash ejii-gashkitoian jawenim ; ki ga-kitchi-sagiig Jesus.

Memindage dash jawenim enokitok, mino dibaamaw, mino dodaw. Kishpin anonad awiia, weweni dibaamaw; awashime potch ki da-dibaamawa iw dash ga iji-wawindamawad. Kishpin awiia weweni dibaama-wassig enokitagodjin, apitchi geget matchi dodam, mi ejibiigadeg Kije - Manito o masinaiganing. Kishpin gego aiansiwan, gashkitossiwan tchi dibaamawad enokitok, kego nindawatch anonaken. Kishpin kija

kikendaman tchi gashkitossiwan weweni tchi dibaamawad, minotch dash anonad, mi dash geget dibaamawassiwad, gwaiak ki waiejima, ki **gimodima**. Ki kitchi matchi dodam dash; apitchi sa matchi dodam awiia, kishpin weweni dibaamawassig **enokitagodjin**.

Nawatch dash tchi minwendaman, tchi mashkawendaman gaie, **minik ejí-gashkitoian** tchi jajawenimad ketimagisid, **ow nanagatawenda**:

1. Kije-Manito Debeniminang kid igo-nan tchi migiweiang kid aiiminanin **minik ejí-gashkitoiang**. Win sa Kije-Manito od **apitchi dibendan kakina gego**, ki minigonan dash minik enendang; kishpin dash bejig nawatch nibiwa minad, mi iw wendjidodang, tchi jawenimad **aw endanid ketimagisinidjin**. — Ow ojibüigade Kije-Manito o masinaiganing: Kishpin awiia danid, wabamad dash ketimagisinidjin, kawin dash o jawenimassin, kawin gego o minassin; kawin win geget Kije-Maniton o sagiassassin, kawin gaie o babamitawassassin; kid igonan sa Kije-Manito tchi sagiangwa kidj' anishinabenanig ejí-sagiidisoiang — Mi sa, ninidjaniss, **ge-ondji-jawenimad ketimagi-**

sid, tchi sagiad Kije-Manito, tchi babamitawad gaie.

2. Minawa dash mikwendan ga-ikitod Jesus. Geget kitchi minwendagwadini od ikitowin. Ow sa gi-ikito: Dibakonige-gijigak nin gad-inag kejewadisidjig, netajawenimadjig ketimagisinidjin, ow nin gad-inag: Ondass ijag kinawa, Noss saiagiineg, pindigeg od ogimawiwin; gi-bakadeiān ki gi-agwiim, gi-akosiiān ki gi-bi-mawadissim.... — Ta-mamakadendamog dash kejewadisidjig, ta-ikitowag: Debendjigeian, aninwapi ga-wabamigoian gi-bakadeian, gi-ashamigowanen dash? gonima gi-pingwashagidiān, gi-agwiigowanen dash? gonima gi-akosiiān, gi-nasikagowanen dash? — Debendjiged dash ow o gad-inan: Geget kid inininim, minik ga-iji-dodawegwa ketimagisinidjig, nin igo ki gi-dodawim.

Geget kitchi minawendagwad iw ikitowin. Kishpin gego minad ketimagisid, win igo Jesus od odapinan iw; ki ga-jawenimig dash dibakonige-gijigak.

Bekish dash gaie mikwendan ged-inad Jesus sesagisinidjin. Ow sa o gad-inan: Awass ijag, matchi aiaawishidog, kagige ishkoteng; gi-bakadeiān kawin ki gi-asha-

missim, gi-pingwashagidiian kawin ki gi-agwiissim . . . — Ta-mamakadendamog dash gaie winawa sesagisidjig; wika jewninemassigog ketimagisinidjin; ow dash taikitowag: Debendjigeian, aniniwapi gwabamigoian gi-bakadeian, gi-pingwashagidiian, . . . mi dash gi-jawenimigossiwanen? — Debendjiged dash ow o gad-inan: Geget kid inininim, minik ga-iji-dodawassiwegwa ketimagisidjig, nin igo kawin ki gi-dodawissim. — Mi dash metchi-ijiwebisidjig kagine ishkoteng tchi ijawad; meno-ijiwebisidjig dash kagine bimadisiwing gjigong.

Nanagatawendañ kakina iw, ninidjanis. Ki kikinoamagonan sa ima Jesus, ge-dodawind kejewadisid, neta-jawenimad ketimagisinidjin; ge-dodawind dash gaie win-sesagisid, wika jewninemassig ketimagisinidjin widj' anishinaben. — Mojag dash gaie kin jawenim ketimagisid, minik ejigashkitoian, weweni gaie jawenim, ejiminodeeian mij ge-wi-minad, minwendan tchi jawenimad ketimagisid Kawin Kije-Manito weweni o gad-odapinansin ki migiwe-win, kishpin migiweian anawi, bekish dash kashkendaman migiweian. Minwendan jajawendjigeian, ki ga-minwendamia dash

Jesus, ki ga-minwendamia gaie ketimagisid; kishpin dash ano jajawendjigeian, bekish dash kashkendaman, ki ga-kashkendamia ketimagisid, Jesus gaie ki ga-kashkendamia.

3. Nawatch tchi minwendaman tchi jajawendjigeian, minawa ow nanagatawenden. Kego inendangen: Kishpin nita-jawendjigeian, waiba nin ga - kitimagis. Kawin; minik sa ejii-gashkitoian jawenim ketimagisid; bekish dash nita-anokin, gwaiak nibwakan, apenimon gaie Kije-Manito; kawin dash ki ga-kitimagisissi.

Mikwendan dash gaie ejibiigadeg Kije-Manito o masinaiganing. Jesus ow gi-ikito: "Jawenim ketimagisid, mij minik ejii-gashkitoian, ki ga-binis dash." — Ki ga-jawenimig sa Kije-Manito, ki ga-minig gwaiak anwenindisowin, tchi webinaman ki matchi ijiwebisiwin, tchi bonitoian ki bata-dodamowin, mi dash tchi binitoian kide. — Ojibbiigade gaie: "Kishpin gi-bata-ijiwebisiian, jajawendjigen, jawenim ketimagisid, ki gagassiamag dash Kije-Manito ki batadowinan." — "Kishpin nibi signigadeg ishkoteng, pabige atemagad ishkote; mi tibishko gaie, kishpin jajawendjigeian, ta-gassiiga-

dewan ki batadowinan." — Nanagatawen-dan kakina iw, ninidjaniss; minik dash ejigashkitoian mino dodaw ketimagisidjig.

#### GIJENDAMOWINAN.

1. Nin gjendam, mojag tchi mindjimendamān iw ga-ikitod Jesus : Nin igo nin dodag awiia minik endodawad widj' anishinaben, gonima mino dodawad, gonima gaie matchi dodawad. — Memindage dibakonige-gijigak o ga-mikwendanan Jesus ki mino dodamowininanin, gaie dash ki matchi dodamowininanin.

2. Nin gjendam dash, mojag tchi mino dodawag nidj' anishinabe ketimagisid, kakina gaie nidj' anishinabeg nijn wi-minododawag, kawin awiia nin wi-matchidodawassi ; Jesus sa nin dodawa endodawag nidj' anishinabe.

#### ANAMIEWIN.

Jesus Debenimiiian , migwetch kid inin ga-iji-kikinoamawiiian tchi mino dodawag nidj' anishinabe; migwetch gaie kid inin

eji-kijewadisiian, kin igo odapinaman minik  
jewenimag nidj' anishinabe ketimagisid.  
Jawenimishin, Jesus kejewadisiian, miji-  
shin mino inendamowin, tchi mino doda-  
màn minik eji-gashkitoàn, wenibik oma  
aking bimadisiiàn, mi dash wedi gjigong  
kaginig tchi wabaminan ki kitchitwawi-  
ning.



18. *Kitchi onijishin binideewin. Kitchi manadad giwashkwebinin.*

W<sup>W</sup>INAWA nongom, ninidjaniss, bejig  
A<sup>AA</sup>ijiwebisiwin nanagatawendañ, ge-  
ondji-sagiik Jesus; mi sa binisiwin, bini-  
deewin. Apitchi kitchi mino ijiwebisiwin  
binideewin. Kishpin binideeian, ki ga-  
sagiig Jesus, ki ga-kitchi-jawenimig dash;  
gi-ikito sa win: "Jawendagosiwag bani-  
deedjig; mi sa igiw Kije Maniton ge-wa-  
bamadjig." Geget Kije-Manito o kitchi  
sagian banideenidjin, o minan dash nibiwa  
o jawendjigewin, o minan gaie mino inen-  
damowinan. Kishpin dash awiia bishigwa-  
disid, memindage o jingenimigon Kije-  
Maniton, o naganigon. — Api Kije-Manito  
wa-anishinabewid, oshkinigikwen aiapi-  
tchi-binisinidjin o wawenabaman ge-nigii-  
god. — Kitchitwa Augustin gi-ikito:  
"Kishpin Kije-Manito wi-nigid, oshkinigik-  
wen eta o ga-nigiigon; kishpin oshkinigik-  
we wi-nigiawassod, Kije-Maniton eta  
o ga-nigian."

Jesus o gi-kitchi-sagiton, o gi-kitchitwa-  
wendan gaie binideewin. Igiw ga-gana-  
wenimadjig Jesusan waieshkat, gaie igiw

panima ga-apitchi-sagiadjig Jesusan, gaie dash Jesusan ga-apitchi-sagiigodjig, kakinia gi-kitchi-binideewag. Kitchitwa Marie, ga-nigiad Jesusan, gi-apitchi-binisi kaginig ; kitchitwa Joseph, ga-ganawenimad, ga-nitawigiad gaie Jesusan, gi-kitchi-binisi gaie win ; kitchitwa Jean-Baptiste, ga-mikanakawad Jesusan gi-gagikwed pagwadakamig, gi-kitchi-binisi kaginig ; kitchitwa Jean, ga-apitchi-sagiad Jesusan, gaie win ga-apitchi .sagiigod , gi-kitchi-binisi, ka wika gaie gi - widigessi ; kitchitwa Pierre, ga-ano-widiged waieshkat, o gi-ishkwa-widigeman ikwewan api ga-non-dawad Jesusan, mi dash gi-odapinang anamiewin, apitchi dash o gi-sagian Jesusan, gaie win dash o gi-sagiigon apitchi. — Mojag sa winawa banideedjig o gi-kitchi-sagiawan Jesusan, gaie dash win Debeniminnang o gi-kitchi-sagian mojag banideenidjin.

Mi dash keiabi nongom ijiwebak. Kishpin awiia binideessig, kawin geget o sagiassassin Jesusan, gaie win kawin o sagiigos-sin. Kishpin dash binideed awiia, geget jawendagos ; Jesusan sa o gigishkawan odeing, o kitchi sagiigon dash win. Geget kitchi jawendagos. Win eta banideed

gwaiak jawendagosi, gwaiak minawani-gwendam odeing. Beshigwadisid kawin geget jawendagosissi, kawin gwaiak jawendagosiwin o kikendansin. Missawa gaie bapid, minawanigosid gaie, kawin geget odeing minawanigosissi, sasagwana kashkendamidee, segendam gaie, o gossan sa Kije-Maniton, o gotan dibakonidiwin, kagige ishkote gaie; o kikendan sa enamiad eji-jingendang Kije - Manito bishigwadisiwin, o kikendan gaie, kagige ishkoteng tchi danakisod beshigwadisid; megwaii dash matchi minawanigosiwining na-ningotinong kashkendam nanagatawenindisod, kitchi kashkendam, bekish segisid.— Nanagatawenda iw, ninidjaniss, ki ganissitotan dash iw ekitong: Awashime jawendagosi, awashime gaie minawanigwendam banideed, aw dash beshigwadisid.

Apitchi dash mashkawenda tchi ganwendaman binideewin, tchi ejindaman dash bishigwadisiwin. Eji-kitchi-sagitod sa Jesus binideewin, mi epitch jingendang bishigwadisiwin. O kitchi nishkian Kije-Maniton beshigwadisid, o kitchi inigaan gaie o tchitchagwan. Mikwendan pangiga-iji-dodawad Debeniminang Kije-Manito beshigwadisinidjin, eji-wabandaming Kije-

**Manito o masinaiganing.** Ningoting Kije-Manito kakina bemadisinidjin aking nibikang o gi-dapinean, nishwasswi eta o gibimadjian kitchi nabikwaning. Wegonen dash ga-apitchi-matchi-dodamowad? Memindage sa gi-bishigwadisiwag, mi ga-ondji-dodawindwa. — Minawa dash ningoting Kije-Manito kitchi ishkote o gi-pangissiton ishpiming ondji, nanan dash odenawan gi-apitchi-sakidewan, kakina dash ima ga-aiadjig gi-tchagisowag. Mi sa minawa bishigwadisiwin ondji; osam sa gibishigwadisiwag igiw anishinabeg. Mi iw ga-ondji-dodang Kije-Manito, kakina beshigwadisidjig ged-ani-bimadisidjig aking tchi kikendamowad ged-iji-aiawad wedi ajibamadisiwining, kishpin bonitossigwa bishigwadisiwin; osam Kije-Manito o jingen-dan iw.

Mikwendan dash minawa ejibiigadeg Kije-Manito o masinaiganing : “Beshigwadisidjig kawin gijigong ta-pindigessiwag, banideedjig eta o ga-wabamawan Kije-Maniton gijigong.” Anindi dash ged-ijawad beshigwadisidjig gi-ishkwa-bimadisiwad aking ? Ojibiigade ged-ijawad. Kitchi sagaigan sa dagomagad wedi anamakamig, ishkote-sagaigan, osawi-makate dash da-

gonigade, mi dash ima agwindjinowad beshigwadisidjig. Jaigwa sa kitchi batainowag ima eiadjig, kakina dash beshig-watch ejiwebisidjig inendagosiwag wedi kaginig tchi agwindjinowad, kaginig tchi wissaginesiwad ima ishkote-sagaiganing, kishpin anwenindisossigwa waiba. *Waiba*, nind ikit. Osam sa jaigwa nibiwa o nishkiawan Kije-Maniton; ginwenj ganabatch jaigwa o bian tchi anwenindisonid; kishpin waiba anwenindisossigwa, waiba bonitossigwa bishigwadisiwin aiapitchi-jingen-dagwadinig, gonima o gad-apitchi-nishkia-wan Kije-Maniton, kawin dash o ga-mikansinawa jawendjigewin, kawin o gagashkitossinawa tchi anwenindisowad, tchi gassiamawindwa.

Mashkawendan dash kin, ninidjaniss waiabandaman mandan masinaigan, mashkawendan tchi apitchi ojindaman iw kitchi batadowin, bishigwadisiwin. Kego gaie wika awiia ondjeta jobiaken. Kishpin iw dodaman, ki bata-dodamo kidji-bimadisi, ki nishkia dash Kije-Manito. Nissitotan weweni. Kishpin sa oshkinawe, gonima oshkinigikwe osam sasegakwanaied, o jo-bian weshkinigidjin, o minan matchi inendamowin, matchi inabiwin, gegapi gaie o

matchi dodamoan. Mi dash wendji-ikitod kitchitwa Bernard: “*Matchi manito kid anokitawa, ki widokawa gaie, kishpin on-djita sasegakwanaieian.*” — Geget debwe aw nibwakawinini. Matchi manito geget mojag ki wi-minigonan matchi inendamowin, matchi ijiwebisiwin gaie, memindage bishigwadisiwin. Mi go gaie oshkinawe, gonima oshkinigikwe endodang, kishpin osam sasegakwanaied. Apitchi geget o widokawan matchi maniton. — Ninidjaniss, nanagatawenindison. Kishpin gaie kin naningo:inong iw ijiwebisiian, osam sasegakwanaieian, ki matchi dodam; an-wenindison, boniton; kego matchi manito widokawaken, kego dodangen endodang, eji-minwendang gaie. Ki wabamig Kije-Manito, ki ga-dibakonig waiba. — Kishpin dash wabamad sesegakwanaied, kego on-djita ganawabamaken, pabige bakan ningotchi inabin, madjan gaie.

Memindage gaie mino ganawandan *kish-kinjigon*. Kishpin mino ganawendansiwani, pabige ima ta-ondji-pindigemagad batadowin, tanassag ishkwandeming. Kego wika ondjita ganawabandangen maianadak gego; kishpin dash pitchi-wabandaman gego maianadak, pabige ningotchi bakan

inabin, pabige gaie webinan matchi inendamowin, kishkinjigong *ga-ondji-pindigemagak* ki tchitchagong. — Mi go gaie *kita-wagan* mino ganawendant, ishkwandeming apitendagwadon gaie iniw; mi ima wendjipindigemagak nibiwa maianadak, kishpin minwendaman matchi ikitowin, ondjita pisindaman; kego dash wika ondjita pisindangen. Kishpin beshigwadak gego nondaman, pabige bakan inendan, mikwenim Kije-Manito; kego ondjita pisindangen, pabige madjan, kishpin ijji gashkitoian.

Minawa dash, ninidjaniss, kishpin inendaman tchi binideeian, tchi ojindaman bishigwadisiwin *ajapitchi-jingendagwak*, kego anisha gaganonaken, kego wissokawaken gaie ikwe, memindage wenagoshigin; gaie dash ikwe kawin anisha *o ga-gaganonassin* ininiwan. Osam sa matchi ijiwebisi bemandisid aking, osam sa bishigwadisiwin inakakeia inagoden iode. Kishpin ganawenindisossig, pabige ta-bishigwatch - inendam, waiba gaie ta-matchi-dodam, kishpin weweni ganawenindisossig.

Tchi apitchi gashkitoian dash tchi ganawendantan binideewin, ow mindjimendant:

1. Apitchi songendant kideing tchi wiganawendaman binideewin, epitch onijish-

ing, epitch gaie minwendang Kije-Manito. Pabige gaie mikwenim Debeniminang Kije-Manito; ki ganawabamig sa apitchi besho.

2. Kego ningot inendangen, kishpin sa-sagwana odissigoian matchi inendamowin; kego gaie inendangen : Kawin nin da-gash-kitossin tchi jagodjitoän kakina nin matchi inendamowinan, osam batainad mojag. Kego inendangen; mojag dash mikwenim Kije-Manito dassing wedissikagoianin matchi inendamowin, pagossemim dash tchi mashkawendamiik ; ki ga-gashkiton dash tchi jagodjitoian kakina, weweni gaie kakina tchi webinaman pabige. Mikwendan gaie bekish wendjibamagak matchi inendamowin. Win sa jangenimik matchi manito ki minig matchi inendamowin ; apegish matchi ijiwebisid, tchi bi-ijad oma anamakamig, kid inenimig. Kego dash odapinamawaken, kego wedi wi-ijaken endanakisod aw matchi aiaawish.

3. Sagi Kije-Manito, goshi gaie bekish ; mi ged-ijiwebisid mojag enamiad ; memindage dash tchi ganawendang binideewin. Ninidjaniss, kishpin wikkwatchitoian we-weni tchi sagiad Kije-Manito, ki ga-jingenden meshkwat kakina bishigwadisiwin, gaie win sa od apitchi jingandan ; kishpin

dash wikkwachitoian weweni tchi gossad, kawin ondjita ki ga-dodansin gego enassamid Kije-Manito, ge-ondji - dibakonigoian apitchi, ge-ondji-webinigoian gaie dibakonige-gijigak. Memindage sa beshigwadi-sidjig ta-animisiwag, dibakonige-gijigadining; ta-webinawag, kagine ishkoteng ta-apaginawag gi-ishkwa - dibakonindwa. — Weweni, ninidjaniss, sagi Kije-Manito, weweni gaie goshi, kawin dash bishigwadisiwining ki ga-bimadisissi.

4. Weweni gaie ojindan nibadisiwin, memindage matchi minikwenin. Kishpin minwendaman matchi minikwewin, kawin ki ga-ganawendansin binideewin; anotch ki ga-matchi-ikit, anotch gaie ki ga-bishigwachchi-dodam, kishpin giwashkwebiian. Memindage iwapi matchi manito o dibendant kide, ejii-minwendang dash win, mi ejiwebisiian api gawashwebiian.

Awashime dash tchi jingendaman giwashkwebiwin, weweni gaie tchi ojindaman, ow mindjimandan. Gawaskwebid o waniton od inendamowin, o nibwakawin, awessiing dash ijiwebisi. Kishpin anishinabe nawatch mino ijiwebisid, nawatch gaie apitendago:id, awessi dash, mi sa iw o nibwakawin wendji-apitendagosid.

Kishpin dash ondjita webinang o nibwakawin giwashkwebid, mi geget awessiing ijiwebisid; naningotinong gaie awashime matchi ijiwebisi, awessi ejiwebisid. — Geget kitchi kashkendagwad iw.

Neta-minikwed kawin o babamitawassin Kije-Maniton. Anawi o kikendan eji-jingendang Kije-Manito giwashkwebiwin, kawin dash o bonitossin; kawin sa Kije-Maniton o babamitawissin. Kawin o sagassassin. Kawin enamiangin ejiwebisissi. — Neta-minikwed kawin mecatewikwanaien o babamitawassin. Win Debeniminang Kije-Manito od anonan mecatewikwanaien, win Debeniminang od inan tchi gagikwenid. Gi-ikito gaie Jesus; "Kishpin awiia pisindawad mecatewikwanaien gegikwenidjin, nin igo nin pisindag." Aw dash neta-minikwed kawin o babamitawassin mecatewikwanaien. Anawi ginaamagewag mecatewikwanaieg misiwe, tchi minikwessigwa anishinabeg ishkotewabo, osam matchi dodagemagad iw; kawin dash aw neta-minikwed o pisindawassin mecatewikwanaien, kawin o babamitawassin. Geget kawin enamiangin ejiwebisissi — Bisan ta-bimadisi enamiad anishinabe; bakan ta-iji-bimadisi, gaiat ga-iji-bimadisid bwa

anamiad. Win dash neta-minikwed kawin bakan iji-bimadisissi. Apitchi minikweshkiwag enamiassigog anishinabeg; kishpin dash gaie win enamiad minikweshkid, mi keiabi ijiwebisid, enamiassigog ejiwebisiwad. Geget sa kawin enamiangin ijiwebisissi neta-minikwed. Enamiadjig dash eta gjigong ta-ijawag, kishpin gwaiak gana-wendamowad od anamiewiniwa Aw dash enamiangin ejiwebisissig, anindi win gedijad? Kawin bakan, mi ima anamakamig kagige ishkoteng. Dagomagad anamakamig kitchi ishkote-sagaigan. Ikito dash kitchitwa Paul: Kawin eta beshigwadisidjig, mi go gaie neta-giwashkwebidjig ima tchi agwindjinowad ishkote-sagaigan-ing kaginig.

Nanagatawenda iw, ninidjaniss. Kego agonwetawaken Kije-Manito, kego agonwetawaken mecatewikwanaie. — Kishpin gaie kin naningotinong minikweian ishkotewabo, anwenindison, boniton. — Kishpin nita-agonwetawad Kije-Manito, gonima gaie jaigwa ginwenj agonwetawad, ki da-kitchi-segis. Gonima nagatch ki gad-ijiwebis, anind neta-giwashkwebidjig ejiwebiswad jaigwa. Geget kashkendagwad ejiwebisid bebejig neta-giwashkwebid. Ka-

win bapish o babamendansin gego, kawin bapish gego o gotansin. Ano gagikima, ina dash: Ki ga-nib tchi bwa anwenindi-soian, kitchi batadowining ki ga-dapine; gi-ishkwa-bimadisiian dash, ki ga-nasikawa Debendjiged tchi dibakonik; ki ga-kitchi-aniris dibakonige-gijigak, epitch jingen-dang Kije-Manito giwashkwebiwin; kawin gijigong kagige minawanigosiwining ki gad-odapinigossi, anamakamig kagige ishkoteng ki ga-danakis, kitchi ishkote-sagaiganing ki ga-wissagines kagigekamig, kawin eta midasswak dasso bibon, gonima gaie midatching midasswak dasso bibon, kawin, kagigekamig sa, apine, apine. — Anawi s̄ ina kakina iw; apitchi dash segendagwad iw, apitchi gotamigwendagwad geget; kawin dash o babamendansin iw, kawin gaie od ondji - b̄enitossin matchi minik-wewin.

Mi sa ejiwebisiwad nibiwa neta-giwash-kwebidjig. Waieshkat kawin o gi-babamendansinawa tchi gi-bonitowad; nagatch dash eshkam gi-mashkawideewag; nongom dash kawin gego o babamendansinawa ano nondamowad. Geget kitchi kitimagisiwag. Kitchi batadowining ta-dapinewag.

Nanagatawendañ iw, ninidjaniss, minawa kid inin, nanagatawendañ, Kishpin dash keiabi naningotinong minikweian ishkotewabo, apitchi nongom boniton. Weweni dash tchi gashkitoian tchi bonitoian, mi ow ge-dodaman.

1. Songendañ apitchi, minawa tchi minikwessiwan, bekish dash gaie pagossenim Kije-Manito tchi minik mashkawendamowin, tchi ganawenimik gaie kaginig.

2. Kego wika besho ijaken endaji - minikwewad ; kishpin ijaian, ki ga-gagansomigog tchi minikweian, ki ga-minaigog, ki ga-minikwe dash. Kego inendangen : Misawa ijaiān endaji-minikwewad, kawin nin wi-minikwessi ; nin gi-songendam tchi minikwessiwān , kawin nin ga-minikwessi ; kego iw inendangen. Gonima kawin pabige ki gad-odapinansin ; kishpin dash ginwenj gagansomigoian , ki gad - odapinan ; mi dash minawa tchi kitchi matchi dodaman. — Kego ganage besho ijaken endaji-minikwewad.

3. Kego wissokawaken neta-minikwed. Kishpin binish nongom gi-wissokawad, sagwana ganabatch mamawi ki gi-matchidodam gi-minikweieg. Kishpin dash nongom geget mashkawendaman tchi bonitoian,

tchi nodjimoad ki tchitchag, kego keiabi wis-sokawaken ; kego babamitawaken kishpin ningotchi wijamik. Mano ki ga-bapiig, mano ki ga-matchi-ig, mano gaie ki ga-jingenimig ; awashime onijishin iw, tchi jingenimik metchi-ijiwebisid, win dash Debeniminang Kije-Manito tchi jingenimik.

4. Eshkam dash tchi songendaman tchi bonitoian matchi minikwewin, nasikwaiapi mekatewikwanaie, weweni anwenindison, wikwatchiton gaie weweni tchi oda-pinaman Jesus wiiaw, kitchi Jawendagosiwini. Ki ga-sagiig dash Jesus eshkam, mi dash gawaiak tchi gashkitoian tchi apitchi bonitoian giwashkwebiwin, kitchi bata-dowin.

Mi ge-dodaman, ninidjaniss. Kego jagwenimoken, ki ga-gashkiton, kishpin wikwatchitoian. Mano dash apitchi wikwat-chiton ; missawa gaie kotagitoian, mano wikwatchiton, kego anijitangen, binish gi-andjitoian kid ijiwebisiwin. Ka na na-watch onijishinsinon, oma aking wenibik tchi mindjiminidisoian, tchi kotagiidisoian gaie, mi dash wedi gijigong kaginig tchi widabimad Kije - Manito od ogimawiwing; iw dash oma aking tchi matchi ijiewebisiian, tchi dodaman kin igo enenda-

man, matchi minawanigosiwining tchi bimadisiian, mi dash wedi anamakamig kaginig tchi animisiian. — Kitchi batainowag wedi aianimisidjig, ga-nita-giwashkwebidjig megwa gi-bimadisiwad aking. Geget nongom kashkendamog ga - ijiwebisiwad aking. Kishpin gashkitowad neiab oma aking tchi bi-ijawad, geget kitchi weweni da-bimadisiwag, memindage ishkotewabo kawin bapish o da-minikwessinawa. Kawin dash igiw wika minawa ogidakamig ta-bimadissiwag; jaigwa gi-dibakonawag, mi dash kagigekamig tchi animisiwad anamakamig. Kin dash, ninidjaniss, keiabi kin ogidakamig ki babamosse, keiabi Debendjiged ki jawenimig, ki biig tchi anwendisoian weweni, tchi bonitoian matchi ijiwebisiwin. Kishpin dash gaie kin baba-mitawassiwad, ki ga-dibakonig gaie kin waiba jaigwa; kishpin dash gi-dibakonigoian, mi apine tchi animisiian gaie kin, endaji - animisiwad kaginig ga - nita - mini-kwedjig.

#### GIJENDAMOWINAN.

1. Enigokodeeiān nin gjendam, weweni tchi ganawendamān mojag binideewin.

Kishpin odissikagoiān matchi inendamowin, pabige nin wi - mikwenima Kije-Manito ; o kikendanan sa wio nind inendamowinan ; pabige gaie nin wi - mikwendan ga-ikitod Jesus : “*Banideedjig eta o ga-wabamawan Kije-Maniton gjigong.*”

2. Nin gjendam tchi apitchi jingendamān kakina gego beshigwadak , matchi inendamowin , matchi gjewin , matchi dodamowin. Od apitchi jingendan Debeniminang kakina gego beshigwadadinig, mi ge-ondji-jingendamān gaie nin, mi ge-ondji-ojindamān gaie nin.

3. Nin gjendam dash gaie, bekish kakina tchi ojindamān ge-ondji-bata-ijiwebisiiān, ge-ondji - winitoian ninde. Metchi-gijwedjig, gegibadisidjig, beshigwadisidjig, kawin nin wi-wissokawassig ; mano nin gabapiigog. Memindage dash matchi minikwewin nin wi-ojindan, nin wi-apitchi-boniton ; bekish kakina nin wi-ojindan ge-ondji-pangishinān kitchi batadowining, giwashkwebiwining.

#### ANAMIEWIN.

Kije-Manito Debenimiiian, ki wabam ejikashkendamān gi-bata-ijiwebisiiān, nin gi-

winiton ninde kitchi nibiwa dassing. Nind anwenindis nongom, nin kitchi inendam dash : Apegish gwaiak ijiwebisiàn, apegish binitoià̄n ninde, mi dash binideewin kagi-nig tchi ganawendamà̄n. Ki sagiton, De-benimiian, binideewin, kid ogimawiwing gijigong ki wi-odapinag banideedjig, kagi-nig wedi tchi wabamikwa. Mi ge-ondji-sagitoià̄n gaie nin, mi ge-ondji-wikwatchi-toià̄n, kaginig tchi binideeià̄n. Ki pagos-senimin dash, Kije - Manito nosse, jaweni-mishin, widokawishin, tchi apitchi mashka-wendamà̄n tchi ganawendamà̄n binidee-win.



19. *Kego ijiewebisissida ejiewebisiwad saia-gitodjig eta oma aking endagog.*

NAWI oma aking ki bimadisimin non-gom, Kije-Manito Debeniminang kidinenimigonan, oma wenibik tchi bimadisiang. Kawin dash win inendansi tchi apitchi sagitoiang bimadisiwin aking, osam gaie tchi babamendamang, tchi sagitoiang gaie aking endagog. Kishpin awiia osam sagitod anotch gego oma aking endagog, kawin meshkwat Kije-Maniton gwetch o sagiassassin ; kishpin gaie osam babamendang anotch gego endagog aking, kawin gwetch o missawendansin, kawin gaie o babamen-dansin wedi gjigong endagog, kawin ganage iw o mikwendansin, epitch sagitod oma aking endagog.

Kawin dash enamiad iw da-ijiwebisissi ; o kikendan sa win enamiad wendji-aiad aking ; o kikendan tchi wanakissig oma, o kikendan wenibik eta aiad oma aking, tchi kikenimad Kije - Maniton, tchi sagiad, tchi anokitawad wenibik, mi dash wedi gjigong kaginig tchi wabamad, mi dash wedi tchi apitchi jawendagosid. Kishpin dash awiia inendang, oma aking tchi api-

tchi jawendagosid, mi dash anotch minawanigosiwın missawendang, odapinang gaie, kawin gwaiak ta-jawendagosissi potch oma aking, o gad-apitchi-waniton dash kagige jawendagosiwın gjigong.

Kego kin, ninidjaniss, sagitoken oma aking endagog, kego gaie ijiwebisiken ejiewebisiwad igiw menwendangig aking endagog ijiwebisiwin, bimadisiwin. — Ki gawindamon dash iw, memindage ge-ojindaman.

1. Apitchi ojindan matchi gigitowin. — Ged - apitch - bimadisiang aking, kawin geget ki ga-gashkitossimin tchi apitchi ojindamang gaganonidiwin; kawin gaie iw manadassinongaganonidiwad bemadisidjig aking. Apitchi dash ganawenindison tchi matchi gigitossowan wika, tchi pisindansowan gaie matchi gjewin. Kego gaie osam nibiwa gagigitoken. Ojibiigade Kije-Manito o masinaiganing: “*Aw nibiwa gaiagigitod nibiwa batadowinan o gad-aianan.*” Mi sa geget ijiwebak. Nawatch dash da-onijishin tchi mindjiminidisoian, osam nibiwa tchi gagigitossowan. Kego gaie gwetch mawadishiweken; mi ima wendjibamagak nibiwa matchi gjewin. — Nanagatwenindison, ninidjaniss. Das-

sing mewadishiweian, ki pangishin batadowining; gonima gaie nibiwa batadowinan kid aianan iko gi-ishkwa-mawadishiweian. — Minik ejи-gashkitoian, bisan bimadisin, kego nibiwa gagigitoken. Nijke gaie aian minik ejи-gashkitoian. Mikwenim dash Kije-Manito kishpin nijke aiaian, win iwapi gaganoj kideing; geget ki ga-mino-dodam. Gaie win dash Kije-Manito iwapi ki gagaganonig kideing, mino inendamowinan gaie ki ga-minig, apitchi wenijishing sagidiwin ki ga-minig kideing, eshkam tchi sagiad Kije-Manito, gaie win dash eshkam ki ga-sagiig.

Tchi bata-gijwessiwan wika, ow mindjimeden. Weweni gaganoj kidji-bimadisi, kego nishkadji-ganonaken; kishpin gaie awiia wi-anwenimad, beka go ganoj, kego matchi inaken. Kego gaie wika awiia pagwanomaken; kishpin dash awiia endashiieg wi-pagwanomad widj' anishinaben, kego kin nassab ikitoken; mano gaie ki daikit: Kawin sa da-matchi-dajimassi aw anishinabe, kawin ganabatch geget gi-iji-webisissi enind, kawin mojag debwessiwag igiw debadjimodjig. — Mano sa, ninidjaniss, ikiton iw, missawa bapiigoian, gonima gaie matchi igoian gaie kin, mano; Kije-

Manito dash ki ga-sagiig, kishpin matchi dajimassiwad kidji - bimadisi, debwetansiwan gaie pabige babamadjimowin, matchi dajindiwin. — Kego ganage aw jangenimik pagwanomaken, kego matchi inenimaken ; gi-ikito sa Jesus : “*Potch jangenimik ki da-sagia, ki da-mino-dodawa.*” Kego gaie awiia nanapagansomaken, kego gaie nishibapinodawaken ; kawin awiia minwendansi iw tchi dodawind, kawin gaie kin ki da-minwendansi tchi dodagoian ; gi-ikito dash Jesus : “*Eji-minwendansiwan tchi dodagoian, kego gaie kin iw dodawaken kidji-bimadisi.*”

2. Minawa dash , ninidjaniss , apitchi ojindan matchi minawanigosiwinan, mi sa, nibadisiwin, atadiwin, nimiidiwin ; apitchi sa kakina iw manadad.

Kishpin awiia osam nibiwa wissinid, od akositon wiiaw. Igiw ketchitwawendagosidjig nongom gijigong ebidjig, kitchi pepangi gi-wissiniwag megwa gi-bimadisiwad aking, ondjita sa wika tchi pangishinsigwa kitchi batadowining nibadisiwining. Memindage anishinabeg sasagwana pangishinog iw batadowining, nita-nibadisiwag sa ; missawa debissiniwad, keiabi dash minwendamog wissiniwad ; geget kitchi ma-

tchi minawanigosiwin iw nibadisiwin. Mi sa wendji-nita-akosiwad; odakositon wiiaw nebadisid. — Kego iw ijiwebisiken. Ow mindjimendan: Kawin anishinabe ondjbimadisissi aking tchi wissinid, ta-wissini eta tchi ondjbimadisid.

Atadiwin, anotch gaie odaminowin, kawin gaie iw onijinsinon. Abinodji eta ta-odamino, kawin kitchi anishinabe. Abinodji kawin mashi o gashkitossin tchi anokid, mano win ta-odamino; kitchi anishinabe dash ta-anoki. Win Debenni-minang Kije-Manito ikito iw, kid igo-nan tchi anokiiang, ki minigonan gaie ged-anokiiang, bebakan ki minigonan anokiwin; eji-aiaiang dash anokiwin, mi iw ged-anokiiang. Gaie win anishinabe enind od aian od anokiwin; kishpin enamiad anishinabe kitimid, anokissig weweni, ge-get matchi dodam, kawin gwaiak anamiasi. Kitchi batadowin kitimiwin. — Awashime dash kitchi batadowin iw matchi atadiwin, anotch sa atadiwin; winawa waibishkiwedjig eji-atadiwad, gaie dash eji-atadiwad anishinabeg; kakina iw kitchi manedad. Kego wika, ninidjaniss, wisso-kangen atadiwin, kego bapish atadiken, osam bata-ijiwebad; anotch matchi ikito-

wag etadidjig, anotch gaie bata-ijiwebisi-wag, waiejingewag, gimodiwag, matchi dodadiwag. Geget manadad atadiwin. Kego iw ijitchigeken, kishpin sagiad Kije-Manito, gossad gaie. Mikwenim Deben-djiged; ki ganawabamig sa mojag; kishpin dash atageian, ki ganawabamig gaie iwapi, kawin dash bapish minwendansi endodaman. — Ninidjaniss, waiabandaman mandan masinaigan, kishpin iw ijiwebisiiian, aiapi atageian, apitchi weweni nongom gi-jendan, mashkawendan gaie, tchi apitchi bonitoian. Kishpin dash kin gi-bonitoian, mano dash awiia kidji-bimadisi ki da-ganova weweni, gaie win tchi bonitod.

Memindage dash kitchi manadad minawa bejig matchi minawanigosiwin, mi sa ni-miidiwin. Apitchi dash o sagitonawa igiw saiagitodjig osam oma aking endagog. Kego kin, ninidjaniss, sagitoken; Kije-Manito o jingendan, mi ge-ondji-jingendaman gaie kin; ginaamagewag Kitchi-mekate-wikwanaieg, kakina gaie mekatewikwanaieg iw nimiidiwin, o jingendanawa gaie apitchi, mi ge-ondji-jingendaman gaie kin; kakina gwaiak ejiwebisidjig enamiadjig nebvakadjig o jingendanawa, kaginig gaie ba-ako-anamiang o gi-jingendanawa, mi

ge-ondji-jingendaman gaie kin, ninidjaniss. Kishpin dash minotch sagitoian, wissokaman gaie, kid agonwetawa Kije-Manito koss gjigong ebid, kid agonwetawag kakina Kitchi-mekatewikwanaieg, mekatewikwanaieg gaie gegikwedjig oma aking, kawin gaie kid ijiwebisissi, swanganamiadjig ejiwebisiwad, ga-ijiwebisiwad gaie waiesh kat. Anotch matchi inendam awiia nimiiding ijad, matchi inabi gaie, anotch sa go bata-ijiwebisi; o babamitawan sa iwapi matchi maniton, od anokitawan gaie. Ikitowag sa nebwakadjig ininiwag: Memindage iwapi nimiiding matchi manito anoki tchi banadjiad enamianidjin. Mojag anawi wi-minigonan matchi inendamowin, maki-tchi ijiwebisiwin gaie. Kishpin dash awiia bisan bimadisid, mikwenimad Kije-Maniton, o gashkiton tchi webinang matchi inendamowin, kawin dash ta-bata-ijiwebisissi. Iwapi dash nimiiding kawin awiia Kije-Maniton o mikwenimassin, matchi maniton sa meg wa od anokitawan, pabige dash od odapinamawan matchi inendamowin, matchi ijiwebisiwin gaie. Mi wendjimañadak nimiidiwin, mi wendji-ginaama-wind enamiad, wika tchi ijassig endaji-nimiiding. — Bejig nibwakawinini ow gi-

ikito : “Mojag nin gi-nondam, manadak nimiidiwin, kawin dash weweni nin gi-nissitotansin ; nongom dash apitchi weweni nin nissitotan, nin gi-wabandan sa. Geget manadad. Gwaiak ikitowag mecatekwanaieg, *kitchi manadad*, ikitowad. Geget kitchi manadad. Weshkinigidjig sa ima mawandjiidiwig; kawin dash nibwakassiwag weshkinigidjig; potch bisan aiawad, mojag wi-matchi-inendamog, awashime dash wedi endaji-nimiiding, pabige ta-matchi inendamog ta-matchi-inabiwig gaie. Nibatibik sa mawandjiidiwig igiw namiididjig, kakina minawanigosiwag dash ima endaji-nimiidiwig, najabiigan gaie madwewemagad, na-ningotinong gaie matchi inikwewin dago-magad. Geget pabige awiia wedi matchi inendam, pabige o minwendamian matchi maniton. Mi dash iw wendji - ikitong : Kego enamiad nimiiding wika da-ijassi. Kitchi mino dodamog mecatekwanaieg ginaamagewad nimiidiwin ; kitchi mino do damog gaie ow ikitowad : Kawin awiia en amiad o ga-gashkitossin tchi odapinang Ja wendagosiwin, Kitchitwa Eukaristiwin, kis hpin nimiiding ijad. Geget mino inakoni gewag mecatekwanaieg iw ijitchigewad, epitch sa manadak nimiidiwin.” —

Mi ga-ikitod bejig nibwakawinini. Geget dash gwaiaak gi-ikito.

Kishpin dash kin, ninidjaniss, waibandanaman nongom mandan masinaigan, kishpin gaie kin nanigotinong iw dodaman, nasikaman nimiidiwin, apitchi nongom anwenindison kideing; ki gi-matchi-dodam da ssing ga-ijaian. — Kego ikitoken: Kawin nin kikendansin tchi gi-matchi-dodamān nimiiding gi-ijaiān; kego iw ikitoken; kego agonwetawaken Kije-Manito; win sa od a nonan mekatewikwanaien tchi gagikwe nid; ekitod dash mekatewikwanaie gagi kwed, mi Kije-Manito od ikitowin; aw dash enamiad aiagonwetawad mekatewik wanaien, gwaiaak Kije - Maniton od ago nwetawan. Kaginig dash, ba-ako-anamia ng aking, gi-ginaamagewag mekatewik wanaieg nimiidiwin; o kikendanawa sa manadádinig, mi wendji-ginaamagewad. Ki shpin dash kin inendaman, awashime weweni tchi kikendaman ejiwébak anotch ge go dodamowin oma aking, winawa dash mekatewikwanaieg, Kitchi-mekatewikwanaie g gaie ejí-kikendamowad; kishpin iw inendaman, ki kitchi maminadis, mi dash min awa bejig kitchi batadowin gigishkama n, mi sa maminadisiwin.

Weweni dash, ninidjaniss, ganawenindison, batadowining tchi bimadisissiwan; memindage kitchi batadowinan kakina apitchi ojindan. Sagi Kije - Manito, goshi gaie bekish, kakina dash eji-gagikimigoian, weweni ki ga-dodam.

**GIJENDAMOWINAN.**

1. Nin gjendam, wika osam tchi sagitossiwàn oma aking endagog. Anawi geget nin wi-aion minik menesiian megwa bimadisiàn aking, kawin dash win osam nin wi-sagitossin gego; kawin gaie nin wi-kashkendansi, kishpin gego wanitoiàn.

2. Memindage dash nin gjendam, we-weni mojac tchi ojindamàn anotch matchi minawanigosiwin, eji-minwendamowad bemadisidjig aking, mi sa anotch gaganonidiwin, nibadisiwin, atadiwin, niymiidiwin. O jingandan kakina iw Debeniminang Kije - Manito; mi ge-ondji-jingendaman gaie nin.

3. Enigokodeeiàn nin gjendam, tchi sagitossiwàn matchi minawanigosiwin aking endagog, meshkwat dash Debeniminang Kije-Manito nin wi-sagia enigokodeeiàn, awashime kakina gego aking endagog, gaie gjigong.

**ANAMIEWIN.**

Kije-Manito nosse, migwetch kid inin mijian kakina gego minik menesiian aking. Ki pagosserimin dash tchi mijian gwaiakwendamowin, kakina gego weweni tchi aioian, kin ejii-minwendaman, tchi sagitosiwan dash osam gego aking endagog. Memindage dash ki pagosserimin tchi jawenimijian tchi mijian ki jawendjigewin, enigokodeeiian tchi jingendamian, tchi ojindamian gaie kaginig, kakina matchi minawanigosiwin aking endagog, mi dash kaggige minawanigosiwin gjigong tchi wi-kwatchitamasoian.



20. *Weweni sagiada kakina kidj' anishinabenanig aking.*

¶ NAMIAD apitchi aiangwamima tchi sagiad kakina widj' anishinaben bemadisinidjin aking; potch jangenimigodjin tchi sagiad. Kishpin enamiad bejig eta widj' anishinaben jingenimad, mi jaigwa kitchi batadowining daji-bimadisid; kishpin dash nibod megwa jingenimad, kawin gjigong ta-ijassi, anamakamig ta-apagina. Apitchi geget kitchi ganasongewin iw, tchi sagianguwa *kakina* kidj' anishinabenanig aking. Jesus Debeniminang kid igonan iw, mi geondji-dodamang. “*Ki ga-sugia kidj' anishinabe ej-i-sagiidiisoian;*” kid igonan. Kitchitwa Paul gaie ikito: “Missawa kakina gego kikendamān, Anjeniwag gaie enzewad inweiān; kakina gaie nind inodewisiwin migiweiān tchi jawenimagwa ketimagingisidjig; kishpin dash sagiidiwin aianisiwān, kawin ningot nind apitendagosissi.” Ikito gaie k. Paul: “Awashime apitendagwad sagiidiwin, kakina dash bakan gego; kakina ta-ishkwa-aiamagad ningoting, sagiidiwin dash kaginig ta-aiamagad.” Kitehitwa Jean gaie kid igouan: “Ninidjanissidog

saiagiinagog, sagiidig. Kishpin awiia jingenimad widj' anishinaben, bekish dash ikitod: Nin sagia Kije-Manito ; giwanimo, kawin debwessi. Kawin ganage widj' anishinaben o sagiassassin ano wabamad, anin dash ged-iji-sagiad Kije-Maniton waiabamassig. Aw jangenimad widj' anishinaben tibishko apitendagos enassaminid Kije-Maniton, neshiweshkid epitendagosid. Kawin kagine bimadisiwin gijigong o gadaiansin." — Nanagatawendan iw, ninidjaniss, segandan dash; apitchi dash mashkawenda, kakina kidj' anishinabeg aking weweni tchi sagiadwa, eji-sagiidisoian; kego ganage bejig jingenimaken. — Mikwendan gaie ge-ondji-sagiangwa kakina kidj' anishinabenanig.

1. Mi sa ge-ondji-sagiangwa, Kije-Manito gi-ininang tchi sagiangwa. Apitchi gwaiak kid igonan iw, bekish dash gaie ikito: Mi iw aiapitchi-niganendagwak gana songewin, bemadisid aking tchi sagiad Kije-Maniton enigokodeed; eji-sagiidiso dash tchi sagiad widj' anishinaben. — Kishpin dash enamiad sagiassig widj' anishinaben, gwaiak od agonwetawan Kije-Maniton.

2. Win igo gaie Debeniminang Kije-Manito o kitchi sagian bemadisinidjin aking, wenidjanissingin od iji sagian. Kawin awiia wenidjanissid inini oma aking tibinawe onidjanissan od iji sagiasson. kos-sinan gjigong ebid eji-sagiinang. Kakina gego win ki minigonan, kid inenimigonan gaie, kagigekamig gjigong tchi jawenda-gosiiang. Apitchi sagiad Kije-Manito bemadisinidjin aking, mi ge-ondji-sagiangwa gaie kinawind.

3. Memindage gaie Jesus, Kije-Manito Ogwissan, o kitchi sagian bemadisinidjin aking; mi ga-bi-ondji-ijad oma aking, mi ga-ondji-kotagitod apitchi, ga-ondji-nibod gaie tchibaiatigong, epitchi sagiad anishinaben; od ineniman gaie kakina tchi ijanid gjigong. Ta-ijawag dash, kishpin gwaiak wi-ijiwebisiwad. Mi ge-ondji-sagiangwa gaie kinawind kakina bemadisidjig, Jesus apitchi sagiad.

4. Enamiad o ga-takwendan kaginig iw ikitowin ga-ikitod Jesus: "*Minik ge-doda-wegwa kidj' anishinabewag, nin igo ki ga-dodawim.*" — Kishpin mino dodawad kidj' anishinabe, Jesus ki mino dodawa; kishpin dash matchi dodawad, Jesus igo ki matchi dodawa. Mi tibishko gaie, kishpin sagiad

kidj' anishinabe, Jesus ki sagia; kishpin dash jingenimad, win igo Jesus ki jingenima. — Mi dash ge-ondji-mino-dodawad mojag kidj' anishinabe, mi ge-ondji-sagiad gaie mojag; win sa Jesus od odapinan kakina iw endodawad kidj' anishinabe.

Bejig enamiad, api jaigwa wi-nibod, gi-kitchi-minawanigwendam. Od inawan dash ima nabawidjig: Anin ejiwebisiian, nongom apitchi minawanigosiiian, jaigwa beshowad iw tchi nasikaman dibakonidiwin? Ikito dash aw aiakosid: Minik ga-bimadisiiān aking nin gi-wikwatchiton tchi dodamān ga-ikitod Debeniminang: Ki ga-sagiag kidj' anishinabeg eji-sagiidisoian. Nin gi-sagiag dash geget; kawin wika awiia nin gi-jingenimassi, kawin gaie awiia nin gi-matchidajimassi, kawin nin gi-dibakonassi, kawin ganage nindeing. Mojag dash nin gi-wikwatchiton minik ga-iji-gashkitoiān, tchi mino dodawag awiia, ge-ondji-minwendang; kawin gaie awiia nin gi-nishkadisitawassi, kawin gaie nin gi-matchi inenimassi. Mi ga-iji-wikwatchitoiān mojag; mi dash wendji-minwendamān nongom; nind apenimonan sa Jesus tchi jawenimid; win sa nin gi-mino-dodawa, minik ga-iji-mino-dodawag nidj' anishinabeg.

Geget gi-jawendagosi aw inini, gi-gash-kitod tchi ikitod: Mojag nin gi-sagiag, nin gi-mino-dodawag nidj' anishinabeg; kawin wika awiia nin gi-jingenimassi, kawin nin gi-matchi-dodawassi. — Mi gaie kin gewikwatchitoian, ninidjaniss. Weweni sagi kakina anishinabeg eji-sagiidisoian; minik eji-gashkitoian mino dodaw. Eji-minwendaman tchi dodagoian, mi ge-dodawadwa mojag kidj' anishinabeg; minik dash jangendaman, minik menwendansiwan tchi dodagoian, kego gäie kin wika awiia doda-waken; mi dash geget tchi sagiad kidj' anishinabe eji-sagiidisoian. — Nanagata-wenindison dash nongom. Kawin ki minwendansi tchi matchi ganonigoian, tchi nishkadji-ganonigoian gaie; kawin ki minwendansi tchi nishkadisitagoian pabige ningot ekitoianin; kawin ki minwendansi tchi matchi dajimigoian ningotchi, tchi pagwanomigoian; kawin gaie ki minwendansi tchi nishibapinodagoian; kawin ki minwendansi tchi matchi inenimigoian anisha, tchi dibakonigoian pabige; kawin ki minwendansi tchi jawenimigossiwan kishpin kitimagisiian, akosiiian gaie; kawin gaie ki minwendansi tchi waiejimigoian, tchi gimodimigoian, tchi makamigoian gego. Ka-

kina iw kawin ki minwendansi tchi dodagoian, ninidjaniss. Nissitotaw dash nongom Jesus, win sa kid ig: Eji-minwendaman tchi iji dodagoian, mi ge-dodawadwa kidj' anishinabeg; minik dash menwendansiwan tchi dodagoian, kego gaie kin awiia iw dodawaken.

Kego dash, ninidjaniss, ikitoken: Kawin nin da-gashkitossin tchi sagiag aw, osam matchi ijivebisi. — Missawa matchi ijivebisi, kego jingenimaken; o matchi ijivebisiwin eta jingendamaw; win dash ki dasagia, ki da-jawenima sa kideing, ki damino-dodawa minik eji-gashkitoian, ki dagaganodamawa gaie anamiaian, tchi jawenimigod Kije-Maniton, tchi minigod gawaiak anwenindisowin.

Nanagatawenindison, ninidjaniss; anwenindison minik ga-matchi dodawadwa kidj' anishinabeg binish nongom, apitchi dash songandan tchi mino dodawadwa; ejiminwendaman tchi dodagoian, mi mojag tchi dodawadwa. Geget dash ki ga-jawendagos, ki ga-sagiig Jesus; kishpin dash gaie kin ningoting oditaman iw tchi ishkwa-bimadisiian aking, ki ga-kitchi-minawanigwendam kideing; win sa Jesus o gamoshkinadon kide minawanigosiwin.

GIJENDAMOWINAN.

1. Nin gjendam tchi sagiagwa kakina nidj' anishinabeg, kawin ganage bejig nin wi-jingenimassi. Kawin Kije-Manito gego od iji jingendansin, eji-jingendang ki jinge-nindiwinan ; kawin gaie gego od iji sagitossin, eji-sagitod ki sagiidiwininan. Mi ge-ondji-sagiagwa kakina nidj' anishinabeg. Kije-Manito nin wi-ondji-sagiag, win gaie eji-minwendang nin wi-sagiag.

2. Kawin dash nindoning eta nin wi-sagiassig, kawin gaie nindeing eta ; nin wi-wabandaiwe sa sagiagwa kakina nidj' anishinabeg. Minik menwendamān tchi dodagoiān, nin wi-dodawag nidji-bimadisidjig ; minik dash jangendamān, kawin nin wi-dodawassig. Bekish gaie Jesus mojag nin wi-mikwenima ga-ikitod : "Minik gedodawegwa kidj' anishinabewag, nin igo ki ga-dodawim."

ANAMIEWIN.

Jesus nosse kejewadisiian, bonigideta-wishin minik ga-bata-ijiwebisiiān binish nongom, osam panggi gi-sagiagwa nidj' anishinabeg ; sasagwana gaie nin gi-matchi-

dodawag. Nind anwenindis nongom, apitchi dash nin songendam, nawatch tchi mino dodawagwa kakina, kawin awiia nin wi-matchi-dodawassi. Nin kitchi minwendam dash, Jesus nosse, migwetch gaie kid inin, eji-kijewadisiian, kin igo odapinaman minik meno-dodawagwa nidj' anishinabeg; mi dash nawatch ge-ondji-mino-dodawagwa. Widokawishin, Jesus, gwaiak iw tchi dodamān.



21. *Enamiad potch jangenimigodjin o ga-sagian.*

AWIN iw sanagassinton, awiia tchi sagiad meno-ijiwebisinidjin , meno-dodagodjin gaie. Kakina anishinabeg bemadisidjig aking dodamog iw. Potch enamiassig anishinabe o sagian meno-dodagodjin. — Win dash enamiad awashime ta-mino-ijiwebisi, enamiassig ejiwebisid ; mi dash iw wendji-inind tchi sagiad gaie jangenimigodjin, metchi-dodagodjin gaie, kawin eta saiagi-godjin gaie meno-dodagodjin. Ow sa kid igonan Jesus. “Sagiig metchi-dodonegog ; jawenimig, mino dodawig jangeniminegog ; gaganodamawig nenekadjiinegog, baiata-minegog gaie. Mi sa ged-ijiwebisiieg tchi onidjanissimineg Kije-Manito kossiwa gijigong ebid ; (gaie win sa mojag o jaweniman metchi ijiwebisinidjin tchi anwenindisonid.) Kishpin saiagiinegog eta sagiegwa, wego-nen ge-dibaamagoie? Kawin na iw do-dansiwag gaie baiata-ijiwebisidjig, enamias-sigog gaie?” Mi sa eninang Jesus. — Sanagad iw anawi ; o gashkiton dash enamiad, Kije-Maniton sa o widokagon.

Awashime dash tchi songendaman tchi sagiad jangenimik, tchi bonigidetawad gaie,

ow nanagatawendaran : Awenen nin? Awenen aw jangenimid? Wegenen ga-dodawid? — Kishpin iw weweni nissitotaman, ki ga-gashkiton tchi honigidetawad, tchi jawenimad, tchi sagiad gaie aw jangenimik.

1. Awenen nin? Anin ejiwebisiiān gaie nin? — Mi nitam ge-nanagatawendaman; inendan dash: Nin bata-ijiwebis sa nin, kitchi sasagwana nin nishkia Kije-Manito, kawin nin de-apitendagosissi, keiabi oma aking tchi babamosseiān. — Mi ged-ine-nindisoian. Bekish gaie mikwendan ejiwebak kitchi batadowin. Kishpin awiia abiding eta kitchi batadowining pangishing, mi jaigwa gi-wikwatchitamasod, kagine ishkoteng anamakamig tchi apaginind; epitch dash kijewadisid Kije-Manito, kitchi ginwenj o biian baiata-ijiwebisinidjin tchi anwenindisonid. Winawa wedi anamakamig endanakisodjig kawin keiabi ta-jawenimassiwag, kawin wika ta-gassiamawassiwag, mi dash kaginig tchi animisiwad anamakamig. Kin dash, ninidjaniss, gano-wikwatchitamasoian jaigwa tchi dakanisoian gaie kin anamakamig, keiabi kin ki wi-jawenimig Kije-Manito, ki wi-gassiamag; kishpin sa weweni anwenindisoian,

weweni gaie babamitawad Debendjiged, kishpin gaie, (mindjimendan iw,) kishpin enigokodeeian bonigidetawad jangenimik. Bonigidetawassiwad dash, kawin gaie Debendjiged ki ga-bonigidetagossi. Ki gagigishkanan dash kakina ki batadowinan ; kishpin dash niboian megwa gigishkaman, mi go gaie kin anamakamig tchi apagini-goian.

2. Awenen aw jangenimid ? Kawin dash nin bonigidetawassi. (Mi iw gaie gennagatawendaman.) Awenen aw ? Kawin bakanisissi, nidjikiwe sa ; bejigo aw kossinan gjigong ebid. Jesus o sagian iniw, awashime ganabatch o sagian, nineji-sagiid. Gi-nibo Jesus tchibaiatigong gaie iniw ondji. O baba-ganaweniman aking ; minik dash endodawag nin, Jesus nin dodawa. Kishpin jingenimag, Jesus nin jingenima ; kishpin sagiag, Jesus nin sagia. — Kije-Manito od ikitowin iw, weweni nanagatawenda. — Kishpin dash ikitoian : Kawin apitendagosissi aw jangenimid, tchi sagiag. Kishpin iw ikitoian, nin dash kid inin : Kishpin win apitendagosissig tchi sagiag, Jesus apitendagos. Jesus sa ki ga-sagia, ki ga-minwendamia, kishpin bonigidetawad, sagiad gaie jaweni-

mad aw jangenimik ga-matchi-dodok. Mi sa enigokodeeian ge-ondji-bonigidetawad.

3. Wegenen ga - dodawid ? — Kitchi pangi ganabatch ki gi-dodag. Naningotinong awiia ondji-nishkadisi gi-anweniinind. Gonima ki gi-anwenimig ; gonima gaie ki gi-matchi-dajimig ; gonima ki gi-matchi-dodag, mi dash wendji-bonigidetawassiwad. Kawin ki wi-nasika wassi, kawin ki wi-ganonassi, kawin ganage ki wi-ganawabamassi. — Gonima dash kawin ijiwebisissi enenimad, gonima kawin geget ki gi-matchi-dajimigossi, gonima kawin ningot ki gi-dodagossi ; osam waiba ki gi-debwetan iw ga-nondaman. Mano dash nasikaw, we-weni tchi gaganonidiieg, mi tchi kikendaman gwaiak ga-ikitod, ga-dodang gaie, mi dash tchi mino aiaieg minawa, tchi minwendameg. — Anish, gonima dash geget ki gi-matchi-dajimig, gonima ki gi - kitchi-matchi-dodag, ki jingenimig. — Potch dash ki da-bonigidetawa pabige, kawin bapish ki da-jingenimassi. — Kawin awashime ki gi-iji-matchi-igossi, kawin gaie awashime ki gi - iji - matchi - dodagoSSI, Jesus ga - iji-matchi-inind, ga-iji-matchi-dodawind gaie. Apitchi dash win weweni o gi-bonigidetawan ga-jingenimigodjin, ga-matchi-doda-

godjin. Kid igonan dash tibishko tchi dodamang ga-dodang gaie win.— Kitchitwa Augustin gi-ikito : “Kishpin wi-jingenimad ga - matchi - dodok, ajida wi - matchi - doda-wad, ganawabam Jesus tchibaiatigong ego-djing, pisindaw ejí-gaganodamawad nessi-godjin.” — Kishpin dash minotch keiabi jingenimad ga - matchi - dodok, assinig iji mashkawamagad kide.

Ow gaie nanagatawendan. Kishpin awiia matchi dodok, *kidj' anishinabe* ki matchi dodag ; anishinabe o matchi doda-wan anishinaben. Kishpin dash kin bata-ijiwebisiian, ki matchi dodawa Kije-Manito. Kitchi bakan iw ijiwebak ; kawin ima ani-shinabe o matchi dodawassin anishinaben, kawin, *Kije-Maniton* o matchi dodawan. Apitchi kitchi matchi ijiwebad iw. Anawi dash Kije-Manito pabige ki wi-bonigidetag anwenindisoian ; kin dash kawin ki wi-bonigidetawassi *kidj' anishinabe* ! — Ki nissitotan na ejí-matchi-ijiwebak endoda-man ? — Apegish, ninidjaniss, weweni nis-sitotaman ; apegish kideing mojitoian ejí-matchi - dodaman, kishpin wi - bonigideta-wassiwad ga-matchi-dodok. Kishpin non-gom igo, ninidjaniss, jingenimad awiia, weweni ganawabamassiwad, weweni gaie

ganonassiwad, pabige enigokodeeian an-wenindison, madjan dash wewib, weweni ganoj, enigokodeeian bonigidetaw eji-nandotamawad Kije-Manito tchi bonigidetok.

Nanagatawendañ dash nongom ekidot awiia menwendansig tchi bonigidetawad ga-matchi-dodagodjin.

1. Ow sa ikito awiia: Anawi bekanisid nin da-bonigidetawa, aw dash kawin nin wi-bonigidetawassi, osam matchi ijiwebisi, osam jingendagosí, kawin de-apitendagosíssi tchi sagiag, tchi bonigidetawag. — Geget kitchi matchi ikito enamiad iw ikitod. Kego kin wika iw ikitoken. Nanagatawenindison gaie kin ejiwebisiian enassamid Kije-Manito; win ki kikenimig ejiwebisiian. Gonima ki gi-wikwatchitamas jaigwa anamakamig tchi apaginigoian, anawi dash keiabi ki jawenimig Kije-Manito, ki bonigidetag. Gonima ki kitchi jingendagos enassamid Kije-Manito, keiabi dash ki sagiig. Kego dibakonaken kidj' anishinabe; win Debeniminang kakina ki ga-dibakonigonan. — Kishpin geget aw ga-matchi-dodok apitendagosissig, tchi bonigidetawad, tchi sagiad gaie, Jesus dash apitendagosí. Jesus ki nandotamag; bo-

nigidetawishin, kid ig. Endodawad sa kidj' anishinabe, Jesus ki dōdawa.

2. Minawa dash awiia ikito: Kawin nin da-gashkitossin tchi webinamān matchi in-endamowin, osam nin gi-matchi-dodag aw; kawin nin da-gashkitossin tchi bonigidetawag. — Kishpin iw ikitod enamiad, mi tanassag anamakamig apagisod, mi epitenda-gwak; kishpin sa anamiad, ow od inan Kije-Maniton: Nosse, bonigidetawishin gaiji-nishkiinan, eji-bonigidetawag gaie nin aw ga-nishkiid. Mi eji-nandotamawad Kije-Maniton; kishpin dash bekish bonigidetawassig ga-nishkiigodjin, mi tanassag inad Kije-Maniton: Kego bonigidetawishiken nin batadowinan, kawin sa gaie nin nin bonigidetawassi aw ga-nishkiid. — Mi sa iw od anamiewin aw enamiad bwanigidetawassig ga-matchi-dodagodjin. — Geget kitche gotamigwendagwad! — “*Kego bonigidetawishiken*”, od iji nandotamawan Kije-Maniton! Mi tibishko nandotamawad gwaiak anamakamig kagige ishkoteng tchi apaginigod. Mi sa wedi kakina ged-ijaiang kishpin bonigidetagossiwang ga-iji-bata-diiang.

Nanagatawenden minawa iw, ninidjannis; apitchi dash songandan pabige tchi

bonigidetawad awiaa ga-matchi-dodok. Pa-gossenim Kije-Manito tchi minik mino in-endamowin; kego dash bapish odapinan-gen matchi inendamowin, kego matchi manito odapinamawaken iw matchi inendamowin, tchi bonigidetawassiwad kidj' anishinabe; kitwen mino inendan, bonigidetaw. Kideing dash nitam bonigidetaw, panima gaie weweni ganoj; ki ga-gashkiton dash, Kije-Manito ki ga-widokag. Kawin dash anawi kid inissinon, tchi wissokawad aw metchi-ijiwebisid; kawin iw. Kishpin wabamad awiaa matchi ijiwebisid, kego wis-sokawaken; kego dash win jingenimaken. Jingendamaw eta o matchi ijiwebisiwin; win dash ki da-jawenima, ki da-sagia, ki da-mino-dodawa gaie minik eji-gashkitoian, Jesus ondji; ki ga-sagiig dash Jesus, ki ga-jawenimig.

Minawa dash, ninidjaniss, nanagata-wendan ekitowad anind enamiadjig. Inen-damog anawi: Nin bonigidetawa jangenimid; kawin dash o bonigidetawassiwawan.

1. Ow sa ikito awiaa: Nin bonigidetawa anawi nongom, kawin dash minawa nin ga-bonigidetawassi. — Kego kin wika iw ikitoken; mikwendan ga-ikitod Jesus.

Kitchitwa Pierre sa ningoting o gi-gagwedjiman Jesusan, ow gi-inad: Debenimiian, anin dassing ge-bonigidetawag nidj' anishinabe? Nijwatching na? — Jesus dash ow o gi-inan: Kid inin, kawin nijwatching eta; nijwassimidana dassing nijwatching ki ga-bonigidetawa." Mi sa *mojug*. Kego dash wika ikitoken, kego gaie inendangen: Nongom eta nin wi-bonigidetawa, kawin dash minawa wika. Kid agonwetawa Jesus, iw ikitoian.

2. Minawa dash awiia ikito: Nin bonigidetawa; kawin dash wika nin ga-wanendansin ga-dodawid. — Enamiad iw ekitod kawin geget o bonigidetawassin ga-matchi - dodagodjin. Waiejindiso ikitod: "Nin bonigidetawa". — Kishpin awiia we-weni wi-bonigidetawad widj' anishinaben ga-matchi-dodagodjin, od apitchi webinamawan, o bonendamawan o matchi doda-mowin; kawin keiabi iw o babamendansin. — Mi ge-dodaman, ninidjaniss; kego waiejindisoken. Apitchi bonendamaw kidj' anishinabe ningot ga-inik, ningot ga-dodok. Kishpin dash kitwen mikwendaman iw ga-dodagoian, kego ondjita nanagatawenden-gen, pabige webinan iko matchi inenda-mowin.

3. Bejig dash minawa ow ikito : Anawi nin bonigidetawa, kawin dash nin wi-wabamassi. — Enamiad iw ekitod kawin o mikwenimassín Kije-Maniton, kawin gaie o debwetawassin. Debeniminang Kije-Manito kid igonan tchi bonigidetawangwa kidj' anishinabenanig, ejí-nandotamawang tchi bonigidetonang gaie win. Kishpin dash kin, ninidjaniss, ikitoian : Kawin nin wi-wabamassi aw ga-matchi-dodawid ; ki gad-ig gaie win Debeniminang Kije-Manito : Kawin ki wi-wabamission oma gjigong. — Mindjimendar iw, weweni dash ganawabam jangenimik ga-matchi-dodok, ejí-nandawenimad Kije-Maniton tchi jawendamiganawabamik. Mindjimendar gaie ga-ikitod kitchitwa François ga-apitchi-kijewadisid ; ow sa gi-ikito : "Missawa awiia apitchi matchi dodawid, bejig gaie nishkinjig mamibidod, nin nabaneshkinjig dash nin da-aion tchi mino ganawabamag."

4. Minawa dash bejig ikito : Kawin nin wi-nasikawassi aw ga-matchi-dodawid ; kawin sa nin wi-wabamigossi, kawin gaie nin wi-ganonigossi. — Anin dash ejí-kikendaman iw ? Gonima da-minwendam tchi wabamik ; kishpin nasikawad, weweni ki ga-ganonig. Mano nasikaw, weweni

gaganonidig. Kishpin iw dodaman, kin igo ki ga-mino-dodas, win gaie ki ga-mino-dodawa.

5. Ow dash gaie ikito awiia: Kawin nin wi-matchi-dodawassi aw jangenimid nidj' anishinabe. — Kawin iw debissesson, ninidjaniss. "Eji-sagiidisoian ki sagia kidj' anishinabe, potch aw jangenimik"; kid ig Jesus. Kishpin geget sagiad eji-nandawenimik Jesus, kawin geget wika ki ga-matchi-dodawassi, meshkwat dash minik eji-gashkitoian ki ga-mino-dodawa; ki ga-dodawa sa eji-minwendaman gaie kin tchi dodagoian.

#### GIJENDAMOWINAN.

1. Nin gjendam, weweni tchi sagiagwa kakina nidj' anishinabeg; potch jangenimidjig nin wi-sagiag. Kishpin dash sanagendamàn iw, nin wi-mikwenima Jesus gai-kitod, ga-dodang gaie. Ki gi-igonan sa tchi sagiangwa kakina bemadisidjig aking, potch jangeniminangog. Gi-dodam dash gaie win iw; o gi-sagian, o gi-mino-dodawan ga-apitchi-matchi-dodagodjin.

2. Nin gjendam gaie, *weweni* tchi bonigidetawag nidj' anishinabe, kishpin matchi

ijid, matchi dodawid gaie. Kawin anishā nin wi-ikitossi : “Nin bonigidetawa”; we-weni sa enigokodeeiān nin wi-webinama-wa, nin wi-bonendamawa ga-matchi-doda-wid, eji-pagosseinimag Kije - Manito tchi webinamawid ga-iji-nishkiag gi-bata-ijiwe-bisiiān.

**ANAMIEWIN.**

Jesus Debenimiian, kid apitchi sagiag bemadisidjig aking, potch ga-apitchi-mat-chi-dodokig, ga-nissikig ki gi-sagiag, ki gi-jawenimimag, ki gi-bonigideta wag. Jawenimishin, Jesus nosse, tibishko gaie nin tchi dodamān, kin ondji. Anawi manadadong inakakeia inagode ninde, pabige ajida nin wi-matchi-dodawa awiia ga-matchi doda-wid. Kin ondji dash nin wi-bonigideta-wa, weweni enigokodeeiān nin wi-webinama-wa, nin wi-bonendamawa ga-iji-doda-wid. Ki pagosseinimin dash, Jesus, tchi wi-dokawiiian tchi gashkitoiān tchi dodaman, nongom ga-iji-gijendamān.



22. *Ta nanagatawenindiso enamiad wen-dji-dajimind. Kego win awiia o gadajimassin.*

ANINGOTINONG awiia ikito : Nin jingenimigog nidj' anishinabeg, anotch nin matchi igog, anotch gaie nin matchi dodagog. — Kawin dash kikenindisossi, win igo dadasod. — Nanagatawenindison, niaidjaniss. Kishpin jingenimigoian, matchi dajimigoian gaie, gonima kin igo ki dadas.

1. Gonima ningot kid ijiwebis, mi wendji-matchi-igoian. Gonima gaie awiia ki wissokawa, mi dash iw wendji-matchi-inenimigoian , matchi-dajimigoian gaie. — Weweni ganawenindison, bisan bimadisin, gonima dash kawin awiia ningot ki gadigossi.

2. Gonima ki sasagis, kawin gwetch awiia ki jawenimassi, kawin eji-sagiidisoian kid iji sagiassi kidj' anishinabe, memindage ketimagisid ; anotch dash ki dajimigo, kawin ki sagiigossi, kawin gwetch kid apitenimigossi. — Kin sa ki dadas iw. Kawin kin weweni ki sagiassig kidj' anishinabeg, kawin gaie winawa ki sagiigossig.

3. Ki nita-matchi-dajimigo, mi dash iw wendji-nishkadisiian. Geget matchi ijiwebisiwag oma anishinabeg, kid ikit mojag. Kawin dash ki nanagatawenindisossi wendji dajimigoian. Nanagatawenindison, wikkikenindison. Gaie kin sa ganabatch ki matchi dajimag mojag bemadisidjig; kawin awiia ki manadjiasi, kawin gaie winawa ki manadjigossig, ki matchi dajimigoj mojag. Kin sa ki dadas.

4. Kid ikit gaie ganabatch : Kawin gego jajawendjigewin dagossinon oma, kawin awiia oin jaweniinigossi. — Gonima dash kin ki dadas iw. Kishpin ano jawenimigoian, kawin weweni kid inabatchitossin; ki minikwadan ganabatch, gonima dash bakan kid iji nishiwanatchiton gego manigoianin; gegapi dash kawin awiia gego ki minigossi.

5. Gonima gaie kid ikit : Geget nin kashkendam, mojag ninidjanissag matchi inindwa, matchi dodawawag gaie. — Gonima dash kin igo ki dodawag kinidjanissag matchi inindwa. Kawin ganabatch weweni ki gi-nitawigiassig, kawin gaie weweni ki ganawenimassig, osam ki pagidinag tchi ijawad enendamowad, tchi ijiwebisiwad gaie ej-minwendamowad; ka-

win ki dibenimassig kinidjanissag, winawa ki dibenimigog ; anotch dash matchi iji-webisiwag, mi dash iw wendji-matchi-dajimindwa. Kego dash bekanisid nishkenimaken, kego gaie anwenimaken ; kin igo anwenindison ; kin kid indowin endodawindwa kinidjanissag.

Mi sa naningotinong ejiwebak. Win endajimind, metchi-dodawind gaie, win igo dodaso. Da-nwenindiso dash aw, dainendam dash apitchi, tchi adjitod o bimadisiwin, gwaiak tchi ijiwebisid ; kawin dash keiabi ningot ta-inassi.

Naningotinong dash awiia geget apitchi anisha matchi dajima, anotch gaie matchi dodawa, anisha geget. Mi sa Debeniminnang Jesus ga-iji-dodawind oma aking. Apitchi anisha gi-matchi-dajima, gi-kitchijingenima, gi-kitchi-matchi-dodawa gaie. Winawa gaie ketchitwawendagosidjig non-gom gjigong ebidjig, mi go gaie winawa ga-iji-dodawindwa. Ga-ijiwebisid dash Jesus, gaie winawa ketchitwawendagosidjig gjigong ebidjig ga-ijiwebisiwad aking, apegish gaie kin ijiwebisiian. Apitchi weweni o gi-odapinanawa ga-dodawindwa, kawin gi-nishkadisissiwag ; o gi-sagiawan, o gi-gaganodamawawan, o gi-mino-doda-

wawan gaie iniw ga-apitchi-matchi-dodagowadjin. Bekish gaie odeiwang gi-minwendamog, o gi-migwetchiwenimawan gaie Kije-Maniton. O gi-mindjimendanawa sa iw ga-ikitod Jesus : "Jawendagosiwag igiw gwaiak - ijiwebisiwin wendji - kotagiindjig ; ogimawiwin gjigong o gad-aianawa. Ki jawendagosim nishiwanasomigoieg, kota-giigoieg gaie, anotch gaie matchi dajimigoieg anisha . . . Onanigwendamog, modjigendamog, apitchi weweni ki ga-dibaa-magom gjigong." — Kishpin mikwenimad Jesus ga-ijiwebisid aking, ga-iji - kikinoamonang gaie, kawin ki ga-nishkadendansi, anisha matchi dajimigoian, matchi dodagoian gaie ; potch migwetch ki gad-inenima Debendjiged, epitch inenimik tchi jawenda-gosian gjigong kagigekamig, gi-ishkwa-kotagitoian aking.

Ow dash nongom, ninidjaniss, weweni nanagatawenden. Ki kashkendam iko metchi-dajimigoianin, ki nishkadiis gaie epitch minwendansiwan dajimigoian. — Anish, geget kashkendagwad matchi dajindiwin. Api dash iw mekwendaman, ow ki da-inendam: Geget kawin nin minwendansi dajimigoian ; mi go dash gaie tibishko nidj' anishinabe kawin minwendansi ; kawin sa

awia minwendansi tchi dajimind. Kawin dash minawa wika awiia nin wi-dajimassi ; eji-minwendamān sa gaie nin tchi dodagoiān, mi ge-wi-dodawag nidj' anishinabe ; eji-minwendansiwān dash, kawin gaie nin nin wi-dodawassi. — Mi ged-inendaman, ninidjaniss ; bekish gaie songandan tchi apitchi bonitoian matchi dajindiwin.

Nawatch dash weweni tchi gashkitoian tchi bonitoian, ow nanagatawenda.

1. Ki kitchi matchi dodam kidj' anishinabe matchi dajimad. Mi eji-wabandaming Kije-Manito o masinaiganing : Ki matchi dodam gimodimad kidj' anishinabe ; awashime dash ki matchi dodam kishpin dajimad. — Mi geget. Awashime sa apitendagwad iw tchi mino-wawinind awiia, iw dash tchi kitchi-danid.

2. Jesus gi-ikito : "Mi memindage kitchi ganasongewin, enamiad tchi sagiad widj' anishinaben eji -sagiidisod." — Aw dash neta-dajinged kawin gwaiak o sagiassassin widj' anishinaben, o matchi ineniman bekish o matchi inan, o dibakonan ; kawin o jawenimasssin, kawin gwaiak o sagiassassin.

3. Jesus gi-ikito : "Anin ged-iji-gashkitoian tchi inad kidj' anishinabe : Beka, nin wi-mamon binsiniwin kishkinjigong eteg.

Kitchi mitig dash kishkinjigong ebid, kawin ki wabamassi." — Mi ejiwebisian kishpin nita-dajingeian. Pabige ki wabandamawa kidj' anishinabe o matchi dodamowin, ki dajima dash; kin dash ejи-matchi-ijiwebisian, kawin iw ki wabandansin, kawin gaie ki babamendansin. — Kin dash ki dababamenindis, kin ki da-dibakonidis, tchi jawenimigoian dibakonige - gijigak. Ikito sa kitchitwa Paul: "Kishpin awiia dibakonidisod, kawin wedi ta-dibakonassi;" m<sup>k</sup> sa, kawin ta-animisissi dibakonige-gijigadinig. Jesus gaie ikito: "Kawin ta-jawenimassi dibakonige-gijigadinig aw jewenimassig widj' anishinaben," dibakonad gaie.

4. Kishpin nita-dajingeian , ki wabandaiwe ki matchi ijiwebisiwin, ki matchideewin gaie. Kawin kideing ki jawenimassi kidj' anishinabe, ki matchi inenima mojag. Ejiwebak dash kide, mi ejinagwak ki gigitowin ; ejи-deeian sa, mi-eji-gijweian. Jesus ikito: "Eji-moshkinemagak kide, mi ejи-gigitomagak kidon" Kishpin kijewadisiwin, ketchitwawendagwak gaie sagii-diwin dagomagak kideing, ki ga-mino-gigit, ki ga-sagiigos ejи-gigitoian. Kishpin dash nita-dajimad, dibakonad gaie kidj' anishinabe, anotch inad, pagwanomad, pabige

ima kikendagwad ejinagwak kide; kawin sa gwaiak kijewadisiwin, kawin gaie we-nijishing sagiidiwin kideing dagossinon. Jingendagwak kide, mi wendji-jingenda-gwak ki gigitowin.

Ki gi-windamon nongom eji-manadak matchi dajindiwin, ki gi-apitchi-gaganso-min dash gaie tchi bonitoian, wika minawa tchi dajimad awiia. — Nongom dash minawa ow kid inin. Kawin iw iji debisss-sinon, tchi matchi dajimassiwad awiia ; gaie dash, ninidjaniss, kego wika ganage pisindawaken metchi-dajinged. Mindjimendar iw ikitowin ga-ikitod kitchitwa Bernard. Ow sa gi-ikito: “Aw dejinged od aiawau matchi maniton *odoning*, aw dash pesindang dajindiwin od aiawan *otawagang*.”— Mi ga - ikitod aw ketchitwawendagosid inini. Mindjimendar iw. Kawin da.oni-jishinsinon ningotchi tchi aiawad matchi manito. — Kego dash ineudangen: Kawin nin matchi dodansi pisindamān eta; kawin nin ningot nind ikito:s, nin pisidam eta, kawin nin matchi dodansi. Kego iw inendangen ; ki kitchi waiejindis iw inendaman. Kid anokitawa, ki minwendamia gaie matchi manito, kishpin ondjita pisindaman

matchi dajindiwin; kitawagang sa kid aia-wa aw matchi aiaawish.

Ninidjaniss, ki ga-windamon dash nongom ge-dodaman, kishpin nondaman matchi dajindiwin.

1. Kego pabige debwetangen nondaman gego. Ow ojibiigade Kije-Manito o masinaiganing: "*Kawin gwaiakwendansi aw daiebwetang pabige minik nwandang.*" Mindjimendan iw. Ki kikendan ej-i-gaginawishkiwad debadjimodjig. Kawin nanningotinong awiia weweni o kikendansin tchi gi-ijiwebak gego, inendam eta, mi dash jaigwa dibadjimod, kawin dash geget awansinon. Kishpin dash kin kakina pabige debwetaman, ki matchi dodam. — Kego dash pabige debwetangen minik nwandaman, kego ganage babamendangen. Kin igo bebamenindis, kego dash bekanisid babamenimaken ejiwebisid. — Kishpin debwetaman matchi dajindiwin, pabige ki ga-matchi-inendam, kidj' anishinabe ki ga-matchi-inenima. Ikito dash kitchitwa Paul: "Aw kejewadisid kawin matchi inendansi, kawin widj' anishinaben o matchi inenimasson." Mi ekitod k. Paul, mi sa Kije-Manito od ikitowin. Kishpin dash pabige debwetaman dajindiwin, matchi

inenimad dash kidj' anishinabe, kid agon-wetawa Kije-Manito. Mi sa iw wendjigoian : Kego pabige debwetangen matchi dajindiwin, kego ganage babamendangen.

2. Minawa dash, ninidjaniss, ow kid inin. Kishpin iji gashkitoian, pabige madjan, kego ima aiaken endaji-matchi-dajimad awiia widj'anishinaben. Kishpin ima aiaian, gonima gegapi gaie kin ki ga-matchi-ikit. Nindawatch dash madjan iji gashkitoian. Kishpin dash gashkitossiwan tchi madjaian, kego ganage babamendangen ekitod awiia dejinged ; kego gaie kin tibishko ikitoken, bisan aian. Kego dash, ninidjaniss, inendangen : Kishpin ningot ikitossiwàn, kawin ta-minwendansi aw gaiagigitod. Kego iw babamendangen. Mikwenim Kije-Manito, ow dash inendan : Kishpin gaie nin nongom gigitoiàñ dajingeiàñ, geget aw anishinabe ta-minwendam, Kije-Manito dash kawin ta-minwendansi ; kishpin dash dajingessiwàn, Kije-Manito ta-minwendam, aw dash anishinabe kawin ta-minwendansi. Mano dash nin ga-dodam, Kije-Manito ged-iji-minwendang. — Mi ged-inendam. Songandan dash kija, wika tchi babamendansiwan dajindiwin, wika gaie tibishko tchi ikitossiwan ekitod aw

dejinged. Mano kawin win ta-minwendansi, Kije-Manito dash ta-minwendam.

3. Awashime dash ta-onijishin ow tchi inad aw dejinged : Kego iw ikitoken, kawin onijishinsinon dajingewin, kitchi manadad, mojag ki ginaamagomin tchi dajimas-siwang awiia, tchi pagwanomassiwang gaie.

— Mano ki da-ganona ; weweni dash ganoj, tchi nishkadisissig. Kishpin dash minotch nishkadisid, win eta o gad-aian batadowin, kin dash mino dodamowin ki gad-aian ; ki mino dodam sa ganonad.

Ow dash nongom kid inin ge-wi-mindjimendaman. Ki kitchi matchi dodam geget dajimad awiia , pagwanomad. Kishpin dash awiia wabamad matchi dodang, g-nima gaie kikenimad tchi gi-matchi-dodang, weweni ki da-ganona, beka ki da-anwenima ; ki ga-kitchi-mino-dodam dash. Debeniminang Jesus kid igonan tchi dodamang iw. Ow sa ikito: "Kishpin kidj' anishinabe matchi dodang, anwenim weweni, win igo nijike ganoj. Kishpin pisindok, ki gi-gashkia; kishpin dash pisindossilog, minawa awiia nebvakad inini ki da - bi - wi-djiwa, tchi ganoneg aw ga - matchi - dodang". . . Weweni dash nissitotan, mindjimendan gaie.

1. Kishpin awiia wi-anwenimad, kego kin tibishko ijiwebisiken ejiwebisid. Kin nitam anwenindison, kin nitam boniton matchi ijiwebisiwin; panima dash ki gamino-dodam, weweni tchi ganonad tchi anwenimad kidj'anishinabe metchi-dodang.

2. Weweni gaie ki da-anwenima awiia, beka go ki da-ganona; ki da-wabandaa sa sagiad; epitch dash sagiad, mi wendji-ganonad. Kishpin kikenimik aw kidj'anishinabe sagiad, mi dash wendji-ganonad, kawin ta-nishkadisissi, ki ga-babamitag; kishpin dash nishkadji-ganonad, anotch gaie inad, kawin ki ga-gashkiassi tchi anwenindisod, kawin ki ga-babamitagossi. Beka go weweni ganoj.

3. Nijke gaie nitam ganoj, tchi agatchisig. Gonima pabige ki ga-babamitag, mi dash gi-gashkiad. Kishpin dash agonwetang, odapinansig gaie ejि-anwenimind, awiia ki ga-gagwedjima tchi ganonad. Mekatewikwanaie nitam windamaw, gaie win tchi ganonad. Gonima gaie awiia nebvakad inini ki da-windamawa, tchi awi-ganonad gaie win iniw metchi-ijiwebisinidjin.— Kishpin dash gwaiak kikendaman tchi babamitossinog aw ga-matchi-dodang, kego nindawatch ganonaken; kawin potch ki

ga-gashkiassi ; da-nishkadisi eta anweni-mind.

Memindage dash kid inawemaganag, tibinawe gaie kinidjanissag ki.da.anwenimag weweni. Tibinawe dash kinidjanissag kawin ki gad-anwenimassig eta, ki ga - bahanjewag gaie, kishpin bonitossigwa matchi ijiwebisiwin, matchi dodamowin. Tanimisi wenidjanissid enamiad dibakonige-gijigadinig, kishpin babamenimassig onidjanissan, bashanjewassig gaie metchi - dodaminidjin. Kije-Manito o masinaiganing ojibiigade : "Ki mino dodawa kinidjaniss bashanjewad, ki banadjia dash bashanje-wassiwad. Kagige ishkoteng agwashima abinodji beshanjeond, aw dash beshanje-wassiwind kagige ishkoteng apagina" Mi iw Kije-Manito od ikitowin.

Bekish dash gaie, kishpin onidjanissian, mino ijiwebisin, gwaiak iji bimadisin, tchi mino kikinoamawadwa mojag kinidjanissag. Kishpin anwenimad kinidjaniss, bekish dash tibishko matchi dodaman gaie kin, kawin kinidjaniss ki ga-pisindagossi ; kid apitchi banadjia matchi kikinoamawad. — Mindjimendar dash gaie ga-ininang Jesus : "*Kawin kiniwa ki da-gashkitossinawa gego tchi mino dodameg nijke.*"

Geget kawin ; mi dash ge-ondji-gaganoda-mawadwa mojag kakina kidj' anishinabeg, memindage dash kinidjanissag, Debenimini-nang Kije Manito tchi jawenimad tchi minad gwaiak anwenindisowin, mino ijiwebisiwin gaie.

**GIJENDAMOWINAN.**

1. Nin gjendam, mojag weweni tchi nanagatawenindisoiàn, memindage wena-goshigin anamiaiàn, weweni tchi wi-kiken-indisoiàn. Kawin iw onijishinsinon kikenidisossig enamiad. Kishpin kikenindi-sossig ejivebisid, sasagwana o matchi in-eniman widj' anishinaben ; nin jingenimig, nin matchi dodag, od ineniman. Kishpin dash weweni kikenindisod, win igo anwe-nindiso ; nin igo nin dudas iw ejivebi-dajimigoiàn, inendam. Weweni nin wi-kikenindis ejivebisiiàn, tchi matchi inenimassiwag awiia. tchi gashkitoiàn gaie tchi andjitoiàn nind ijiwebisiwin.

2. Nin gjendam dash gaie memindage tchi apitchi bonitoiàn matchi dajindiwin, weweni gaie tchi ojindamàn. Nin wi-sagiag kakina nidj' anishinabeg ejivebi-

soiān. Kawin awiia nin wi-dodawassi ejimwendansiwān tchi dodagoiān ; kawin gaie nin wi-pisindawassi dejinged, kawin nin wi-babamenimassi ; potch nin ga-ganona tchi bonitod dajindiwin epitch manadak.

3. Nin gjendam gaie, weweni tchi anwenimad metchi-dodang ; weweni beka nin wi-ganona tchi nishkadirissig. Epitch sagiag nin wi-ganona, kawin nin wi-jingennimassi. O matchi dodamowin eta nin wi-jingendamawa, win dash nin wi-sagia, nin wi-jawenima.

#### ANAMIEWIN.

Debenimiian Kije-Manito, kin aiapitchi-sagiadwa bemadisidjig aking, kid iji pagosenimin tchi mijian ketchitwawendagwak sagiidiwin, tchi moshkinadoian ninde kijewadisiwin, sagiidiwin gaie. Kishpin dash ninde moshkinemagak kijewadisiwin, kawin nindoning matchi dajindiwin wika tadagossinon. Anawi nin kitchi inendam tchi bonitoiān kakina matchi dajindiwin, nin kikendan ejimanaadak; kawin dash nijike nin da-gashkitossin gego tchi mino

dodamān ; mi wendji - pagosse niminān,  
Kije-Manito nosse, jawenimishin, widoka-  
wishin , mijishin ki jawendjigewin, tchi  
gashkitoiān mojag tchi mino dodawag nidj'  
anishinabe, eji-minwendamān tchi doda-  
goiān.



23. *Maminadisiwin kitchi manadad.*

KITCHI matchi dodam enamiad kishpin maminadisid. Meminadisid o nandawandan kitchitwawisiwin, tchi kitchitwanenimind, awashime tchi apitenimind, anind dash; inendam tchi dibendjiged, tchi ijiwebisid win igo enendang. Mi sa iw ejii-nandawendaang meminadisid.

Kitchi jingendagwad maminadisiwin; Debeniminang Kije-Manito o jingendan, bemadisidjig gaie aking o jingendanawa. — Geget Kije-Manito o jingendan maminadisiwin, o jingeniman meminadisnidjin. Mi sa maminadisiwin apitchi netamissing batadowin. Bwa bata-dodamowad anishinabeg aking, winawa Anjeniwag gjigong gi-bata-ijiwebisiwag, *gi-maminadisiwag* sa. Pabige dash Kije-Manito anamakamig o gi-apaginan iniw gamaminadisnidjin anjeniwan. Mi ima memindage wendji-kikendamang, ejii-jingendang Kije-Manito maminadisiwin. — Nanagatawandan ga-ijiwebak iwapi. — Awennenag igiw ga-maminadisidjig? Anjeniwag sa, kawin anishinabeg; gjigong eiadjig, kawin aking. Api dash meminadisiwad,

anamakamig kagige ishkoteng apaginawag ; mi dash nongom matchi-manitowiad. Mi ga-dodawindwa igiw nitam ga-maminadisidjig, mi sa anjeniwag gijigong, epitch jingendang Kije-Manito maminadisiwin.

Ojibiigade Kije-Manito o masinaiganing : “Kawin Debendjiged jawendjigewin o minasssin meminadisinidjin, o jingeniman.” Kawin dash awiia o da-gashkitossin gego tchi mino dodang, win igo nijke, Kije-Maniton widokagossig; kishpin awiia aiansig Kije-Manito o jawendjigewin, kawin bapish o da-gashkitossin gego tchi dodang ge-ondji-minind kagige bimadisiwin gijigong. Anotch dash ta-matchi-ijitchige ; kawin weweni ta-ijitchigessi ejitwawad enamiadjig, kawin widj’ anishinaben gwaiak o ga-dodawassin, kawin o ga-sagiasssin widj’ anishinaben, kawin gaie Kije-Maniton o ga-sagiasssin, mi eta win igo tchi sagiidisod, win igo wiiaw tchi apitchi apitendang Mi ged-ijiwebisid meminadisid ga-wanitod Kije-Manito o jawendjigewin.

Kawin dash Kije-Manito eta o jingen-dansin maminadisiwin, gaie winawa bema-disidjig aking o jingendanawa. Geget jingendagwad maminadisiwin, jingendagosí

meminadisid. Kawin bisan bimadisissi. Mojag gikawidam, o nanibikiman widj' anishinaben; kishpin apitchi kitchitwawinassig, kawin minwendansi, o nandawendan kitchitwawisiwin; o tabasseniman widj' anishinaben, win od ishpandan wiaaw; mojag wi-debwe ningot ekidot; kakina gwaiak o wi-kikendan, kawin wika inendansi: Gonima kawin gwaiak nin kikendansin iw; kawin iw inendansi; apitchi gwaiak nin kikendan kakina gego, inenindiso. Geget jingendagosi. Kitchi nibiwa dash matchi dodam meminadisid, kaginig wi-debwed, inenindisod win eta gwaiak tchi kikendang kakina gego. Mi ima gaie wendjibamagak kakina bebakan ijitwawin aking. Meminadisidjig o gi-ojitonawan bebakan ijitwawinan. Kawin onijishinsinon iw ejitwawad, nawatch wenijishing ijitwawin nin nin gad-ojiton, inendam meminadisid; mi dash bakan ijitwawin ojitol; win igo enendang od ojiton.

Weweni nanagatawenda, ninidjaniss. Wegonen wendji-maminadisid aw meminadisid? Geget kawin gego bermadisid aking od aiansin ge-ondji-maminadisipan. Ow ojibiigade: "Anishinabe aking, win igo, kawin gego od aiansin, mi eta batado-

win, gagibadisiwin gaie". Mi geget. Apitchi gagibadisi, bata-ijiwebisi gaie anishanabe aking, kishpin ijiwebisid win igo enendang. Kishpin dash gego minododamang, gonima gaie wenijishing gego kikendamang, Kije-Manito Debeniminang ki minigonan kakina iw. Wegonen dash ge-ondji-maminadisiang? Mi wendji-gagwedjimad kitchitwa Paul enamianidjin : "Wegonen aiaian ga-minigossiwan? Kishpin dash gi-minigoian kakina gego, wegonen wendji-maminadisiian tibishko gi-minigos-siwanban?" — Geget kawin bapish gego nin wabandansin ge-ondji-maminadisipan bemadisid aking. Anotch sa awiia matchi dodam, anotch gaie gagibadisi megwa bimadisid aking; geget kitimagendagosi anishanabe oma aking bemadisid. Wegonen dash iw ge-ondji-ishpendang wiiaw tchi maminadisid? Wegonen ge-ondji-ki-tchitwawenindisid? Kishpin awiia gashkitod gwaiaak tchi ijiwebisid, gonima nibiwa gego kikendang, gonima gaie nibiwa gego dibendang, migwetch o gad-ineniman Kije-Maniton; Debenimid Kije-Manito anishanin gi-jawenimig, kakina win nin gi-minig, kakina win od apitchi dibendan, kawin nin

gego nin dibendansin. — Mi ged-inendang enamiad tchi maminadisissig.

Apitchi sa, ninidjaniss, ojindan mamina-disiwin, apitchi sagidjiwebinan kideing; meshkwat dash tabassenindison. Geget kitchi onijishin tabassenindisowin, kitchi minwendagwad gaie. Epitch-jingenda-gwad maminadisiwin, mi epitch-minwendagwak tabassenindisowin. Kije-Manito Debeniminang o kitchi apitandan tabassenindisowin, o sagiton gaie. Kawin dash gwetch awiia enamiad o kikendansia iw gwaiak tabassenindisowin, kawin gaie gwetch awiia od aiainsin.— Ow dash nana-gatawenda, ninidjaniss, tchi apitehi wikitwatchitoian tchi tabassenindisoian.

1. Kitchitwa Bernard ow ikito: "Kawin awiia o gad-aiansin gwaiako-bimadisiwin; kishpin gaie aiad, kawin ginwenj o ga-ganawendansin, kishpin tabassenindisossig." — Kitchitwa Augustin dash ow ikito: "Kishpin tabassenindisossiwan api wa-mino-dodaman, tabassenindisossiwan gaie ga-ish-kwa-mino-dodaman, matchi manito kakina o ga-madjidonan ki mino dodamowinan"— Tabassenindison dash, nindjaniss, tchi makamigossiwan ki mino dodamowinan. Kishpin ano mino dodaman, bekish dash mami-

nadisiian kideing, matchi manito meminadisid kakina o ga-mamonanq iniw ki dodamowinan, kawin Kije-Manito o gad - odapinansinan. Mi sa minawa Phariseiag gaijiwebisiwad ; anawi nibiwa gi-mino-dodamog, bekish dash gi-maminadisiwag, wi-kitchitwawenindisowad ; kakina dash o gi-wanitonawa; kawin Kije-Manito o gi-odapinamawasssin o dodamowiniwan.

2. Memindage dash Jesus Debeniminang o kitchi sagiton tabassenindisowin, o kitchi apitendan gaie. Ki gi-kikinoamagonantchi tabassenindisoiang enigokodeeiang ; kawin od ikitowin eta o gi-aiossin gi-kikinoamonang, o dodamowin gaie o gi-aion. Minik ga-bimadisid aking, mojag gi-kitchikitimagisi; ondjita o gi-odapinan kitimagisiwin tchi tabassendang wiiaw ; mi dash tchi kikinoamonang tabassenindisowin. Mi ga-ondji-ikitod : "Kikinowabamishig, nin bekadis, enigokodeeiān gaie nin tabassenindis." Kikinowabamishig, ikito, tibishko ijiwebisig, nin ejiwebisiān. Kawin dash wi-ikitossi : Mamandadodamog, nodjimoig aiakosidjig, abitchibaig nebodjig, nin endodamān ; kawin iw wi-ikitossi. *Bekadisig, tabassenindisog enigokodeeieg, nin eji-ta-*

*bassenindisoian*, mi eninang.— Memindage geget Jesus o minwendan tabassenindisowin ; o kitchi sagian tebassenindisonidjin, o nita-jaweniman. Api Jesus wa-bi-ijad oma aking, apitchi tebassenindisonidjin ketimagisinidjin oshkinigikwen Marian o gi-wawenabaman ge-nigiigod ; tebassenindisonidjin gaie ketimagisinidjin manishtanishiwininiwan nitam o gi-kikendamoan gi-niginid aking ; mojag gaie tabassenindisowining, kitimagisiwining gaie gi-bimadisi. Api dash ga-ininiwid, mi dash madjigagikwed, apitchi tebassenindisonidjin ketimagisinidjin gigoikewininiwan o gi-oda-pinan, mi dash gi-baba-widjiwad, weweni gi-kikinoamawad. Apitchi kitchi tabassenindisowining mojag gi-bimadisi, binish kitchi tabassenindisowining gi-dapined tchibaiatigong, tibishko awiia ga-apitchi-webinind ; gi-tabassenindiso sa, gi-pagidenindiso gaie, kinawind ondji. — Ninidjaniss, ki wabama Jesus ejitabassenindisod, ejiminwendang tabassenindisowin, ejitagitod gaie ; o kitchi sagian tebassenindisonidjin. Kishpin dash inendaman : Apegish sagiid Jesus ; ki kidandan ge-dodaman tchi sagiik. Tabassenindison sa enigokodeeian, ki gakitchi-sagiig dash Jesus.

3. Kishpin nandawendaman Kije-Manito o jawendjigewin aiapitchi - kitchitwawen-dagwadinig, mi minawa tchi tabassenindisoian. Ikito sa Kije-Manito: "Kawin me-minadisidjig nin wi-minassig nin jawendjigewin, mi eta tebassenindisodjig ge-minagwa. Apitchi geget apitendagwad iw Kije-Manito o jawendjigewin; mi dash nibiwa iw tchi minigoian, kishpin tabassenindisoian. Abinodjiing sa ta-tabassenindiso enamiad, tchi ijiwebisid ga-ikitud Jesus: 'Kishpin ijiwebisissweg abinodjiag ejive-bisiwad, kawin Kije-Manito od ogimawi-wining gijigong ki ga-pindigessim.' Mi sa, kishpin tabassenindisossiweg enigokodeeieg, kawin ki gad-ijassim gijigong.

Gwaiak dash tchi tabassenindisoian, ow ki da - inendam : Kakina minik endaniiān, minik gaie kekendamān, kakina Kije-Manito nin gi-minig; mi mojag ged-inendaman, mi gaie ged-ikitoian. Wikwatchiton gaie tchi wi-kikenindisoian weweni; kego ondjiita gagibingweken tehi wabandans-iwan ki matchi ijiwebisiwin. Kishpin awiia wi-wabandansig o matchi ijiwebisiwin, wi-kikenindisossig weweni, kawin ta-tabas-senindisossi; kishpin dash awiia weweni kikenindisod, gwaiak gaie wabandang o

matchi ijiwebisiwin, kawin o gad-ishpendansin wiiaw, gwaiak ta-tabassenindiso.

Kego gaie nishkadisiken anwenimigoian. Kishpin awiaa nishkadisid anwenimind, kawin tabassenindisossi, od ishpendedan wiiaw, o nandawendan kitchitwawisiwin. Migwetch potch ki da-inenima aw aianwenimik; ki mino dodag sa win, ki wabandaig ki matchi ijiwebisiwin, ki wabandaig ejia-kosid ki tchitchag; mi dash tchi gashkitoian tchi kikenindisoian weweni, tchi andjitoian ki bimadisiwin. Kishpin dash anwenimigossiwan, kawin ki ga-kikenindisossi eji-webisiian, kawin ganabatch ki matchi ijiwebisiwin weweni ki ga-wabandansin. Onijishin iw tchi anwenimigoian; migwetch ki da-inenima aw waiabandaik ejiwebisiian; mi dash geget tchi tabassenindisoian. — Mindjimendan iw, ninidjaniss; kego dash wika nishkadisiken anwenimigoian. Kawin gaie aiakosid nishkadisissi wabandaind od akosiwin, tchi gashkitod tchi aiod wenijishing mashkiki, tchi nodjimod. Mi go gaie kin kego nishkadisiken kishpin wabandaigoian ejia-kosid ki tchitchag. Ki tchitchag sa akosi kishpin gigishkaman bata-ijiwebisiwin; ki da-minwendam dash wabandaigoian iw, tchi gash-

kitoian gwaiak mashkiki tchi aioian, geondi-nodjimod ki tchitchag, mi sa, anwenindisowin, webinigewin, andji-bimadiswin.

Ow dash memindage mindjimendan. Kishpin gwaiak wi-tabassenindisoian, wiktawtchiton mojag weweni tchi kikenimad Kije-Manito, minik eji-gashkitoian, tchi mikwenimad mojag ejiwebisid ; misi sa aia, kaginig ki ganawabamigonan, kakina o wabandan nan ki dodamowinininan. Apitchi gaie Kije-Manito Debeniminang kitchitwawen-dagosi, apitchi sagiigosi, kakina mino ijibisiwinan od apitchi aianan. Apegish we-weni mikwenimad , ki da - tabassenindis enassamid Kije - Manito Debendjiged. — Kishpin gaie kin weweni nagatawenindisoian, weweni kikenindisoian, gwaiak ki ga-tabassenindis. Ki ga-wabandis sa eji-kitimagisiian, eji-gagibadisiian gaie, gego gwaiak kikendansiwan. Kawin ningot nind apitendagosissi, pingwing nind apitendagos ; ki da-inenindis. Mi sa geget ged-inenindisoian, kishpin gwaiak kikenindisoian. Mi iw wendji-ininàn: Wikwatachiton tchi kikenimad weweni Kije-Manito; gaie kin dash weweni tchi kikenin-

disoian, mi dash gwaiak tchi tabassenin-disoian.

**GIJENDAMOWINAN.**

1. Apitchi nin gjendam, mojag tchi migadamān maminadisiwin, tchi jingendamān tchi webinamān gaie apitchi. Nin kikendan eji-manadak, nin kikendan gaie eji-jingendang Debeniminang Kije - Manito, eji-jingenimad gaie meminadisiniidjin; mi ge-ondji-jingendamān gaie nin maminadisiwin. Nin kitchi nandawendant iw tchi sagiid Kije-Manito; kawin dash nin dasagiigossi kishpin maminadisiān, mi - ge-ondji-webinamān maminadisiwin.

2. Nin gjendam gaie, mojag tchi takwendamān iw ikitowin: "Wegonen aiaian ga-minigossiwan?" Geget kakina gego nin gi-minigo anisha; kakina gego Kije-Manito nin minig, minik menesiiān aking, kawin gego nin nin minidisossi; nin kitimagis, nin gagibadi, nin matchi ijiwebis; wegonen dash ge-ondji-ishpendamān niiaw?

3. Apitchi gaie nin gjendam, tchi tabassenindisoian enigokodeeiān, Jesus ondji, win tchi minwendang. O sagiton Jesus tabassenindisowin, o kitchi minwendan;

mi ge-ondji-minwendamàn gaie nin. Kawin  
nin wi-nishkadisissi, awiia anwenimid ; mi-  
gwetch potch nin gad-inenima. Nin mino  
dodag sa aw aianwenimid, nin wabandaig  
eji-akosid nin tchitchag ; mi dash tchi aioiàn  
mashkiki, nin tchitchag ge-ondji-nodjimod.

**ANAMIEWIN.**

Jesus Debenimiian, ga-apitchi-tabasse-  
nindisoian minik ga-bimadisiian aking, kid  
iji pagossenimin tchi mijian songendamo-  
win, weweni tchi sagidjiwebinamàn ninde-  
ing kakina maminadisiwin. Kitchi nibiwa  
atemagad nindeing, nin kitchi kashkendam  
nanagatawenindisoian. Kishpin dash keiabi  
nindeing ganawendamàn maminadisiwin,  
kawin kin ki gad-abitansin ninde, epitch  
jingendaman maminadisiwin. Apitchi dash  
ki nandawenimin, Jesus nosse, mojag tchi  
aiaian nindeing ; mi wendji-pagosseniminan  
tchi widokawiian tchi sagidjiwebinamàn  
nindeing kakina maminadisiwin, meshkwat  
tabassenindisowin kaginig nindeing tchi  
ganawendamàn.



24. *Enamiad ta-anwenindiso, ta-kotagii-diso gaie.*

KITCHI onijishin anwenindisowin. Enamiad neta-anwenindisod weweni bimadisi, mino nibo gaie. Kishpin awia weweni nita-anwenindisod, ta-gassiamawa, ta-gassiadeniwan o batadowinan, o ga-gashkiton gaie tchi ojindang batadowinan, tchi ganawendang gaie odeing Kije-Manito o jawendjigewin; kaginee jawendagosiwine dash gijigong o gad-aian. Mi wendji-ikitod Jesus: "Kishpin anwenindisossiweg, kakina mamawi ki ga-banadjidisom." Kitchitwa Augustin dash ow ikito: "Kishpin anwenindisoian, katagiidisoian gaie, kawin meshkwat Kije-Manito ki ga-kotagiigossi gibata-ijiwebisian. — Kitchi-mekatewikwanaieg gaie, ningotchi gi-mamawi-gigitowad, ow gi-ikitowag: "Minik ge-bimadisid aking enamiad, mojag ta-anwenindiso, ta-kotagiidiso gaie."

Mi go gaie Debeniminang Jesus ga-ijiwebisid minik ga-bimadisid aking; mojag sa kotagiidisowing gi-bimadisi, ondjita wi-kikinoamonang. Kawin win wika gi-matehi-dodansi, anawi dash gi-kotagiidiso

mojag; mi sa wi-kikinoamonang ge-dodamang megwa bimadisiang aking. Mi go tibishko gaie winawa ketchitwawendagodidjig nongom gijigong ebidjig ga-dodamowad, megwa gi-bimadisiwad aking. Geget memindage gi-anwenindisowag mojag odeiwang, gi-kotagiidisowag gaie mojag. Mi dash gaie kinawind baiata-ijiwebisiiang gedodamang, tchi gassiamagoiang ki batadowininanin. "Aianwenindisossig kawin tagassiamawassi," ikito kitchitwa Jerome.

Wegonen dash ge-dodang enamiad, weweni tchi gassiamawind gi-bata-ijiwebisid?

1. Nitam sa enamiad ta-anwenindiso odeing gi-bata-ijiwebisid, gi-nishkiad Kije-Maniton; enigokodeed ta-anwenindiso. — Weweni dash tchi anwenindisoian kideing, ninidjaniss, weweni nanagatawendenan ejimanadak batadowin. Ojibiigade mandan masinaiganing, ejimanadak batadowin, mi iw ge-wabandaman, ge-nanagatawendenman gaie, weweni tchi nissitotaman. Weweni gaie wikwatchiton tchi nissitotaman wa-ikitomagak iw: Nin gi-nishkia, nin gi-matchi-dodawa Kije-Manito. — Kishtpin enamiad weweni iw nissitotang, mojito gaie odeing, geget kitchi anwenindiso gi-

bata-ijiwebisid, gi-matchi-dodawad Kije-Maniton Debendjigenidjin.

2. Bekish dash gaie enamiad enigoko-deed ta-kashkendam gi-bata-ijiwebisid. Geget kitchi kashkendagwad batadowin. Kishpin awiia bata-ijiwebisid, gigishkang dash kitchi batadowin, geget kitchi kashkendagwad, kitchi segendagwad gaie ejiaiad. Kawin iwapi Kije-Maniton o sagi-gossin, o webinigon. — Weweni nanagata-wendant eji-manadak batadowin, enigoko-deeian tchi kashkendaman gi-bata-diian. — Ow gaie nanagatawendant. Jesus gi-kitchi-kashkendam ki batadowininan ondji. Apitchi geget gi-kashkendam minik ga-bimadisid aking, memindage dash api jaigwa wa-ishkwa-bimadisid, gi-kitchi-kashkendam, binish miskwi gi-abwesod, ga-apitch-kashkenkang. — Wegonen dash ga-ondji-kashkendang? Mi sa ki batadowininan ondji. Kawin win wika gi-bata-ijiwebisissi, kinawind sa ki batadowininan gi-ondji-kashkendam. Kishpin dash Jesus gi-kitchi-kashkendang ki batadowininan ondji, gaie kinawind ki da-kashkendamin. — Nanagatawendant iw, ninidjaniss, enigo-kodeeian tchi kashkendaman gi-bata-ijiwebisian. — Ketchitwawendagosidjig giji-

gong ebidjig gaie winawa gi-kitchi-kashkendamog, gi-mawiwag gaie, panggi gi-bata-ijiwebisiwad. Anawi geget kitchi panggi gi-matchi-dodamog, enigok dash gi-mawiwag mojag ga-apitch-kashkendamowad.— Kitchitwa Pierre iwapi eta gi-matchi-dodam gi-ikitod : "Kawin nin kikenimassi Jesus"; mojag dash panima gi-kitchi-kashkendam, gi-mawi gaie, abiding gi-matchi-dodang. Kinawind dash mojag ki matchi dodamin, kawin dash wika ki mawissimin. — David ga-kitchi-sagiad Kije-Maniton, gi-kitchi-matchi-dodam ningoting; panima dash mojag gi-kitchi-kashkendam, gi-mawi gaie ga-apitch-kashkendang. "Mojag nin mikwendan nin batadowin, mojag nin wabandan," gi-ikito. — Mi sa kakina ketchitwawendagosidjig ga-dodamowad megwa gi-bimadisiwad aking, gi-mawindamowad o batadowiniwan, gi-kashkendamowad. Mi gaie kin, ninidjaniss, ge-dodaman gedako-bimadisiian; mojag kashkendan bataijiwebisiian. Kego wika inendangen: Sasgwana jaigwa nin gi-mawindanan nin batadowinan; kitchi ginwenj eko-kashkendamàn gi-matchi - dodamàn ; mi minik. Kego iw ikitoken. Bejig ketchitwawendagosid inini ow gi-ikito : "Bejig eta kitchi

batadowin debisse, tchi ondji-mawid enamiad kagigekamig.” Mi geget. Kishpin bejig eta kitchi batadowin gigishkaman api ge-niboian, ki ga-maw kagigekamig anamakamig, kawin dash ningot ki gad-inabadjitossin iw ki mawiwin. Kishpin dash nongom mawindaman ki batadowinan, enigokodeeian kashkendaman gi-bata-ijiwebisiian, kakina Kije-Manito ki gagassiamag ki batadowinan, mi dash kaginiig gijigong tchi minawanigosiian. Apitchi o minwendan Kije-Manito iw ketchitwawendagwak kashkendamowin, awiia kashkendang gi-bata-ijiwebisid. Mi wendji-ikitod Jesus: “Jawendagosiwag keshkendangig gi-bata-ijiwebisiwad, mi sa igiw geminawanigwendangig.” Pabige gaie Jesus o gi-jaweniman Pierran gi-kashkendaminid. Gi-kitchi-mawi sa Pierre gi-kashkendang gi-matchi-dodang, mi ga-ondji-jawenimind pabige. Marie Madeleine gaie gi-kitchi-kashkendam, gi-mawi gaie Jesus san osidaning, gi-kashkendang gi-matchi-ijiwebisid. Pabige dash Jesus ow o ginan: “Nindaniss, Kije-Manito apenimon, gassiigadewan ki batadowinan.” — Mi iw ge-dodaman gaie kin, ninidjaniss, ki ga-jawenimig dash Kije-Manito, ki ga-gassia-

mag kakina ki batadowinan, kishpin kash-kendaman gi-bata-diiān.

3- Memindage dash, ninidjaniss, andjiton ki bimadisiwin, boniton ki matchi-iji-webisiwin, mi dash tchi gassiamagoian ki batadowinan minik ga-matchi-dodaman binish nongom. Kishpin bonitossiwan ki bata-ijiwebisiwin, kawin ki ga-gassiamagossi, missawa apitchi mawiiān, mawindaman ki batadowinan. Kawin gaie ki ga-jawendagosissi gjigong tehi ijaian, missawa gego mino dodaman, kishpin bekish kitchi batadowining daji-bimadisiian, bonitossiwan bata-ijiwebisiwin. Nissinon memindage kitchi mino dodamowinan, wi sa, *giigwish-imowin, anamiewin, jajawendjigewin*. Missawa dash giigwishesimoian endasso-gijigak, ga - dodamowad ketchitwawendagosidjig nongom gjigong ebidjig, kawin gjigong ki gad-ondji-ijassi, kishpin bata-ijiwebisiian, bonitossiwan bata-ijiwebisiwin. Missawa gaie anamiaian gega kabe-gijig, endasso-gijigak gaie anamiewigamigong ijai-an, anamieminag gaie agimadwa endasso-gijigak, bekish dash bata-ijiwebisiwining daji-bimadisiian, kawin Kije-Manito ki ga-gassiamagossi ki batadowinan, kishpin bonitossiwan bata-ijiwebisiwin, andjitossiwan

ki bimadisiwin. Missawa gaie kitchi nibiwa maminadwa ketimagisidjig, kitchi nita-jawendjigeian, kawin ningot kakina iw ki gad-inabadjitossin, kawin gjigong ki gad-ijassi, kishpin bonitossiwan bata-ijiwebisiwin, kishpin kitchi batadowining dajibimadisiian. Mi sa eji-manadak kitchi batadowin, mi eji-kitimagiidisod gegishkang kitchi batadowin; kakina mino dodamowaninan o banadjitonan, kawin gego od aiansom ge-ondji-gashkitamasod kagige jawenda-gosiwin gjigong, epitch gigishkang kitchi batadowin. Mi iw eji-nandawendang Kije-Manito memindage, andji-bimadisiwin, tchi andjitod o bimadisiwin baiata-ijiwebisid, tehi bonitod o bata-ijiwebisiwin, mi dash meshkwat gwaiako-bimadisiwin tchi oda-pinang, tehi ganawendang gaie apine. Mi dash iw wendji-ikitod Debeniminang Kije - Manito : "Kawin nin nandawenimassi baiata-ijiwebisid tchi dapined bata-ijiwebisiwining; nin nandawenima tchi andjitod o bimadisiwin, tehi bonitod o bata-ijiwebisiwin, mi dash kaginig gjigong tchi bimadisid."

Awashime dash weweni tchi gassiamagoian ki batadowinan, ki da-kotagiidis aiapi. Giigwishimowin, mi bejig kotagii-

disowin. Dassing enindwa enamiadjig tchi giigwishimowad, ki da-giiwishim gaie kin, kishpin iji gashkitoian. Kego dash anisha inendangen : Kawin nin da-gashkitossin tchi giigwishimoian ; kego pabige iw inendangen. Gagwedjim mecatewikwanaie, gwaiaak windamaw ejiaiaian ; kishpin dash win pagidinik tchi giigwishimossiwan, kawin ki ga-matchi-dodansi tchi giigwishimossiwan.

Naningo tinong gaie enamiadjig inawag tchi gonwapowad wiiass, ondjita tchi midjissigwa, missawa atenig, mi sa tchabaiatigo-gijigakin, gaigwishimo-gijigakin gaie. Mi iw gaie kin ge-dodaman, tchi kotagiidoisan pang. Kego ondjita wiiass midjiken tchabaiatigo-gijigak, giigwishimo-gijigak gaie, kishpin bekanak gego dagomagak. Kishpin eta dagossilnog bekanak, kawin ki da-matchi-dodansi tchi midjiian wiiass ; kego dash ondjita midjiken, mano kotagiidison.

Ow dash gaie mindjimendan tchi kota-giidisoian. Kishpin kitimagisiiian, gego we-nijishing midjim aiansiwan, kego ningot inandangen, kego gaie missawendangen mino wissiniwin, ketchi-danidjig ejimino-wissiniwad. Mikwenim Jesus ga-iji-kiti-

magisid gaie win aking. Kawin wenijishing gego o gi-midjissin, osam gi-kitimagisi, ondjita gi-kitimagitod wiiaw; awashime gi-kitimagisi, kin eji-kitimagisiian; gi-minwendam dash, kawin ningot gi-inendansi. Gaie kin minwendan, kotagiidiso-wining dash odapinan kitimagisiwin, gaie ki wissiniwin eji-kitimagak. Eji-ashamigoian gaie gego odapinan; kego ningot inendangen, kishpin gwetch onijishinsinog eshamigoian. — Jesus ᥐ ᥕ gi-inanan o kikinoamaganan: “Madjag, baba-gagiki-mig anishinabeg; ged-ashamigoieg dash odapinig, midjig.” Mi go gaie kin gedijiwebisiian; kego ningot ikitoken, kego sanagisiken, eji - ashamigoian odapinan, midjin.—Mindjimendar dash iw ga-ininān ningotchi mandan masinaiganing: Kishpin tchibaiatigo-gijigak, gonima giigwishimo-gijigak ashamigoian wiiass, kego odapinangan, kego midjiken.

Bakan dash gaie ta-giigwishimo enamiad, mi sa, tchi matchi inabissig, tchi matchi pisindansig, tchi matchi ikitossig gaie.

1. Weweni, ninidjaniss, ganawendañ *kishkinjigon*, tchi wabandansiwan maianadak gego. Kishpin gego maianadak pitchi-wabandaman, pabige mikwenim Kije-

Manito, bakan dash ningotchi inabin. Kawiwin kid ondji-aiansin batadowinan, kishpin pitchi-wabandaman gego ; kishpin eta ondjita ganawabandaman gego maianadak, ki gad-aiān matchi inendamowin, ki gawiniton kide, gonima gaie eshkam ki ga-matchi-inendam, ki ga-bata-dodam gaie. Mi dash wendji-igoian : Mino ganawandan kishkinjigon ; mi sa iniw ishkwandeman geondji-pindiged matchi manito kideing, tchi dibenimik. — Meshkwat dash minwandan, wenijishing gego sasagwana tchi ganawabandaman ; Jesus tchi ganawabamad tchibaiatigong egodjing, tchi mikwenimad gaiiji-jaweniminang, gi-bi-ijad oma aking, gi-kotagitod, gi-nibod gaie, tchi nodjimoad ki tchitchagonanin. Gonima gaie masinitchigaganag ki da - ganawabamag aiapi , tchi mikwenimadwa ketchitwawendagosidjig gjigong ebidjig , ga-iji-mino-bimadisiwad aking, ga-iji-kotagitowad gaie, weweni gi-dapinamowad kotagitowin ; gaie kin tchi mashkawendaman, gwaiāk tchi iji bimadisiian aking, Kije-Manito weweni tchi anokitawad. Masinaigan gaie sasagwana ki da-wabandan, eshkam tchi kikendaman ketchitwawendagwak gagikwewin , eshkam tchi nissitotaman, eshkam gaie tchi mash-

kawendamar tchi dodaman, enendagosid enamiad tchi dodang. Mi ged-aioian kishkinjigon ; kego dash wika aioken, maiana-dak gego tchi ganawabandaman.

2. Tibishko gaie *kitawagan* weweni ganawendañ. Kego ondjeta pisindangen matchi gigitowin ; pabige madjan iji gashkitoian ; kishpin dash gashkitossiwan, kego ganage minwendangen tchi nondaman maianadak gego ; kego ganage babamendangen. Mi sa gaie kitawagan ishkwandeman ge-ondji-pindiged matchi manito kideing, kishpin weweni ganawendansiwan. Weweni mojag ganawendañ kitawagan tchi ondji-pindigagossig jangenimik. Kego pisindangen matchi dajindiwin ; memindage o jingenden Kije-Manito. Kego gaie pisindangen bishigwadji-gijwewin ; apitchi jingendagwad, o kitchi jingenden Debeniminang. Kego sa go gego maianadak ondjeta pisindangen. — Meshkwat dash minwendan tchi nondaman anamie - gagikwe-win anamiewigamigong. Mojag ijan enamiegijigakin anamiewigamigong tchi nondaman gagikwewin. Kishpin gaie awiia dibadodang wenijiishing gego, gonima gaie masinaigan agindang, nabowadang, mi iw

ge-pisindaman weweni; maianadak dash kego wika pisindangen.

3. *Kidon* gaie weweni ganawendant; mi ima wendji - bata - ijiwebisid awiia kitchi nibiwa dassing, kishpin weweni ganawendansig. Kego, ninidjaniss, nibiwa gigitonken; mano bisan bimadisin. Kije-Manito o masinaiganing ow ojibiigade: "Endagog nibiwa dananagidonawin, mi ima ge-dagog gaie batadowin." — Aw neta-gigitod nibiwa ikito ged-ikitossig. Nawatch da-onijishin tchi ikitossig; epitch dash minwendang tchi gigitod mojag, anotch gego ikito. — Kego wika, ninidjaniss, matchi aioken kidon. Mikwenim Kije-Manito, ki pisindag kaginig; mino gigiton dash eta. Weweni mojag ganoj kidj' anishinabe, tchi minwendang; kikinoamaw gaie awiia, ki ga-kitchimino dodawa. Kije-Manito gaie ganoj anamiaian. Mi ged-aioian kidon, kego dash wika matchi aioken.

Kishpin iw dodaman, nongom ga-iji-kikinoamonan, kishpin sa mindjiminidisan, tchi matchi aioissiwan kishkinjigon, kitawagan, kidon gaie, tchi mino aioian dash kaginig, ki ga-kitchi-mino-dodam. Mi apitchi wenijishing giigwoshimowin,

enamiad tchi mino ganawendang oshkin-jigon, otawagan, odon gaie.

**GIJENDAMOWINAN.**

1. Nin gjendam, weweni mojag tchi anwenindisoian nindeing, tchi kashkenda-man gaie ged-ako-bimadisiian gi bata-iji-webisiian. Winawa kitchitwawendago-sidjig nongom gjigong ebidjig kitchi panginaningotinong gi-matchi-dodamog; gi kitchi-anwenindisowag dash, gi-kitchi-kashkendamog gaie. Nin dash kitchi nibiwa nin matchi dodam, mojag gaie; kawin dash nind anwenindisossi, kawin nin kashkendansi. Mi wendji-gijendam an nongom, enigokodeeiian tchi anwenindisoian minik ga-matchi-dodam an binish nongom; enigokodeeiian gaie tchi kashkendam an gi-bata-ijiwebisiian.

2. Memindage dash nin gjendam tchi andjitoian nin bimadisiwin. Apitchi kit-chitwawendagi Kije-Manito Debenimina-nang, od apitchi jingandan kakina matchi ijiwebisiwin, batadowin. Ged-apitch-gi-gishkam an dash iw bata-ijiwebisiwin, nin ga-jingenimig gaie nin. Missawa mino dodam an, giigwishimoian, anamiai an, jaja-

wendjigeiàn gaie, kawin ningot nin gad-inabadjitossin kakina iw, kawin Kije-Manito nin gad-odapinam'gossi gego mino dodamowin, kishpin bekish kitchi batadowing daji-bimadisiiàn. Mi ge-ondji-adjitoiàn nin bimadisiwin, tchi minwendang Kije-Manito, tchi sagiid, gaie nin dash tchi sagiag, weweni tchi anokitawag.

3. Nin gjendam dash gaie, tchi kotagii-disoiàn minik eji-gashkitoiàn; memindage dash tchi mino ganawendamàn nishkinjigong, nitawagan, nindon. Kishpin ondjita matchi inabiiàn, ondjita gaie pisindamàn matchi gjewin, nin gad-aiawa matchi manito nishkinjigong, nitawagang gaie; kishpin dash matchi gjweiàn gaie nin, nindoning nin gad-aiawa; kawin dash ningotchi nin wi-aiawassi matchi aiaawish; mi dash ge-ondji-mino-ganawendamàn nishkinjigong, nitawagan, nindon.

#### ANAMIEWIN.

Debenimiian nin Kije-Manitom, enigoko-deeiàn ki ganonin eji-kitimagisiiàn, mojag bata-ijiwebisiiàn. Jawenimishin, nosse, kitimagenimishin. Enigokodeeiàn nongom nind anwenindis; nin kitchi kashkendam

gi-bata-diiān kitchi nibiwa dassing. Nin jingendan nin matchi ijjiwebisiwin, nin wi-andjiton nin bimadisiwin, nawatch weweni ki wi-anokiton nongom, Debinimiian. Widokawishin, mijishin ki jawendjigewin, tchi gashkitoiān gwaiaak kakina tchi dodamān minik ga-gijendamān nongom.



25. *Enamiad kotagiidisowining o gad-odapinan kotagitowin aking endagog.*

AKINA bemadisidjig aking od aianawa ~~K~~akotagitowin; anind nenibiwa od aianawa, anind dash pepangi. Debeniminang Kije-Manito ki minigonan kotagitowin, be-kish dash kid inenimigonan, weweni tchi odapinamawang. Batadowining sa ondjiba-magad kakina kotagitowin. Mi wendji-minigoiang kotagitowin bata-ijiwebisiiang. Kishpin dash enamiad minind kotagitowin, kotagiidisowining o gad-odapinan, migwetch o gad-ineniman Kije-Maniton, minigod ko-tagitowin. Jawendagosi enamiad weda-pinang kotagiidisowining kakina anotch kotagitowin aking endagog. Mojag sa kotagiidisowining ta-bimadisi, kotagiidisowining gaie ta-nibo, mi dash kaginig tchi jawendagosid gijigong.

Songandan, ninidjaniss, weweni mojag tchi odapinaman kotagitowin, kotagidisowining tchi odapinaman. Kawin sanagsiuon; ki ga-gashkiton kishpin inendaman. Ow sa mindjimendant:

1. Dassing wedissikagoianin kotagitowin, pabige inendant: Nin bata-ijiwebis, mi

wendji-minigoiān kotagitowin; batadowining sa ondjimagad kakina kotagitowin. Kawin gi-kotagitossiwag nitam anishinabeg bwa bata-dodamowad; api dash gabata-ijiwebisiwad, pabige anōtch kotagitowin o gi-aianawa; kakina dash kotagitowin minik endagog aking, mi ima wendjimagak. Gaie nin dash nin bata-ijiwebis, mi wendji-minigoiān kotagitowin. Mi nitam, ninidjaniss, ged-inendaman.

2 Panima dash mikwenim Debenim-nang Kije-Manito, eji-kijewadisid. Pangi kotagitowin ki minig oma aking wenibik bimadisiian; kishpin dash weweni odapinaman, kotagiidisowining sa odapinaman, kagine kotagitowin wedi ki ga-webinamag, kagine jāwendagosiwin dash meshkwat ki ga-minig. Mi dash ow ged-inendaman: **Migwetch** nind ina Kije-Manito. Nin kikendan weweni, nin nissitotan, wendjimijid kotagitowin oma aking Geget kijewadisi. Weweni dash kotagiidisowining nin wi-adapinan iw kotagitowin, wenibik oma aking tchi kotagitoiān; kaginig dash wedi nin ga-wabima Kije-Manito gjigong, nin ga-sagia kaginig, nin ga-jawendagos kagigekamig. — Ninidjaniss, kishpin iw weweni nissitotaman, mindjimendaman

gaie, geget weweni ki gad-odapinan kota-gitowin, mojag dash kotagiidisowining ki ga-daji-bimadis.

3. Ow dash gaie mikwendan dassing kwetagitoian: Awashime Jesus gi-kotagito megwa gi-bimadisid aking, nin ejii-kotagi-toiān. Nin dash gi-ondji-kotagito Jesus gi-kitimagenimid. Nind inenimig dash, gaie nin pangtchi kotagitoiān. Migwetch enenimid. Weweni nin wi-odapinan minik majid. Ga-iji-bekadisid dash win gi-kotagitod, nin wi-wikwatchiton gaie nin tchi iji bekadisiān. Mi iw ged-inendaman kishpin kotagitoian. Bekish dash gaie ganawabam Jesus tchibaiatigong egodjing. Geget apitchi gi-wissagendam, ka dash ningot gi-ikitossi, kawin gaie gi-nishkandansi; weweni o gi-odapinan kotagitowin. — Apeghish, ninidjaniss, tibishko ijiwebisiān; geget dash ki ga-kitchi-mino - inabadjiton kotagitowin minik manigoian gaie kin.

Winawa ketchitwawendagosidjig nongom gijigong ebidjig o gi-apitchi-nissitotanawa iw ejii-onijishing kotagitowin, ejii-jawendagosid gaie enamiad wedapinang we-weni kakina kotagitowin, megwa gi-bimadisiwad aking, o gi-nandawendanawa gaie

kaginig. Kitchi kitimagisiwin ondjita o gi-odapinanawa; ondjita gaie kawin gego wenijishing o gi-midjissinawa, gi-kitchi-gii-gwishimowag gaie endasso-gijigadinig; gi-bashanjeodisowag gaie, binish gi-miskwiwiwad, endasso-tibikadinig; kitchi anokiwin gaie ondjita o gi-odapinanawa; anotch sa go kitchi kotagitowin o gi-odapinanawa ondjita, ga-apitch-minwendamowad tchi kotagitowad oma aking, gjigong dash kaginig tchi jawendagosiwad.

Kin dash, ninidjaniss, anawi kawin ki nandawendagosissi, ondjita tchi odapinan man kotagitowin; kishpin dash minigoian pangi kotagitowin, kishpin sa Kije-Manito Debeniminang inenimik tchi kotagitoian pangi oma aking, mano dash ganage iw weweni odapinan, mikwenim Kije-Manito, migwetch gaie inenim mojag, kego dash wika ondjita matchi inendangen, pabige webinan matchi i: endamowin wedissikagoianin. Gonima gaie kitimagisiwin minigoian, weweni odapinan, bekish dash anokin minik eji-gashkitoian tchi gashkitama-soian minik menesian. Kitchi anokiwin mi gaie wi bejig kotagitowin aking endagog; weweni dash kotagiidisowining odapinan. Kishpin gaie matchi dajimigoian, matchi

dodagoian gaie; apegish gaie iw weweni odapinaman, enendagosid enamiad tchi odapinang mojag. Anotch sa go gego senagak, anotch gaie gego keshkendagwak, kakina weweni odapinan, kotagiidisowing sa odapinan; mi dash mojag kotagii-disowining tchi daji-bimadisiian ej-i-nanda-wenimik Jesus.

Kishpin dash kotagitowin weweni odapinansiwan, ki gad-aian minotch; kakina sa bemadisidjig aking od aianawa kotagitowin; kawin dash ki gad-ondzi-jawendagosissi kotagitoian aking. Kishpin weweni odapinaman, ki ga-kitchi-jawendagos gi-ishkwa-kotagitoian aking; kishpin dash weweni odapinansiwan, nishkadendaman, kawin ki ga-jawendagosissi gi-ishkwa-kotagitoian aking; awashime wedi ki ga-kitchi-kotagito. Missawa gaie kagige kotagitowining anamakamig apaginigossiwan, anawi dash ki gad-apitchi-kotagito wedi, kishpin oma aking weweni odapinansiwan kotagitowin; mi sa *gassiiakisowining* gedaji-kotagitoian.

Kego dash, ninidjaniss, inendangen: Kawin nin babamendansin *gassiiakisowin*; apegish anamakamig kagige ishkoteng ijas-iwàn. Kego iw inendangen, kego gaie

wika ikitoken. Ki ga-kitchi-kashkendam wedi, kishpin babamendansiwan nongom, gotansiwan gaie gassiiakisowin. Apitchi kitchi kotagitowin gaie wedi dagomagad, apitchi ginwenj gaie kotagitowag iko wedi, bwa ijawad gijigong. Kawin bemadisi-djig aking o da-gashkitossinawa tchi de-kikendamowad, tchi de-nissitotamo wad gaie, eji-kotagitowad gassiiakisowining ebidjig; ginwenj gaie kotagitowag. Kitchi kashkendamog nongom wedi kwetagito-djig, weweni gi-kotagiidisossigwa megwa gi-bimadisiwad aking; mi dash nongom ginwenj wedi tchi apitchi kotagitowad.

Mindjimendan iw, ninidjaniss. Kishpin dash odissigoian kotagitowin, pabige mi-kwendan iw kitchi kotagitowin gassiiakisowining endagog. Apeghish wedi ijassiwàn, apeghish ganage ginwenj wedi kotagitossiwàn, inendan. Mi dash ge-ondji-odapinaman weweni kakina kotagitowin minik manigoian oma aking. Kishpin weweni nissitotaman iw, weweni gaie mindjimendaman, kawin ki ga-jingendansin kotagitowin aking endagog, kawin gaie ki ga-gotansin, potch ki ga-minwendan. Mi sa ketchitwawendagosidjig nongom gijigong ebidjig ga - ondji - minwendamowad ko-

tagitowin, weweni gi - nissitotamowad  
ejiwebak gassiiakisowin, eji-kitchi-wissa-  
gendagwak kotagitowin wedi endagog.

Nebwakad enamiad o gotan gassiiakisowin ; minik dash eji-gashkitod od ojindan ; mino ganawenindiso eji-bimadisid aking. Batadowinensing endapinedjig gassiiakisowining ijawag ; mi dash enamiad nebwa-  
kad wendji-ganawenindisod mino ijiwebi-  
siwining, tchi pangishinsig ganage batado-  
winensing. Missawa dash apitchi ganawe-  
nindisod, minotch naningotinong ta-pan-  
gishin batadowinensing, endasso-gijigadinig  
ta-pangishin ; pabige dash minawa pasi-  
gwi, anwenindiso odeing, pangi gi-matchi-  
inendang, gi-matchi-ikitod, gi-matchi-do-  
dang gaie. Minawa dash nawatch mino  
ganawenindiso ; kawin gaie wika *ondjita*  
*gego* matchi dodansi ; anisha sa eji-nanina-  
misid anishinabe bemadisid aking, mi wen-  
dji-pangishing batadowinensing.

Gonima dash kid ikid : “Anawi nin ki-  
tchi ganawenindis, nin kitchi inendam tchi  
mino ijiwebisnān, mojag dash *nassab* nin  
pangishin batadowinensing.” — Anish, ni-  
nidjaniss ; nawatch na ki da-jawendagos,  
kishpin mojag *bebakan* matchi dodaman ?  
Kawin. Kid aianan sa ki batadowinensan

eji-naninamisiian gaie kin. Anawi kash-kendagwad iw, kawin dash wika bakan ta-ijiwebassanon oma aking. Winawa eta gjigong ebidjig kawin wika ganage batadownensing pangishinsiwag. — Ow dash mindjimendant;

1. Kego wika *ondjita* matchi dodangen ganage pangi. Kishpin ondjita bata-ijiwebisiiian, missawa pangi eta matchi dodaman, ki mawandjiton nibiwa ge-*ondji*-animisiiian dibakonige - gjigak. Kishpin gaie anamakamig kakige ishkoteng apaginigossowan, kitchi ginwenj gassiiakisowining ki gad-animis. Gaie dash Kije-Manito o jawendjigewin eshkam ki waniton, kishpin ondjita batadowinensing pangishinan ; eshkam dash Kije-Manito nawatch pangi ki ga-sagiig, gaie kin dash eshkam nawatch pangi ki ga-sagia.

2. Kishpin pitchi-dodaman gego, ejinamisiian , gonima gaie sesika matchi inendaman, matchi ikitoian, matchi dodaman gaie, *pabige anwenindison enigokodeeian*, jingendan iw batadowinens, apitchi mashkawendan minawa tchi dodansiwan, pagossemim dash gaie Kije-Manito tchi jawenimik, tchi mipik mashkawendamowin, eshkam tchi bonitoian bata-ijiwebisiwin,

eshkam gwaiak tchi anokitawad Kije-Manito, eshkam tchi sagiad.

Kego ganage, kid inin, ninidjaniss, kego ganage *pangi gego ondjita* matchi dodangen. Awashime dash kid inin, apitchi gaie weweni kid aiangwamimin, kego wika ondjita kitchi bata-ijiwebisiken ; apitchi we-weni ojindan kakina kitchi batadowinan, mojag gaie ojindan. — Ki gi - windamon nandan masinaiganing, ejि- manadak kitchi batadowin. Apegish weweni nissitotaman, tchi gotaman batadowin, tchi ojindaman apitchi weweni, mi dash wika kitchi batadowining tchi daji-bimadisissiwan. — Kishpin awiia wawika kitchi batadowining pangishing, sesika gego matchi dodang ; pabige dash kitchi anwenindiso odeing, o pagosseniman gaie Kije-Maniton tchi bonigidetagod ; kishpin gaie webiniged wewib, apitchi gaie mashkawendang minawa tchi dodansig ; geget win ta-jawenima, ta-gassiamawa. Aw dash sasagswana metchi-dodang, genawenindisossig weweni, meshka wenindisossig, geget win kitchi kitimagisi ejиwebisid. Kawin Kije-Manito o jawendjigewin od aiansin, apine kitchi batadowining daji-bimadisi ; kitchi segenda-gwad iw ejи-aiad ; kishpin sesika nibod, mi

gwaiak anamakamig kagige ishkoteng tchi ijad. — Kego kin, ninidjaniss, iw ijiwebisiken. Apitchi jingenden, gotan gaie, ejindan gaie kakina kitchi batadowinan memindage ; kego gaie wissokawaken baiata-ijiwebisidjig, kego gaie nasikangen wigwam endaji-bata-ijiwebising. Bekish gaie mojac endasso-gijigak pagossemim Kije-Manito tchi minik mashkawendamowin, tchi apitchi ojindaman memindage kitchi batadowinan, apine go mojac.

#### GIJENDAMOWINAN.

1. Nin gijendam, mojac weweni tchi odapinamàn kotagitowin, kotagiidisowing sa tchi odapinamàn; nin kikendan sa, mi wendji-minigoià̄n kotagitowin bata-ijiwebisiià̄n. Migwetch nin gad-inenima Debendjiged, kishpin mijid kotagitowin; nin wi-mikwendan sa iw wendji-mjid. Mi sa wendji-mjid pangit kotagitowin, wenibik oma aking tchi kotagiidisoià̄n, mi dash tchi webinamagoià̄n kagige kotagitowin ga-wikwatchitamasoià̄n gi-bata-ijiwebisiià̄n, kagige minawanigosiwining dash gjigong tchi odapinigoià̄n gi-ishkwa-kogitoià̄n aking.

2. Nin gjendam gaie, sasagwana tchi mikwendamàn *gassiiakisowin*, endaji-animisiwad igiw batadowinensing ga-dapinedjig, tchi gotamàn gaie win batadowinens, tchi ojindamàn gaie minik eji-gashkitoàn. Kawin ganage pangí gego *ondjita* nin wi-matehi - dodansi. Kishpin dash minotch dodamàn, sesika gaie bata-ijiwebisiiàn, nin wi-kitchi-anwenindis, awashime dash nin ga-mino-ganawenindis, enigokodeeiàn gaie nin wi-pagossenima Kije-Manito, tchi jawenimid, tchi songendamiid gaie.

3. Memindage dash kitchi batadowin nin wi-kitchi-ojindan mojag, kakina gaie geondji-bata-ijiwebisiiàn, nin wi-ojindan, kawin gaie *wika* batadowining nin wi-dajibimadisissí; pabige nin wi-anwenindis, nin wi-webinige gaie; awashime dash andj nin wi-mashkawendam tchi wi-matchi-dodansiwàn.

#### ANAMIEWIN.

Kije-Manito nosse, neta-jawendjigeian, ki pagossenimin tchi jawenimiian, tchi was-sakwanendamawiian, weweni tchi nissit tamàn, eji-mino-dodawiiian api majiian ktagitowin. Ki wi-kitchi-jawenim sa iwapi;

kagige bimadisiwin gijigong, kagige minawanigosiwın gaie ki wi-mij. Mashkawendamiishin, Kije-Manito nosse, mojag tchi mino odapinamàn kotagitowin, kotagiidisowining sa tchi odapinamàn, kinindjing sa tchi odapinamàn eji-mijiian, kejewadisiian. Memindage dash ki pagossenimin tchi gnawenimiian mojag, batadowining tchi pangishinsiwàn. Kawin gego wenijishing nin igo nijke nin da-gashkitossin tchi ijitchigeiàn, mi wendji-pagos seniminan tchi widokawiian tchi ojindamàn batadowinan, kakina gaie ge-ondji-bata-ijiwebisiiàn, we-weni mojag tchi ojindamàn.



26. *Anamiewigamig mi Kije-Manito o wigiwam, mi ge-ondji-manadjitod enamiad.*

**D**E BENIMINANG Jesus gi-ikito : "Nin wigiwam mi sa anamiewigamig." — Mi ima Kije-Manito endad, mi sa gwaiak Kije-Manito o wigiwam. Mi dash iw, nindjaniss, ge-ondji-manadjitoian apitchi anamiewigamig. Kego wika gego dodangen ima, ge-ondji-minwendansig Kije-Manito ima endad. Kishpin ningotchi wakaganing pindigeian, kawin gego ki dodansi ge-ondji-minwendansig aw debendang wakaigan; memindage kishpin apitchi kitchitwawisid ima endad, kawin ningot kid ijiwebisissi, weweni kid aiā ima. Mi go gaie memindage, kishpin Kije-Manito o wegiwaming pindigeian, kawin ningot ki da-ijiwebisissi ge-ondji-minwendansig Debeniminang Kije-Manito ima endad; awashime win apitendagosi, awashime gaie kitchitwawendagosi, kakina kitchi ogimag aking epitendagosiwad. — Ki ga-windamon dash nongom ge-dodaman, ge-dodansiwang gaie anamiewigamigong.

1. Api degwishinan ima endagog anamiewigamig, weweni beka pindigen, oda-

pinan anamiewabo, otchitchingwanitan, anamian, anamietaw Jesus ima kasod Kitchitwa Eukaristiwining. Epitch dash ai-an anamiewigamigong, kego awiia anisha gaganonaken, kego gaie wika bapiken. Kije-Manito eta gaganoj anamiaian. Kego gaie ondjit a bakan gego inendangen, Kije-Manito eta mikwenim, win nanagatawennim, ima anamiewigamigong; pabige dash webinan bakan inendamowin.

2. Kego gaie ningotchi inabiken; awiia gaie pandigedjin, kego wedi ishkwandem-ing inakakeia inabiken. Kishpin sa ningotchi inabiian, pabige anotch ki gad-inendam, pabige ki ga-waniton mino inendamowin, anamie-inendamowin. Anotch gego ki ga-wabandan, kishpin baba-inabiian; mi dash ima ge-ondji-matchi-inendaman, potch anamiewigamigong. Bisan anamian iima pindig, kego ningotchi inabiken; goshi Kije-Manito.

3. Kego gaie anotch aiaken ima anamiewigamigong, weweni aian; otchitchingwanigabawin weweni, naningotinong gaie namadabin. Weweni sa aian enassamid Kije-Manito. Anawi misi aia Kije-Manito, memindage dash ima aia anamiewigamigong, mi sa tibinabe o wigiwam.

4. Weweni anamian mojag anamiewigamigong, memindage epitch anamessiked mekatewikwanaie. Apitchi kitchitwawendagwad anamessikewin. Mi ima mekatewikwanaie tibishko dodang, Jesus ga-dodang gi-widopamad ishkwatch o kikinoamaganan; od ojiton sa Kitchitwa Eukaristiwin, mi sa Jesus wiiaw, o miskwim gaie. Mi ima Jesus pagidenindisod tibishko ga-iji-pagidenindisod tchibaiatigong gi-bimadjiad ki tchitchagonanin; o pagidendaawan sa wiiaw o miskwim gaie Os-san Kije - Maniton, mekatewikwanaien onindjining. — Apitchi manadjiton anamessikewin, weweni dash anamian dassing aiaian endaji-anamessikeng.

5. Weweni gaie pisindan anamie-gagikwewin; jawendagosiwag pesindangig anamie-gagikwewin. Mindjimandan minik ekitod mekatewikwanaie gegikwed. Kishpin weweni pisindaman gagikwewin, eshkam ki ga-kikendan Kije - Manito od ikitowin, eshkam gaie ki ga-mashkawendam, gwaiak tchi ijiwebisiian, enendagosid enamiad tchi ijiwebisid aking, gjigong dash kaginig tchi jawendagosid.

6. Gi-ishkwa-anamiaian dash anamiewigamigong, weweni sagaan, giwen en-

daian, kego ima ishkawandeming nibawiken tchi ganawabamadwa saiagaangig. Kishpin ondjitma ima nibawiian, anotch matchi inendamowin ki ga-minidis; pabige dash ima endad Kije-Manito ki ga-nishkia minawa. Weweni sa madjan, migwetch inenim Kije-Manito gi-inenimik gi-pindi-geian endad, mino ganawendant dash anamie-gagikwewin ga-nondaman.

Weweni, ninidjaniss, mojag ganawendant kid anamiewin ga-iji-kikinoamagoian. Jawendagos geget swanganamiad, kagigekamig gaie ta-jawendagosijigong. Apitchi sagiton kid anamiewin, apitchi niganendant; awashime apitendagwad anamiewin, kakina dash aking endagog; gawaiak Kije-Manito od ijittwawin iw kid anamiewininan. Win o gi-ojiton, win ki gi-biminigonan gi-bi-ijad oma aking. Geget kitchi onijishin kid anamiewininan; mi ima wendji-kikenimang Kije-Manito eji-kitchitwawisid. Enamiassig kawin o kikenimas-sin Kije-Maniton; anotch gego bakan o manitoken; enamiad eta o kikeniman. — Mamakadendagos Kije-Manito; kaginig gi-aia, kaginig dash gaie ta-aia; misi aia, kawin ningotchi ishkwa-aiassi; kakina o wabandan, kakina o nondan, kakina o ki-

kendan ; apitchi gwaiak ijiwebisi, kawin-o da-gashkitossin ganage pangitchi matchi inendang, tchi matchi ijitchiged gaie. Kakina kitchitwawisiwin, kakina gashkiewisiwin, kakina gaie gwaiak ijiwebisiwin od apitchi aian, kaginig o gi-aian, kaginig dash gaie o gad-aian. — Geget mamakadendagos Debeniminang Kije - Manito. Enamiad dash eta weweni o kikeniman.

Bekisk dash gaie enamiad o kikendan gwaiako-bimadisiwin, mino ijiwebisiwin; mojag sa kikinoamawa ge-dodang gwaiak tchi ijiwebisid aking. Jesus Debeniminang, win igo nitam ki gi-kikinoamagonan kakina gego gwaiak ijiwebisiwin; nongom dash mecatewikwanaieg tibishko gagikweg, tibishko gaie kikinoamagewag, win Debeniminang ga-iji-gagikwed win nitam. Kishpin dash enamiad weweni pisindang anamie-gagikwewin, kakina wenijishing ijiwebisiwin o kikendan; kishpin gaie dodang eji-gagikimind, geget ta-kitchi-jawendagos kagigekamig gijigong. Mi eta anamiewin ge-ondji-jawendagosid awiia kishpin weweni ganawendang. Missawa kitchi nibwakad awiia, kakina masinaiganan kikendang, kitchi-danid gaie, kishpin dash anamiewin babamendansig, kishpin gaie

dodansig eji-kikinoamawindwa enamiadjig  
tchi dodamowad, geget gagibadisi, kitchi  
kitimagisi gaie; kawin gijigong ta-ijassi,  
kishpin iw iji nibod; anamakamig ta-anis-  
misi kaginig.

Geget kitchitwawendagwad kid  
anamiewininan. Kishpin awiia weweni  
ganawendang, weweni mojag dodang eji-  
gagikimind anamiewigamigong, ta-apitchi-  
mino-ijiwebisi, mi sa anamie-gagikwewin  
ge-ondji-mino-ijiwebisid. Enamiassig kawin  
o kikendansin gwaiak ijiwebisiwin, ena-  
miad eta o kikendan, kishpin weweni pi-  
sindang gagikwewin, wabandang gaie  
wenijishing masinaigan ketchitwawenda-  
gwak.

Nawatch dash, ninidjaniss, tchi nissito-  
taman eji-kitchitwawendagwak kid ana-  
miewininan, mikwenim aw ga-mininang  
anamiewin. Awenen aw ga-mininang, ga-  
bi-kikinoamonang? Bejig na nibwakawi-  
nini ki gi-bi-kikinoamagonan anamiewin?  
— Aiawag sa aking geget nibwakawinini-  
wag, gaiat gaie gi-bi-aiawag aiapi. Bejig  
na igiw ki gi-bi-kikinoamagonan kid ana-  
miewininan? Kawin. Win tibinawe Kije-  
Manito Debeniminang, win igo gi-bi-iija  
aking, gi-bi-anishinabewi, mi dash gi-bi-

mininang kid anamiewininan aiapitchi-ki-tchitwawendagwak. Gwaiak kikenda-gwad gi-bi-anishinabewid oma aking Kije-Manito Wegwissimind, Jesus Christ, Kije-Manito Ogwissan, mi sa Kije-Manito. Gwaiak anishinabewi Jesus, bekish gaie Kije-Manitowi. Mi sa ga-bi-ondji-anishinabewid aking, tchi kikinoamonang gwaiak anamiewin, gaie dash tchi nodjimoad ki tchitchagonanin; gi-kotagito dash, gi-nibo gaie tchibaiatigong, mi dash gi-mininang kagine bimadisiwin gjigong.

Nisso bibon gi-kikinoamage Jesus anamiewin, bekish dash gaie gi-kitchi-maman-dadodam; gegibingwenidjin o gi-wabian, gegibishenidjin o gi-nondamoan, anotch aiakosinidjin o gi-nodjimoan, nebonidjin gaie o gi-abitchibaan, od ikitowin eta mo-jag gi-aiod. Mi dash im'a gi-wabandai-wed Kije-Manitowid. Kawin sa pijishig anishinabe o da-gashkitossin iw tchi dodang. Kije-Manito eta kakina gego o gashkiton, kakina gego gaie o dibendan, bimadisiwin, nibowin gaie od apitchi dibendan.

Ga-ishkwa-gagikwed dash win tibinawe Kije-Manito, midasswi ashi nij ininiwan o gi-ininajawan tchi gagikwenid misiwe aking. Mamakadamig dash ga-ijiwebak

iwapi ; mi dash ima kikendagwak eji - kitchitwawendagwak anamiewin , mi sa gwaiak Kije-Manito od ijitwawin. Jesus midasswi ashi nij ininiwan od anonan tchi gagikwenid misi aking. Kitchi kitimagisiwag dash igiw ininiwag, gigoikewininiwag, kawin gego o kikendansinawa, anind kawin ganage masinaigan o nissitawinansi-nawa, kawin gego od aiansominawa, kawin kitchitwawisissiwag, apitchi geget kitimagisiwag. Da-inendam dash awiia : Anin ged-iji-gashkitowad igiw tchi gagikwewad misiwe aking, mi dash tchi gashkiawad anishinaben tchi anamianid ? Memindage iwapi matchi-ijiwebisigwaban anishinabeg aking, awashime nongom eji-matchi-ijiwebisiwad. Memindage gi - maminadisiwag, gi-kitchi-bishigwadisiwag , gi - jingendjigewag gaie apitchi ; memindage ketimagisindjin o gi-kitchi-jingenimawan ; anotch gego gaie o gi-manitokenawa ; geget kitchi matchi ijiwebisiwin misiwe gi - dagomagad iwapi oma aking. — Anin dash ged-iji-gashkitowad igiw midasswi ashi nij ketimagisidjig ininiwag, kékendansigog gego, anin ged-iji-gashkitowad tchi gagikimawad, tchi gashkiawad gaie iniw meminadisinidjin, metchi-ijiwebisinidjin anishinaben, tchi

bonitonid kakina matchi ijiwebisiwin, mi dash tchi anamianid? — Geget kawin anishinabe-gashkiewisiwin da-gi-debissessonon iwapi. — Anawi dash o gi-gashkiawan kitchi nibiwa anishinaben misiwe aking. Pabige kitchi nibiwa gi-anwenindisowag gi-nondamowad anamie-gagikwewin, pabige o gi-bonitonawa kakina matchi ijiwebisiwin, apitchi dash gwaiak ijiwebisiwin o gi-odapinanawa, mi dash gi-mino-ganwendamowad binish gi-ishkwa-bimadisiwad aking. Anawi dash gi-kitchi-matchi-dodawag enamiadjig iwapi, kitchi nibiwa anamiewin gi-ondjinanawag, kawin dash wewib gi-nissassiwig anind, gi-kitchi - kotagiawag ginwenj, gi-kitchi-bashanjewawag, anotch gaie gi-kitchi-kotagiawag kitchi ginwenj. Kawin dash o gi-pagidinansinawa anamiewin; anamiewining gi-dapinewag. Kawin dash anind gi-jagwenimossiwag tchi odapinamowad anamiewin gi-wabandamowad eji - kotagiindwa enamiadjig; eshkam nibiwa gi-anamiawag misiwe aking. Iw miskwi ga-siginamowad igiw ga-nissindjig anamiewin ondji, tanassag gi-minikaniwan, ga-ondji-nitawigiwad enamiadjig; eshkam dash gi-batainowag.

Geget mamakadakamig ! Anin ga-iji-gashkitowad igiw midasswi ashi nij inini-wag, ga-baba-gagikwewad misi aking, anin ga-iji-gashkitowad kakina iw tchi ijitchi-gewad ? — Kawin winawa o da-gi-gashkitossinawa, Debeniminang Kije-Manito eta. Mi ima minawa kikendagwak ejii-onijishing, ejii-kitchitwawendagwak gaie kid anamie-wininan ; mi gwaiaak Kije-Manito od ijitwawin. Win eta Debeniminang Kije-Manito o gi-gashkiton gi-songitod od ijitwawin misiwe aking ; win o gi-widokawan iniw nitam ga-baba-gagikwenidjin, keiabi dash kakina gegikwenidjin win o widokawan.

Kishpin iw weweni nanagatawendaman, nissitotaman gaie , ninidjaniss , apitchi gwaiak ki ga-kikendan ejii-onijishing kid anamiewininan, Kije-Manito od ijitwawin ; apitchi dash ki ga-sagiton, apitchi gaie weweni ki ga-ganawendant binish tchi ishkwa-bimadisiian aking.

**GIJENDAMOWINAN.**

1. Nin gjendam, weweni tchi manadjitoian mojag anamiewigamig, Kije-Manito o wigiwam. Potch ketchitwawisid inini

o wigiwam nin manadjiton, awashime dash Kije-Manito endad nin wi - manadjiton. Kawin anisha nin wi-pindigessi anamie-wigamigong, kawin gaie anotch nin wi-ijiwebisissi ima anassamid Kije - Manito Debenimid. Ged - iji - minwendang Deben-djiged, mi ged-iji-aiaiàn ima.

2. Nin gjendam gaie, weweni tchi inabadjitoiàn anamie - gagikwewin nwandamàn anamiewigamigong. Apitchi kitchi apitendagwad iw gagikwewin, mi gwaiak Kije-Manito od ikitowin. Anawi anishinabe gagigito ima, kawin dash anishinabe-ikitowin awansinon, Kije-Manito sa od ikitowin gagikwewin. Jesus gi-ikito, mi wendji - debwetamàn. Weweni nin wi-nissitotan eji - kitchitwawendagwak anamiewin. Win tibinawe Kije-Manito o gibidon oma aking, win o gi-songiton misiwe aking. Gwaiak Kije-Manito od ijitwawin iw anamiewin ga-minigoiàn gaie nin.

#### ANAMIEWIN.

Jesus Debenimiian , enigokodeeiàn ki mamoiawamin gi-bi-ijaijan oma aking gi-bi - mijiiàng apitchi wenijishing anamie-win. Geget nin jawendagos gi-odapina-

màn gaie nin. Migwetch kid inin gi-inenimiian tchi odapinamàn. Songideeshkawishin dash, Jesus nosse, weweni tchi ganawendamàn nind anamiewin binish tchi ishkwa-bimadisiän aking, mi dash wedi gjigong kaginig tchi wabaminàn, kaginig tchi sagiinàn.



27. *Bejigwan iw gweiakossing anamiewin,  
mi sa katolik anamiewin.*

KO-AIAMAGAK aking anamiewin, ga-  
mako-bidot sa Kije-Manito anamiewin  
oma aking, awashime nijwak bakan ijitwa-  
winan gi-ojitchigadewan. Apitchi waiesh-  
kat, megwa keiabi bimadisiwad igiw mi-  
dasswi ashi nij ininiwag ga-haba-gagikwe-  
djig nitam, jaigwa iwapi anind bemadisi-  
djig bakan anamiewinan o gi-ojitonawan.  
Panima dash aiapi minawa awiia bejig  
ijitwawin o gi-ojiton; binish nongom; ki-  
tchi bebakan dash nongom ijitwawag be-  
madisidjig aking. Dassing dash wejitchi-  
gadege bakan ijtawawin, pabige ikitowag  
igiw wedapinangig: Mi mandan gawaiak  
ijitwawin, mi sa gweiakossing Kije-Manito  
od ikitowin. Mi kakina ekitowad igiw  
bebakan ejitwadig.

Mi sa anawi ikitowad, kawin dash de-  
bwessiwag. Kije-Manito o masinaiganing  
ojibiigade: Bejigo Kije-Manito Debendji-  
ged, bejigwan debweiendamowin, bejig-  
wan sigaandadiwin. — Bejigo Jesus Krist  
ga-ojitol anamiewin, bejigwan gaie od ana-  
miewigamig, mi sa od ijtawawin. Kawin

Jesus bebakan gi-gagikwessi, mi mojag bejigwanong; kawin gaie iniw midawasswi ashi nij o kikinoamaganan o gi-inassin, bebakan tchi gagikwenid, mi go mojag bejigwanong.

Kakina igiw bebakan ejitwadjig ikutowag: Ninawind nind aiamin gwaiak ijitwawin, gweiakossing anamiewin. Mi kakina ekitowad; anawi dash *bejigwan* eta iw *gweiakossing* anamiewin. — Anin dash ged-iji-kikendaming iw geget gweiakossing anamiewin? — Kawin sanagassinton, ninidjaniss, iw tchi kikendaman, kishpin sa ow nanagatawendaman: Anin iw anamiewin *Jesus* ga-ojitetod, igiw gaie midasswi ashi nij ininiwag ga-dibadodamowad misiwe aking? Anin iw *netamissing* anamiewin, kaginig ga-atet eko-anamiang, waieshkak ga-ojitchigade, kawin panima, kawin nomai? Anin iw anamie-gagikwewin, mojag *tibishko* ga-atet aking, enigokwag aki? — Mi sa eta *katolik* anamiewin. — Weweni dash nissitotan iw.

1. Anin iw anamiewin *Jesus* ga-ojitetod? Mi sa kid ijitwawininan, katolik anamiewin. Kije-Manito o masinaiganing ojibiigade ga-iji-gagikwed Jesus, ga-ikitod, ga-dodang gaie; kakina dash iw keiabi o ganawenda-

nawa katolik enamiadjig. Anawi gaie winawa bebakan ejitwadjig od aianawa anind Jesus od ijitwawin, nibiwa dash wenijishing gego o gi-bonitonawa, o gi-webinanawa. Winawa dash katolik enamiadjig kakina gego keiabi od aianawa, weweni gaie kakina o ganawendantanawa ga-ikitod Jesus, ga-iji-kikinoamonang. Mi sa gwaiak Jesus od ijitwawin.

2. Anin iw *netamissing* anamiewin, kaginig ga-ateg eko-anamiang? Mi sa katolik anamiewin, kawin gego bakan. Jesus o gi-ojiton iw, mi dash eko-aiamagak. Bakan ijitwawinan dash kakina panima gi-ojitchigadewan. Aiapi minawa bejig ojitchigade, mi minawa bejig ningotchi mogissemagak. Mi mojag ga-ijiwebak eko-anamiang. Ojibiiigade masinaiganing ga-ijiwebak; gwaiak gaie kikendagwad api minawa bejig ga-ojitolong, kikenima gaie aw ga-ojitetod. Nongom gaie eko-bimadisiang kinawind aking, anind bakan ijitwawinan gi-ojitchigadewan. Kawin iniw ijitwawinan gwaiakossessinon, netamissing eta gwaiak Kije-Manito od ijitwawin, mi sa katolik anamiewin.

3. Anin iw anamie-gagikwewin, mojag *tibishko* ga-ateg aking? Mi sa katolik ana-

miewin; winawa eta mekatewikuwanieg, katolik anamiewin kekinoamagedjig, mojag tibishko gagikwewag enigokwag aki, Jesus ga-iji-gagikwed, igiw gaie midasswi ashinij ininiwag, nitam ga-baba-gagikwidjig, ga-iji-gagikwewad. Kawin gaie wika bakan ta-ijiwebassinton binish tchi ishkwa-akiwang; kawin sa Jesus o da-gashkitos-sin tchi gaginiawishkid; o gi-inan sa o kokinoamaganan, kakina gaie mekatewiku-naien gegikwenidjin od inan: "Baba-gagi-kimig anishinabeg enigokwag aki; tibishko gagikweg ga-iji-gagikweiān; mojag dash ki ga-widokoninim tchi wanishinsiweg binish tchi ishkwa-akiwang." Mi enad Jesus gegikwenidjin. Anin dash ged-iji-gashkitowad tchi wanishinowad, bebakan tchi iji gagikwewad? Mi sa mojag tibishko wendji-gagikwewad mekatewikuwanieg. Winawa dash eta katolik gegikwedjig, mi sa meka-tewikuwanieg, bejigwan tibishko kakina gagikwewag, kawin igiw bakan ejitwadjig. Kawin winawa tibishko gagikwessiwag; bebakan debweiendamog, bebakan gaie gagikwewag, agonwetadiwag gaie mojag.

Kishpin kakina iw weweni nanagata-wendaman, ninidjaniss, ki ga-nissitawinan iw gweiakossing enamiewin, gwaiak Kije-

Manito od ijitwawin; mi sa eta katolik anamiewin, kawin bakan.

Geget mamakadendagwad ga-iji-aiamagak katolik anamiewin waieshkat. Kitchi ogimag odenang Roming ga-danisidjig o gi-kitchi-jingendanawa anamiewin, o gi-kitchi-matchi-dodawawan dash enamianidjin. Memwetch dash ima Roming ija kitchitwa Pierre, naganisid Kitchi-mekate-wikwanaie, minik ga-dashiwad igiw nitam ga - baba - gagikwedjig. Ima dash kitchi odenang gagikwe, kitchi nibiwa dash ima endanakinidjin o gashkian tchi anamianid, kitchi ginwenj gaie ima gagikwe, binish nissind anamiewin ondji; eshkam dash ima nibiwa anamiawag. Igwi kitchi ogimag Roming ga-danisidjig, kitchi ginwenj, mi sa nisswak dasso bibon, o gi-kitchi-matchi-dodawawan mojag enamianidjin, minik ga-iji-gashkitowad o gi-matchi - dodawawan, kitchi nibiwa dassing midasswak enamianidjin o gi-nissawan, anamiewin ondji; eshkam nibiwa gi-anamiawag. — Kawin dash kitchi ogimag eta o gi-jingenimassiwawan gwaiak enamianidjin, mi gaie bakan ejitwadjig ga-ijitehigewad, apitchi gi-jingenimawad katolik enamianidjin; o gi-matchi-inawan, o gi-matchi-dodawawan gaie mi-

nik ga-iji-gashkitowad; eshkam dash nibiwa gi-anamiawag, apitchi dash weweni o giganawendanawa od anamiewiniwa, mi sa katolik anamiewin.

Kishpin kakina iw nanagatawendaman, ninidjaniss, mi ima minawa ge-ondji-kiken-daman ej-i-mamakadendagwak kid anamie-wininan. Apitchi dash weweni ki ga-nis-sitotan, kawin anishinabe od anokiwin awansinon katolik anamiewin, mi sa Kije-Manito od anokiwin, win o gi-ojiten. Ge-get win Debeniminang o gi-ojiten, win o gi-songiton misiwe aking, win kaginig o gi-bi-ganawenda binish nongom gijigak, win gaie kaginig o ga-ganawenda binish tchi ishkwa-akiwang.

Enigokodeeian dash migwetch ki da-in-enima Kije-Manito, gi-minik gaie kin iw gweiakossing anamiewin, katolik anamiewin. Apitchi dash sagiton, apitchi mino ganawenda; weweni dodan mojag ejigagikimigoian anamiewigamigong, ej-i-wabandaman gaie masinaigan. Kego dash bapish babamendangen bakan ijitwawin; kego wika ijaken endaji-gagikwewad bakan ejitwadjig; kego angonwetawaken mekatewikwanaieg, mojag sa winawa o ginamaawan katolik enamianidjin, wika

bakan gagikwewin tchi pisindansigwa. Kego gaie ikitoken: Anisha nind ija awi-pisindamān iw gagikwewin. Kego bapish ijaken, kid agonwetawa mekatewikwanaie kishpin ijaian, kid agonwetawa gaie Kije-Manito ga-minik gweiakossing anamiewin. Kishpin mekatewikwanaie wassa danisid, gashkitossiwan dash tchi ijaian endaji-gagikwed enamiegijigakin, kego ningotchi bakan ijaken, endaji-gagikwewad bakan ejitwadjig. Endaian aian, ima dash anamian, masinaigan gaie wabandan. Mi tchi mino dodaman. Kego bakan gagikwewin awi-pisindangen, kego gaie kinidjanissag pagidinaken tchi ijawad; kego wika pagidinaken. Minik gaie eji-gashkitoian ginamaw gaie kidj' anamiad tchi ijassig gaie win. Kawin sa bapish onijishinsinon, katolik enamiad bakan gagikwewin tchi awi-pisindang.

Nongom dash, ninidjaniss, nanagata-wendan ejiwebak katolik anamiewin, gaie dash iniw bakan ijitwawinan. Kishpin dash iw weweni nissitotaman, ki ga-wabandan eji-onijishing katolik anamiewin; awashime dash ki ga-sagiton, awashime gaie ki ga-mamoiawama Kije-Manito gi-inenimik gaie kin tchi odapinaman iw ana-

miewin. Mi dash nongom ow ge-nana-gatawendaman.

1. Geget jawendagosiwag katolik enamiadjig ; apitchi weweni winawa o kiken-danawa aiawad Jesus od ijitwawin, gweia-kossing anamiewin ga-ojitetod win igo Jesus Debeniminang. Gwaiak kikendagosiwag kakina' Kitchi - mecatewikwanaieg maia-mawi-niganisidjig ga-aiawad kitchi odanang Roming, kitchitwa Pierre ga-daji-gagikwed nitam. Win nitam wedi gi-Kitchi-mekatewikwanaiewi, kakina dash igiw ga-nabishkawawad Pierran, ojibiigasowag masinaiganing, apine ga-nabishkawawad binish nongom gjigak. Winawa dash bakan ejitwadjig nomaia gi-bi-aiawag, kawin waieshkat aiassibanig. Mi sa geget katolik anamiewin mi gwaiak Jesus od anamiewigamig, Jesus od ijitwawin.

2. Jesus o gi-owenabaman Pierran tchi niganisnid od anamiewigamigong. Ow o gi-inan : "Pierre kid aw, (mi sa ajibik;) mi dash ima ajibikong tchi ojitoian nind anamiewigamig, ka dash wika ta-banadjitchigadessinon." Pierran apitchi nigan o gi-assan Jesus ; mi dash kaginig ga-bi-ijiwebak eko-anamiang. Igiw Kitchi-mekatewikwanaieg ga-nabishkawadjig Pierran ima ki-

tchi odenang Roming, mojag gi-niganisiwag. Mi aw Roming endanisid Kitchi-mekatekwanaie apitchi niganisi ; kakina dash enamiadjig o manadjiawan, o babamitawan gaie, Jesus ga-inakoniged tehi ijiwebak. Winawa dash 'bebakan ejitwadjig kawin o gi-ganawendansinawa iw ga - inakoniged Jesus, ka dash ningotchi od aiawassiwawan maiamawi-niganisinidjin

3. Kitchitwa Paul ow ikito : Kije-Manito Wenijishid-Manito o gi-assan Kitchi-mekatewikwanaien, winawa dash tchi ganawenimawad enamianidjin, tchi inakonigewad kakina gego wenijishininig, ge-dodamowad enamiadjig tchi jawendagosiwad kaginig gjigong. Katolik enamiadjig dash eta od aiawawan gwaiak Kitchi-mekatewikwanaien, kaginig gaie waieshkat o gi-biaiawawan. Winawa dash bebakan ejitwadjig kawin od aiawassiwawan Kitchi-mekatewikwanaien. Anind anawi od aiawawan, kawin dash gwaiak Kitchi-mekatewikwanaiewissiwag. Gi-wanishinog sa, o gi-nagadanawa anamiewigamig, Jesus od anamiewigamig, endaji - aiawad kaginig gwaiak Kitchi-mekatewikwanaieg ; o ganawendanawa sa Jesus od inakonigewin.

4. Katolik enamiadjig misi aking aiawag enigokwag aki, tibishko dash misiwe ijit-chigewag. Kawin bebakan iji debweiendansiwig katolik enamiadjig, mi go tibishko bejigwanong enigokwag aki. Geget dash bebakan inwewag, bebakan gaie nagamowag anamiewigamigong, anotch gaie gego bebakan dodamog katolik enamiadjig; kawin dash iw ningot awansinon. Iw dash anamie - ijitwawin, anamie - gagikwewin, debweiendamowin gaie, apitchi bejigwan enigokwag aki; kawin bebakan debweiendansiwig katolik enamiadjig misiwe aking eiadjig. Winawa dash kakan ejitwadjig kitchi bebakan geget ijitwawag, bebakan gagikwewag, bebakan debweiendamog, kitchi agonwetadiwig gaie misiwe. Anish, kawin sa gwaia-kossessinini od ijitwawi-niwa.

5. Aia aw genawendang katolik anamie-win oma aking, mi sa aw maiamawi-niganisid Kitchi-mekatekwanaie Roming endanisid. Kishpin ningotchi aking awiia wanishing, bakan dash wi-gagikwed, bakan wi-debwetang, pabige windamawa aw genawendang katolik ename-win enigokwag aki, mi dash dibadji-mod ejiwebak gwaia-k Kije-Manito od ijitwawin. Kishpin dash

awiaa agonwetawad iniw maiamawi-niganisnidjin Kitchi-mekatekwikanaien, sagidina anamiewigamigong , kawin keiabi aiassi ima Jesus od anamiewigamigong, mi sa katolik anamiewining. Mojag dash tibishko aiamagad iw anamiewin misi aking, kawin wika andjitchigadessinon ; aia sa aw genawendang. Winawa dash bebakan ejitwadjig, enendamowad sa mi eji-debwearendamowad, mi gaie eji-gagikwewad. Gaie iw Kije-Manito o masinaigan, enendamowad sa od iji nissitotanawa. Kitchi bebakan dash od iji nissitotanawa, mi dash mojag bebakan wendji-debearendamowad, mi dash kaginig agonwetadiwad.

6. Katolik enamiadjig weweni o debwetawan Jesusan. Minik ga-ikitod, minik gaie ga-inakaniged, keiabi o ganawenda-nawa ; binish dash tchi ishkwa-akiwang mojag kakina o ga-ganawendanawa. Winawa dash bebakan ejitwadjig kawin we-weni o debwetawassiwawan Jesusan. Kawin sa kakina iw ga-ikitod Jesus, ga-inakaniged gaie, keiabi od aiainsinawa ; nibiwa o gi- webinanawa. Debeniminang Jesus o gi-o jitton iw Kitchi Jawendagosiw Winanig ewin ; o gi-webinanawa dash winawa beba kan ejitwadjig, kawin keiabi o gana-

wendansinawa. Win gaie Debeniminang Jesus o gi-ojiton iw Kitchi Jawendagoswin Kitchitwa Eukaristiwin; o gi-bonitonawa dash gaie iw winawa bebakan ejitwadjig; anind dash o gi-andjitonawa iw Jawendagosiwin; kawin ijitchigessiwag gaijitchiged Jesus, ga-inad gaie o mekate-wikwanaiem tchi ijitchigenid. — Kitchi nibiwa gaie bakan ga-ikitod Jesus, ga-inakoniged gaie, o gi-bonitonawa, o gi-andjitonawa gaie. Katolik enamiadjig dash eta kakina o ganawendantawa Jesus od ikitowin, Jesus od ijitwawin.

Kishpin kakina iw weweni nanagata-wendaman, ninidjaniss, geget enigokode-eia n migwetch ki gad-inenima Kije-Manito gi-minik iw gwaiak debweiendamowin, gweiakossing ijitwawin, mi sa katolik anamiewin; apitchi dash weweni ki ga-sagiton, ka ginig ki ga-ganawenda n.

Mino ganawenda n sa geget kid anamiewin gweiakossing, ki ga-kitchi-jawendagos dash. Kishpin katolik enamiad weweni ganawendansig od anamiewin, dodansig eji - gagikimind, geget ta-matchi-ijiwebisi. Kego dash awiia ta-ikitossi: Manadad katolik anamiewin, osam matchi ijiwebisi-wag katolik enamiadjig. Kawin gwaiak

ikitossi aw ekitod iw. Geget aiawag metchi-ijiwebisidjig katolik enamiadjig, anotch anind matchi dodamog geget. Kawin dash awiaa da - ikitossi: Matchi ijiwebisiwag anind katolik enamiadjig, mi dash iw anamiewin manadak. Kawin iw. Kitchi onijishin iw anamiewin, mi sa gwaiak Kije-Manito od ijtwawin. Kishpin awiia weweni ganawendang, geget ta-mino-ijiwebisi, kawin bapish ta-matchi-dodansi. Kakina sa go gego wenijishing kikinoamawawag enamiadjig tchi dodamowad, kakina dash gego maianadak kitchi ginaamawawag mojag. Kishpin awiia babamendang katolik anamiewin, babamitawad weweni mekatewikwanaien gegikwenidjin, geget apitchi gwaiak ijiwebisi. Kishpin dash babamendansig iw anamiewin gaie anamie-gagikwewin, geget pabige anotch ta-matchi ijiwebisi. Mi dash ima kikendagwak, geget onijishin anamiewin. Kishpin dash minotch enamiadjig matchi ijiwebisiwad, mi sa wendji matchi-ijiwebisiwad babamendansigwa od anamiewiniwa.

Kego gaie awiia ta-ikitossi: Kawin onijishinsinon katolik anamiewin, kawin sa ganage mekatewikwanaieg kakina mino ijiwebisissiwag, anind matchi ijiwebisiwag.

— Geget; kitchi kashkendagwad dash iw. Kawin geget kakina mecatekwanaieg mino ijiwebisissiwag; anawi dash katolik anamiewin kitchi onijishin, gwaiak Kije-Manito od ijitwawin. Kishpin mecatekwanaie gaie win matchi ijiwebisid, kawin anamiewin ondji matchi ijiwebisissi; mi wendji-matchi-ijiwebisid ganawendansig anamiewin gaie win. Mi go gaie waieshkat ga-ijiwebak naningotinong; mi dash ga-ondji-ikitod Jesus: “Kishpin mecatekwanaie gwaiak ijiwebisissig, kego dodangen endodang; eji-gagikwed dash dodan,” (kishpin sa gwaiak gagikwed.) Debenimini-nang Jesus midasswi ashi nij o kikinoaganan, o mecatekwanaejeman o gi-aiawan, mojag o gi-baba-widjiwan, weweni o gi-kikinoamawan, kakina gaie wenijishing gashkiewisiwin o gi-minan, tchi gagiklewad misi aking. Bejig dash gi-kitchi-matchi-ijiwebisi, mi sa Juda Iskariot. — Da-ikito na dash awia: Kawin onijishinsinon Jesus od ijitwawin, gi-matchi-ijiwebisiwan sa bejig o mecatekwanaejeman.—Gegibadisid eta ta-ikito iw. — Mi tibishko gaie nongom. Kitchi onijishin katolik anamiewin, missawa anind enamiadjig matchi ijiwebisiwad. Kawin sa anamiewin ondji

matchi ijibisisissiwag; mi wendji-matchi-  
ijiwebisiwad babamendansigwa anamiewin  
aiapitchi-wenijishininig.

GIJENDAMOWINAN.

1. Nin gjendam, apitchi weweni tchi manadjitoàn katolik anamiewin, tchi sagitoàn gaie kaginig. Apitchi nin kikendan, nia nissitotan gaie, gwaiakossing; mi sa gwaiak Jesus od ijitwawin, win ga-bidot oma aking, win ga-songitod enigokwag aki; win gaie keiabi o ganawandan misiwe aking, kaginig gaie o ga-ganawandan binish tchi ishkwa-akiwang. Mi ge-ondjisagitoàn enigokodeeiàn, weweni gaie nin wi-ganawandan binish tchi ishkwa-aiaiàn aking. Nawatch nin da-minwendam tchi nissigoiàn, tchi signamàn nin miskwim, iw dash nind anamiewin tchi pagidinamàn.

2. Nin gjendam gaie, enigokodeeiàn mojag tchi mamoawamag Debenimid Kije-Manito gi-mijid gaie nin iw gweiakossing ijitwawin, katolik anamiewin. Kawin nin de-apitendagosissi tchi minigoiàn, anisha nin gi-jawenimig Kije - Manito gi-mijid. Awashime dash iw kitchi migiwewin, kakin dash bakan minik endagog aking.

Kishpin awiia midasswak dasswabik jonian minind; geget nin kitchi minigo, nin kitchi jawendagos, da-inendam. Awashime dash nin nibiwa nin gi-minig Kije-Manito, katolik anamiewin gi-mijid. Geget apitchi enigokodeeiàn nin migwetchiwenima noss gjigong ebid, gi-mijid gweiakossing anamiewin.

3. Nin gjendam gaie, mojag weweni tchi dodamàn eji-kikinoamagoiàn pisindamàn anamie-gagikwewin. Mi iw gwaiak Kije-Manito od ikitowin; mi ge-ondji-dodamàn mojag eji-gagikimigoiàn.

#### ANAMIEWIN.

Kije-Manito nosse gjigong ebiian, enigokodeeiàn ki mamoiaawamin gi-mijiian katolik anamiewin, aiano-apitendagosissiwàn. Epitch sa kijewadisiian ki gi-mij, gi-kitimagenimiiian. Migwetch, nosse, kid inin. Awashime dash weweni tchi mamoiaawaminan, nin wi-míno-ganawendant nind anamiewin aiapitchi-kitchitwawendagwak. Kawiin nind ikitowin eta nin wi-aiossin tchi

mamoiawaminan, nin dodamowin gaie nin wi-aion. Kawin anisha nin wi-aiansin iw anamiewin ga-mijiian, nosse kejewadisiian, weweni mojag nin wi-inabadjiton. Jawenimishin, widokawishin, tchi gashkitoià̄n tchi dodamà̄n ga-iji-gijendamà̄n nongom.



*28. Eji-debwetamang iji bimadisida mo-jag, memindage gaie apenimoda Kije-Manito.*

W ISHPIN katolik enamiad weweni pisin-dang anamie-gagikwewin, sasagwana gaie wabandang wenijishing masinaigan, eshkam o ga-kikendan od anamiewin. Kikinoamawa dash enamiad tchi *debwetang*, gaie dash tchi *dodang*. Kawin sa iw iji debissessinon tchi debwetang eta enamiad minik nwandang gagikwewin, ta-dodam sa gaie eji-gagikimind, ta-ijiwebisi enendagosid enamiad tchi ijiwebisid. Kitchitwa Paul ikito : "Gwaiak enamiad iji bimadisi eji-debwetang." Mi sa geget; eji-gagiki-migoian sa, eji-debwetaman gaie anamie-gagikwewin, mi ge-dodaman minik ge-bimadisiian aking; mi gwaiak tchi anamiaian, kawin anisha ki gad-aiansin iw gwei-akossing anamiewin.

Weweni dash tchi iji bimadisiian, nini-djaniss, enamiangin tchi ijiwebisiian, mojag mikwenim Jesus ga - iji - bimadisid aking. Win Debeniminang Jesus kakina gwaiak ijiwebisiwin ki gi-kikinoamagonan; kawin od ikitowin eta o gi-aiossin, mi go gaie o

dodamowin ga-aiod gi-kikinoamonang.  
Minik dash ga-ijiwebisid aking, apegish  
gaie kin ijiwebisian, geget ki ga-jawen-  
dagos.

Jesus gi-kitchi-minwendam gi-anamiad ;  
naningotinong kabe-tibik gi-anamia ; mo-  
jag o gi-mikweniman Ossan Kije-Mani-  
ton. — Mi go gaie kin ge-dodaman ; min-  
wendan tchi anamiaian endasso-gijigak,  
kigijeb, onagoshig gaie mikwenim Kije-  
Manito.

Jesus gi-anoki mojag, minik ga-bimadi-  
sid aking. Nissimidana dasso-bibon o gi-  
baba-widokawan Josephan gi-anokiwad  
mamawi ; nisso-bibon dash gi-baba-gagi-  
kwe, minawa gi-kitchi-anokid. — Gaie kin  
dash, ninidjaniss, minwendan anokiwin,  
kego kitimiken ; kishpin kitimiian, kid  
agonwetawa Jesus, kawin sa ki dodansi  
eji-gagikimik Jesus, kawin gaie ki dodansi  
win ga-dodang, mojag weweni gi-anokid.  
Kishpin kotagitoian kitchi anokiian, mik-  
wenim Jesus ga-iji-kotagiidisod oma aking,  
kinawind ondji, ga-iji-kitchi-anokid minik  
ga-bimadisid aking.

Jesus o kitchi sagian kakina anishina-  
ben ; megwa gi-bimadisid oma aking, o  
gi-kitchi-sagian gaie ga-matchi-dodagodjin,

**o gi-jaweniman, o gi-gaganodamawan gaie.**  
Kid igonan dash: Eji-sagiidisoieg ki da-sagiigowag kidj' anishinabewag. — Mi dash gaie kin ge-dodaman, kawin eta me-no-dodokig ki da-sagiassig; mi go gaie jan-genimikig, metchi-dodokig ; Kije-Manito sa ki da-ondji-sagiag ; win gi-ikitod, mi ge-ondji-iijitchigeian, mi dash geget tchi iji bimadisiian ejj-debwetaman.

Jesus ejj-anishinabewid mojag o gi-mikweniman Ossan Kije-Maniton, mojag gaie gi-inendam, gi-ikito gaie : Apegish kakina ijiwebak, Noss gijigong ebid ejj-minwendang. Kawin nin enendamàn ta-ijiwebassanon gego; apegish Noss enendang ijiwebak kakina. — Mi go gaie kin, nindjaniss, ged-ijiwebisiian. Mojag mikwenim Kije-Manito ; kaginig sa ki ganawbamig, kaginig ki pisindag, kakina gaie kid inendamowinan o kikendanan ; kishpin dash mojag mikwenimad, kawin anotch ki gad-ijiwebisissi. Apitchi gaie pagidinamaw kiiaw Kije-Manito; mojag gaie kin iw inendan: Apegish kakina ijiwebak, Kije-Manito ejj-minwendang. Kishpin kotagitoian, akosiian, kitimagisiian, matchi-dodagoian gaie, pabige mikwenim Kije-Manito, weweni pagidinamaw kiiaw; minwenda-

dash, pangi minigoian kotagitowin oma aking, gjigong dash kaginig tchi jawenda-gosiian. Jesus gi-kitchi-kotagito aking, nongom dash gjigong aia od ogimawiwin-ing, o kitchitwawisiwining. Mi go gaie kin ged-iji-jawendagosiian, kishpin weweni odapinaman pangi kotagitowin aking; ka-ginig wedi gjigong ki ga-jawendagos.

Jesus mojag kitchi kitimagisiwining gi-daji-bimadisi, binish gi-ishkwa-bimadisid aking; kawin wika kitchitwawisiwin, kitchi-daniwin' gaie o gi-missawendansin; o gi-sagiton kitimagisiwin.— Mi go gaie kin, ninidjaniss, ged-ijiwebisiian. Kishpin kitimagisiian, minwendan, kego wissawen-dangen kitchi-daniwin. Ki kikinoamagon-nan Jesus, eji-manadak kitchi-daniwin; ta-kitchi-sanagisi ketchi-danid gjigong wi-ijad; kawin gwetch awiia ta-ijassi; na-wat'h wenipanisi ketimagisid gjigong tchi ijad.. Mi ga-ikitod Jesus, mi eji-debwetang enamiad; mi go gaie kin eji-debwetaman, anamiaian. Mano dash dodan eji-debwetaman; kego missawendangen kitchi-daniwin, minwendan kitimagisiwin.

Mi go mojag, ninidjaniss. Kishpin gego dodaman, ningot gaie endiian, pabige mi-kwenim Jesus ga-ijiwebisid megwa anish-

inabeng gi-bimadisid aking, ga-iji-kikinoamonang dash gaie. Wikwatchiton dash gwaiak tchi dodaman ga-dodang, tchi ojin-daman dash ga-ojindang gaie win. Mik-wendan gaie iw anamie-gagikwewin, win Jesus nitam ga-iji-gagikwed, nongom dash mekatekwanaieg nassab gagikwewag misi aking enigokwag aki. Ki kikendañsa, ki debwetan gaie, ga-inad Jesus o mekatekwanaieman, (kakina gaie bekish mekatekwanaien o gi-inan:) “*Baba-gagikimig anishinabeg; aw ge-pisindoneg, nin igo nin ga-pisindag.*” Ki debwetan iw ga-ikitod Jesus, mi dash gaie wendji-debwetaman minik ekitowad mekatekwanaieg gegikwedjig; dodan dash gaie iw, ki ga-jawendagos; ki gad-iji-bimadis sa ejidebwetaman.

Memindage dash gaie, niniidjaniss, *apenimon* mojag Kije-Manito. Mi gaie iw ga-iji-kikinoamonang Jesus. Gi-ganonad ketimagisinidjin, keshkendaminidjin gaie, ow o gi-inan iko: “Ningwiss, apenimon Kije-Manito . . . Nindaniss, apenimon Kije-Manito.” — Gaie dash kin kid ig tibishko. Mi dash ge-ondji-apenimoian Kije-Manito mojag. Win kakina gego ki minigonan, epitch kijewadisid; minik menesiang tchi

bimadisiang aking, minik gaie menesiang ki tchitchagonanig tchi bimadisiwad, minik gaie ge-ondji-jawendagosiang gjigong, kakina ki minigonan, ki jawenimigonan; mi ge-ondji-apenimoiang. Aw dash awashime ged-apenimod Kije-Maniton, mi aw awashime ge-jawenimigod. Enigokodeeian apenimon, ninidjaniss, apitchi dash ga-jawenimig.

Kawin anind enamiadjig weweni od apenimossinawan Kije-Maniton. Wegonen wendji-apenimossigwa? Anish, kawin sa weweni o kikenimassiwawan Kije-Maniton, kawin o nanagatawenimassiwawan e jiwebisinid, mi wendji-apenimossigwa. — Nanagatawenim dash kin, ninidjaniss, wi-kikenim weweni; ki gad-apenimonan dash enigokodeeian, kishpin weweni kikenimad. — Ow dash nongom nanagatawendan, weweni mojag tchi apenimoian Debeniminang Kije-Manito.

1. Kakina gego o gashkiton Kije-Manito, kawin gego o bwanawitossin. Kishpin kitimagisiiian, animisiiian, ningot gaie endiiian, o gashkiton Debeniminang tchi jawenimik, tchi minik gaie minik menesiian, tchi ikonamok gaie kakina iw wendji-anmisiiian. Apenimon weweni, kawin gego

o bwanawitossin. Kishpin bemadisid aking apenimoian, kawin win mejag o da-gashkitossin tchi dodang, tchi ijitchiged ejipenimoian, ejipagosseinimad gaie; kawin sa bemadisid aking gwetch gego o gashkitossin tchi dodang, missawa inendang. Debeniminang dash Kije-Manito kakina gego o gashkiton tchi dodang minik enendang. Mi ge-ondji-apenimoian enigokodeeian.

2. Kawin dash iw eta ijiwebisissi Kije-Manito tchi *gashkitod* kakina gego tchi mininang, tchi jaweniminang; *inendam* gaie tchi jaweniminang, megwa bimadisiang oma aking, gaie dash wedi gjigong kaginig tchi jawendagosiiang. Inendam sa iw; gi-ikito gaie sasagwana tchi jaweni-mad hemadisinidjin aking. Minik dash ekitod, mi endodang; kawin anisha gego ikitossi. Kishpin gego wawindamaged, mi iw magiwed; awashime gaie nibiwa mi-giwe ko, ejipawindamaged dash. Mi ge-ondji-apenimoian enigokodeeian.

3. Kitchi nita-jawendjige Kije-Manito, apitchi kijewadisi, wenidjanissingin ki sagiigonan. Kawin awiia bemadisid aking o da-gashkitossin tchi iji sagiad tibinawe onidjanissan, kossinan gjigong ebid ejip-

sagiinang kakina. Potch baiata-ijiwebisi-nidjin keiabi o jaweniman, kitohi ginwenj o bian, aiapi o nandoman; kishpin dash bi-giwed aw baiata-ijiwebisid ga-naganad os-san gjigong ebinidjin, neiab dash bi-nasikawad, od apitchi jawenimigon, pabige o gassiamagon kakina batadowinan, o kitchi sagiigon: Apitchi minwendam Kije-Manito api waiabamad baiata-ijiwebisinidjin bonitonid o matchi ijiwebisiwin, andjitonid o bimadisiwin; geget minwendam. Mamakadakamig ga-ikitod Jesus: "Awashime minwendam Kije-Manito wabamad bejig aianwenindisonidjin, iw dash wabamad jangassimidana ashi jangasswi meno-ijiwebisinidjin." Geget mamakadendagwad! — Mi sa Jesus iw wendji-windamonang, tchi nissitotamang weweni ej-i-kijewadisid Kije-Manito. Kishpin awiia weweni iw mikwendang, nissitotang gaie odeing, od apitchi apenimonan Kije-Maniton, od apitchi sagiian gaie.

4. Memindage dash Kije-Manito kid inenimigonan, gjigong tchi ijaiang gi-ishkwabimadisiiang aking, kaginig wedi tchi jawendagosiiang. Anawi gaie oma aking minik menesiiang kakina ki minigonan; kakina gego o gi-aton aking, ge-ondji-

mino-aiaiang. Kawin dash Kije-Manito iji minwendansi, oma aking eta tchi mino aiaiang, osam sa wenibik ki bimadisimin aking; kid inenimigonan sa, *kaginig* tchi mino aiaiang. Epitch sa kijewadisid, epitch gaie sagiinang, kid inenimigonan wedi gjigong tchi apitchi mino aiaiang, tchi apitchi jawendagosiiang; kawin dash wenibik eta, kawin gaie midasswak dasso bibon eta, goniima gaie midatching midasswak dasso bibon, kawin; kagigekamig sa apine. — Geget kijewadisi *Kossinan gjigong* ebid. Mi dash ge-ondji-apenimoian enigokode-eian.

5. Kego dash inendangen, ninidjaniss, kin tchi apitendagosian, iw minik tchi jawenimigoian, tchi sagiigoian gaie, ej-sagiik geget Kije-Manito. Kawin kid apitenda-gosissi Kije-Manito tchi sagiik, kawin gaie awiia aking de-apitendagosissi tchi sagiigod Kije-Maniton; win eta Jesus Debeniminnang ki minigonan iw tchi sagiigoiang; win Jesus gi-kotagitod, gi-nibod gaie, kinawind ondji, mi wendji-sagiinang Debeniminnang Kije-Manito. Epitch sa sagiad Ogwissan baiejigonidjin, mi wendji-sagiinang gaie kinawind, mi wendji-jaweniminnang. Jesus Kije-Manito Ogwissan, kakina

o miskwim o gi-siginan tchibaiatigong, kinawind ondji, kinawind ki gi-siginamaganan, ki saswebigaandagomin o miskwin; mi dash iw wendji-sagiinang, mi wendji-jaweniminang kossinan gijigong ebid. — Mi apitchi ge-ondji-apenimoian Kije-Manito kejewadisid; Jesus o kotagitowin, Jesus o nibowin, Jesus o miskwim, mi ge-ondji-apenimoian.

6. Memindage dash gaie, ninidjaniss, apenimon Kije-Manito, Jesus od ijinikasowin ondji. Apitchi gwaiaak gi-ikito Jesus: "Kishpin gego nandotamaweg Noss nin nind ijinikasowining, ki ga-minigowa." Kawin anishinabe od ikitowin awansinon iw, gwaiaak Kije-Manito od ikitowin. Kishpin dash Kije-Manito debwetawassiwad, awenen ge-debwetawad? — Kishpin nингot endiian, gonima animisiian, kashkendaman, segendam, gonima gaie gego menesiian, nandotamaw Kije-Manito koss gijigong ebid, bekish gaie mikwendan ga-iki-tod Jesus, debwetaw, enigokodeeian dash pagossenim kossinan gijigong ebid, *Jesus od ijinikasowining* pagossenim, geget dash ki ga-jawenimig Kije-Manito, ki ga-minig dash eji-nandotamawad, gonima gaie bakan gego ki ga-minig nawatch wenijishing,

nawatch ge-mino-inabadjitoian tchi jawendagosian kaginig gjigong.

Mi iw ge-nanagatawendaman, ninidjannis. Kishpin dash weweni nissitotaman, babamendaman gaie, kawin osam ki gasegisissi wika, weweni gaie ki ga-sagia Kije-Manito eji-kijewadisid, enigokodeeian gaie ki gad-apenimonan mojag ningot endiian.

Memindage dash Kije-Manito o kitimageniman baiata-ijiwebisinidjin. Anawi o kitchi jingengan batadowin ; kakina batadowinan, memindage dash kitchi batadowinan, o kitchi jingendanan geget ; baiata-ijiwebisinidjin dash win o kitchi jaweniman, o kitimageniman. Mojag dash inendam : Apegish anwenindisod. Kawin ninda-minwendansi tchi dapined batadowining, mi dash tchi apaginind anamakamig kagige ishkoteng ; apegish anwenindisod, mi dash tchi gassiamawind, tchi bimadisid kaginig gjigong. — Mi sa enenimad Kije-Manito baiata - ijiwebisinidjin ; mi dash wendji-nandomad aiapi ; od anonan sa mekatewikwanaien, tchi ganonad dash win baiata-ijiwebisinidjin, tchi wikwadjiad tchi mino-ijiwebisiad. Kishpin dash anwenindisod aw baiata-ijiwebisid, andjitol dash o

bimadisiwin, geget Kije-Manito kitchi minwendam. Kawin anawi Kije-Manito na-watch ondji - jawendagosissi , wabamad baiata-ijiwebisinidjin anwenindisonid, andjitonid od ijiwebisiwin ; kawin win na-watch ondji-jawendagosissi ; kaginig tibishko Kije-Manito jawendagosi o kitchit-wawisiwinning gjigong. Mi eta wendji-minwendang , epitch kijewadisid , epitch sagiad gaie kitimagenimad baiata-ijiwebisinidjin ; mi dash wendji-minwendang wabamad anwenindisonid. — Mi dash ima memindage ge-ondji-kikenimang Kije-Manito ej-i-kijewadisid , mi ge-ondji-sagiang gaie enigokodeeiang.

Agitchi geget Kije-Manito kijewadisi, nita-jawendjige, o nita-jaweniman baiata-ijiwebisinidjin geget. Kawin dash awiia ta-inendansi: Kishtpin Kije-Manito iji kijewadisid, nita-jaweniman baiata-ijiwebisinidjin, kawin anamakig nin gad-apaginigossi, missawa bata-ijiwebisiiān ; mano dash nin gad-ijiwebis enendamān. Kego enamiat iw ta - inendansi. *Aianwenindisonidjin* eta geget o kitchi jaweniman Kije-Manito ; kishpin dash awiia *ondjita* bata-ijiwebisid, wi-anwenindisossig, kawin win ta-jaweni-massi bwa anwenindisod, bwa andjitol o

bimadisiwin; kishpin dash kitchi batadowining dapined, mi kaginig anamakamig tchi danakisod.

Apenimon Kije-Manito, ninidjaniss, enigokodeeian mojag apenimon; enigokodeeian gaie sagi kossinan kejewadisid. Bekish dash gaie goshi ; gotan gaie nibowin, gotan dibakonidiwin, gotan kagine animisiwin anamakamig ; memindage dash gotan, jingendan gaie ojindan batadowin. Mi sa ge-ondji-animisiian kaginig, kishpin batadowining dapineian.

#### GIJENDAMOWINAN..

1. Nin gjendam, mojag weweni tchi dodamān eji-gagikimigoān, eji-debwetamān gaie. Memindage dash gaie Jesus nin wi-kikinowabama mojag. Ningot endiānin pabige nin wi-mikwenima, nin wi-wikwattchiton dash tibishko tchi ijiwebisiiān, Jesus ga-ijiwebisid megwa gi-bimadisid aking. Mi sa ga-bi-ondji-ijad oma aking Jesus, mi ga-ondji-anishinabewid, tchi nodjimoad kitchitchagonanin, bekish dash gaie tchi kikinoamonang ge-dodamang , ged-ijiwebisiiang, wenibik bimadisiang aking, kaginig dash gjigong tchi jawendagosiiang. Kid


igonan gaie gwaiak: "Kikinowabamishig; ejiwebisiian ijiwebisig." Nin wi-babamitawa dash Jesus, nin wi-kikinowabama minik ejи-gashkitoian.

2. Nin gjendam gaie, enigokodeeiian tchi apenimoian mojag Kije-Manito. Kawin gego Debeniminang o bwanawitossin, *o gashkiton* tchi jawenimid, *inendam* gaie; kitchi nita-jawendjige, memindage baiata-ijiwebisinidjin o kitchi kitImageniman, pabige o jaweniman anwenindisonid. Memindage dash nin wi-apenimonan Kije-Manito, Jesus ondji, ga-kitchi-kotagitod, ga-nibod gaie tchibaiatigong, nin ondji. Mi iw memindage ge-wi-ondji-apenimoian Kije-Manito.

#### ANAMIEWIN.

Kije-Manito nosse aiapitchi - kijewadiian, mojag ki wi-mikwenimin ejи-kijewadisiian, kawin nin wi-wanendansi ejи-minododawiiian, enigokodeeiian tchi apenimonan. Ki mamoiawamin minik ga-iji-jawenimiian binish nongom gijigak. Endasso-gijigak ki mino dodaw, ki jawenim epitch kijewadisiian; mi wendji-apenimonan, minawa

tchi jawenimiiān, mojag gaie tchi jaweni-miān, tchi widokawiiān gaie, enigokodeeīān tchi anwenindisoīān minik ga - iji - batadüiān, weweni gaie tchi ganawenindisoīān, gwaiak tchi iji bimadisiīān aking, mi dash gijigong kaginig tchi wabaminan, tchi sagiinan.



29. *Anamiada epitch apenimoiang Kije-Manito.*

W<sup>E</sup>EWENI mojag, ninidjaniss, anamian endasso-gijigak. Kishpin awiia anamiassig, kawin gwaiak debwetansi, kawin gaie weweni Kije-Maniton od apenimossinan, kawin gaie enigokodeed o sagiassin.

1. Aw weweni enamiassig kawin gwaiak *debwetansi*. Kishpin sa awiia weweni debwetang anamie-gagikwewin, o kikendan ga-ikitod Jesus : “Kawin kinawa nijike ki da-gashkitossinawa gego wenijishing tchi dodameg, kishpin widokossilongagog.” Gaie kitchitwa Paul ga-ikitod : “Kawin gego wenijishing kinawind nijike ki gashkitossimin ; kawin ganage abiding tchi mino inendamang ki gashkitossimin kinawind nijike.” Kije-Manito eta widokonang ki ga-gashkitomin tchi mino inendamang, tchi mino dodamang gaie. Mi sa Kije-Manito od ikitowin. Bekish dash gaie ow ki kikinoamagomin: Pagosseinimad awiia Kije-Maniton, o ga-minigon o jawendjigewin, o ga-minigon gaie mashkawendumowin tchi gashkitod tchi mino dodang, gwaiak tchi ijewebisid; kishpin dash pagosseinimas-

sig, kawin gego o ga-minigossin. Mi-eji-kikinoamawind enamiad, mi ejि-debwetang gaie; mi dash wendji-anamiad, pagosse-nimad Kije-Maniton tchi jawenimigod tchi minigod o jawendjigewin, anamie-mash-kawendumowin gaie, tchi gashkitod mojag tchi ojindang batadowinan, tchi mino do-dang dash meshkwat. Mi endodang enamiad kishpin *debwetang*. Kishpin dash awiia wika anamiassig, gonima naningotinong eta anamiad, kawin gwetch o debwetansin anamie-gagikwewin. — Mojag, ntidjaniss, anamian endasso-gijigak, weweni gaie mikwenim Kije-Manito epitch anamiaian; nandotamaw tchi minik kakina gego menesian, memindage dash tchi jawenimik, tchi minik songendamowin tchi gashkitoian weweni tchi anokitawad binish tchi ishkwa-bimadisian aking.

2. Awiiia dash gonima ta-ikito: Nind ano anamia, nin nandotamawa gego Kije-Manito, kawin dash nin minigossi, kawin nin jawenimigossi; mi dash gwetch wendji-anamiassiwàn. — Kishpin awiia iw ikitod, kawin weweni od *apenimossinan* Kije-Maniton, mi dash gwetch wendji-anamiasig. — Apegish dash kin, ntidjaniss, enigokodeeian apenimoian, ki ga-jawendagos.

Anamian mojag, apine pagossenim Kije-Manito ; win dash minik enendang ki gaminig, ki ga-jawenimig ejji-minwendang. Apine dash mano pagossenim gego mene-siian ; kishpin gaie pangi eta ikitoian pagos-senimad, ta-minwendam ; gi-ikito sa Jesus : "Enamiaiegon kego nibiwa ikitoke-gon." Ojibiigade Kije-Manito o masinai-ganing, ga-iji-jawendagosiwad anind, kitchi pangi ga-ikitodjig, gi-pagossenimawad Kije-Maniton gego. Bejig ga-matchi iji-webisid ikwe Samariiing ow o gi-inan Jesusan : Debendjigeian, minaishin iw bemadak nibi, (mi sa, ki jawendjigewin.) Pabige dash Jesusan o gi-kitchi-jawenimigon. — Aw dash gaie ga-bata-ijiwebisid inini ga-pindiged kitchi anamiewigamigong Je-rusaleming wi-anamiad, ow eta gi-ikito : Debendjigeian, jawenimishin, nin bata-iji-webis. Gi-kitchi-jawenima dash, gi-gas-siamawa kakina o batadowinan. — Bejig gaie ga-kitchi-gimodishkid inini ga-sassa-gakwaond tchibaiatigong, Jesusan o kitchi-nikaning, ow eta o gi-pagosseniman Jesusan : Debendjigeian, mikwenimishin gi-pindi-geian kid ogimawiwing. Pabige dash Jesusan o gi-igon : Geget kid inin, nongom gjigak ki ga-widjiw gjigong.

Missawa gaie gigitossig awiia anamiad, *inendang* eta odeing, mi geget anamiad, weweni gaie anamia; o kikendanan sa Kije-Manito kid inendamowinininan. Ikito gaie kitchitwa Paul: Kishpin kideinang anamiaiang, iwapi Wenijishid-Manito ki widokagonan, ki gaganodamagonan. — Marie Madeleine *g<sup>ii</sup>-kitchi-matchi-ijiwebisid* odenang Jerusaleming, kawin gi-gigitossi gi-bi-anwenindisod Jesusan osidaning, mi eta odeing gi-anwenindisod, gi-kitchimawi gaie. Geget kitchi onijishin iw anamiewin, awiia weweni odeing gaganonad Kije-Maniton; geget jawendagosi aw ejianamiad; ta-jawenima, ta-gassiamawa, ta-widokawa gaie tchi gashkitod gawaiak tchi ijiwebisid aking.

3. Kishpin awiia weweni anamiad, minwendang dash gaie anamiewin, kikendagosi *sagiad* Kije-Maniton. Api sa awiia enamiangin, o gaganonan Kije-Maniton; epitch sa sagiad, minwendam gaganonad. Kishpin dash awiia wika anamiassig, gonima gaie weweni anamiassig, mi ima wabandaiwed gwetch sagiassig ossan gjigong ebinidjin. Aw abinotchi saiagiad ossan, mojag o gaganonan, anotch gego o pagoseniman; epitch sa sagiad, minwendam

gaganonad. Kishpin dash abinodji we-weni ganonassig ossan, kawin geget o sa-giassin. — Mikwenim Kije-Manito ejikijewadisid, eji-mino-dodok gaie kaginig; mojag migwetch inenim kideing, mojag gaie pagossemik tchi jawenimik minawa.

Nongom dash, ninidjaniss, nanagatawenden dan wendji-ijiwebak iw, awiia ano anamiad, kawin dash minigossi eji-nandotamawad Kije-Maniton. Nisswaia gadinig sa iw wendji-minigossig.

1. Ano anamia awiia, nandotamawad Kije-Maniton gego, sasagwana gaie o nandotamawan, kawin dash minigossi. Mi sa wendji-minigossig, osam matchi ijiwebisid. Kishpin awiia inendang: Apeghish jawenimid Kije-Manito; bekish o ga-jingandan, o ga-webinan gaie bata-ijiwebisiwin. Baiata-ijiwebisid o kitchi matchi dodawan Kije-Maniton, o nishkian. Kishpin dash iw nita-dodang, ondjita gaie dodang, kawin Kije-Maniton o ga-jawenimigossin. Apitch Kije-Manito o jingendanan batadowinan, mi sa ki batadowaninan ga-ondji-nibod Jesus, Kije-Manito Ogwissan. Epitch dash Kije-Manito sagiad Ogwissan baiejigondjin, mi epitch jingendang batadowinan, ga-ondji-nissimind Ogwissan. Ged-apitch

dash awiia ondjita bata-ijiwebisid, kawin o ga-gashkitossin weweni tchi anamiad, kawin Kije-Maniton o ga-minigossin gego. Anawi dash ta-anamia aw baiata-ijiwebisid, enigokodeed ta-anamia, bekish dash ta-anwenindiso, o ga-jingendan batadowin, o gad-ojindan gaie weweni; mojag dash Kije-Maniton o ga-pagosseniman tchi widokagod. Mi nitam ge-dodang baiata-ijiwebisid; ta-jawenima dash, min wa Kije-Maniton o ga-sagiigon, eshkam o ga-jawenimigon. Kishpin dash bata - ijiwebisid, anwenindisossig dash, minotch dash gego nandotamawad Kije-Maniton, kawin taminigossi.

2. Wegonen dash minawa iw wendji-minigossig awiia ano nandotamawad Kije-Maniton? Anish, anawi sa anamia, kawin dash weweni anamiassi, kawin dash gwetch ningot awansinini od anamiewiu. Kawin sa weweni *ojitassi* tchi bwa anamiad; kawin gaie *tabassenindisossi* api enamiadjin; anotch gaie *bakan* gego o mikwendan megwa anamiad; *atchina* gaie eta o nandotamawan gego Kije-Maniton, pabige dash anijitam. — Mi iw nongom, ninidjaniss, genanagatawendaman, tchi iji anamiassiwang gaie kin ejि-anamiawad anind enamiadjig.

a. Kishpin awiia weweni ojitassig tchi bwa mashi anamiad, kawin gwaiak ta-anamiassi. — Ojitan dash kin dassing wanamiaianin. Kitchi mino dodam enamiad, mojag mikwenimad Debendjigenidjin ; memindage dash api ge-wi-anamiad, weweni o ga-mikweniman. Nin wi-ganona Debennimid nin Kije-Manitom ; apegish weweni ganonag, eji-minwendang ; mi ged-inen-dang enamiad. Kija gaie ta-nanagatawendum ged-ikitod tchi anamiad ; weweni ta-ojita. Mi sa ge-dodaman gaie kin. Mikwenim aw ge-wi-ganonad. Kishpin awiia kitchi ogiman awi-nasikawad wi-ganonad, kija ojita nanagatawendum ged-inad. Awashime dash enamiad weweni ta-ojita wi-gaganonad Maiamawi-Ishpendagosinidjin.

b. Anind dash kawin tabassenindisossiwag anamiawad, kawin dash gego minasiwig. Mojag, ninidjaniss, enigokodeeian tabassenindison, api enamiaianin ; mikwendan apitendagosissiwan tchi ganonad Debendjiged ki Kije-Manitom. Ketchitwawendagosid inini Abraham ow gi-ikito : Awenen nin, ge-ganonag Kije-Manito ! Pingwing nind apitendagos, anawi dash nin ganona Debendjiged. Mi ga-iji-tabassenindisod Abraham. O gi-kitchi-sagian

dash Kije-Manito iniw ininiwan. — Oji-biigade gaie Kije-Manito o masinaiganing: “Tebassenindisod od anamiewin gjigong pindigemagadini.” — Bejig ikwe Kanaan-ing ga-ondjibad gi-kitchi-tabassenindiso Jesusan gi-binasiyawad gi-bi-nandotamawad gego; o gi-minigon dash. — Bejig gaie ogima gi-kitchi-tabassenindiso gi-bi-nandotamawad Jesusan. Kawin nin de-apitendagosissi tchi pindigeian endaiān; o gi-inan. Jesus dash gi-mamakadendam, gi-minwendam gaie, mi dash gi-jawenimad iniw ga-tabassenindisonidjin ogiman. — Aw dash gaie inini, kitchi odenang Jerusaleming ga-anamiad, gi-kitchi-tabassenindiso; mi dash gi-jawenimind, gi-gassiamawind. — O kitchi minweniman sa Kije-Manito tebassenindisonidjin enamianidjin. — Mi go gaie kin ged-ijiwebisiian; enigo-kodeeian tabassenindison enassamid Kije-Manito, dassing enamiaianin; ki ga-minotag dash Debendjiged, ki ga-jawenimig gaie.

c. Minawa dash kawin weweni anamiassi awiia mojag bakan gego mekwendang, megwa anamiad; kawin dash o kikendasin ekitod; kawin od anamiewin o naganatawendansin, bakan gego mojag o na-

nagatawendan. Kawin win gwaiak anami-assi. — Mi naningotinong awiia iw wendji-ijiwebisid, osam sagitod anotch gego aking endagog ; mojag dash iw o mikwendan. — Kego kin, ninidjaniss, osam sagitoken gego oma aking endagog. Kishpin osam sagitoian gego, mojag kide wedi tatemagad ; gi-ikito sa Jesus : "Tibi ged-ategwen ki daniwin saiagitoian, mi wedi gaie kide ged-ateg." — Kego gaie babamendangen kid anokiwin, megwa anamiaian ; kina bekanak inendamowin iwapi webinan, kego ondjitabakan gego nanagatawenden, mi eta iw ge-nanagatawendaman ekitoian anamiaian. Kishpin dash kitwen odissikagoian anotch inendamowin, kawin iw manadassinon, kishpin sa pabige jingendaman, wikwatchitoian gaie tchi webiman.

*d.* Osam gaie atchina awiia o nandotamawan Kije-Maniton gego ; kishpin pabige minigossig, mi anijitang. — Kego gaie iw ijiwebisiken, ninidjaniss. Kishpin gego nandotamawad Kije-Manito, mano ginwenj nandotamaw, gonima gegapi ki gaminig. Jesus kitchi nibiwa gi-anamia, ginwenj gaie ko ; naningotinong kabe-tibik gi-anamia. Kawin anawi win gego o ma-

nesissin, kakina sa win od apitchi dibendan; mi sa **ga**-ondji-anamiad, tchi kitchitwawenimad Ossan, gaie dash kinawind tchi kikinoamonang, tibishko gaie kinawind tchi dodamang. Ki gi-igonan gaie gi-kikinoamonang, ginwenj tchi nandotamawang Kije-Manito gego; kawin nijing, nissing gaie eta, mi dash tchi anijitamaug, kawin; ginwenj sa go nassab tchi nandotamawang gego.

3. Iw dash eko-nissing, wendji-minigosiwang ano nandotamawang gego Kije-Manito, mi iw ki gagibadisiwininan. Kawin naningotinong ki kikendansimin ejiewbak iw nendotamawang Kije-Manito, win dash weweni o kikendan. Kakina win gwaiak o kikendan, kija gaie kakina o kikendan. Naningotinong awiia o nandotamawan Kije-Maniton gego, inendan dash: Geget nin **da**-jawendagos kishpiin minigoian iw. Mi anawi inendang; kawin dash o kikendansin, nawatch tchi onijishingiban tchi minigossig; Kije-Manito dash o kikendan, epitch dash sagiad iniw, epitch mino ganawenimad gaie, kawin o minassin ano nandotamagod; mi dash gwaiak jawenimad. — Weweni nissitotan iw. — Gonima ki kitimagis, ki nandotamawa dash Kije-

Manito daniwin aking ; kawin dash ki minigossi. O kikendan sa tchi mino inabadji-tossiwan; o kikendan gaie nawatch onijishing tchi kitimagisiiian, iw dash tchi kitchidaniian oma aking. Wedi dash gjigong kagige minawanigosiwın ki wi-minig, kishpin gwaiak wi-ijiwebisiian. — Gonima dash ki nita-akos, ginwenj gaie ko kid akos ; kid ano nandotamawa dash Debendjiged tchi minik mino bimadisiwin, tchi mino aiaian minawa ; kawin dash ki minigossi ej-nandotamawad. Mi sa wendji-minigossig kikendang nawatch onijishing tchi akosiian, tchi gashkitoian kagige jawendagosiwın gjigong. — Gonima dash kinidjaniss akosi, ki segis dash tchi nibod, mi dash enigoko-deeian nandotamawad Kije-Manito debendang bimadisiwin, tchi ganawenimad kinidjanissan, tchi bimadjiad, tchi nodjimoad. Kawin dash nawatch mino aiassi kinidjaniss, nibo dash. O kikendan sa Kije-Manito iw nawatch tchi onijishing. Nongom epitisid kinidjaniss gwaiak gjigong ija giishkwa-bimadisid aking ; kishpin dash ginwenj bimadisid, gonima ta-matchi-ijiwebisi, gonima memwetch kin ki ga - banadjia, osam sagiad, osam gaie pagidinad tchi ijiwebisid enandang igo. Mi dash wewib

wendji - odapinad megwa abinodjiiwid, gjigong tchi assad. Geget o kitchi jaweniman; gaie kin dash ki jawenimig, tibinawe kinidjanissan odapinad od ogimawi-wining gjigong, megwe Anjeniwan assad. Kishpin dash minwendansiwan, gonima gaie osam kashkendaman, ki matchi dodam. Kawin sa enamiad daiebwetang Kije-Manito od ikitowin, osam da-kashkendansi; da-inendam sa: Migwetch nind ina Deben-djiged Kije - Manito ga - dodang ; apitchi gwaiak mino dodam minik endodang. — Mi mojag, ninidjaniss, ged - inendaman; apitchi sagiton, minwendan gaie, Kije-Manito od inakonigewin. O kikendan win wendji - dodang gego; kawin dash o dagashkitossin, ganage pangitchi matchi dodang. Minik endodang apitchi mino iji-webadini.

**GIJENDAMOWINAN.**

1. Enigokodeeiàn nin gjendam, mojag weweni tchi anamiaiàn ; kawin dash eta kigijeb, onagoshig gaie nin gad-anamiassi ; nonda-gijig gaie nin wi-mikwenima nin-deing Debenimid Kije-Manito. Migwetch nin wi-inenima, minik ga-iji-jawenimid bi-

nish nongom; nin wi-pagossenima gaie, minawa tchi jawenimid, tchi gassiamawid gaie kakina nin batadowinan.

2. Tchi mino anamiaià̄n dash, nin gjendam, weweni nakawe tchi ojitalà̄n. Nin wi-mikwenima sa Kije-Manito tchi bwa madjitaià̄n anamiaià̄n. Nin wabamig, nin nondag, nind inendamowinan gaie o kikendanan; mi ged-inenimag. Nin wi-mikwenima gaie Debendjiged Kije-Manito ejikitchi - kitchitwawisid, ejikitchi-apitendagosid gaie, nin wi-tabassenindis dash enassamid Kije-Manito, weweni tchi anamiaià̄n.

3. Memindage dash nin gjendam tchi ojindamà̄n kakina batadowinan, minik ejigashkitoià̄n. Kishpin ondjita batadowining daji-bimadisià̄n, kawin nin ga-gashkitossin weweni tchi anamiaià̄n; mi dash ge-ondji-ojindamà̄n batadowinan.

#### ANAMIEWIN.

Kije-Manito nosse gjigong ebiiyan, enigokodeeià̄n ki mamoiawamin gi-mijiian gweiakossing anamiewin, katolik anamiewin; kid iji pagossenimin dash tchi jawenimiiyan tchi mino anamiaià̄n mojag. Epitch

kijewadisiiān ki minotawa enamiad, kish-pin gwaiak anamiad. Ga-iji-pagossenimi-kwa ki kikinoamaganag, Jesus Debenimian, kid iji pagossenimin gaie nin : Debendjigeian, kikinoamawishin ged-anamiaiān! — Mijishin gwaiakwendamowin, kin eta tchi mikweniminan epitch anamiaiān ; midagwenamawishin dash kakina bakan inendamowin ; tchi minotawiian dassing enamiaiānin, tchi jawemiian dash tchi mijian ejī-nandotamonan.



30. *Sagiada Kije-Manito.*

DEBENIMINANG Kije-Manito apitchi sagiigosi , apitchi kitchitwawendagosi, apitchi gaie kijewadisi ; kakina mino ijiwebisiwin od apitchi aian ; mino ijiwebisiwin dash eta od aian, kawin ganage pangi gego maianadak od aiainsin ; kawin wika ganage pangi matchi inendansi ; kakina gego apitchi mino dodam minik endodang. Geget mamakadendagosi Debenniminang Kije - Manito, apitchi gaie kitchi sagiigosi. Mi dash, ninidjaniss, ge-ondjisagiad enigokodeeian ; win igo ondji sagi, epitch kitchitwawendagosid. Ki ga-ja-wendagos, kishpin weweni sagiad Kije-Manito ; kakina gwaiak ki ga-dodam, kawin gego ondjita ki ga-matchi-dodansi, kishpin weweni sagiad.

Apitchi gwaiak kid igomin tchi sagiang Debeniminang Kije-Manito, ki kikinoamagonan gaie Jesus ged-iji-sagiang ; ikito sa : “Debendjiged ki Kije-Manitom ki ga-sagia kakina kideing, kakina gaie ki tchitchagong, kakina gaie kid inendamowining, kakina gaie ki mashkawisiwining” ; mi ekitod Jesus. Wikwatchiton dash, ninidja-

niss, gwaiak tchi sagiad, ejि-кикиноамонанг Jesus.

*Kakina kideing* ki ga-sagia Kije-Manito, ikito Jesus. — Kishpin sa awiia awashime sagiad Kije-Maniton kakina dash aking endagog, kakina ode minad Kije-Maniton, mi aw saiagiad kakina odeing. — Kishpin gaie awiia apitchi songendang tchi ojindang kakina batadowinan, awashime gaie minwendang tchi nissind, iw dash tchi bata-ijiwebisid ondjita, mi aw saiagiad Kije-Maniton *kakina o tchitchagong*. — Kishpin gaie mikwenimad mojag Debendjigenidjin, tibishko sa go wabamad, mi dash bekish inendang : Kawin nin wi-matchi ikitossi, kawin gaie nin wi matchi dodansi, nin nondag sa Debendjiged, nin wabamig gaie ; mi aw saiagiad Kije-Maniton *kakina od inendamowining*. — Kishpin dash enamiad apitchi mashkawendang tchi mino ijiiwebisid ; apegish mino ijiiwebisiàn, mojag inendang, bekish gaie geget ojindang maianadak minik ejи-gashkitod ; mi aw saiagiad Kije-Maniton *kakina o mashkawisiwinning*.

Geget jawendagosí gwaiak saiagiad Kije-Maniton ! — Weweni, ninidjaniss, sagi, ki ga-kitchi-jawendagos. Ga-ininàн oma,

iji sagi; *win* gaie memindage ondji sagi, epitch kitchitwawendagosid, epitch gaie kitchi apitendagosid; bekish gaie sagi, mo-jag *jawenimik*. Kakina gego sa *win* ki minig. — Ow dash nanagatawendañ, we-weni tchi nissitotaman eji-jawenimik mo-jag Kije-Manito, mi dash ge-ondji-sagiad. — Kishpin apitchi bakadeian, kinidjanis-sag gaie bakadewad, awiia dash ki bi-jawenimig, ki bi-ashamig; geget ki ga-migwe-tchiwia; kishpin dash sasagwana iw do-dang bi-jawenimik, ki ga-sagia. — Kishpin gaie akosiian, kitchi wissagendaman, awiia dash bi-ija, ki bi-minaig wenijishing mash-kiki, pabige dash ki kitchi mino aia; geget ki ga-mamoiawama aw inini, ki ga-minwe-nima. — Gonima gaie ki gagibingwe, gonima ki gagibishe, awiia dash bi-ija, ki nondjimoig dash, tchi wabiian minawa, tchi nondaman gaie; geget enigokodeeian ki ga-mamoiawama aw inini ga-bi-kitchi-mino-dodok. — Gonima gaie kitchi nibiwa ki masinaige kitimagisiian, kawin ki gashkitossin tchi dibaigeian; ketchi-danid inini dash ki bi-jawenimig, ki bi-minig ge-ondji-dibaaman ki masinaigan, awashime gaie nibiwa ki minig; geget ki ga-migwetchi-wia, ki ga-sagia aw inini.

Awashime dash, ninidjaniss, Kije-Manito ki da-sagia, ki da-mamoiawama gaie. Win sa geget kid ashamig ; kawin naningotinong eta, mojag sa, endasso-gijigak, kid ashamig, kid agwiig gaie, kakina gego win geget ki minig. Kishpin mino aiaian, akosissiwan, win debendang bimadisiwin ki minig mino bimadisiwin ; kishpin dash naningotinong akosiwin minik, mi wendji-minik tchi jawendagosiian ; aking pangitchi kotagitoian, kaginig dash wedi gijigong tchi jawendagosiian. Win gaie Debendjiged misi gego ga-gijitod, ki gi-minig kishkinjigon, kitawagan, kidon, tchi wabiian, tchi nondaman, tchi nita-gigitoian ; win gaie mojag ki ganawenimig tchi bandidjitosiwan kishkinjigon, kitawagan, kakina gaie kiiaw ; win kaginig ki ganawenimig oma aking. Minik gaie endaniian, kakina win ki gi-minig ; kishpin dash nawatch nibiwa minigossig, apitchi mino dodam, ki jawenimig ; o kikendan sa kija, tchi mino inabadjitossiwan, o kikendan iw nawatch onijishing, pepangi eta tchi aiaian minik menesiian, iw dash tchi kitchi-daniian. — Kakina sa go gego Kije-Manito ki minig, ki kitchi jawenimig ; mi gaie iw ge - ondjisagiad enigokodeeian.

Kawin dash iw eta ki minigossi Kije-Manito, minik menesiian eji -owiiawiian. Awashime apitendagos i tchitchag, kiiaw dash epitendagwak. Memindage dash ki mino dodag Kije-Manito eji-otchitchagoian. — Nanagatawenda iw tchi nissitotaman. — Apitchi apitendagos i tchitchag, Kije-Maniton od inawan, inendamowin, nibwakwin gaie od aian, kaginig ta-bimadisi, kawin wi ka ta-nibossi. — Eji-nibossig wika Kije-Manito, mi go gaie ki tchitchag kawin nibossi. — Geget kitchi apitendagosiwag ki tchitchagonanig. — Kaginig dash gijigong tchi apitchi jawendagosiiang, mi gaondji-inenimad Kije-Manito ki tchitchagonanin kaginig tchi bimadisinid.

Minawa dash iw mikwendan ga-dodang Debeniminang Jesus, kinawind ondji ; gaiiji-kotagitod tchi nodjimo ad ki tchitchagonanin, tchi jawendagosiad gaie. Gweia-kossing anamiewin gaie ki gi-minig, geondji-jawendagosian kagigekamig. Kawin awiia gjigong ta-ijassi kagige minawani-gosiwining, kishpin gwaiak anamiassig. Kitchi nibiwa dash dassing midasswakosiwag bemadisidjig aking enamiassigog, kawin Jesus od anamiewigamigong gi-pindi-ganassiwag, kawin jawendagosiwini-mika-

nang gjigong enamog bimossessiwag, kawin wika gjigong ta-ijassiwag, ta-kitimagiwiwag kaginig. Kin dash ki gi-minigo gweiakossing anamiewin, katolik anamiewin, aiapitchi-kitchitwendagwak ijittwawin. Kitchi nibiwa gaie dassing midasswakosiwag bemadisidjig aking anotch metchi-ijiwebisidjig. Anawi anamiawag, kawin dash o babamendansinawa od anamiewiniwa, o webinanawa, o bapitonawa gaie anind. Kin dash ki jawenimig Debendjiged, ki ganawenimig anamiewining, ki ganawenimig od anamiewigamigong, wendjanissingin geget mojag ki jawenimig. Anisha sa ki jawenimig Kije-Manito; kawin awashime kin kid apitendagosissi, anind bemadisidjig aking epitendagosiwad; anisha ki jawenimig, ki sagiig Debendjiged.

Kishpin kakina iw, ninidjaniss, weweni nanagatawendaman, enigokodeeian ki gamamoiaawama Debeniminang Kije-Manito, apitchi gaie ki ga-sagia. — Nijwaiagad sa iw ge-ondji-sagiad Kije-Manito; mi sa nitam ge-ondji-sagiad, apitchi sagiigosid, apitchi gaie win apitendago-i, apitchi gaie mino ijiwebisi, kakina mino ijiwebisiwin od apitchi aian; mi nitam ge-ondji-sagiad. Minawa dash ki da-sagia epitch kijewadisid,

epitch jawenimik mojag eji-owiiawiiian, eji-otchitchagoian gaie ; oma aking kaginiig ki jawenimig, kakina gego ki minig ; bekish gaie kid inenimig, kaginig gjigong tchi jawendagosian, tchi apitchi mino aiaian gi-ishkwa-kitimagisian áking ; mi iw gaie ge-ondji-sagiad enigokodeeian Debенимик ki Kije-Manitom.

Geget Kije-Manito apitchi apitendagosi, apitchi gaie kijewadisi ; mi sa enamiad ge-ondji-sagiad Kije-Maniton. — Kitchi kashkendagwad dash ejiwebak. Kawin gwetch awiia enamiad weweni o sagiassin. — Anawi ikito enamiadjin : Kije-Manito nosse, ki sagiin enigokodeeiàn. — Kishpin gaie gagwedjimind enamiad : Ki sagia na Kije-Manito ? — Nin sagia sa ; ta-ikito pabige. — Anind dash eta debwewag iw ikitowad. Kitchi nibiwa dash enamiadjig kawin geget o sagiassiwawan Kije-Maniton. — Nanagatwendan iw, ninidjaniss. Kitchi kashkendagwad.

Kishpin awiia geget sagiad Kije-Maniton, enendagosid sa enamiad tchi sagiad, od apitchi niganeniman ; kawin gego awashime o sagitossin, kawin gaie gego awashime od apitendansin, eji-sagiad, epitenimad gaie Kije-Maniton ; awashime gaie

segendam tchi waniad Kije-Maniton, kakina dash bakan tchi wanitod ; awashime da-minwendam, kakina od inodewisiwin, kakina sa go gego, potch gaie o bimadisiwin tchi wanitod, iw dash tchi bata-ijiwebisid ondjita, mi dash tchi wanitod Kije-Manito o jawendjigewin, Kije-Maniton sa tchi waniad. — Anin dash enamiadjig ej\webisiwad iko ? Mi na iw ej\webisiwad ga-ikitoian oma ? Kawin. Anind eta. Kitchi nibiwa dash, pangi gego od ondji waniawan Kije-Maniton, kitchi batadowining pangishinowad. — Matchi minawani-gosiwin awiia o sagiton, bishigwadisiwin, nimiidiwin, minikweshkiwin, atadiwin ; kitchi batadowining daji-bimadisi ; o gi-waniton Kije-Manito o jawendjigewin, Kije-Maniton o gi-naganan. — Anin dash ej\sagiad ? Kitchi giwanimo ikitod : Nin sagia. — Bakan gaie matchi ijiwebisiwinning awiia daji-bimadisi, gonima gimo-dishki, dajingeshki, jingendjige gaie, anotch sa go matchi ijiwebisiwin od aian, kawin dash o wikwatchitossin tchi bonitod ; minotch dash ta-ikito : Nin sagia Kije-Manito. — Kawin debwessi.

Kishpin awiia weweni sagiad Kije-Maniton, enigokodeed o kitchitwaweniman ; we-

weni gaie anamia, o kitchi minwendan anamiewin, o minwendan anamie-gagikwewin, o sagiton anamiewigamig. Apitchi gaie inendam: A pegish kakina enamiadjig kitchitwáwenimawad Kije-Maniton, weweni anamiawad, anokitawawad Debendjigenidjin. Bekish gaie dodam minik ejí-gashkitod ge-ondji-kitchitwawenimind Kije-Manito. Minwendam kikinoamawad widj' anishinaben anamiewin; o mino ganawenimán onidjanissan, anamiewining od iji nitawigian. Memindage o mino ganawendant, o manadjiton gaie anamiegijigad, mi sa Kije-Manito o gjigadom. — Mi na iw ejíwebisiwad enamiadjig? — Anind sa. Kitchi nibiwa dash kawin weweni anamiassiwag, kawin gaie minwendansiwag anamiewin wi-kikinoamawawad widj' anishinabewan; kawin gaie Debeniminang o gjigadom weweni o ganwendansinawa. — Kawin sa gwaiak Kije-Maniton o sagiassiwawan.

Kishpin awiia weweni sagiad Kije-Maniton, kitchi kashkendam wabamad baiataijiwebisiridjin, ejí nishkiawad Kije-Maniton ejí-matchi-dodamowad gaie. Mi sa kitchitwa Paul ga-ondji-ikitod: "Nin tchagis, kishpin awiia matchi dodang." — Ta-

nassag gi-wissagakiso gi-wabamad baiata-  
ijiwebisinidjin, ga-apitch-sagiad Kije - Ma-  
niton. Kishpin awiia geget sagiad, kitchi  
kashkendam wabandang gego maianada-  
dining, gonima gaie nondang matchi gjewe-  
win. Nibiwa dash enamiadjig kawin o  
babamendansinawa gawaiako - bimadisiwin,  
kawin gaie o babamendansinawa tchi ginaa-  
magewad gego maianadak ; awashime  
gaie o manadjiawan bemadisinidjin aking,  
Kije-Maniton dash. Kishpin maianadadi-  
ning gego nondamowad, gonima matchi  
dajindiwin, kawin ginaamagessiwag ; potch  
dajingewag gaie winawa ej-nondawawad  
dejingenidjin ; gonima gaie beshigwadadi-  
ning gego nondamowad, bapiwag, gonima  
gaie winawa nassab ikitowag. Kawin gaie  
maianadading o jingendansinawa tchi wa-  
bandamowad ; ondjita o wissokawawan  
metchi-ijiwebisinidjin ; sasagwana dash o  
wabandanawa bata-dodamowin, o nonda-  
nawa gaie bata-gijewin. — Kishpin awiia  
iw ijiwebisid. kawin geget o sagiassiu Kije-  
Maniton, missawa ikitod : Nin sagia.

Kitchi nibiwa enamiadjig awashime o  
sagitonawa oma aking endagog, ej-sagia-  
wad Kije-Maniton ; awashime gaie segisi-

wag:tchi wanitowad, pangı gego daniwin aking, iw dash Kije-Manito o jawendjigewin tchi wanitowad, mi sa Kije-Maniton tchi waniawad. Waiesindisowag geget, kawin kikenindisossiwag ejiwebisiwad; kawin sa nanagatawenindisossiwag. — Weweni dash kin, ninidjaniss, nanagatawenindison, weweni wi-kikenindison. Memindage dash gaie wi-kikenindison eji-sagiad Kije-Manito; gonima kawin gwaiak ki sagiassi, nanagatawenindison. Wikwatchiton dash, gwaiak tchi sagiad, win igo gaiji-kikinoamonang tchi sagiang, gi-ikitod : “Debendjiged ki Kije-Manitom ki ga-sagia kakina kideing, kakina gaie ki tchitchagong, kakina gaie kid inendamowining, kakina gaie ki mashkawisiwining.” Ki ga-kitchi-jawendagos geget, kaginig gaie ki ga-jawendagos, kishpin wikwatchitoian weweni tchi sagiad Debeniminang Kije-Manito, megwa bimadisiian aking.

**GIJENDAMOWINAN.**

1. Nin gjendam, enigokodeeiān tchi sagiag Kije-Manito. Binish nongom kawin weweni nin gi-sagiassi; nin kikenindis, weweni gi-sagiassiwag. Nongom dash nin

mashkawendam, gawaiak tchi wi-sagiag mojag, binish tchi ishkwa-bimadisiiān aking; ga-iji-kikinoamonang sa Jesus tchi sagiang, nin wi-sagia.

2. Nin gjendam, nijing tchi ondji sagia Kije-Manito; nitam sa nin wi-ondjisagia, apitchi kitchitwawendagosid, apitchi gaie apitendagosid; minawa dash nin wi-ondji-sagia, apitchi kijewadisid, kakina gego win nin minig, kaginig nin jawenimig aiano-apitendagosissiwān, nind inenimig dash gaie, wedi gjigong kaginig tchi apitchi jawendagosiiān od ogimawiwining.

3. Nin gjendam dash gaie tchi wikkwachitoiān mojag tchi gashkiag awiia tchi sagiad, tchi anokitawad Kije-Maniton; minik dash eji-gashkitoiān nin wi-ginaamawag bemadisidjig tchi bata-ijiwesissigwa, tchi nishkias igwa Kije-Maniton.

#### ANAMIEWIN.

Jesus Debenimiian, widokawishin tchi iji sagiinan mojag, ga-iji-kikinoamawiiian tchi sagiinan, kakina nin deing, kakina nin tchitchagong, kakina nind inendamowining, kakina gaie nin mashkawisiwinning. Kawin dash ganage pangī gego nin nijike

nin gashkitossin; anin dash ged-iji-gash-  
kitoian weweni tchi sagiinan widokawissi-  
wan? Mi wendji-pagosseniminan, Jesus  
nosse, widokawishin, andjiton ninde, mi-  
nodeeishin, enigokodeeiān tchi sagiinan.  
Kawin nin de-apitendagosissi tchi sagiinan,  
kawin ganage tchi mikweniminan. Nin  
kitchi kitimagis, sasagwana gi-matchi-do-  
damān, gi-nishkiinan; nin kitimagis geget.  
Nin kitimasisiwing dash kid ondji-ga-  
nonin pagosseniminan tchi jawenimiian,  
tchi kitimagenimiian, mi dash tchi mijiian  
gwaiakwendamowin, weweni mojag tchi  
mikweniminan, enigokodeeiān gaie tchi sa-  
giinan.



31. *Apegish ijiwebisiiang, Kije-Manito ej-i-minwendang.*

YEWENI tchi sagiad Kije-Manito, mo-jag mashkawendan, kakina gego tchi dodaman ej-i-minwendang Debeniminang. Mikwendan ekitoian anamiaian : “*Enendaman apegish ijiwebak.*” Apegish dodaman ej-i-minwendang Kije-Manito; mi mo-jag ged-inendaman. Kishpin enamiad wikwatchitod mojag tchi dodang ej-i-minwendang Kije-Manito, geget jawendagos, kaginig gaie gjigong ta-jawendagos; gi-ikito sa Jesus : “Kawin kakina, Debendjigeian, Debendjigeian, ejidjig, gjigong taijassiwag; mi eta aw endodang, Noss gjigong ebid ej-i minwendang, mi aw gjigong ged-ijad.” — Mi, ninidjaniss, gaie kin ged-ijiwebisiian. Mojag inendan: Ape-gish kakina ijiwebak, Kije-Manito enendang; bekish gaie mashkawendan tchi dodaman mojag ej-i-minwendang; minwendan gaie tchi kotagitoian oma aking minik win enenimik tchi kotagitoian. Mi dash ow ge-dodaman :

1. *Pagidenindison* Kije-Manito onindjing, Jesus ga-dodang megwa gi-bimadi-

sid aking ; apitchi dash niganendan iw : Apegish kakina ijiwebak, Kije-Manito endang. Kishpin enamiad iw inendang, geget bisan bimadisi oma aking, kawin segisissi, kawin gego o gotansin, od apenimonan Kije-Maniton ; mojag gaie o mi-gwetchiweniman minik endigid.

2. Bekish dash gaie, ninidjaniss, mash-kawendan tchi *dodaman* eji minwendang Debeniminang Kije-Manito. Kishpin eta kideing inendaman : Apegish ijiwebak endang Kije-Manito ; kawin iw da-debis-sessinon ; bekish sa go wikkwatchiton, apine tchi ijiwebisiiian, Debeniminang eji-minwendang. Kishpin gego kikendaman tchi manadak, kego iw dodangen ; awashime minwendan tchi niboian, iw dash ondjita tchi dodaman gego maianadak. Kishpin dash kikendaman gego tchi onijiishing, mi iw ge-dodaman mojag, missawa sanagak ; awashime dash ki ga-sagiig Kije-Manito, kishpin senagak gego dodaman wi ondji, tchi minwendang.

3. Minwendan gaie tchi *kotagitoian* minik Kije-Manito enenimik tchi aiaian kota-gitowin aking. Ketchitwawendagosidjig nongom gjigong ebidjig apitchi weweni o

gi-odapinanawa kotagitowin, gi-inendamowad : Debeniminang Kije - Manito kid in-enimigonan tchi kotagitoiang, mi weweni ge-ondji-odapinamang minik kotagitowin manigoiang. — Mi go gaie kin mojag ged-inendaman ; kawin dash ki ga-kitimagisissi, ki ga-jawendagos missawa kotagitoian.

Memindage dash Kije - Manito inendam, kakina anishinabeg tchi apitchi jawenda-gosiwad, gijigong tchi ijawad gi-ishkwa-bimadisiwad aking. Kishtpin dash enamiad sagiad Kije-Maniton, mashkawendang dash: Apegish ijiwebak eji-minwendang Kije-Manito, kitchi inendam gaie win, geget tchi ijawad gijigong, kaginig wedi tchi jawenda-gosiwad; minik dash eji-gashkitod dodam gaie win, tchi jawenda-gosiad widj' anishinaben. — Mi iw, ninidjaniss, ge-wi-kwatchitoian gaie kin minik eji-gashkitoian. Kishtpin weweni sagiad Kije-Manito, sagiad gaie kidj' anishinabe, gaié dash weweni nissitotaman epitendagosiwad ki tchitchaganig wika ge-nibossigog, geget ki ga-kitchi-wikwatchiton tchi widokawad awiia gijigong tchi ijad. Ki ga-kitchi-jawenda-gos dash, kin igo ki ga-mino-dodas, kishtpin gashkiad awiia, widokawad gaie, gijigong tchi ijad. Memindage enamiassigog ki

da-jawenimag; ki da-wikwatchiton dash, awiia tchi gashkiad tchi anamiad weweni, mi dash gaie win gjigong tchi ijad ningot-ing. — Ki ga-windamon dash ge-dodaman tchi gashkiad awiia.

1. Anamian pagossenim Kije-Manito tchi jawenimad baiata-ijiwebisinidjin; memindage dash anishinaben enamiassinigon tchi jawenimad tchi pindiganad od anamiewigamigong. Apitchi geget kitimagisiwag enamiassigog. Kawin Kije-Maniton o kikenimassiwawan, kawin gaie wenijishing gego o kikendansinawa, kitchi wassa geget wanishinog, kawin jawendagosiwini-mikanang gjigong enamog bimossessiwag, o gkishkanawan gaie kakina o batadowinan, kawin wika gego mashi o webinansinawa; kishpin dash nibowad ejii-aiawad, kawin wika gjigong kagige minawanigōsiwining ta-pindigessiwag, anamakamig sa ta-kitimagisiwag kaginig. — Enigokodeeian, nindjaniss, kitimagenim enamiassigog kidj' anishinabeg, gaganodamaw dash endassogjigak, pagossinim Kije-Manito tchi jawenimad, tchi minad mino inendamowin tchi odapinamowad anamiewin. Ketchitwawendagosidjig gjigong ebidjig, megwa gibimadisiwad aking, o gi-kitchi-gaganoda-

mawawan mojag enamiassinigon, baiata-ijiwebisinidjin gaie; gi-mawiwag ga-iji-kashkendamowad, gi-nanagatawendamowad ijiwebisiwad kitchi nibiwa bemadisidjig aking, bata-ijiwebisiwad, gonima gaie anamiassigwa. Gaie kin dash kitimage-nim mojag gaie gaganodamaw.

2. Kawin dash iw da-dēbisessonon, tchi gaganodamawadwa eta enamiassigog; be-kish gaie ganoj awiia enamiassig anishinabe, windamaw eji-jawendagosiwad enamiadjig gi-ishkwa-bimadisiwad aking, eji-mino-aiawad gijigong kagige minawanigosiwining; enamiassigog dash kitimagisiwag wedi, animisiwag, kaginig gaie ta-animisiwag, kawin wika gijigong ta-ijassiwag. Wikwattchiton tchi nissitotamonad enamiassig ejikitimagisid. Kikinoamaw dash gaie, kishpin minwendang tchi pisindang anamie-dibadjimowin. Kikinoama.w anamiewin, windamaw gaie ejiwehisid Debeniminang Kije-Manto, ejiwebak gaie katolik ijitwawin; weweni windamaw ged-iji-nissitotang. Kego kitimiken tchi kikinoamawad awiia anamiewin; ki kitchi mino dodam sa iw dodaman; kishpin dash kitimiian, ki kitchi matchi dodam; kawin ki sagiassi Kije-Manito, kawin gaie kidj' anishinabe

weweni ki sagiassi, kawin ki wi-mino-dodawassi. Apitchi sa ki mino dodawa awiia kikinoamawad anamiewin; memindage dash gashkiad awiia tchi anamiad, ki kitchi mino dodawa, ki kitchi minwenda-mia Kije-Manito. Ki ga-jawendagos gjigong iw ondji. Kakina anishinabeg enamiassigog ki da-inenimag: Apegish anamia-wad, gjigong kaginig tchi jawendagosiwad. Memindage dash kid inawemaganag ki da-jawenimag, ki da-wikwatchiag tchi ana-miawad, gaie winawa tchi jawendagosiwad gjigong.

3. Memindage dash mino ijiwebisin, gwaiak ganawendant kid anamiewin, kish-pin inendaman tchi gashkiadwa enamias-sigog tchi anamiawad, gonima gaie baiata-ijiwebisidjig tchi anwenindisowad. Kish-pin matchi ijiwebisiian gaie kin, dodansi-wan eji-gagikimigoian anamiewigamigong, kawin awiia ki ga-babamitagossi kishpin ganonad, anamiewin ondji. Kitchi kash-kendagwad geget ejiwebisiwad nibiwa enamiadjig, kawin gwaiak o ganawendansi-nawa od anamiewiniwa, kawin dodansiwag enendagosiwad enamiadjig tchi dodamo-wad, eji-ginaamawindwa sa mi endodamo-wad. Mi dash awiia iw wendji-anamias-

sig; ikito sa: Wegonen ge-ondji-anami-aiān? Mino ijiwebiwag nange enamiadjig. — Kishpin kakina enamiadjig gawaiak iji-webisiwad, kitchi nibiwa enamiassigog da-anamiawag; o da-sagitonawa sa anamie-win, o da-missawendanawa gaie; da-inendamog sa: Apegish gaie nin anamiaiān, tchi mino ijiwebisiiān, enamiadjig ejiwебisiwad. — Mi mojag ga-ijiwebak, keiabi dash ijiwebad; enamiadjig matchi ijiwebisiwad, mi sa nibiwa enamiassigog wendji-odapinansigwa anamiewin. Kitcheitwa François Xavier, ga-gashkiad kitchi nibiwa enamiassinigon gi-anamiawad, sasagwana gi-ikito: Awashime nibiwa enamiassigog da-anamiawag oma endanakidjig, kishpin winawa enamiadjig gawaiak ijiwebisiwad. Epitch dash matchi ijiwebisiwad oma enamiadjig, mi nibiwa enamiassigog wendji-odapinansigwa anamiewin; osam sa matchi kikinoamawawag. — Mi ga-ikitod aw ketchitwawendagosid inini, mi dash keiabi iw ekitowad kakina mekate-wikwanaieg beba-gagikimadjig anishinaben. Mi dash wendji-ininan, ninidjaniss; kin nitam wikwatchiton, gawaiak tchi iji bimadisiian oma aking, ej - minwendang Kije-Manito, enendagosid sa enamiad tchi

iji bimadisid ; bekish dash gaie ganoj awiia enamiassig tchi anamiad, kikinoamaw gaie anamiewin, gagano~~d~~amaw gaie endasso-gijigak. Eniweg dash awiia ki ga-gashkia tchi anamiad; ki ga-kitchi-jawenima dash; kitchi mino dodamowin ki gad-aian; ikito sa bejig nibwakawinini: "*Kitchi dodumowin geget mamandadodamowin ; awashime dash kitchi dodamowin iw, awiia gashkiad enamiassinigon tchi anamianid.*" — W-watchiton, ninidjaniss, gaie kin tchi gashkiad awiia tchi anamiad; ki ga-kitchi-minwendamia Kije-Manito, kidj' anishinabe dash ki ga-jawendagosia. Kishpin geget sagiad Kije-Manito, kidj' anishinabe gaie; kishpin gaie geget inendaman : Apegish ijiwebak kakina, Kije-Manito ej-i-minwendang, mi gwaiak tchi w<sup>i</sup>kwatchiad awiia enamiassig mashi tchi anamiad.

Geget kitchi jawendagosи enamiad meno-ijiwebisid. Win igo jawendagosи, gaie dash widj' anishinaben o jawendagosian. Apine sa tanassag gagikwe aw meno-ijiwebisid; endodang sa, ejiwebisid gaie, mi ima wendji-mino-kikinoamawad widj' anishinaben. Mi sa Jesus ga-dodang mojag. Kawin od ikitowin eta o gi-aiossin gi-kikinoamonang, mi go gaie o dodamowin, od iji-

webisiwin, ga-aiod. Mi tibishko gaie enamiad gwaiak ejiwebisid o dodamowin od aion gagikimad widj' anishinaben; nibiwa dash o gashkian anwenindisowad, mi dash Kije-Maniton anokitawawad. Mi ga-ondjiiikitod Jesus: "Gwaiak ijiwebisig, mino dodamog, tchi wabandamowad bemadisidjig ki mino dodamowiniwan, mi dash tchi kitchitwawenimawad kossiwan gjigong ebinidjin." — Mojag dash gaie kin wikitchehiton tchi mino ijiwebisiian, tchi apitchi ojindaman dash kakina maianadak. Kishpin gwaiak ijiwebisiian, ki wabandaiwe sagiad Kije-Manito, kitchitwaweninad gaie; kidj' anishinabe gaie ki mino kikinoamawa, ki jawendagosia, mi dash gaie kin tchi jawendagosia kaginig gjigong.

Kishpin dash matchi ijiwebisiian, ki kitchi kitimagis, kin igo ki kitimagiidis; kawin ki sagiassi Kije-Manito, ki matchi dodawag gaie kidj' anishinabeg, ki matchi kikinoamawag, ki matchi dodamoag gaie. Memindage kitimagiidiso awiia metchidodamoad widj' anishinaben; gi-ikito sa Jesus: "Nawatch da-onijishin tchi bako-biwebinind awiia kitchigaming, iw dash tchi matchi dodamoad widj' anishinaben." — Kishpin enamiad gwaiak sagiad Kije-Ma-

niton, widj'anishinaben gaie weweni sagiad, kitchi mino ganawenindiso, wika gego tchi dodansig, ge-ondji-matchi-kikinoamawad widj'anishinaben.

Kitchitwa Paul gi-apitchi-mino-ganawenindiso, wika ganage pangtchi matchi kikinoamawassig widj'anishinaben. Ow gaie gi-ikito: "Kishpin kikendamān, awiia enamiad tchi matchi inenimid midjīān wiiass, kawin wika nin da-midjissin, tchi matchi inenimissig nidji-bimadisi." — Mi go gaie kin, ninidjaniss, ged-inendaman. Apitchi mino ganawenindison, wika gego ondjita tchi dodansiwan, ge-ondji-matchi-inendang awiia, ge-ondji-matchi-ijiwebisid gaie. Kishpin dash *mino-doduman*, awiia dash minwendansig, mi dash matchi inendang, matchi ikitod, matchi dodang gaie, win eta od aian batadowin, kawin kin; mino dodamowin kin kid aian; kego gaie inendangen tchi bonitoian mino dodamowin, awiia tchi matchi ikitossig; kego iw inendangen. Mojag sa kin mino dodan; kishpin dash awiia matchi dodang iw ondji, matchi ikitod gaie, kego babamenimaken; pabige mikwenim Jesus, ga-iji-matchi-inind, ga-iji-matchi-dodawind gaie, gi-mino-dodang; kawin dash o gi-bonitossin mino

dodamowin binish gi-nissind gi-jingenimind, o mino ijiwebisiwin ondji.

Eji-wikwatchitoian dash tchi matchi dodansiwan wika, tchi matchi kikinoamawasiwadwa kidj' anishinabeg, tchi matchi dodamoassiawadwa; mi tibishko gaie ge-wikwatchitoian tchi ginaamawadwa kidj' anishinabeg tchi matchi dodansigwa; memindage kid inawemaganag ki da-mino ganawenimag, minik eji-gashkitoian. — Ta-kitchi-animisi geget dibakonige-gijigak aw metchi-dodamoad widj' anishinaben, ta-kitchi-wissagakiso kagigekamig anamakamig. Kishpin awiia matchi dodamoad bemadisinidjin, tibishko dodam, matchi manito ga-dodang waieshkat, endodang gaie keiabi. Win sa matchi manito o gi-bi-matchi-dodamoan nitam anishinaben kitchi kitiganing; keiabi dash nongom mojag ki wi-minigonan matchi inendamowin, matchi ijiwebisiwin gaie. Tibishko gaie dodam aw metchi-ijiwebisid, metchi-kikinoamawad widj' anishinaben eji-matchi-ijiwebisid. Mi dash gaie tibishko tchi danakisod anamakamig, kishpin weweni anwenindisossig, andjitossig gaie o bimadisiwin. — Kawin dash iji debisessonon tchi anwenindisod aw ga-matchi-dodamoad widj'

anishinaben, tchi bonitod gaie eta o matchi ijiwebisiwin, bekish gaie o ga-nanaiton ga-matchi-dodang ; memindage sa weweni ta-mino-ijiwebisi, tchi mino kikinoamawad meshkwat iniw ga-matchi-kikinoamawad, ga-matchi-dodamoad gaie; kishpin gaie iji gashkitod o ga-ganonan iniw metchi-ijiwebisinidjin, o ga-wikwatchian tchi mino ijiwebisiad ; gaie dash o ga-gaganodaman mojag endasso-gijigadinig kakina iniw ga-matchi-kikinoamawad megwa gi-matchi-ijiwebisid.

**GIJENDAMOWINAN.**

1. Mojag nin wi-ijiwebis, Kije-Manito ejii-minwendang. Kishpin gaie ningot endiiàn, kotagitoiàñ gaie, pabige nin wi-inendam : Kije-Manito nind inenimig tchi iji kotagitoiàñ ; mano enendang Debendjiged ta-ijiwebad. Endasso-gijigak sa nind ikit anamiaiàñ : “Enendaman apegish ijiwebak, tibishko gijigong, mi go gaie aking”; mi dash iw geget mojag ge-wikwatchitoiàñ.

2. Nin gjendam, minik ejii-gashkitoiàñ mojag tchi wikwatchitoiàñ tchi mino iji webisiag awiia, tchi jawendagosiaq. Ki-

timagisi sa metchi-ijiwebisid; apitchi dash jawendagosi meno - ijiwebisid. Weweni dash nin wi-ganawenindis, wika awiia tchi matchi kikinoamawassiwag. Nin gossa Kije-Manito, nin ga-dibakonig ningoting. Kishpin matchi ijiwebisiiān, mi dash matchi kikinoamawag awiia, nin bata-dodamoa; mi dash nin ge-ondji-gagwedjimid Kije-Manito dibakonige-gijigak, minik geomatchi-dodang aw ge-gi-matchi-kikinoamawag.

#### ANAMIEWIN.

Jesus Debenimiian, ga-iji-kikinoamawian tchi ikitoiān anamiaiān endasso-gijigak: "Enendaman apegish ijiwebak"; kid iji pagosserimin widokawishin, mashkawendamiishin, kaginig tchi ijiwebisiiān eji-minwendaman. Memindage dash ki pagosserimin tchi ganawenimiian, wika tchi matchi ijiwebisissiwān. Kishpin matchi ijiwebisiiān, kin ki matchi dodon, kin nishkiin, gaie dash nin igo nin matchi dodas, apitchi geget nin kitimagiidis, bekish gaie nidj' anishinabeg nin matchi dodawag,

matchi kikinoamawagwa. Apegish wika  
matchi ijiwebisissiwàn! Jesus nosse, jayne-  
nimishin, widokawishin, mojag gwaiak tchi  
ijiwebisiiàn ejì-minwendaman.



32. *Kija ojitala, weweni tchi niboiang.*

PITCHI gwaiak ki kikendamin, ningogting tchi niboiang. Mi dash iw eta kekendamang. Kawin dash ki kikendansi-min api ge-nibowangen, gaie dash ge-daji-nibowangen, kawin bapish ki kikendansi-min. Gi-bata-ijiwebisiwad nitam anishinabeg kitchi kitiganing, mi kakina wendjiniboiang. — Nanagatawenda iw, ninidjaniss. — Kawin ki kikendansin api ge-nibowanen, gonima waiba, gonima panima kitchi wika. Mi tibishko gaie kawin ki kikendansin ge-daji-nibowanen, gonima endaian, gonima gaie megwa babainadisiian. Iw dash gaie, sesika tchi niboian, gonima gaie nakawe tchi akosiiian, kawin gaie iw ki kikendansin. — Iwapi ki ga-nagadan aki, bekish dash gaie kakina oma aking endagog ki ga-nagadan, kakina gaie saia-giadzig gaie kakina saiagiikig ki ga-naganag ; mi eta ki dodamowinan, mino dodamowinan, gonima gaie matchi dodamowinan, ki ga-madjidonan. — Ninidjaniss, nanagatawenda iw !

Ondjita sa Debeniminang Kije-Manito ki kadagonan iw api ge-niboiang ; win eta

misi gego kekendang o kikendan iw ; bemadisidjig dash aking kawin awiia o kikendansin api ge-ishkwa-bimadisigwen. Mi wendji-kadonang Debendjiged, mojag *wejitangin* tchi bimadisiang. Mi dash geget endodang nebwakad enamiad. Mojag inendam : Gonima waiba, gonima nongom, nin gad-ishkwa-bimadis. Bekish ojita ; mi dash wejtingin mojag iji bimadisi.

Mi iw, ninidjaniss, gaie kin ged-ijiwebisian. Endasso-gijigak inendan : Gonima nongom gjigak nin ga-nib. Bekish dash anwenindison minik ga-matchi-dodaman binish nongom ; jingendan kakina batadowinan, apitchi gaie mashkawandan tchi bata-ijiwebisissiwan ; kishpin dash kikenimad awiia tchi matchi inenimik, nasikaw, mino ganoj, gagwedjim dash tchi webinamok kakina, gaie kin dash webinamaw kakina matchi inendamowin ; kishpin gaie mikwendaman gego tchi gi-gimodimad awiia, pabige nanaiton iw ki matchi dodamowin, neiab mij minik ga-gimodimad. Kakina sa go gego minik mekwendaman, ge-ondji-mino-nibossiwan, kakina pabige nanaiton, webinan. Kego gaie wika ginwenj gigishkangen batadowin Kishpin kikenindisoian gi-matchi-dodaman. gi-bata-

ijiwebisiian, pabige anwenindison ki teing, gaie dash nasikaw mekatekwanaie, weweni webinigen, tchi gassiamagoian ki batadowinan. Apitchi dash ganawenindison, tchi matchi inendansiwan, tchi matchi ikitossiwan, tchi matchi dodansiwan gaie kabe-gijig; minik gaie eji-gashkitoian weweni anamian, weweni gaie dodan kakina, enendagosian tchi dodaman gaie kin. — Kis'ipin iw ijiwebisiian, gwaiak wejitanig ki gad-iji-bimadis; kawin dash ki ga-matchi-nibossi, missawa gaie apitchi sesika niboian.

Ki gotan na nibowin, ninidjaniss? — Kis'ipin ijiwebisissiwan eji-gagikimind enamiad tchi ijiwebisid, ki da-gotan geget; kawin sa ki da-mino-nibossi. Kis'ipin dash mojac wikwatchitoian, gwaiak tchi ijiwebisiian, tchi dodaman eji-kikinoamagoian pesindamanin anamie-gagikwewin; kis'ipin gaie kikenindisoian tchi gigishkansiwan kitchi batadowin, kawin **ki da-gotansin**; ki da-mino-nib sa.

Tchi gotansiwan dash tchi niboian, weweni ojitan megwa mino bimadisiian; gedako-bimadisiian mojac ojitan, ningoting tchi mino niboian; ijitechigen sa, kitchitwa Paul ga-ijitchiged, mi dash ga-ondji-ikitod:

“*Endasso-gijigak nin nib* ;” mi sa, endasso-gijigak nind ojita tchi mino niboiān, inendamān : Gonima nongom gijigak nin ga-nib.— Bejig ketchitwawendagosid inini nimidana dasso bibon pagwadakamig .gi-bimadisi, gi-kitchi-kotagiidisod ; api dash wa-ishkwa-bimadisid, ow gi-ikito : Minik ga - bimadisiān pagwanakamig nimidana dasso bibon, mojag endasso-gijigak nin gi-ojita tchi mino niboiān. Mi dash geget gi-kitchi-mino-nibod ; nongom dash gijigong aia kagige jawendagosiwining. — Kitchitwa Antoine, pagwadakamig ga - bimadisid kitchi ginwenj kitchi kotagiidisowining, endasso gijigak gi-inendam, gi-ikito gaie : Mi sa nongom ganabatch ishkwatch wabandamān gijigad.

Mi iw, ninidjaniss, gaie kin mojag ged-inendaman. Apine wikkwatchiton, wejittangin tchi iji bimadisiian aking ; kakina dash webinan, kakina boniton, kakina andjiton, nanaiton gaie, ge-ondji-matchiniboian, kishpin iwapi gigishkaman api geniboian. Weweni ganawenindison, mojag wikkwatchiton tchi ganawendaman Kije-Manito o jawendjigewin, wika tchi wanitossiwan, mi sa, kitchi batadowin wika tchi gigishkansiwan. Apitchi sagi Kije-

Manito kossinan kejewadisid; enigoko-deeian sagi, bekish gaie goshi. — Ki-hpin Kije-Manito sagiad, gigishkaman o jawendjigewin api ge-niboian, ki ga-mino-nib, ki ga-jawendagos kaginig.

**GIJENDAMOWINAN.**

1. Nin gjendam tchi mikwendamān nibowin endasso-gijigak; weweni gaie tchi nanagatawendamān wendji - bimadisiān aking. Mi wendji-bimadisiān tchi niboian, tchi mino niboian dash, kaginig dash wedi tchi bimadisiān Kije-Manito od ogiñawining, tchi wabamag, tchi sagiag, tchi kitchitwawenimag kagigekamig.

2. Kawin dash anisha nin wi-mikwendansin nibowin, nin gjendam bekish, mojag weweni tchi ojitaliān tchi mino niboian ningoting. Minik ge-bimadisiān, nin wi-ojita éndasso-gijigak tchi mino niboian. Abiding eta nin ga-nib, kishpin dash iwapi matchi niboian, mi apine tchi animisiān kagigekamig; mi dash apine ge-ondji-oji-tiān tchi mino niboian, tchi jawendagosiiān gijigong. Minik dash ge-ondji-mino-niboian, nin wi-dodam, eji-gagikimigoian nin wi-ijiwebis, minik kekendamān tchi

mino-ijiwebak, nin wi-ijitchige, Jesus gaiji-kikinoamonang. Minik dash ge-ondjimatchi-niboiàn, minik kekendamàn tchi mitchi-ijiwebak, nin wi-apitchi-ojindan kaginig. Kije-Manito enigokodeeiàn nin wi-sagia, nin wi-anokitawa weweni; o jawendjigewin gaie mojac nin wi-ganawendan nindeing, wika tchi wanitossiwàn; o jawendjigewining tchi niboiàn, mi dash get tchi mino niboiàn.

ANAMIEWIN.

Kije-Manito Debenimiiàn, kin debendaman nin bimadisiwin, kin debendaman nibowin, kakina gego gaie, enigokodeeiàn nongom kid iji pagosseniimin tchi bonigide-tawiian minik ga-nishkiinan gi-bata-ijiwebisiiàn binish nongom. Enigokodeeiàn nind anwenindis, enigokodeeiàn gaie nin mashkawendam, weweni mojac tchi anokitonan, weweni gaie tchi sagiinan minik ge-bimadisiìàn aking. Widokawishin, nosse, gwaiak tchi dodamàn eji-gijendamàn non-gom. Ganawenimishin, Debenimiiàn, wika minawa tchi bata-ijiwebisissiwàn; gana-

wenimishin ki jawendjigewining mojag, ki  
jawendjigewining tchi dapineiān, mi dash  
tchi nasikonan wedi gijigong, kaginig wedi  
tchi wabaminan, tchi sagiinan gaie kagine-  
kamig.



Igiw ga-ojitetdjig mandan masinaigan, kawin kakina  
gego gwaiak o gi-atossinawa. Kishpin dash weweni  
wabañdaman, bekish gaie nanagatawendaman, ki ga-  
gashkiten tchi nanaiton, gwaiak dash tchi ikitoian. Pe-  
pangi dash ki wabandain oma, gwaiak ga-atossigwa.

Ima p. 16. l. 11. ojibiigade *gashkitoriän*; ki gad-ikit  
dash *gashkitoiän*.

Ima dash p. 34. l. 14. ojibiigade *kitimagiwin*; ki gad-  
ikit dash *kitimagisiwin*.

Ima dash p. 99. l. 23. ojibiigade *aw metchi-dajimind*;  
ki gad-ikit dash *aw metchi-dajimid*.

Ima dash p. 101, l. 1. ojibiigade *kotagisowin*; ki gad-  
ikit dash *kotagitowin*.

Ima dash p. 164. l. 16. ojibiigade *matchi inikwewin*; ki  
gad-ikit dash *matchi minikwewin*.

Ima dash p. 310. l. 4. ojibiigade *Waiesindisowag*; ki  
gad-ikit dash *Waiejindisowag*.

Kitchi nibiwa gaie bakan.

# INDEX.

	Page.
1. Wegonen wendji-aiaiān aking ? -	7
2. Kagige jawendagosiwin wikwa-tchitoda - - - - -	12
3. Apitchi kitchi apitendagwad ka-gige jawendagosiwin gjigong ; apitchi dash wikwatchitoda tchi minigoiang ; apitchi weweni ga-nawenimada ki tchitchagonanig	17
4. Apitchi anokida tchi gashkitama-soiang kagige jawendagosiwin gjigong, segisida tchi wanitoiang	22
5. Geget gagibadisi enamiad wikwa-tchitossig tchi gashkitod kagige jawendagosiwin gjigong endagog	29
6. Wenibik eta kid aiamin aking, kakina gaie aking endagog waiba ko ishkwa-aiamagad - - - - -	34
7. Awashime batadowin manadad, kakina dash bakan maianadak aking endagog - - - - -	39

## I N D E X.

Page.

8. Kije-Manito o kitchi jingendan batadowin, od apitchi kotagian gaie baiata-ijiwebisinidjin - - -	48
9. Apitchi inigaidiso baiata-ijiwebisid	55
10. Gotanda ki matchi ijiwebisiwini-nan gegishkamang; batadowinen-san gaie - - - - -	63
11. Kego enamiad ta-inendansi: Pani-ma nagatch nin gad-anwenindis	72
12. Jesus gi-kotagitod ki batadowi-ninanin ondji, mi ge-ondji-kiken-damang eji-manadak batadowin	85
13. Kego babamenimassidanig bema-disidjig ekitowad - - - - -	92
14. Weweni odapinanda kotagitowin	101
15. Nawatch onijishin kitimagisiwin, kitchi-daniwin dash - - - - -	116
16. Osam kitchi kitimagisiwin kawin onijishinsinon - - - - -	126
17. Enamiad ta-nita-jawendjige, ta-kijewadisi gaie - - - - -	133
18. Kitchi onijishin binideewin. Ki-tchi manedad giwashkwebiwin -	140
19. Kego ejiwebisissida ijiwebisiwad saiagitodjig eta oma aking endagog - - - - -	157
20. Weweni sagiada kakina kidj' ani-shinabenanig aking - - - - -	168

## I N D E X.

Page.

21.	Enamiad potch jangenimigodjin o ga-sagian - - - - -	176
22.	Ta - nanagatawenindiso enamiad wendji-dajimind. Kego win awiia o ga-dajimassin - - - - -	188
23.	Maminadisiwin kitchi manadad -	203
24.	Enamiad ta-anwenindiso, ta-kota- giidiso gaie - - - - -	215
25.	Enamiad kotagiidisowining o gad- odapinan kotagitowin aking en- dagog - - - - -	230
26.	Anamiewigamig mi Kije-Manito o wigiwam; mi sa katolik anamiewin tod enamiad - - - - -	242
27.	Bejigwan iw gweiakossing ana- miewin, mi sa katolik anamiewin	254
28.	Eji-debwetamang iji bimadisida mojag, memindage gaie apenimo- da Kije-Manito - - - - -	271
29.	Anamiada epitch apenimoiang Kije-Manito - - - - -	286
30.	Sagiada Kije-Manito - - - -	300
31.	Apegish ijiwebisiiang, Kije-Ma- nito ejii minwendang - - - -	313
32.	Kija ojitada, weweni tchi niboiang	327

